

काँशिरि लूकु कथु

Source: 'käshírí lükû kathû' (Vol: 4) in Persio-Kashmiri Script,
compiled by Nishat Ansari.

Published by: Jammu & Kashmir Academy of Art, Culture & Languages in 1988.

Rewritten in Devanagari-Kashmiri Script by M.K.Raina

Work Started: **10 November 2005.**

Work Completed: **02 February 2006 ~ Updated 29.03.2020**



M.K.Raina

सूची

- | | |
|--|---------------------|
| १. पछ | २. वागु भट |
| ३. दानत दार चूर | ४. पोज़ यार |
| ५. गुबी किताब | ६. लोल |
| ७. दरवेश तु सोदागर | ८. मनुट तु पांजुव |
| ९. बद खॉही | १०. ताँज्य बटुन कान |
| ११. तकदीर तु रोज़े अब्बल | १२. रंगर कूर |
| १३. दानाँयी | १४. तिलु क्राय |
| १५. दाना वँज़ीर | |
| १६. स्वनुहँर्य आब, सज़ु कुल तु कथु करवुन्य च़र | |
| १७. शेतान गंड | १८. बे अक्ल |
| १९. ठठु गोर | २०. दानत |
| २१. सबरुक ताकत | २२. गुह्य र्यूज |
| २३. तमहुक नँतीजु | २४. वोवुर |
| २५. आसमानस तीर लायुन | |
| २६. यस नु कांह तस ख्वदा | |
| २७. इस्मे आज़म | २८. पाकदामन |
| २९. पीर बहोदरुन्य च़ोट | ३०. नूरॉनी कबर |
| ३१. नेति बद | ३२. खर टांग |

पछ

दपान छि पथ कालि ओस ब्रह्मना अख स्यठहुय इबादथ गुज़ार। अयाल बॉरी सबब ओस न रादस वातान तु न होंजस। रातस ओस दयि संज इबादथ करान तु दूहस मोज़ूर्य मशकथ। यूताह पानु नेक तु नर्म मिज़ाज़ ओस, तीन्नाह ऑसुस ज़नानु तेज़ तु त्यलंग, येमि किन्स् स्व तस सख तंग ऑस करान। अख दूहा बन्योव सु गव कामि, अमा कुनि बनेयस नु कॉम। शामन वोत खूच्य खूच्य गरु वापस। येलि ज़नानि छैन्यव अथव सु वुछ, स्व द्रायस दूकरुन ह्यथ तु लेंजिस चस्तु वालनि। दोयिमि दूह द्राव बेयि मोज़ूर्य छांडनि, अमा अमि दूह ति पूर्योस नु ड्यकस। गरु येलि वोत, अति वुछिन शुर्य ब्वछि सूत्य छ्वरु छ्वरु करान। जिगरस गॉस यि वुछिथ कबाबु। करिहे ति क्याह? लेहाज़ा साँविन शुर्य फाकय फुकरय। पानस क्याह पेयिहेस नैदर? सोंचान छु ज़ि बगवानन छु वोनमुत ज़ि बु छुस शाम सपदनु ब्रोंह कनि तलु किस केमिस ताम रूज़ी सोज़ान। अगर यि किताबि मंज दर्ज छु तु अथ मंज पज़र छु, तेलि क्याज़ि लोग अज़ म्यान्यन अलाल खानन फाक? यि सोंचनु पतु वोथ थोद तु मुज़रुन किताब। अति वुछुन बिलकुल यी लीखिथ। दोपुन हा यि छु सरासर गलथ। यि कथ गॅयि जान किताबि मंजु च़टन्य। यि वॅनिथ तुलुन कलम तु त्रौवुन अथ छू। अमि पतु वोथ तु द्युतुन दराज़।

दोयिमि दूह सुबहन वोथ बेयि तु द्राव कॉम छांडनि। दूहस जुव चॅटिथ ज़ीनिन कॅच ताम पोंसु। तिमन ह्योतुन ऑट्य सेराह अख तु वोत गरु। अमा युथुय आंगुनस अंदर च़ाव, अति वुछुन बदलय आलमाह। प्रथ तरफ़ दिवय तु कामु दीव लोगमुत। गुमानु गोस ज़ि कोठ मा च़ाव कुनि व्वपर गरस मंज। मगर दरवाज़स प्यठ वुछिन पनुन्य आशेन्य असुवनि ह्वंजि तु ड्यक मुज़रिथ इस्तेकबालस प्रारान। येलि ब्रांदस प्यठ खोत, आशानि आपुरनस नाबद फोलाह तु असान असान वोनुनस अज़ च़ेज असि उमरि हुंज गटु तु व्यछ्य। चॉन्य अॅक्य यारन थॉव्य अॅस्य अबदुल आबाद तु हॉथी कॅरिथ। दय कॅरिनस उमरि बरकथ तु बेयि ऑसिनस रुमु रेश्युन आय। यि बूज़िथ प्यव ब्रह्मन सोंचस ज़ि अमा म्योन कुस याराह छु यूताह दारंदु। खबर कस ताम छु ब्रम गोमुत। नतु मा छु म्यानि गर वाजनि कांह स्यदु होल नावि वोलमुत। ब्रह्मन लोग आशानि पृछनि ज़ि ओस कुस सु शख्स? यि बूज़िथ वॅछ ज़नानु तस कुन 'ज़न नु किहिन्य ज़ानख। लाग कॅलिश डोल। यि ओस सुय यस च़े राथ कति ताम ज़्यव छ्य च़ॅटमुच़। बिचारस ओसुस रथ वसान। अखतुय वोनुनम ज़ि खानुदारस

वॅनिज़ि मे दियि यथ ज़ेवि टेब, युथ यि रथ हारुन बंद गछ्छयम।' सु वोथुस तोरु 'वन बकवास। मे कस छे ज्यव चॅटमुन्न। मे वन सोरुय कुसु जि ओस कुस तु नाव क्याह ओसुस ?

आशेन्य वॅछुस जि येलि च्चु सुबह वख्तु शहर कुन द्राख, च्चे पतय आव गुर्य वोलाह अख। गुरिस प्यठ ऑसुस ठेलु हॅना। दोपुन खानुदार कति छुय। बु वॅछुसस जि सु छु कामि गोमुत। तोरु दोपुन तेलि रॅट्यतव यि ठेलु। बु नेरु वापस। असि खोर ठेलु ह्योर तु फ्युर। तथ अंदर ऑस्य लाल, जवॉहिर तु म्वख्तु बेयि अशरफियु। ठेलु वापस मॅरिथ लॅगिस अॅस्य पृछनि 'च्चु कुस बा छुख तु यिम लाल जवॉहिर कति अॅनिथ ?' सु वोथ तोरु दर जवाब 'चॉनिस खानुदारस तु मे ऑस पानुवॅन्य दारुहोर। राथ शामन आसिहे नु त्वहि कॅह ति ख्यनु बापथ। तॅम्य वॅरनम खश्मु सान वुगरॉय। मे येलि नु पॅहरा कॅह वोनुस, सु वोथ तु चॅटनम ज्यव।' यी वनान वनान हॉवुन ज्यव। तथ ऑसिस ज़ु अड गॉमुत्य तु रथ ओसुस दिगनि वसान।

गाशुदारस तोरु यि बूज़िथ सोरुय फिकरीह तु पोत खोरी द्राव वापस। ज़नानि दोपुस च्चु कोत द्राख ? दोपुनस तस बिचारस दिमु ज़ेवि टेब। यी वनान वनान वोत अॅकिस तपु वनस मंज़ तु पतु आव नु ज़ांह ति गरु।

★ ★ ★

वागु भट

दपान महाभारतुक जंग ओस अंद वोतमुत तु पांडव ऑस्य बेयि मुल्कस मंज राजाह ताजाह करान । अकि दूह कोर पांडव राजु युधिष्ठिरन हस्तिनापोरुक्यन ऑलिमन तु बुजर्गन साल तु दावथ ख्यावनु पतु वोथ मेहमानन कुन जि महाभारतुक जंग ति ज्यून असि। सॉरिसुय मुल्कस प्यठ छे सॉन्य होकुमरॉनी। अमा मे वॅन्यतव मे क्याजि छु दिल परेशान तु दिलमलूल। जन तु छम दिलुच फुलय बरु गॉमुच। अख बुजर्गाह वोथुस जि महाराज, जंगस अंदर सपुद कत्तल व गारत। लछि बघन गरन अंदर गॅयि दुह्य छेतय। माजन हुंघ अँछ गाश आयि मारनु। महारेन्यन हुंघ माँजि नम गॅयि जायि। हस्तिनापोरुक्य कोच तु बाजर छि खून सुत्य बॅरिथ। तवय छे त्वहि बे-करॉरी। लेहाजा पजि त्वहि तिमन पापन हुंद तोबु करुन तु अमि खॉतरु गछि अश्वमीद यज्ञ करुन। यि बूजिथ गव यी करुन मशखस तु अख्तुय आयि कृष्ण जीयस ति शेछ करनु। अति वोथ सवाल जि अथ यज्ञस अंदर कुस परि वीदन हुंघ मंत्र तु कुस बनावोन चंद्र तारुख। अमि कामि बापथ गछि थदि पायुक ऑलिम तु बुजर्ग आसुन। यि कथ त्रॉवुख कृष्ण जीयस प्यठ तु आव तस निश पांडवन हुंद मँज्युम बोय भीम सोजनु जि सुय करि यि यज्ञ शरु। भीम द्राव यि शेछ ह्यथ तु वोत द्वारिका शहरस अंदर कृष्ण जीयस निश।

कृष्ण जीयन येलि यि बूज, सु वोथ भीमस कुन जि म्यानि खोतु छु थोद ऑलिम तु बुजर्ग वॅशीरि मंज वागु भट नावुक। तॅम्य सुंदे अथु शूबि अथ कामि दस तुलुन। भीम येलि वापस हस्तिनापोर वोत, तति गॅयि पांडव यि कथ बूजिथ हॉरान। दोपुख हस्तिनापोरुक्यन ऑलिमन हुंदि खोतु ति छा कांह ऑलिम मुल्कस मंज सरस? अमा, कृष्ण सुंद ओस वनुन, सॉरी गॅयि लाजवाब। ऑखुर आव भीम वॅशीरि रवानु करनु। मंजु गॅयि केंह र्यथ तु भीम वोत वॅशीरि। येति पय कडान कडान वोत सु वागु होम। अति वुछिन जॅन्य पॅशि अँकिस कुलिस तल दरबार करान। ब्रॉह कुन गॅछिथ कोरनख सवाल जि यि वॅन्यतव, वागु भट सुंद आश्रम कथ जायि छु? तिमव येलि यि नाव बूज, तिमन चोल ठाह ठाह वॅरान असुन नीरिथ तु दोपुहस येति छुनु कांह ति वागु भट, अमा पोज येति छु वागरा नावुक अख शिकसलद यस रबि रूदस मंज जमीन लॉग्य लॉग्य डाख छु गछान। खबर तॅमी मा आसुनय च्चे शॉल्य तारख हॉव्यमुत्य। ति वॅरिथ गछ तु हुक्या छु सु खेति अंदर दांद वायान तु ह्व छे तसंज पॅहर। अति पृछतस आशनि। दपान यि बूजिथ वोथ भीम तु

वोत तसंजि ज़नानि निश। तस निश वॉतिथ वुछिन स्व ओट पिहान। भीम वोथुस, मोजी! यि वागु भट कति छु? स्व वॅछुस मालि! सु छु खाहस अंदर दांद वायान हुथ कुलिस तल। यि बूजिथ द्राव भीम तु वोत खाहस प्यठ। अति वुछुन शख्साह अख कुट काल ह्यू स्नानु पटस मंज दांद वायान। सु वुछिथुय लोग त्राहि त्राहि परनि। दोपुन कति हस्तिनापोरुक्य व्यद्वान तु ऑलिम, तु कति यि कुट काल ह्यू शिकस लद मनुश। अँमिस बास्योव कृष्ण सुंद वनुन अपुज। खबर कति छुन येमिस ज़लँच लद सुंद नाव बूजमुत। हरगाह यि तथ मजलिसि अंदर अचि, सोरुय केंह गछि ब्रश्ट। यि छु यी सोंचान, तामथ वॉच तसंज ज़नानु ति तस चोट ह्यथ। स्व वॅछुस, मालि वुछथनु वागु भट? करार कर, यि वाति यूर्य येथ्य कुलिस तल बतु खेनि। रछाह गॅयि तु वागु भट ति आव ओतथ। अति वुछुन पोछाह ति आमुत। तस सुत्य खॉराह पाठाह करनु पतु वोनून तस 'बबु, च़ कति प्यठ आख तु मे निश क्याह कॉम छय?'

भीम लोग सोंचनि जि वनसु किनु न! अमा याद प्योस कृष्ण जी सुंद होकुम। दोपुनस, 'महाराज! पांडव राजु युधिष्ठिरस छु अश्वमीद यज्ञ करुन। कृष्ण जीयन थोव त्वहि तथ मंज यिनुक दावथ तु चंद्र तारुख बननुक सूजनवु पॉगाम।' यि बूजिथ च़ोल वागु भटस असुन नीरिथ। दोपुनस, खबर कोत छुख लोगमुत। ज़ानान दय कस आसि नाद तु कस निश वोतुख? कति वागरा तु कति अश्वमीद यज्ञ? म्यानि सुत्य हय आमच़ क्वकुर ति पॅत्य गछि। नसॉ मे नय यॅड म्यॅट तु तनि ज़ॅट छे। बु क्या ज़ानु अश्वमीद यज्ञ। यि वनान वनान लोग वागु भट थवकु अथव बतु खेनि। भीमन येलि तसुंद मॅकरेर वुछ, तस गॅयि दनन। सूंचुन, यि छु पोज़ वनान। यि हेकि नु सु ऑसिथ येमिस बगवानन दरजु आसि द्युतमुत। अमा भीमस पेयि हंगु मंगु दांदन कुन नज़र। वुछुन अख काव अलुबानि प्यठ बिहिथ तु दांद पानय पकान। यि इशारु च़ून तॅम्य गाशदारन। वागु भट वोथ थोद तु लोग दुबारु दांद वायनि। ऑखुर लोग भीम तस ज़ारु पारु करनि तु केंचि दोह्य कोर वागु भटन तस यिनुक इकरार। मगर शर्त थोवनस जि बु नबा ख्यमय नु तथ बुतरॉच प्यठ अन्न, यथ आदुम्य रथ मथनु आव। म्यानि खॉतरु छु ख्वनुवठ ख्वढ खॅनिथ बतु रनुन। यि शर्त मोन भीमन तु द्रायि यिथु पॉठ्य हस्तिनापोर कुन। मंजु गॅयि र्यथ तारु तु वॉत्य तिम सपनुनिस मँजिलस। येलि कृष्ण जीयन वागु भटुन्य शोछ बूज, सु आव पनुन्य यार दोस ह्यथ तसुंदि इस्तेकबालु खॉतरु। कृष्ण जीयन छॅल्य वागु भटस ख्वर तु औनुन यज़तु सान दरबारस मंज। येलि अतिक्यव ब्रह्मनव कुट काल ह्यू ब्रह्मन वुछ, तिमव कॅड्य ब्रेड्य। वागु भट ओस यि सोरुय केंह वुछान तु पानस सुत्य असुनाह करान।

ऑखुर गव अश्वमीद यज्ञ शरू। कृष्ण जीयन बेहनोव वागु भट थज़रस तु पानु रूद
 अँमिस ख्वरन तल। नियाज़ शरू करनु ब्रोंह लॉज ब्रह्मनव कनु फुसरारय करुन्य। व्वन्य
 येलि तमि रुचि कामि हुंद वक वोत, अख ब्रह्मन वोथ थोद तु वोनुन वागु भटस 'ज़ॉलिव
 महाराज नार।' वागु भटन वोनुनख अँनिव त्योंगुल। 'चु ज़ालुखा नारु सुत्य नार, तेलि
 क्याह कमाल छुय च्ने?' तिम वँथिस तोरु 'असि दोप चु मा ज़ालख यि मंत्र परनु सुत्य।'।
 वागु भट वोथुख 'अज़ ताम छा मंत्र परनु सुत्य नार दोदमुत।' तिमव दोपुहस 'माहरा!
 दीपक रागि सुत्य छुना नार दज़ान?' वागु भटन वँर छ्वपु तु ब्रह्मनव त्रोव असन खंगालु।
 कथ ऑस पँज़ तु कृष्ण जी वोथ थोद। गुल्य गँडिन तु वोनुन वागु भटस कुन 'महाराज,
 यिम छि बे खबर। यिमन प्यठ वँरिव दया। म्यानि बापथ वँरिव व्वन्य यज्ञ शरू।' यि वनान
 वनान लँज अँमिस अँश दार तु वागु भट सपुद बेकरार। अँमिस चँज क्रख नीरिथ
 'बगवानु, बस वँरिव। बु करु तुहुंद होकुम पूर।' यि वनान वनान कोर अँम्य ऑंगजि सुत्य
 ज़िनिस इशारु तु नार गव ज़ॉहिर। लबन च्वन कोरुन इशारु तु तिमव मंज़ु द्रायि वीद
 परनुच आवाज़। ज़न ऑस्य सासु वादु ब्रह्मन अकी हटि मंत्र परान। युधिष्ठर वोथ जल
 जल थोद तु ह्योतुन वागु भटस मोरु छलव सुत्य वाव करुन।

★ ★ ★

द्यानतदार चूर

वननु छु यिवान जि स्यठाह वख्ताह ब्रोंठ द्राव चूराह अख राथ क्युत चूर करनि। पकान पकान वोत अँकिस मंदरस निश। अति वुछुन अख ब्रह्मन पुजार्यन प्रचार करान। चूरस येलि पुजार्यन हुंघन खरबानन प्यठ नजर पेयि, दोपुन अज ओसुस गरि रुचि जंगि द्रामुत, तवय बन्योव मालाह ति वारियाह। अमा खरबानु तुलनु ब्रोंह चाव यि ति मंदरस मंज ब्रह्मनु सुंद वाज बोजनि। तमि विजि ओस ब्रह्मन महाभारतुच अख दँलील लुकन बोजुनावान तु कृष्ण जी सुंदि ल्वकचारुक अख कुसु ओस लुकन कनन करान। दपान ओसुख अज ति छु कृष्ण महाराज गूकलु किस जंगलस मंज च्वदॉहिमि रॉत्र अंदर गॉव ह्यथ यिवान। तस छे कुमती तु म्वललि लालु मालु नॉल्य आसान। येमि विजि सु मुर्ली छु वायान, जंगलुक्य मोर छि नद्युन ह्यवान, जानावार छि कुल्यन प्यठ वज्दस यिवान तु पकवुन आब छु थामि गछान। यि बूजिथ गव चूर ख्वश। दोपुन जान ग्राखाह बन्यव मे। शोठस कथ प्यठ छु ओरु योर खामखाह दर-बदर गछुन। शोठ कोनु गछि तँथ्य जंगलस अंदर? हरगाह अक्य लालु माल अथि लग्यम, वॉसि प्यठ सपदु मर्फाह। यि रूद मंदरु मंजु नीरिथ ब्रह्मनस जागि। यूथुय लूख नीरिथ मंदरु मंजु ब्रह्मन द्राव, चूरन दिचुस थफ तु वोनुन तस 'हतो ब्रह्मना! त्रास मु खे। मे वनतु जि यि कृष्ण जी छा लालु मालु लॉगिथ जंगलस अंदर कुनुय ज़ोन आसान, किनु बेयि ति छुस कांह सुत्य रोजान? बेयि वनतम सु कथ जायि छु तति गॉव ह्यथ ब्यहान?'

चूर सुंद गुप्तार बूजिथ गव ब्रह्मन त्रेन तु त्रुवहन। दोपुन चँट्य तव कथाह। शोठ हय अज फनाह गव। ज़ सास वँरी प्रॉन्य कथ। व्वन्य कति सना अनन बु कृष्ण जी जंगलस अंदर। सोंचाह दिथ लॉयिन जुव बचावनु खॉतरु अँन्य ग्यल तु दोपुनस 'सु हा माल्या छु कुनुय ज़ोन जंगलस अंदर यिवान। जंगलस दरमियान छु अख नाग तु तथ नागस प्यठ छु अख तुलसी कुल। तँथ्य तुलसी कुलिस तल कनि छु कृष्ण जी ब्यहान।' चूरन त्रोव यि बूजिथ ब्रह्मन यल तु द्राव पानस। गरु वॉतिथ तुलुन डुसाह अख सुत्य तु सपुन गूकल कुन रवानु। वारियाहि कॉल्य येलि गूकल प्यव वॉतिथ, तति चाव तथ जंगलस अंदर तु लोग नाग छारनि। ह्यवान दिवान लोबुन सु नाग ति तु कुल ति। चूर रूद च्वदॉहिमि ज़ूनि हुंद व्वन्य इन्तिजार करान। येलि पुनिम राथ सपुज, चूर गव स्यठाह ख्वश। न्यस्फ राथाह सपुज तु रूद अँकिस कुलिस तल छायि। रुचि खंजि पतु लोग मुर्ली

हुंज आवाज बोजनि। अमिच आवाज आयस यीचाह पसंद जि पनुन पान ति गोस मँशिथ। तान्य लोग वनुनि 'न बा मोनमख। जॉद्यगरु पकान गछ योर कुन, अकी डुसु दबु मँशरावय यिम नग्मु छँकरावन्य।' वारु वारु वॉच आवाज तुलसी कुलिस नखु तु चूरन ह्योत कमर गंडुन तु डंडु चलावनु बापथ तयोरी करुन्य। रचि खँड्य वाचु गॉव ति कुलिस नखु तु पतय वोत सु ति येम्य सुंद तस इन्तिजार ओस। वुछुन शामु रंगु अख ख्वश शँकील मोसूम लँडकु हना, युस स्वनु सुंद पाजेब लॉगिथ, कलस ताज दिथ तु लालु मालु तु म्वख्तु मालु नॉल्य त्रॉविथ मुर्ली ओस वायान। चूर गव सु वुछिथ हॉरान। सूंचुन, अमा अँम्यसुंद्य मोल मॉज कौत्याह संगदिल छि, यिमव युथ ह्यू मोसूम लँडकु कुनुय ज़ोन जंगलस अंदर गॉव रछनु बापथ सूजमुत छु। व्वथ जि नेर बा पानु वापस। यिथिस ना फहम तु मोसूम लँडकस प्यठ अथु तुलुन गव पाप। यि छु सरासर ग्वनाहि कँबीर। मे कति छु पय जि यि छु यूताह ल्वकुट।

चूरन त्रोव डंडु पथर तु ह्योतुन नेरुन। अमा नेरान नेरान वोथुस खयाल जि तोति हावु अँमिस बुथ तु बेयि करस नँसीहथ जि कुन ज़ोन लागि नु पोत वनन अंदर फेरुन। यिमु कथु सौंचान सौंचान वोत कृष्ण जीयस निश तु वोनुनस जि मालि क्याजि छुख यथ जंगलस अंदर यूताह त्रीर्य यिमु गॉव ह्यथ नेरान। यि बूजिथ वोथुस कृष्ण जी तोरु जि दृहस छुस कॉम करान तु रातस छुस गॉव रछान। यि वँनिथ दोपुन चूरस च़ कति प्यठ आख तु येति क्याह कॉम ऑसुय। चूरन बोवनस यि बूजिथ सोरुय हाल तु दोपुनस कोठन ओस च़ मारनु बापथ डुस ति स्रुत्य ओनमुत। अमा पोज़ च़े कुन वुछिथ आम नु यि करनस सहम। गछ पानस गरु तु बेह मॉलिस माजि निश। कृष्ण जीयन त्रोव यि बूजिथ असुन तु मोसूम पॉठ्य दोपुनस जि मे छि गरि यिछय वारियाह लालु मालु। व्वलु अजि नि च़। चूरन दोप, अदु क्याह जानुय गव। यि बिचोर छु पनुनि रज़ामँदी सान बख़्शान। निनस हरजु ति क्याह छु?

यि वननु पतु दिचनस कृष्णन ज़ु च़ोर लालु मालु। चूरन गंजि दजि अंदर तु द्राव वापस गरु कुन। वति वति छु सौंचान जि ब्रह्मनन वोन मे पोज़ नेब। लेहाज़ा पजि मे तस ति यिमव मंज़ु हिंसु द्युन। यामथ चूर शहरस अंदर वोत, सु गव स्योदुय मंदरस कुन। तति ओस ब्रह्मन बेयि लूकन कृष्ण सुंज कथ वनान। ब्रह्मन युथुय मंदरु मंज़ु द्राव, चूरन दिचनस नालु हँटिस थफ तु न्यून अँकिस छायि हँलिस कुन। यि वुछिथ गव ब्रह्मनस अँद्रीम शाह अंदर तु नेबरिम न्यबर। दोपुन थँव्यतव, शोठ गव अज़ मारु। यि तावन ज़द छु शायद गूकल शहरुकि जंगलु मंज़ु वापस आमुत। व्वन्य त्रावि शोठस मॉरिथ। चूरु जिगर

कॅरिथ वोथ चूरस कुन जि बबा, क्या सॉ मामलु छु? मे क्याह कोरमय? चूर वोथुस 'महाराज! चानि मेहरबॉनी किन्य आस बु कृष्ण जीयस सुत्य मुलाकात कॅरिथ। अखतुय कॅरुम कॉम ति। यि वनान वनान कॅड चूरन दॅज तु हॉवन ब्रह्मनस। तॅम्य येलि दजि अंदर लालु मालु नपु नपु करान वुछि, तस गव गॉयलु। सु प्यव असमानु। चूर वोथुस, 'महाराज! बु छुस ईमानदार। त्रे क्याजि गॅयी छ्वपु? मे छुनु वुनि यिमन म्वख्तु मालन अथु ति लोगमुत। रठ, यिमव मंजु तुल पनुन न्यसुफ हिस्।' यि बूथिथ चॅज ब्रह्मनस अॅश दार अॅछव मंजु नीरिथ। चूरस कॅरुन थफ तु वौनुनस 'म्यानि टाठि! यि माल गोय त्रेय सोरुय। अमा मे ति नितु तथ जायि, येति त्रे कृष्ण महाराजस सुत्य मुलाकात कॅरुथ।' चूर गव यि बूजिथ हॉरान तु ब्रह्मनस वौनुन, 'न महाराज। यि क्याह छिवु तोह्य वनान? चॉनिसुय नेब दिनस प्यठ वोतुस बु तोर तु चुर्य छुख मे वापस तसुंदुय पृछान।' यि बूजिथ प्योस ब्रह्मन परन तु कॅह काल गॅछिथ वोथुस 'जबर गव। व्वलु बु हावय वथ तु यिमय सुत्य। चकि आसख च वति हुंजन सखितयन खोचान। कांह परवाय छुनु। बु वातुनावथ तोर।'

दपान छि जि कॅह दूह गॅछिथ द्रायि यिम गूकलु किस जंगलस कुन तु येलि पुनिम हुंज जून खॅच, चूरन वोन ब्रह्मनस 'बस, रोज व्वन्य वुछनु खॉतर तयार, तिक्क्याजि तसुंदि दरशुन करनुक वख्त वोत।' यी वनान वनान गॅयि मुर्ली हुंज आवाज शरु। चूरन दिच ब्रह्मनस ज़ीर तु दोपुनस 'बोज आवाज। हुक्या छु कृष्ण यूर्य कुन पकान।' अमा ब्रह्मनस ओस नु अति कॅह ति बोजनु यिवान। सु वोथ चूरस कुन जि च कस सुत्य छुख कथु करान। 'हुक्या छुना तुलसी कुलिस तल मुर्ली ह्यथ।' अमा ब्रह्मनस ओस नु तोति कॅह पाथान। चूरस खॅच ब्रह्मनस प्यठ चख। तॅम्य थोवनस अॅछन प्यठ अथु तु दोपुनस 'हुथ कुलिस कुन त्राव नजर।' युथुय चूरन अॅमिस अॅछन अथु लोग, ब्रह्मनस गॅयि सतवय दारि यलु तु वुछुन अख नूर आगुर पानस ब्रॉह कनि मुर्ली वायान।

★ ★ ★

पोज़ यार

यि ओस अख शाहज़ाद। तस ओस स्वनर कोटाह अख यार। शाहज़ाद ओसप्रथ दूह तसुंदिस वानस प्यठ दरबारदोरी करनि गछान। यिहुंदि यारानुच शेछ येलि बादशाहस निश वॉच, सु सपुद नारोनार। होकुम द्युतुन जि स्वनर कोट गछि फोरन फहि युन दिनु। अमा पादशाह सुंद अख गाटुल वॅज़ीर ओस दरबारस मंज़ मूजूद। तॅम्य कोर बादशाह सलामतस अर्ज़ जि जहां पनाह! यि गव नु जान। अथ नेरन नु जान नॅतीजु तु तुहुंद खानदान सपदि यि करनु सुत्य बदनाम जि अख स्वनर कोट आव बादशाह ज़ादस सुत्य यारज़ करनस प्यठ फहि दिनु। यि गव मखमलकिस कुनि पलवस टाटुक पयवंद करनस बराबर। हज़ूर, गलती छि गॉमुच। अमि सुत्य वाति तुहुंदिस अँछ गाशस ति दु-लतु। अथ पेयि गाटुजारु सान कदम तुलुन युथ स्वरुफ ति मरि तु लूर ति रोज़ि सरि सोबूत। यि बूज़िथ वोथुस बादशाह जि मशवरु छु रुत। अमा यि वॅन्यतव तेलि क्या गछि करुन। वॅज़ीरन कोरुस अर्ज़ 'हज़ूर, यि कॉम त्रॉविव मे प्यठ, बु ज़ानु तु कार ज़ानु।'

कॅह दूह गॅछिथ आव बादशाह सुंदि तरफु स्वनर वॅगटिस साल करनु तु सालु शेछ ह्यथ सूज़नस पनुनुय यार। यि वुछिथ सपुद्य दूनवय स्यठाह ख्वश, अख ऑकिस नालुमॅत्य करान तु माय मोहबत बरान। ऑखुर वोत मुकर्र दूहस प्यठ स्वनर लॅडकु महल खानस अंदर। बादशाहन कोर पनुनिस शाहज़ादु सुंदिस यारस मायि होत इस्तेक्बाल। शामस सालाह वालाह ख्यथ लॅग्य ओरुं योरुच कथाह बाथाह करनि। येलि व्वन्य राथ योर वॉच, बादशाहन वोन शाहज़ादस जि व्वन्य गव स्यठाह चेर। यारस पज़ि वखसथ द्युन। स्वनर लॅडकु वोथ थोद तु इजाज़थ ह्यथ लोग गरु कुन नेरनि। रस्म र्यवाज़ु मुताँबिक द्रास बादशाह सुंद वॅज़ीर महल खानु निशि दूर ताम सुत्य तु खोरुन अँकिस गुरिस, युस ज़ीन साज़ वॅरिथ ओस थवनु आमुत। स्वनर लॅडकन लॅज़ गुरिस लथ तु सपुद रवानु। गुर येलि मँहल खानु निशि दूर्योव, सु लोग मुंह ज़ोर सपदनि, त्यूताह जि तस प्यठ छुनु स्वनर वॅगटिस कोबू हॉसिल सपदानुय। सु छु पनुन्य किन्य तस जिलव सुत्य कोबूहस मंज़ अननुच कूशिश करान। अमा कॅह ति छुस नु चलान। तस तोर फिकरि जि क्याहताम चाल छि आमुच करनु तु यि छे दर अस्ल बादशाह तु वॅज़ीरु सुंदि तरफु सु मारनुच अख च्वय। मगर स्वनर लॅडकन हॉर नु ह्यमथ। गुर ओस असमॉनी वुडान तु स्वनर कोट छु ज़ीनस सुत्य चीरु रुज़िथ दयस गॉबी मदद मंगान। ऑखुर चाव गुर अँकिस जंगलस मंज़। अति

ऑस्य हूपौर्य ति कुल्य तु यपौर्य ति कुल्य। अँम्य वँड्य वारु वारु रिकाबव मंजु खवर तु अँकिस जायि लॉयिन याशाह वँरिथ अँकिस कुल्य लंजि थफ तु गुर चोल बोन्त्य किन्त्य ब्रोंह कुन। कुल्य लंजि अवेज्ञान सपदिथ लोग सॉचनि जि व्वन्य क्याह बनि, तिक्याजि यपौर्य ऑस राथ। ज़ोनन अगर ब्वन वसु, खबर जंगली जानवर मा ख्यन शोठस। अवु किन्त्य ब्यूठ कुल्य लंजि प्यठुय। रॉच हंड पँहँर खंड युथुय अदा सपुद, कुलि तलुकि नागु मंजु खोत नफराह अख तु लोग कुलिस तल डुवनि। येलि सु डुविथ म्वकल्यव, तामथ गव फर्श त्रावन वोल् पाँदु तु त्रोव तँम्य म्वलुल फर्शाह अति। यिम दूशवय वापस गँछिथ खोत नागु मंजु अख द्यव। सु युथुय पथर ब्यूठ, जँमीनस गव ज़न तु बुन्युल। स्वनर कोट मोच्योव यि वुछिथ क्वकर पूत ह्यु कुलिस प्यठ। येलि रछ खंड गँयि, द्यवन वँड चंदु मंजु अख डबु हना। अथ तुलुन ठानु तु अमि मंजु कोडुन अख कनि फोल। अथ द्युतुन फवख तु वुछान वुछान सपुज अथ मॉर्यमँज तु ख्वश शँकील पँरियाह नमूदार। तमि दिन्न अँछन मूरनाह तु ओरु योर त्रॉवन नज़राह तु लोगुन वारु वारु ग्यवुन। युथुय स्व ग्यवनि लँज, द्यवस खँन्न नँदर तु दितुन पँरी हंड कोठ शांद तु त्रॉवन ज्वल। सुबु वक्तु ब्रोंह येलि क्वकरन बांग दिन्न, द्यव गव बेदार। पँरी द्युतुन फवख तु तस बन्योव दुबारु कनि फोल तु वँरुन डबस मंजु बेयि बंद। अमि पतु वोथ नागस अंदर। यि हाल वुछिथ प्यव स्वनर कोट हॉरतस। अफताबु खँसिथ द्राव यि पनुनिस शहरस कुन।। मंजु गँयि अख ज़ु दूह तु वोत गरु। मोल मॉज सपदुस ख्वश जि खानु मोल आव बादशाह गरि वापस। तिम लँगिस म्वनि तु मीठ्य करनि। अमा यि छुनु पनुन गुदरुन काँसि बावान।

दोयिमि दूह द्राव सु आदतु मुताँबिक वानस प्यठ तु तान्य प्योस बादशाह ज़ादु ति वॉतिथ तु रोदुन नालमति। दँलीलाह दरबाराह छुस पृछान, अमा स्वनुर्य कोट छुस नु कथुय करान। शाहज़ादस आव वदुन तु सवाल द्युतुनस जि यारु कथ प्यठ छुहम नाराज। ऑखुर लोग नु स्वनर वँटिस चारय कांह बावथ करनस तु वँनिनस सॉरुय दासतान जि किथु पाँठ्य ओसुस शोठ मारनु खॉतरु गुरिस शराबु दिनु आमुत। येलि तँम्य पँरी तु द्यव सुंजु दँलील पनुन यार बोज़नोव, शाहज़ादु गव पँरी वुछनु खॉतरु बेकरार। यारस दोपुन अँस्य गछव बेयि तथ जंगलस अंदर तु बु ति वुछहन स्व नाज़ल अकि लटि। वापस यिथ करन बु पनुन्यव अथव वँज़ीर कत्ल, येम्य च़े यूताह अज़ाब छुनय वातुनोवमुत। अमा स्वनुर्य कोट छुस नु तोरु दुबारु गछुन हरगिज़ ति मानान। मगर शाहज़ादन त्रोवुस डांब तु ऑखुर सपुद सु मजबूर तु यिथु पाँठ्य सपुद्य तिम अथ सफरस रवानु। युथुय तिम जंगलस अंदर तथ नागस प्यठ वॉत्य, अति बीठ्य अँकिस जंडस छायि पान खँटिथ।

न्यस्ब राथ येलि सपुज़, फराशन त्रोव वथरुन तु खोत नागु मंज़ु द्यव। तँम्य कोड चंदु मंज़ु डबु तु कनि पॅगलिस युथुय फ्वख द्युतुन, सब्ज पॅरियाह गॅयि पॉदु। शाहज़ादस युथुय तथ प्यठ नज़र पेयि, सु गव फलवाँय। तसुंद हुस्नो जमाल वुछिथ गोस ज़ीरो ज़बर। यारस वोनून ज़ि अगर म्योन पोज़ यार छुख, मे करनाव अँमिस पॅरी सुत्य मुलाकात। 'चु मा छुख पागल गोमुत', वोनूस स्वनर कॅट्य। अगर जुव छुय खरान तेलि गव ती करुन। अमा सु कथ मानिहेस। शाहज़ादु लोग रिनि तु स्वनर कोट गव यि वुछिथ बेकरार तु दोपुनस अदु सॉ कर करार। मे दि कांह छ्वम्ब सॉचनु।

द्यवस येलि नॅदुर पेयि, स्वनुर्य कोट वोथ थोद तु गव पॅरी निश। तमि होवुनस इशारु ज़ि चल, नतु छुय मोत गीरान। मगर सु कति चलिहे? इशारु होवुनस ज़ि मे ओस च़े कॅह वनुन। तमि होवुस कलु सुत्य इशारु ज़ि व्वलु यूर्य। युथुय सु पॅरी निश वोत, दोपुनस मे थाव यि मिनथाह तु म्यॉनिस यारस सुत्य कर कथाह बाथाह। यि छु चानि बापथ फलवाह गोमुत। स्व वॅछुस 'ऐ, आदम ज़ादु! ति किथु पॉठ्य बनि? येमिस द्यव सुंद कलु छु शोठि हुंजि रानि प्यठ। अगर बु थोद व्वथु, यि सपदि बेदार। पतु न रोज़ि चोन जुव तु न म्योन।' स्वनुर्य कॅट्य वोनूनस योरु ज़ि चु कड वारु वारु पनुन्य रान तु बु थावु अँम्यसुंदिस कलस तल पनुन्य रान तु चु यि म्यॉनिस यारस तु पनुनिस आशकस सुत्य मुलाकात वॅरिथ। ऑखुर सपुद ती। स्वनुर्य कोट रूद द्यव सुंद कलु ह्यथ तु पॅरी वॉन्न शाहज़ादस निश। येलि नु वारियाह काल गॅछिथ ति पॅरी वापस आयि, स्वनुर्य कोट गव बे करार। योतान्य ज़न क्वकरन बांग ति दिन्न, तामथ गव द्यव हुशार। तँम्य येलि अति पॅरी हुंदि बदलु आदम ज़ाद वुछ, सु गव सख गज़बनाक। स्वनुर्य कॅटिस पृछुन ज़ि पॅरी कोत गॅयि? तँम्य वोनूनस 'ऐ पातालुकि सरदारु! बु ओसुस यपॉर्य पकान, अति वुछिम यि पॅरी सख काठ गॉमुन्न। मे कौरुन सवाल ज़ि बु कडुहा वाश तु चु रोज़ तु तामथ म्यानि जायि।' 'ऐ आदम ज़ादु! चु छुख अपुज़ वनान' वोथुस तोरु द्यव। यि वनान वनान कोड द्यवन मस वाल अख तु तथ वॅरिन च़ोर हिसु तु लॉयिन च़्वन तरफन। तान्य पेयि शाहज़ादु तु पॅरी द्यवस ब्रॉह कुन वॉतिथ। ठाह ठाह करान त्रोवुन असुन तु वॅरिन त्रेशवय बंद तु पानु लॉयिन नागस अंदर व्वठ। अँछ टिंडि मंज़ु खोत ओरु जानावाराह अख अथस क्यथ ह्यथ। तस आसु दंदव बदलु श्राकु। तँम्य युथुय आदम ज़ाद अति वुछ, सु लोग आदम माज़ ख्यनु बापथ चांचु रारय करनि। द्यवन वोन यिमन ज़ि मरनु खॉतरु रूज़िव तयार। यि जानावार तुलि वुन्य तुहुंद्यव बदनव प्यठु तिकि तिकि माज़। स्वनुर्य कोट वोथुस योरु 'पातालु कि सरदारु! च़े छुय हज़रते सुलैमानु संज़ि वाजि हुंद कसम, यि म्योन यार मतु मारतन। यि छु

बे ग्वनाह। अँमिस कॅड दर अस्ल मे योर यिनुच कल। यि छु सॉनिस बादशाह सुंद कुन शाहज़ाद। अँमिस बदलु अगर मे मारख, परवाय छुनु।' स्वनुर्य कॅट्य सुंद ज़ारु पारु बूज़िथ आव द्यवस आर तु वोनूनस 'मे ओस अँमिसुय सज़ा द्युन तु च़ु छुख बे ग्वनाह। चोन यारानु वुछिथ गोस बु ख्वश, नतु क्या परु थाव्योनय अँम्यसुंद मॉल्य तु वँज़ीरन। लेहाज़ा छवु त्रेशवुन्य मॉफी। येमि पॅरी वुछ व्वन्य आदम ज़ाद तु यि लगि नु व्वन्य येति। यि ति गँयि अँमिसुय।' यि वनान वनान गव द्यव गॉब तु शाहज़ाद तु तसुंद यार आव पातालुच पॅरी ह्यथ। गरु वॉतिथ बोवुन बादशाहस सोरुय हाल तु तसुदिवुय अथव द्यावुनोवुन वँज़ीर फहि।

★ ★ ★

गुबी किताब

दपान छि जि यिम ऑस्य बाँच जोराह, स्यठहय सफेद पोश तु बूसीदु। अख दूहा बन्यव जि यिमन द्युत ख्वदा साँबन अख मॉर्य मॉद औलादाह। अमा पोज़ वुनि ओस केंहनय दहन हुंद जि हंगु तु मंगु गॅयस मॉज मॅरिथ। यि वुछिथ हेत्य अँमिस बचु संद्य मॉल्य अथु ज़ु मूरन्य। मगर मोतस क्याह करिहे। सु बिचोर लोग साँचनि जि येमिस माजि यतीमस क्याह बन्यम। खयाल वोथुस जि यि मोसूम क्याजि करन पनुन्य पॉठ्य गॅरीबी बुज्य। अँमिस ओस अँथ्य शहरस मंज अख बारस्तु वक्त सोदागाराह अख, यस ख्वदायनप्रथ केंह ओस द्युतमुत मगर औलादु रॅग्य ओस मुफलिसुय। यि साँचनु पतु तुलुन दूह अकि यि ज़ा शुर राँच हंजि अनि गटि मंज तु त्रोवुन सोदागारु सुंदिस आंगुनस मंज छ्वपु दम वॅरिथ। सु सोदागर येलि सुबु वक्तु बेदार सपुद, तस पेयि ज़ा शुरिस प्यठ नज़र तु दोपुन दयन सूज असि दौलथ येमि बापथ शोठ वारियाह कालु प्यठ तोशान ओस। सोदागर लोग अमि पतु तस ज़ा शुरिस ल्वलमतु लाय करनि। बचु गव वख्तस सुत्य सुत्य जवान सपदान तु इब्तिदॉयी लिखु पॅर हेछिनॉविथ लोग सोदागरन यि नेचुव ति बापारस कुन।

अकि दूह शाम वख्तस येलि गोबुर गरु चाव, अति वुछुन मोल सफरस नेरनु बापथ सामानु गंडान। नेचुव वोथुस 'बाबु! यि वनतम च़ कथ सफरस प्यठ छुख सखरान।' मोल वोथुस तोरु, 'म्यानि अँछ गाशु! च़ ति कर सफरस नेरनु म्वखु मे सुत्य सखर तु यि कथ ननी च़े पतु पानय।' यि बूजिथ लोग तसुंद नेचुव ति सामानु गंडनि। युथुय सुबुह नमूदार सपुद, यिम मॉल्य पॅथुर सपद्य सफरस प्यठ केंह गुर्य तु वूठ ह्यथ रवानु। मँजिलु पतु मँजिलु सर करान वॉत्य तिम अँकिस सहरावस अंदर। अति न वुछुख कांह आदम तु न कांह आदम ज़ाद। फकत अख अँनीख सेकि मॉदानाह, यथ मंज अख सराय बँनिथ ऑस। यिम मॉल्य पॅथुर चायि शाम सपदनु ब्रोंतुय अथ सरायि अंदर। अंदर अँचिथ वुछुख अख कुठ तु तथ दरवाज़ मुचरिथ वुछुख स्यठहय शूबिदार पलंगु जोराह सजाँविथ तु यिमनुय प्यठ द्युतुख दराज़। तामथ आख नोकर तु थोवुनख ख्यनु चनुक सामानु ब्रोंह कनि। नैचिव्य प्रुछ मॉलिस, 'बाबु यि वनतम अँस्य क्याह करनि आयि योर यथ वॉरानस अंदर।' यि बूजिथ वोथुस मोल, 'गोबरा! बु छुस वुन्यक्यस सख्त थोकमुत। पगाह सुबहस नैदरि वँथिथुय बावय सोरुय केंह। पतु तरी पानय फिकरि जि म्यानि योत यिनुक मक्सद क्याह ओस?'

वनन वोल छु वनान, जि राथ गँयि अदा तु सोदागर लँडकु गव नेह गटे बेदार तु लोग मॉलिस ति वुजनावनि। अमा सु गोस नु वुजनाँव्य वुजनाँव्य ति बेदार। बुथि प्यठु तुलनस वुरुन तु अति वुछुन पनुन मोल रहमते हक सपुदमुत। यि वुछिथ चँजिस यकबार वदन क्रख नीरिथ। अँम्यसंजु वदन बाकु बोजनु पतु आयि दोयिमि कमरु मंजु नोकर चाकर ति। अति येमि विजि यि हस्बि हाल वुछुख, तिम लँग्य तसुंदिस नेचिविस दिलासु मदारु करनि तु अख नोकर, यस तसुंदिस मॉलिस सुत्य सौरुय वाँस आँस गुजरेमुन्न, लोगुस वनुनि, 'गोबरा! यि ओस मनशाये इल्लोँही। चु कर दिल तु हना हे सबुर। चु व्वथ थोद तु येमि कमरु मंजु नेर न्यबर, तिक्याजि यि छु येथ्य कुठिस मंजु दफन करुन।' सु वोथुस तोरु, 'हा यारु चु वनान क्याह छुख? नेबरु हय यूताह सहरा छु! असि क्याह आव बँनिथ जि येथ्य कमरस अंदर वँडरावोन?' नोकर वोथुस तोरु, 'म्यानि टाठ्या! यि कमरु छु तुहुंद आबोँयी कब्रिस्तान तु तुहुँदि खानदानु क्यन पांचन पीर्यन हुँद्य म्वरदु छि वुन्युक ताम येथ्य कमरस अंदर वँडरावनु आमृत्य। चोन यि मोल गव शेयिम। यथ सरायि अंदर छि सथ कुठ्य। तुहुँदि खानदानुक्य जिठ्य, ति ज़न गव जदन छे वँसीयत वँरमुन्न जि शोठु सुँदि खानदानुचि सथ पीरि गछन येथ्य सरायि अंदर दफन सपदुन्य।' यि बूजिथ वोथ सोदागर लँडकु तु लोग मॉलिस स्नान दिनि तु यिथु पाँठ्य आव सु अँथ्य अंदर वँडरावनु। शाम वख्तस वोन नोकरन सोदागरस जि रस्मु मूजुब छुय च़े शेन र्यतन येथ्य मकानस अंदर रोजुन।

दपान येलि दूह च़तजीह मरु अदा सपुद्य, सोदागर ज़ादस गव अकि दूह न्यसुफ शबु दरवाज़ु मुन्नरुन ह्यु। तँम्य मुन्नरि अँछ तु गव पलंगु प्यठु थोद वँथिथ। अति वुछुन कमरु नूराँनी सपुदमुत, तिक्याजि तस आव पानस ब्रोंह कनि बुज़र्गाह अख अथस मंजु तस्बीह ह्यथ लबनु। यि वुछिथ लोग सोदागर लँडकु नोकरस आलव दिनि, अमा पोज तँम्य बुज़र्गन होवुस छ्वपु वँरिथ रोजनुक इशारु तु दोपुनस 'ऐ नवजवानु! बु छुस चानि खानदानुक जद। मे ओस यि गरु स्यठाह टोठ। अमि किन्य कोंछ मे जि म्यानि खांदानुचि सथ पीरि गछन येथ्य सरायि अंदर दफन यिनि करनु, युथ म्योन रूह शाद सपदि। वन्य बन्योख चु म्यानि खांदानिक वॉरिस। बु दिमय च़े अख नायाब डॉल्य तु स्व गँयि हुथ अलमारि अंदर अख किताब। अथ छु यि शर्फ जि यि यियि नु च़े वरॉय बेयि काँसि ति बोजनु। अथ अंदर आसि चानि प्रथ कुनि सवालुक जवाब तु चु आसख प्रथ कांह कॉम किताब ब्रोंह कनि थॉविथ करान तु यि किताब आसि च़े रुत मशवरु दिवान। अगर अथ प्यठ अमल करख, चु रोजख हमेशु ख्वश हाल। योदवय अथ प्यठ अमल करख नु तेलि

बनि यि चानि बापथ सितमुक अख दरवाज़।' यी वनान वनान गव बुज़र्ग गॉब। यि हाल वुछिथ लोग सोदागर ज़ादु त्रॅहॅरनि।

सुबु वख्तु येलि सोदागर ज़ादु पलंगु प्यठु थोद वोथ, तस गव खयाल ज़ि शोठ वुछिहे अमि किताबि हुंदि ज़ॅरियु ज़ि शोठस कर छु मरुन। यि ज़ाननु बापथ मुचरॉवन किताब तु अम्युक जवाब द्रास ज़ि अख दूह ब्रॉह सपदी पानय इन्कशाफ। किताबि हुंदिस बेयिस वर्कस प्यठ वुछुन अमि खांदानुक्यन लुकन हुंद सौरुय हाल दर्ज। अदु यि कथ ति द्रायस किताबि मंजु ज़ि अमि खांदानुक्य सॉरी लुख छि ने-प्वत्र ऑस्यमुत्य। केंह दूह गॅछिथ लोग सु अथ तनहॉयी मंजु दोह्य दूहस कुनुय ज़ोन तंग यिनि। अमि किन्य द्राव अकि दूह सॉलस तु दिलुक बार ल्वत्योस। केंह दूह रूद सु यिथय पॉठ्य शाम वख्तस चकरस नेरान तु अकि दूह द्राव सु ज़्यादय पहन गरु प्यठु दूर। वातान वातान वोत अँकिस बालु तेंतॉलिस प्यठ। अति वुछिन पॅहरा अख तु च़ाव तॅथ्य मंजु, यथ अंदर अख ख्वश शॅकील कोरि हना वुछिन। स्व ऑस यि दॅप्यज़ि ति यॅहय अफताबु अड हिश। स्व वुछिथुय गव योहय शशदर ह्यु। येलि तमि स्वर्मु टार्यव सोदागर कॅटिस नज़र त्रॉव, तस गव ज़ीरो ज़बर। सोदागर ज़ादन मँज तस त्रेश। यि बूजिथ वॅछ स्व असवुनि दहानु थोद तु अँनिनस शर्बता तयार वॅरिथ। तॅमिस शेहल्याव शर्बत चथ दिलि जिगर तु यि चथुय खॅच़स कॉफ तु गव बे-ख्वद। येलि सु बेदार सपुद, तॅम्य वुछ स्व नाज़ल तस ख्वरन फश फश दिवान। यि वुछिथ सपुद सोदागर ज़ादु तस प्यठ आशक। पृछुनस ज़ि च़ु क्या छख यथ बालु तेंतॉलिस प्यठ पहरि अंदर कुनी ज़ॅन्य करान। तमि दोपुस तोरु 'अँस्य आसु माजि कोरि ज़ु येथ्य पहरि मंजु ज़िंदगी बसर करान तु शोठ छे येथ्य पॅहरि मंजु ज़ामुच़ बडेमुच़। अमा ज़ु च़ोर दूह ब्रॉह गॅयम मॉज मॅरिथ। व्वन्य छस कुनी ज़ॅन्य यथ वॉरान जहातस मंजु।' सोदागर ज़ादु गव यि बूजिथ अँदुर्य किन्य ख्वश ज़ि दयन सूज़ुनम सुत्य बोज तु रॉत्य रातस रूद सु अथ्य पॅहरि मंजु अँमिस सुत्य।

दोयिमि दूह सुबु वख्तु तुजिन स्व सुत्य तु वोत वापस सरायि अंदर। अँमिस च़ॅल्य सॉरी गम तु तफरीख ति क्याज़ि सु लोग अँम्यसुय नाज़लि सुत्य गिंदनि द्रोकनि। फॉसलु कोरुन ज़ि युथुय मॉल्य सुंद च़तजिहिम सपद्यम, अँमिस सुत्य करु बॉजॉप्यत्तु निकाह। केंह दूह गॅछिथ बास्यव अँमिस पनुन पान य्वहय थोकमुत तु लूसमुत ह्यु। अमि पतु लोगसु दूह पतु दूह सोरनि तु नातवॉनी ति गॅयस पॉदु। दूहा वोत तु सु गव यूताह अँलील ज़ि बिस्तरस गव लॉरिथ। पनुन यि हाल वुछिथ गव तस खयाल ज़ि वुछु ना बु किताबि अंदर ज़ि मामलु क्याह छु? क्याहताम बहानु कोरुन तस नाज़लि तु अलमारि मंजु वॅडुन

किताब। तति द्रास जि यि मसवल छे चकि राँटस तु यि छय चाँनिस कुठिस मंज अँचिथ
 च्ने प्रथ शबु हटि तलु रथ चवान। यि परान परान गव सु वँहशतु सुत्य बे-खद। येमि विजि
 नाजलि तसुंद यि हाल वुछ, स्व आयि दवान तु दोरान तु लँजिस खरन फश फश दिनि।
 अमि सुत्य आव सोदागर जादु ह्यसस तु वोथ थोद। नाज मसवल सूजुन कथ ताम कामि
 न्यबर तु लोग दरवाजु बंद कँरिथ हँटिस वुछनि। अथ आस जु स्वराख बोजनु, यिमव
 किन्य स्व राँटस पँज्य किन्य तस रथ छे आँसमुन्न चवान। यि वुछिथ चँज तस खरव तलु
 मेन्न नीरिथ। यि लोग सँचनि जि अँमिस निशि किथु पाँठ्य सपद्यम नजाथ हाँसिल तु
 आस अख खयाल। येलि व्वं राथ वॉन्न, यिमव ह्योत शंगुन तु नाजल ति गँयि शंगनि बापथ
 पनुनिस कमरस मंज। सोदागर जादु वोथ पनुनि बिस्तरु प्यठु थोद तु चाव अलमारि मंज।
 केह काल गँछिथ आयि राँटस कुठिस मंज तस रथ चनु बापत. युथुय स्व तसुंदिस पलंगस
 निश वॉन्न, तमि दिन्न दुनन तु बनेयि अख खतरनाक राँटस पँज्य किन्य। अमि विजि
 आँस्य अँमिस दंद जु ति रथ चनु बापथ न्यबर कुन द्रामुत्य। वारु वारु तुलुन लेफि हुंद अख
 अंद थोद। अति वुछुन नु सोदागर जादु किहिन्य ति। यि वुछिथ सपुज फलवा हिश। कमरु
 मंजु नीरिथ लँज तस थेपि थेपि छाँडनि। अँथ्य मंज दिन्न क्वकरन बांग तु यि सपुज
 पनुनिस कमरस मंज अचनु खॉतरु मजबूर। सुब वख्तु आयि स्व सख पाँरॉव कँरिथ तस
 ब्रॉह कुन चाय ह्यथ तु थॉवन दून खास्यन मंज चाय तस ब्रॉह कनि। अख खोस पनुनि
 बापथ तु ब्याख तसुंदि खॉतरु। सोदागर जादन मँज तस चाय चनु ब्रॉह त्रेश। स्व युथुय
 त्रेश अनुनि गँयि, सोदागर जादन रलोव वँल्य वँल्य तसुंदिस चायि खॉसिस अंदर
 शीँकियाह। ताम आयि स्व त्रेश ह्यथ तु लँज चाय चेनि। युथुय चायि खोस तमि चव, तस
 लँज सॉरिसुय पानस थरु थरु अचनि, तु वुछान वुछान आयि पलंगु प्यठु ब्वन लायनु तु
 सॉरिसुय पानस चँजिस जथ नीरिथ तु यिम दंद जु तस रथ चनु विजि न्यबर आँस्य
 नेरान, तिम ति आयि पथर लायनु। यि वुछिथ वोथ सोदागर जादु थोद तु याशाह कँरिथ
 थोवनस तलवारि सुत्य सर जुदा कँरिथ तु डाँनि निश वँछुस थफ।

★ ★ ★

लोल

वनन वोल छु वनान जि पथ कालि ओस कॅशीरि हुंदिस अँकिस बालु थौगिस प्यठ दरवेशाह अख रातस द्रहस ख्वदायि संज इबादथ करान तु लुख अँस्य तस स्यठुहय रुचि नज़रि वुछान। द्रह अकि आव दुनियोवी जाह व जलालुक तौलिब नवजवानाह अख दरवेशस निश। अर्ज कोनस 'पीरो मुरशिद! कॅछा न्वस्खाह दीतोम, युथ बु दुनियोवी थज़र लबुहा।' यि बूजिथ कॅड्य दरवेशन चंदु मंजु पोंसु जोराह तु यि वॅनिथ दितिन नवजवानस जि कुनि अन यिमन पोंसन दून लोल मॅल्य, युथ बु चानि दुनियोवी थज़र लबनु बापथ तौवीज बनाँविथ ह्यकु। नवजवानन रँट्य पोंसु ज़ु तु द्राव तमि बालु प्यठु ब्वन वँसिथ शहरस कुन लोल छांडनि।

यथ यथ जायि नवजवान वातान ओस, तति ओस अथस मंजु पोंसु लुकन कुन हौविथ वनान जि हे लूको! मे गोछ यिमन दून पोंसन लोल। यि बूजिथ अँसिस लुख टसन तु टॉनु चटान। वारियाह कालाह अथ परेशौनी अंदर फीरिथ थूरिथ येलि मोयूस सपुद, फ्यूर गरु कुन वापस। अमा वति अंदर वोत अँकिस जायि, येति बादशाह सुंद शौही बाग च्वपासे गँडिथ ओस। बागु नेबुर्य किन्य पकान पकान बूज तँम्य शमशेरबौजी हुंज आवाज तु बागुचि अँकिस द्रसि प्यठ खँसिथ वुछिन अति बुडु शख्साह तु नव जवान शँकील कूराह पानु वँन्य शमशेरजँनी करान। यि बुडु ओस बादशाह संजि कोरि हुंद जंगी करतब हेछिनावनुक व्वसताद। नवजवान ति च्राव यि वुछिथ बागस अंदर तु वोत तिमन ब्रौह कुन। अदबु सान सलामाह वँरिथ ब्यूठ अँकिस अंदस कुन तिहुंज शमशेरजँनी वुछनि। अँखुर वोथ थोद तु हेतिन शाहजादि हुंदि हुस्नो जमालुक्य तौरीफ करुन्य। यि बूजिथ सपुज शाहजाँद्य सख ख्वश। अमा अमि पतु युथुय नवजवान ज़ु पोंसु अथस अंदर रँटिथ शाहजादि निश दून पोंसन हुंद लोल तलब करनि लोग, तस खौत सख खश्मु तु अकी शमशेरि चंजि न्यून नवजवानस कलु चँटिथ।

दपान छि जि शाहजादि हुंद मोल ओस इनसाफ पसंदी मंजु स्यठुहय नामवर। अवं म्वखु सपुज शाहजाँद्य हदु खौतु ज़्यादु परेशान जि कुनि गोछ नु पादशाहस पय लगुन अमि अतुर गछनुक तु सु खारि तस तु तसुंदिस व्वस्तादस फहि। अमि परेशौनी तु फिकरि निशि आजाद सपदनु म्वखु कोर यिमव पानुवँन्य फाँसलु जि नवजवानु संजु लाश पजि काँसि पुजिस दिन्य युथ सु नवजवानु सुंद माज कटु माजस सुत्य रलौविथ ग्राकन वरतावि।

अमि फॉसलु पतु अनुनोव शाहज़ादि शॉही पुज तु कोछ दिथ कोरुन सु यि कार करनु बापथ आमादु। पुज येलि इनसान माज़स निकरुनि लोग, माज़ फॅल्य लॅग्य तस वनुनि जि 'हना कर शर्म, तिक्याज़ि च़ु छुख इनसानु माज़ तु कटु माज़ अके म्वलु कुनिथ ना-इनसॉफी वरतावान।' पुजिस च़ायि यि बूज़िथ थरु थरु तु अखतुय लॅग्य ग्राख ति लरज़ुनि। वुछान वुछान वॉच़ यि शेछ जंगलुकि नारुक्य पॉठ्य सारिनुय शहर बाशन निश। पादशाहस निश ति येलि यि खबर वॉच़, तस आव नु यकीनुय तु फोरन द्युतुन वॅज़ीरस होकुम जि शॉही पुज गछि हॉज़िरि दरबार करनु युन। युथुय पुज बादशाहस ब्रोंह कनि हॉज़िर आव करनु तमि विज़ि ति आसु माज़ तिकु वनान 'हता पुजि! हना शर्म कर। इनसान माज़ तु कटु माज़ अके म्वलु कुनुन कत्युक इनसाफ छु।'

यि बूज़िथ सपुद बादशाह परेशान तु जलादस द्युतुन पुज सुंज गरदन च़टनुक होकुम। यि बूज़िथ च़ायि पुजिस थरु थरु। अर्ज कोरुन 'बादशाहम! जान बख्शी अगर आस्यम, बु वनु पोज़ पोज़।' बादशाह वोथुस, 'वन क्याह छुय वनुन?' अर्ज कोरनस 'जहां पनाह! कस ताम नवजवानु सुंज लाश वातुनॉव मे निश शाहज़ादि हुंघ व्वस्तादन तु तैमी द्युतुनम होकुम जि कटु माज़स सुत्य गछि यि इनसान माज़ ति वरतावनु युन। बु छुस बे-कसूर। म्योन छुनु कांह खता।' यि बूज़िथ आव पुज रिहा करनु। अमा पोज़ शाहज़ादि हुंदिस व्वस्तादस आव कलु च़टनुक होकुम दिनु। यि बूज़िथ च़ाव व्वस्तादस लरज़ु तु लोग बादशाहस अर्ज करनि जि बादशाहम! जान बख्शी अगर आस्यम, बु वनु पोज़ पोज़। बादशाह वोथुस, 'वन क्याह छुय वनुन?' सु वोथुस तोरु जि बु ओसुस शाहज़ादि शमशेरज़ैनी हुंज तरबियत दिवान तु तान्य च़ाव बागस अंदर नवजवानाह अख तु लोग शाहज़ादि निश दून पॉसन हुंद लोल तलब करनि। यि बूज़िथ खोत शाहज़ादि खश्म तु न्यूनस शमशेर दबु सुत्य कलु च़ॅटिथ। मे द्युतुन होकुम जि यि लाश वातुनावुन शॉही पुजिस निश।' यि बयान बूज़िथ द्युत बादशाहन जलादस होकुम जि शाहज़ादि हुंद कलु ति गछि तिथय पॉठ्य कलम युन करनु यिथु पॉठ्य तमि नवजवानु सुंद कलु च़ोटमुत छु। अमि फॉसलु पतु लॅज शाहज़ाद मॉलिस ज़ॉरी करनि, अमा सु सपुद नु सरे मू ति कॉयिल। बादशाहन द्युत अमि विज़ि होकुम जि शाहज़ादि हुंजि लाशि ति गछन तिकु वॅरिथ नवजवानु सुंजन माज़ तिकन सुत्य रलॉविथ जंगलस अंदर छॅकरावनि यिनु। अमि पतु आव यी करनु।

बालु थॉगिस प्यठ बिहिथ दरवेशन युथुय ब्वन कुन अमि वाकु पतु नज़र त्रॉव, तस आव अँकिस जायि जंगलस अंदर इनसॉन्य माज़ छॅकरिथ लबनु। यि माज़ वारु पॉठ्य

वुछनु खॉतरु वोथ सु अमि बालु थोंगि प्यटु ब्वन। सु माज़ प्रज़ुनॉविथ सपुद ख्वदायि संज़ि बारगाहि मंज़ दस्त ब-दुआ जि बारे इल्लॉही, यथ माज़स दितु दुबारु जान। दरवेशु सुंद दुआ गव कबूल तु दृशवय सपुद्य ख्वदायि सुंदि अमरु जिंदु तु वॉत्य दरवेशस ब्रॉह कुन। अमी विज़ि पॅर्य अॅम्य ख्वदा दोस्त दरवेशन यिमन निकाह तु वातुनॉविन पादशाहस निश। पादशाह सपुद पनुन्य शाहजॉद्य तु तसुंद खावंद वुछिथ स्यटुहुय शाद। दरवेशन बोज़ुनोव बादशाह यि सोरुय कुसु तु वोनूनस 'ऐ इनसाफ पसंद बादशाह! यि वाकह छु इनसॉनी अमलन तु जिंदुगी हुंज़ कथ। पज़र छु यि जि रूहॉनी थज़र लबनु बापथ पज़ि इनसानस दुनियाँवी खॉहिशव निशि पनुन दामन वटुन। यि नवजवान ओस दुनियाँवी जाह व हशमतुक तलबगार तु यिथ्य इनसान छि मेहनतु बदलु तु पनुन पान गालनु बजायि राहत तु आसॉयिशि हुंदि बापथ दूरि दूरि पनुनि खोरि फालवान। थज़र छु तिमनुय लूकन नॅसीब सपदान यिमन अंदर क्वरबॉनी हुंद जज़्ब आसि, तिक्क्याज़ि प्रथ कांह थोद मक्सद छु थदि कुसमुचि क्वरबॉनी हुंद तलबगार आसान। यि कति छु मुमकिन जि लोल ह्यू म्वलुल चीज़ क्या हेकि दून पॉसन हुंदि हॅकीर चीज़ु सुत्य हॉसिल सपदिथ। अमि लोलुकि हॉसिल करनु खॉतरु छु पनुनि म्वलुलि ख्वतु म्वलुल जुव ति दावस प्यवान लागुन, तु अमि राजु निशि ओस नु यि नवजवान वॉकफ। तु रूज़ येमिस शाहज़ादि हुंज़ कथ। यि ऑस बादशॉही जाह व जलालन अॅन्य बनॉवमुच्च, येमि किन्य यि जल्द बॉजी तु च़खि मगलूब ऑस कॅरमुच्च। येमि किन्य अॅमिस यिमन नाकारु खसलच़न हुंद खुमियाज़ु तुलुन प्यव तु चोन फॉसलु यि ओस, तमि सुत्य सपुद जॉहिर जि च़े कोरुथ पनुन सु फर्ज़ अदा, यथ अंदर मॉलिस तु औलादु संज़ माय महबत कांह हसरुय छनु थावान, तु पनुन फर्ज़ अदा करनस मंज़ युस लोल च़े वरतोवुथ, सु छु रूहॉनियत तु इनसॉनी थज़र।'

★ ★ ★

दरवेश तु सोदागर

दपान पथ कालि ओस अख बादशाहा अख। शाहजादु ऑसिस जु तु दूशवय ऑस्य ओखनस निश तौलीम परनु खॉतरु त्रावनु आमृत्य। बँडिस ओस सबक कमय पहान च्यतस रोजान। अमा ल्वकुट ह्यू ओस अथ मंज ताक। अकि दूह ओस बेयि जायि हुंद दरवेशाह अख बादशाहस निश आमृत तु अमि विजि आव शाहजादन हुंद ओखनु ति दरबारस मंज मंगुनावनु। तस आयि येमि कथि खॉतरु पृष्ठु गॉर करनु जि बँडिस शाहजादस क्याजि छु सबक कम पहान च्यतस रोजान। ओखनन कोर अर्ज 'बादशाहम! अगर ओजुर्दु सपदिव नु, तेलि छि कथ यि जि बोड शाहजादु छु कनु त्रकुर। अँमिस न छु खश्म करुन बनान तु न ग्रज। अँमिस मुकाबलु छु ल्वकुट ह्यू शाहजादु स्यठुहय ज्ञानन मानन वोल तु यि वनोस ति छु करान। बडि पायि छुस व्यपन बानु ति।' ओखनु संजि दँलील बूजिथ वोथ दरवेश बादशाहस कुन 'बादशाह सलामत! बोड ह्यू शाहजादु अनुनॉव्यतो न यूर्य।' दरवेशु संजि खॉहिशि मुतॉबिक आव शाहजादु फोरन दरबारस मंज अननु। दरवेशन वँर तस नजराह तु दोपुन बादशाहस 'येमि दूह यि शाहजादु माजि हुँदिस शिकमस मंज डम्बि छ लोगमुत, तमि दूह छु ऑलीजाह सुँदि तरफु कस ताम सुत्य ज्यादती सपुजमुच। नतु छु यि शाहजादु ति स्यठुहय गाटुल, द्यमागुदार तु श्वद ब्वद थावन वोल।' बादशाहन प्रुछ दरवेशस अथ छुना कांह यलाज। 'अदु क्याजि छुस नु' दरवेशन द्युत वापस जवाब। अमि पतु द्युत दरवेशन शाहजादस नॉल्य त्रावनु बापथ अख तौवीजु। दरवेशु सुंद तौवीजु नॉल्य त्रावनु पतय त्रोव शाहजादन मचर करुन तु सबक परनस कुन लोग रगबत ति हावनि। कमय काल गँछिथ द्राव ल्वकटिस बॉयिस परनस मंज ब्रोंह। अम्युक नँतीजु द्राव जि बादशाह छुनु दरवेशस पानस निशि छुट गछनु ति दिवान।

अकि दूह वोन बादशाहन पनुनि आशनि जि दरवेशु सुँदि तौवीजु सुत्य वुछ कति कोर वोत शाहजादु। यि नय योत वातिहे, शाहजादु आसिहे बखीलन तबाह गोमुत। स्व वँछुस अदु कँह जान पहान डॉल्या दितस। दोयमि दूह वोन बादशाहन दरवेशस त्रे कोरुथ रुत मे सुत्य। अमि खॉतरु क्वसु खँदमथ ह्यकव अँस्य चॉन्य वँरिथ? लेहाजा मंग च्रु कँछा। सु वोथुस तोरु 'पादशाहम! मे छुनु कुनि चीजुक ति हाजथ।' अमा बादशाह रूद तस योरु सख इसरार करान। मजबूर गँछिथ दोपुस दरवेशन 'यि बु मंगु, ति छुवु कुनि हीलु हुजतु वरॉय द्युन।' बादशाह वोथुस दर जवाब 'क्याजि नु? च्रु कड तु फकत ज़ेवी।'

ऑखुर वोनुस दरवेशन 'जान बख्शी गछ्यम करुन्य। मे छुनु कांह ति हवस। अमा वुछुहा, बू क्युथ शूब यथ चॉनिस तख्तस प्यठ ताज लॉगिथ। पॅहरस खंडस दितु पनुन ताज तख्त। बस युतुय छुम तमाह।' बादशाह ओस ज़बान दिथ गोमुत। पनुन वादु पूर करनस लोगुस नु कांह चारय। तॅम्य थोव पनुन ताज दरवेशस कलस प्यठ तु बेहनोवुन तख्तस। युथुय दरवेश बादशाह बॅनिथ तख्तस प्यठ ब्यूठ, यकदम द्युतुन पादशाह ज़ोलानु वॅरिथ कौद खानस मंज त्रावनुक होकुम। बेयि कोडुन अथ सुत्य यि ति फरमान जि पादशाह तु तसुंज आशेन्य गछि शुर्य ज़ ह्यथ शहर बदर यिन्य करनु। यिथु पॉठ्य बन्यव अख शाह वुछान वुछान गदा, तु लोग मुसीबतुचन ठिलन तु ठोंचन।

पनुनि शहर मंजु नीरिथ ओस यि बद कुस्मत बादशाह अकि सहरावु मँज्य पकान तु राथ कटावनु बापथ प्यव यिमन बे सरो सामान अँथ्य सहरावस मंज कयाम करुन। तामथ पोक अपॉर्य सोदागारा अख पनुन कॉफिलु ह्यथ, युस यिमन सुत्य कांह कथाह बाथाह करनु वरॉयी ब्रॉह कुन द्राव। फकत रूद चिहिस अँकिस सोदागर अँम्य सुंजि आशनि मुदय गँडिथ। पॅहर ड्वड पॅहर गँछिथ आव सोदागर वापस, योहय तमु होत ह्यु। अँमिस बद कुस्मत बादशाहस वॅरुन सलाम तु वोनुनस 'मे छि खानुदारेन्य ति सुत्य। स्व ऑस ग्वबि ख्वरु तु तस कोरुन हुथ पडावस प्यठ वॉतिथ खलास गछनुक आज़ार। ख्वदायि सुंदि बापथ दितन पनुन्य आशेन्य ख्वसु तस पीनुनाविहे। पोत खोरे अनन वापस।' बादशाहस आव अँम्य सुंज लाचॉरी वुछिथ आर तु पनुनि ज़नानि दोपुन व्वथ, कर वुछ तु करुस हले मुश्किल।

अमा स्व कति गँयेयि सोदागरस ज़नानु सुत्य? बादशाह बिचोर छु पनुन्य शुर्य ज़ ह्यथ हारि तु तोतस वनान। दूहन जोरुहन छु सु आशनि हुंद इन्तिज़ार करान, मगर बे सूद। सोदागर ओस चकि कुस ताम डाकू युस बादशाहस ज़नानु अगवा वॅरिथ च़ोल। मोयूस गँछिथ द्राव बादशाह ब्रॉह कुन। बुथि आस वति अंदर अख दॅरियाव। अमि मँज्य तरनु बापथ तुलुन अख शाहज़ादु नखस तु ब्याख रोटुन क्वछि अंदर। ख्वदायि सुंद करुन जि नखु प्यटु किस लॅजिस ग्राय तु आव आबस अंदर वुकरावनु। सु बचावनु खॉतरु आव वॅल्य वॅल्लत बॅठिस कुन तु थोवुन ख्वनि मंजुक शाहज़ादु पथर। आबु मंजु किस युथुय थफ दियिहे, सु न्युव आबु गुथि दॅहिथ। यपॉर्य आव सुह तु तॅम्य न्युव ऑसस अंदर बठि प्यटुक शाहज़ादु। बादशाह लोग यि हाल वुछिथ वदनि तु पान मारनि। अमा करिहे तु करिहे क्याह? यि गछुन ओस ति गव। दॅरियावु अपोर तॅरिथ लोग ब्रॉह कुन कदम दिनि।

ख्वादयि सुंद करुन। येम्य सुहन बादशाह सुंद अख शाहज़ादु ऑसस बैरिथ न्युव, तस लोय जंगलस मंज़ अँक्य शिकॉर्य टास तु सु गव तँती डेर तु शाहज़ादु त्रौवुन खून चनु वरॉय। शिकॉर्य ओस बे औलाद। तँम्य येलि मॉर्य मॉद ल्वकुट बचु हना अति नीम जान वुछ, सु गव ख्वश तु वातुनोवुन गरु। यिथु पॉठ्य बन्योव शाहज़ादु व्वन्य शिकॉर्य सुंदुय। दोयिमि पासु ओस गाडु हाँज़न अँक्य दँरियावस अंदर ज़ाल त्रौवमुत। तसुंदिसुय ज़ालस अंदर लोग बादशाह सुंद सु शाहज़ादु युस आबस ओस फोटमुत। यि गाडु हाँज़ ति ओस बे औलाद तु तस ति बन्योव हंगु तु मंगु ख्वश जमाल औलाद।

बादशाह ओस व्वन्य व्वपर शहरस अंदर वोतमुत। दूहस ओरु योर कँरिथ च़ाव शामस अँकिस खारु सुंज़ि पँहरि मंज़। तस वौनुन पनुन बिदाद तु राथ टपावनु खॉतरु रूद तँस्य निश। खारन सूंच, तस ति छनु नँर कँह। क्याज़ि रटन नु यि मोहनियव गरज़ु। यिथु पॉठ्य बनेयि बादशाहस छपन जाय तु लोग अँमिसुय खारस निश दूहा दूहा गुज़ारनि। कँह काल गँछिथ गव अमि शहरुक बादशाह मँरिथ। पारय आयि दिनु, पगाह गछन सतु वँहरि प्यठ हतु वँहरिस ताम तमाम लुख फलॉन्य जायि समुन्य। तति यस ति शख्सस पॉज़ बेहे, सु यियि येमि शहरुक नोव पादशाह बनावनु। दोयिमि दूह द्राव खार ति पनुन यि मोहन्युव ह्यथ तु वोत लुकु अरसातस मंज़। क्वदरतुक कार, पॉज़ ब्यूठ अँमिसुय मुसीबत ज़दु बादशाहस। अँमिस आयि ताजपूशी करनु। मगर ज़नानि तु शाहज़ादन हुंज़ि जुदॉयी मंज़ आसस वॉलिंजि दजि नेरान तु तनहॉयी मंज़ ओस तहँदिस फिराकस मंज़ वदान तु रिवान। अकि दूह वोत बादशाहस निश अख ज़नानु कँज़ियाह। सु अँज़रावनु पतु वोथुस खयाल ज़ि सियाह सरन हुंघन कँज़ियन तु न्यायन हुंदि बापथ क्याज़ि करोन नु अलग महकमु कॉयिम। अँमीरन वँज़ीरन सुत्य सलाह मशवरु करनु पतु आव फॉसलु निनु ज़ि तिथ्य ज़ु नवजवान गछन शहरस अंदर वुछनु यिन्य, यिमन शाहानु ख्वय, शाहानु आदाब तु व्वथुबेठ आसन अलावु सियाह सरन सुत्य अज़ली हमददी आसि तु बेयि आसन माजव निशि छ्यनु गॉमुत्य। अमि खॉतरु आव सॉरिसुय शहरस अंदर गरु गरु गँछिथ प्रथ जवानाह सरु खरु करनु। स्यठाह जुस्तुजू तु छॉड दिनु पतु आयि हाँज़स तु शिकॉरिस निश ज़ु नवजवान पसंद करनु। बादशाहस वननु पतु आयि यिम दूश्वय जवान पेश करनु। यिमन सुत्य कथ बाथ कँरिथ तोर बादशाहस फिकरि ज़ि इन्तिखाब छु मोज़ून तु फॉसलु मुताँबिक आव तिमन होकुम दिनु ज़ि अँज़्यकि प्यठ युस ति सियाह सरि हुंद कांह कँज़ियु आसि, सु अँज़रावनु तु तम्युक फॉसलु द्युन रोज़ि तिमनुय मटि।

अथ शहरस अंदर ओस यि दस्तूर जि युस ति कांह सोदागर बेयन शहरन अंदर माल कुननु पतु वापस ओस वातान, तस ऑस बादशाह सुंदि खॉतरु कांह नतु कांह डॉल्याह अनुन्य प्यवान। क्वदरँती वोट अँथ्य मोकस प्यठ सु सोदागर ति शहरस अंदर येम्य सहाराहस अंदर अँमिस बादशाह सुंज ज़नानु दोखु दिथ अगवा ऑस वँरमुन्न। दस्तूर मुताँबिक वँर तँम्य सोदागरन ति डॉल्य पेश तु अथ वख्तस ताम ओस नु बादशाह बायि अँमिस सोदागरस सुत्य नेथुर करुन मोनमुतुय, तिक्याज़ि स्व ऑसुस वनान, तसुंद खावंद छु वुनि हालय हयात। तवु किन्य किथु पॉठ्य करि सोदागरस सुत्य नेथुर। सोदागर ओसुस वनान जि च़े कति लगी येमि कथि हुंद पय जि सु क्या मूद। तसुंद गुप्त ओसुस यी आसान जि येमि विज़ि सु मरि, तमि विज़ि फटि तसुंजव अँछव मंज़ पानय ओश। यपॉर्य ओस सोदागरन ति बूजमुत जि बादशाहन छु ज़नानु वँज़ियु अँज़रावनु बापथ अख महकमु बनोवमुत। बादशाहस डॉल्य पेश करनु विज़ि आव तस पनुन यि दोद ज़ॉहिर करनुक मोकु। अर्ज़ कोरनस 'जहां पनाह! मे छि अख सियाह सर हॉसिल वँरमुन्न तु तस सुत्य छुस नेथुर करुन यछान। अमा स्व छम नु हरगिज़ ति अथ वथ दिवान। वनान छम यीतिस कालस नु तस पनुनिस असली खावंदु सुंदि मरनुक पय लगी, तोताम हेकि नु स्व नेथुर वँरिथ.'

अँमिस सोदागर सुंद यि कुसु बूज़िथ सूज़ तँम्य यि ज़नानु न्याय ति दून नवजवानन निश। वँज़ियु यिमन निश वॉतिथ करनोव यिमव सोदागर तु स्व ज़नानु तलब तु दूशवुन्य हुंद बयान आव लेखनु। अमा तथ कांह फॉसलु दिनुक आव नु तिमन कांह व्यस्ताराह। अवु किन्य सूज़ुख यि न्याय फॉसलु बापथ बादशाहसुय निश तिक्याज़ि यि खुर्यदार मामलु आव नु तिहुंदिस फहमस मंज़। अँथ्य मंज़ वोन यिमव नवजवानव मंज़ अँक्य बेयिस जि अँस्य छि येति दूहय खुर्यदार न्याय तु वँज़ियु अँज़रावान, कांह आसिहे युस म्योन न्याय ति यिथय पॉठ्य अँज़रॉविथ त्राविहे। ब्याख वोथुस च़े क्या न्याय छुय? सु वोथुस वँनिथ क्वसु समात सपद्यम, वनुनुय रावि। मगर हु रूदुस सख इसरार करान तु ऑखुर कोर तँम्य ति सोरुय बयान यि तस वुछुन प्योमुत ओस। यि दासतान बोज़ान बोज़ान वोथ दोयिमिस ति ओश। सु वोथुस मे ति छु पनुन दोद बावनु बापथ वॉलिंज फटनस आमुन्न। ऑखुर वोन तँम्य ति जि किथु पॉठ्य आयि तसुंज मॉज अँकिस सहाराहस मंज़ अँकिस सोदागर सुंद्य दँस्य अगवा करनु तु दँरियावस तरान तरान किथु पॉठ्य प्यव सु मॉल्य सुंदि नखु प्यठु वँस्य तु वोट हाँज सुंदिस ज़ालस अंदर। अख अँक्य सुंद बयान बोज़नु पतु वँथ्य तिम थोद तु कोरुख पानुवँन्य नालुमोत। पानुवँन्य दोपुख जि यस सियाह सरि हुंद वँज़ियु

तिमव बादशाहस निश सूजमुत छु, स्वय छे तिहुंज छ्यनु गॉमुन्न मॉज। यकदम वॉत्य तिम दूशवय बारुन्य बादशाहस निश बिलकुल तमी वख्तु येलि सोदागर तु स्व सियाह सर बादशाहस ब्रॉह कनि पेश ऑस्य आमृत्य करनु। सियाह सर वुछिथुय प्रजुनॉव तिमव पनुन्य मॉज तु तस सुत्य रूद्य नालुमोत कॅरिथ। यि वुछिथ गव बादशाह हॉरान जि यि क्या कुसु छु? तिमव कोर अमि पतु बादशाह सलामतस अर्ज जि यि छे सॉन्य मॉज। अॅस्य ऑस्य अकि दूह पनुनिस मॉलिस सुत्य अकि सहरा मँज्य पकान तु अॅकिस जायि ऑस्य कयाम कॅरिथ। ताम आव यि दोखु बाज तु डाकू सोदागर तु कॅरुन सॉन्य यि मॉज अगवा। पतु गॅयि अॅस्य मॉलिस निशि तमि वख्तु छ्यनु येलि सु दॅरियाव मँज्य ओस तरान। असि ओस वुनि हयात तु अख वोत शिकॉरिस निश तु ब्याख हॉजस निश, तु अज समखेयि बराबर पंदाहि शुराहि वुहुर्य। बादशाह वोथ तख्तु प्यठु ब्वन तु रॅटिन दूशवय शाहजादु नालुमति। सोदागर आव अमी विजि गिरपतार कॅरिथ रामु होन्यन त्रावनु। अमि पतु कोर अॅम्य पनुनिस शहरस प्यठु हमलु तु दरवेश बादशाह आव जेर कॅरिथ गुर्य दुम्बस गंडनु। यिथु पॉठ्य वोत हकदारस पनुन हक तु बद-ख्वाहन म्यूल पनुन्यन करतूतन हुंद सजा।

★ ★ ★

मनुट त पांजुव

यि ऑस बुडु मॉजाह अख। नेचिव्य ऑसिस ज़ु। बॅडिस ओस पांजुव नाव तु ल्वकटिस मनुट। पांजुव ओस ज़मीन ज़िरातुच कॉम करान तु मनुट ओस मदरसस मंज परान। गरुक लोह लंगर चलावनु किन्य ऑस पांजुविस सख मेहनत प्यवान करुन्य। अवु म्वखु ऑसुस बुडु मॉज दूहय बतु मॅड्य हन ति दिवान तु वोन्य मेचि हन ति। मनटिस ऑस फकत वोन्य मेटुय ख्यनस बनान। माजि हुंद यि वॅतीरु वुछिथ ओस मनुट अँदरी दज़ान तु माजि हुंद ज़ु अँछ करनस प्यठ पांजुविस ख्वतान। सॉचान ओस अँस्य छि दूशुवय अके डम्बि ज़ामुत्य, अमा यीच फर्क क्याजि। पोज़ वॅनिथ ओस नु कॅह ह्यकान। दपान दूह अकि ऑस बुडु माजि पनुनि आदतु मुताँबिक पांजुविस किच बतु मेचि ज़ु चोर तु वोन्य पावाह अख बुशकाबस मंज शीरिथ थविमचु तु पानु ऑस यँदुर कतान। मनुट आव मदरसु प्यठ कोज ख्यनु बापथ। पनुन्य वोन्य म्यँट ख्यनु पतु तुलुन पांजुव्य सुँदि हिंसु प्यठुक्य बतु लुकमु अख ज़ु ति। यि वुछिथ कोरुस माजि सख खशम तु लॅजिस व्वहवुनि। मनटिस खँच चख तु तुजिन पांजुव्य सुँदि हिंसु मंजु बेयि अख बतु म्यँट तु ज़ोर ज़बरदस्ती वॅरिथ बॅरुन माजि गुपनस नून दिनुक्य पॉठय ऑसस। तस गव हँटिस गंड तु च़ोलुस वुछान वुछान ज़ुव नीरिथ। मनुट्य येलि यि वश्फु गछान वुछ, सु गव दवान तु दोरान बॉयिस निश खहस प्यठ। दूरे लॉयिनस क्रख, हयो काका मॉज हा छि मूमच। सु वोथुस किथा पॉठ्य ? दोपुनस बु हा गँयोस गरु कोज ख्यनु बापथ, अदु स्व वुछुम यँद्रसुय प्यठ मूमच। पांजुव आव यि बूजिथ अथु मूरान मूरान गरु तु अति वुछिन मॉज पँज्य पॉठ्य हकु बल वॉचमुच। वदुनाह रिबुनाह वॅरिथ लोग तसुँदि कफन दफन करनुक संज करनि। मनटिस दितिन कॅह पॉसु बाज़रु माजि क्युत कफन तु च़ूर्युम करनु खॉतरु तीलु म्वया अननु बापथ। मनुट द्राव बाज़र तु ओनुन कफन तु तील। वति वुछुन अँकिस जायि फ्रस्तु कुलिस वावु दकव सुत्य और योर गछान। दोपुन बबु सुँदिस फ्रस्तस छि सख तुर लॅजमुच, तु अथ वोलुन माजि हुंद कफन। ब्रॉह कुन पॅकिथ वुछुन फ्राटु दार ज़मीनु खेताह अख। दोपुन बबु सुँजि यथ खेति छे पोनु गॉमुच। तु यि तीलु डबुहन त्रॉवुन अँथ्य मंजु फिरिथ तु वोत गरु खॉली अथव।

पांजुव वोथुस, 'कफनु तु तील ओनुथा?' 'अवु ओनुम', मनुट वोथुस तोरु। पांजुव्य वोनुस, 'कति थोवुथ?' सु वोथुस दर जवाब, 'काका! छुख ना बोजान, बबु

सुंदिस फ्रस्तस आँस तुर लँजमुच्च तु सु कफनु कपुर वोलुम तँथ्य तु तीलु हन त्रॉवम बबु सुंजि खेति मंज।' पांजुव वोथुस, च्छुख च्चकि वॉरान म्वगुल। लाचार सपदिथ द्राव बाज़र तु ओनुन दवान तु दोरान माँज दफन करनु खॉतरु कफन बेत्रि। माजि हुंदि च्चूर्यमि पतु लोग पांजुव बेयि गरु किस लोह लंगरस तु ज़मीन ज़िरातस सुत्य तु मनुट रूद मदरसु गछान। अमा माजि हुंदि सायि व्वथनु पतु आँस्य बाँय बारुन्य सुबहस शामस पानुवॉन्य ठाँसलु मिलुवान तु स्व बरादँरी ति रूजुख नु य्वसु माजि थी आँसुख। आँखुर वोत सु ति दूह येलि बाँय बारुन्य अख अँकिस निशि ब्योन द्रायि। गरुक यि दाशत नदाशत ओसुख, तथ कोरुख हिंसु तु दांद जोराह ति आँसिख। यिमव मंज आव अख अँकिस हिंसु तु ब्याख दौयिमिस। मनटिस ओस दूह अकि पनुनिस दांदस नून द्युन। पांजुविस वोनून, 'काका! गुपनस कोताह नून गछि द्युन।' सु वोथुस तोरु 'गछ दितस नून मनुटाह।' सु वोथ तु पँज्य पाँठ्य दितुन पनुनिस दांदस नून अजि पावि बदलु नून मनुटाह। नँतीजु द्राव यि ज़ि दांद गव मँरिथ। अमि न्वकसानु सुत्य वोत मनटिस सख सदम। अमा करिहे क्याह? कार ओस पानय वँरिथ गोमुत। मगर बाँय सुंद बड्योस हसद। दोपुन अँमी मारनोवुस दांद।

दांदस वालुनोवुन मूचिस अथि मुसलु तु थोवुन काँनी प्यठ सम्बॉलिथ। येलि यि मुसलु वारु पाँठ्य च्चमिथ ख्वश्क सपुद, अकि दूह न्यून शहर कुनुनि। अमा तति आस नु अथ कांह खँरीदार। शहरु प्यठु वापस यिवान यिवान लँजिस अँकिस तिछि जायि राथ, येति आबाँदी आँसुय नु। राथ गुज़ारनु खॉतरु खोत अवं किन्य अँकिस कुलिस प्यठ तु दांद सुंद चमरु ति खोरुन ऊर्य। ख्वदायि सुंद कार, अमे वति आयि अड राथ गँछिथ चूर ज़ु चोर। तिमव आँस कस ताम आसन वॉलिस सन दिचमुच्च तु यिमु र्वपयि अनिमच्च आसख, तिमु बाँगरावनि बीठ्य अँथ्य कुलिस तल। र्वपयि बाँगरावनु ब्रॉटुय व्वथुख अख चूर ज़ि ग्वडु तुलिव साँ बायव स्रोदि खातु प्यठु काहनाँव्य सुंजु काह र्वपयि तु अदु वँरिव तकसीम, नतु हबा पेयिवु असमाँनी त्रठ। ब्याख वोथुस, 'रोटनखु च्छु काहनाँव्य। ग्वडु दितु र्वपयि बाँगरावनु, अदु वुछव।' मनुट ओस सोरुय तमाशु कुलिस प्यठ बिहिथ वुछान। तस दिच बख्तन ज़ीर तु याशाह वँरिथ द्युतुन चूरन प्यठ दांद सुंद होख शोरु हू खलुर दॉरिथ। अमिकि खुर खुर सुत्य गँयि चूरन वावुन्य वातल तु म्वछि वँटिथ त्रॉवुख दव। अथ चलु लारि मंज हेक्य नु तिम अख विरिन्य ति तुलिथ। मनुट वोथ कुलि प्यठ फुरसँच सान ब्वन तु सारेय र्वपयि वँटिथ द्राव गरु कुन। बेयि दूह सुबहस वोत तोशान तोशान गरु तु पांजुव वोथुस, 'केहो, कुनथा दांद सुंद खलुर?' मनुट वोथुस, 'काका! छुख ना वुछान र्वपयय र्वपयि। दालु त्रकस हा र्वपयि त्रख यिवान।' यि बूजिथ लोग पांजुविस आँसस आब यिनि।

आशनि सूत्य मशवरु वॅरिथ वोथ सु तु छुनुन गानस मंज़ दांद मॉरिथ। दूह पांछ ऑठ गॅछिथ तुल तॅम्य ति दांद सुंद खलुर तु द्राव शहर कुन कुननु बापथ। शहर वॉतिथ फ्यूर सुबु प्यठ शाम ताम हटरि हटरि, अमा सु कति दालु त्रकस र्वपयि त्रख ? वॅछ्य ताम आस केह पौसु तु वोत दवान दवान गरु। आशेन्य वॅछुस, 'अनिथा र्वपयि ?' 'अवु मनुट्य सुंद कलु। अॅम्य तावन ज़दन हय बु ख्वरु कूटि अपोर तोरुस। यि छा सेद्यव पद्यव ?'

पांजुव ओस अमि पतु कवस ज़ि कर यियम मोकु, अॅमिस तावन टॉकिस ह्यमु पूर कसास तु ह्यवान दिवान द्युतुन अकि दूह मनुट्य सुंजि पॅहरि राथ क्युत नार। मनटिस यि कॅछा दाशत नदाशत ओस गरस मंज़, तथ गोस वुछान वुछान सूर। मनुट ति ओस योरु स्यठह्य पोरुश। पनुनि पॅहरि हुंद मलबु साफ करान करान सौंबुर्य तॅम्य च़ुनि ठेलु अख ज़ु तु अकि दूह द्राव शहर कुन अख च़ुनि ठेला कुननि पाबथ। अमा अमिक्यन च़्वन कूनन थव्यन च़ोर र्वपयि। शहरस अंदर वॉतिथ गव अॅकिस वॉनिस निश। दोपुनस 'हे बायाह! तामथ थावहा बु यि च़ुनि ठेलु यथ चॉनिस वानस प्यठ।' सु वोथुस, 'अदु हर्जु क्याह छु ? थाव हुथ थरस प्यठ।' च़ुनि ठेलु थरस प्यठ थॅविथ द्राव मनुट ओकुन योकुन वख्त कटावनि तु केह वख्त गॅछिथ आव वापस तु तुलुन वानु प्यठ पनुन ठेलु। अम्युक गोल मुच़रॉविथ वाहरोवुन ऑस ज़ि 'हा ख्वदायो! येम्य वानु वॉल्य हा छुनस लूटिथ त्रोवमुत। अॅम्य हा छुनम र्वपयि ठेलस च़ुनि ठेलु थोवमुत।' मनुट्य सुंदि ऑस वाहरावनु सूत्य गॅय वुछान वुछान लुख जमाह। मनुट छु बुथि बुथि दिवान, पान मारान तु पलव च़टान ज़ि वानु वॉल्य हा लूटनस। अॅम्य हा बेहनोवुस सूरस प्यठ। लूख छिनु व्वं तस छ्वपु करनावनस पोशान। वानु वोल बिचोर गव दम फुट्य। सु छु न अपुज़ ह्यकान वॅनिथ तु न पोज़। तस छुनु किहिन्य तगान वनुन। 'क्या साँ हे वानु वाल्या! यी वातिहे ?' लूकव दोप तस ब-यक ज़बान। अमा सु छुख तोरु अबुन्य कसम बबुन्य कसम हॉविथ वनान ज़ि 'यि हखुर हसॉ छु रूंटुय टर वनान। अथ छि वनान आर युन गव नार वसुन। अख द्युतुमस वानु थरस प्यठ ठेलु थावनु, बेयि छुम च़ूर हांछु लागान।'

दुकानदारस ओस नु कांह अखाह ति पछ करान। साँरी ऑसिस वनान, अपुज़ हय यि तावन ज़द वनि ति तु कोताह ? ऑखुर कोर ज़िठ्यव ज़िठ्यव फॉसलु ज़ि अगर ठेलु मंज़ु च़ुनि फिरिथ कांह र्वपय नेरि, तेलि छु येमिस च़ुनि वॉल्य सुंद पोज़। अगर र्वपय श्वपय नेरि नु, तेलि छु यि अपुज़ तु पॉथर। दपान युथुय मनुट्य सुंद च़ुनि ठेलु दननु आव, तमि अँदरु द्रायि च़ोर र्वपयि। यि वुछिथ दिच़ मनुट्य क्रख, 'वुछिव साँ बायव, बु मा ओसुस कांह पॉथर चारान।' वानु वोल छु यी डीशिथ ज़हर च़ापान ज़ि येम्य हखरन वुछतव कुस

स्वरुफ पिलनोवुम लोरि पेठ्य ? अमि पतु द्युत ज़िठ्यव फॉसलु ज़ि वानु वॉल्य छु पॅज्य पॉठ्य र्वपयि ठेलस च़ुनि ठेलु बॅरिथ थोवमुत। यि छ्वम्ब वरतॉविथ ओन मनुट्य शहरु प्यठु र्वपयि ठेलु। गरु वॉतिथ पृष्ठुनस पांजुव्य, 'वनू ह्यो मनट्या! क्योहो कोरुथ च़ुन्यन?' सु वोथुस दर जवाब, 'किहिन्य मु पृष्ठ काका। बस च़ुनि ठेलस र्वपयि ठेलु यिवान। यस निशि च़ुनि आसन, वुछान वुछान सपदि हॉथी।' यि वुछनु पतु ह्योतुन पांजुविस ऑसस आब युन। तु केंह दूह गॅछिथ द्युत तॅम्य पनुनि आशनि सुत्य सलाह मशवरु कॅरिथ पनुनि लरि नार। सथ ऑठ दूह गुज़रनु पतु द्राव सु ति च़ुनि ठेलु हना ह्यथ । अमा सु कति च़ुनि ठेलस र्वपयि ठेलु युन ? पांजुव वोत स्यठुहय मोयूस गॅछिथ गरु वापस तु बॉय संजि चालॉकी तु पनुनि बेवकूपी प्यठ ओस दुयान। सॉचाह कोरुन, 'येमिस मनटिस तावन टॉकिस किथु पॉठ्य ह्यमु कसास।' कांह अनमानाह छुस नु यिवान ज़ि किथु पॉठ्य दिमस वटुखूर।

केंह कालाह गॅछिथ वोथ बॉयिस मनटिस कुन ज़ि 'च़ु कूतिस कालस बेहख नेथरु वरॉय। ख्वदायन हय छुनय वुन्यक्यन दूह द्युतमुत। बेहतर रोज़ि व्वं चानि खॉतरु नेथरु करुन। मे हा छमय अँकिस गामस मंज़ कोरि हना यिहय जनतुच हूर हिश वुछिथ थॅवमुच़।' मनुट ख्वदवय खांदर करनु बापथ वुनि रज़ामंद ओस नु, अमा पांजुव्य वोल नावि तु मनुट वोथुस, 'अदु सॉ, येलि च़ु यी यछान छुख, तेलि करव ती।' ऑखुर कोरुख नेथरु करनु बापथ अख दूहा मुकर्। मनटिस आव महाराज़ु पोशाखाह लागनु तु तमि ज़मानुकि र्यवाजु मुताँबिक आव अँम्यसुंदि खॉतरु ज़ाँपानाह ति शेरनु पॉरनु। सुबह सपदनु ब्रॉटुय बोरुख मनुट ज़ाँपानस तु द्रायि महारेन्य अननु बापथ अँम्य सुंद होवुर कुन। वातान वातान वॉल्य यिम अँकिस मॉदानस अंदर। कहार तु पांजुव ऑस्य पॅक्य पॅक्य थॅक्यमुत्य। लेहाज़ा थोवुख ज़ाँपानु पथर तु अँकिथ कुन लॅग्य च़ोट खेनि। अथ मॉदानस मंज़ ओस पोहलाह अख पनुन तीर्य रंबु ह्यथ गासु ख्यावान। मनुट्य कॅरनस क्रख तु सु आव डोलि नॅजदीख। तु वोनूनस मनुट्य ज़ि 'हे बाया, मे छु बोय पांजुव जबरन खांदर करुन यछान। बु छुस नु वुनि खांदरस लायक। बोज़ख ना कथाह, च़ु बेहख यथ डोलि मंज़ म्यॉन्य महाराज़ु पलव लॉगिथ। हंगु मंगु बनी स्वर्गु हूर हिश ज़नानु।' पॅहलिस आव दारि किन्य अँज़। 'अमा म्यान्यन यिमन तीरन क्याह बनि?' पॅहॅल्य वोनूनस। मनुट वोथुस, 'हा यि गॅयि म्यॉन्य कॉम। बु वातुनावय तीर्य रंबु गरु पानय। च़ु मु बर गम।' यि बूज़िथ कॅड्य पॅहॅल्य पनुन्य जंदु पलव तु त्रॉविन महाराज़ु पलव नॉल्य। मनुट द्राव डोलि मंज़ पॅहॅल्य संद्य पलव लॉगिथ तु लोग तीरन बेयिस अंदस कुन ज़ीर दिनि। तामथ म्वकल्यायि कहार तु पांजुव बतु ख्यथ तु महाराज़ु डूल्य ह्यथ द्रायि पनुनिस मँज़िलस कुन। पकान पकान वॉल्य

अँकिस दँरियावस प्यठ तु दितुख महाराजु डूल्य ह्यथ याशाह वँरिथ आबस अंदर दँरिथ । पांजुव छु पनुनि जायि तोशान जि बँड बलायाह चँज । अमा तस क्याह पय जि बलाय छे तँस्य किच नचान ।

शाम वख्तस बॉग्य वोत मनुट तीर्य रंबाह ह्यथ गर । यि वुछिथ प्यव पांजुव असमानु जि बार-इलॉही, यि क्याह छुस वुछान । सोंचान छु यि तावन ज़द हय असि दँरियावस अंदर फाटुव्योव, मगर यि छु तोरु ति वापस आमुत । सु ति तीर्य रंबु ह्यथ । बोय वोथुस, 'मनट्या ! यिम तीर्य कत्यू अँनिथ ?' सु वोथुस, 'हयो काका ! तति हा छि दँछिन्य ति तीर्य तु खोवर्य ति तीर्य । हेरि ति तीर्य तु ब्वनु ति तीर्य । अदु तोरय हा खोरुम यि तीर्य रंबु । काँसि अगर नँर आसि, सु हा अनि येमि खोतु ति दूगनु माल ।' यि बूज़िथ द्राव पांजुव ति केँह दूह गँछिथ पनुन्य हँहरु लालु जोराह ह्यथ दँरियावस कुन । तोत वॉतिथ वोनुनख पांजुव्य, येमि विज़ि बु अथव सुत्य आबु मंजु इशारु हावोवु, यकदम त्रॉव्य ज़्यवु तोह्य ति व्वठ । दपान युथुय पांजुव्य आबस अंदर व्वठ त्रॉव, सु लोग फटनि तु बचावु खॉतरु लोग अथव सुत्य हावनि कोठस बचॉव्यतव । अमा हँहरन तोरुस फिकरि जि यि छु वनान वँलिव वँसिव तोह्य ति । वुछान वुछान लायि तिमव ति अख अँकिस पतु व्वटु तु पँट्य साँरी अकि अकि । अदु क्याह, तिम गँयि तोर तु अँस्य आयि योर ।

★ ★ ★

बद खाँही

दपान पथ कालि आँस अँकिस कावस तु चरि पानुवॉन्य सख यान्ज। अख अँकिस निश युन गछुन, यिकुवट फेरुन थोरुन, अँदर्युम सीर बावुन तु ओरु योर लोल बावुन ओस युहुंद आदत बन्योमुत। चँर आँस साफ दिल, नेक नियत तु कुनि दगाँयी वरॉय। यि दिलस ओसुस ती ओसुस जेवि ति। अमा कावस मुतलिक छुस वोनमुत 'काव हय छँल्यज्यन सजु साबुने, कावस कृहन्यार चलि नो ज़ांह'। सु ओस अवय अँमिस चरि कुनि नतु कुनि बहानु ख्योन यछान। विज़ि विज़ि ओस पानस सुत्य सौंचान जि यि चँर किथु पॉठ्य वातुनावन हकबल? अँम्य सुंद यि नर्म नर्म तु मज़ुदार माज़ कर तु कमि तँरीक ख्यमन। योहय खयाल ह्यथ द्राव दूह अकि हर्द कालस अंदर चँर ह्यथ सॉलस। पहर जोराह कोरुख कोह नालन, वीरि वारन, पोशि मर्गन तु जंगलन हुंद यड बँरिथ सॉल। येलि व्वं सॉल करान करान थँकिथ पेयि, वँथ्य अँकिस मॉदानस मंज़। अति आँस्य अँक्य ग्रीस्य बायि मर्चुवांगन तापस त्रॉव्यमुत्य, यिमन हुंद व्वजुजार अँछ नाटु ओस करान। कावन दोप यिम मर्चुवांगन वुछिथ चरि 'वुछ यिम व्वजुल्य नार हिव्य मर्चुवांगन क्याह छि दिल निवान। दपान छुस, अकि अकि ख्यमुहख।' यि बूज़िथ वँछुस चँर 'अवु, बु ति छस यिम अकि अकि खेन्य यछान। युहुंद यि व्वजुजार कोताह छुम ख्वश करान।' दर जवाब वोथुस काव 'हतय चँरी, कोताह अपुज़ छख वनान? चोन ताकथ छा यिम मर्चुवांगन खेन्य।' पनुनि साफ दिली तु स्यज़रु पज़रु सुत्य वोनुनस चरि 'अगर म्योन बितुर छुनु, अमा चानि बापथ हा ख्यमख अकि अकि।' 'नाय च़ नय ह्यकख नु ओड ति ख्यथ' काव वोथुस तोरु। दुबारु वोनुनस चरि 'कावु बबा! चानि म्वखु पेय तन मे केँह ति करुन।' काव ओस दर अस्ल चरि व्वटि अनुन यछान। सु वोथुस 'तलु बी कर तु तेलि बिस्मिल्लाह। मगर शर्त छुय यी जि च़ योदवय ज़ुय त्रेय ह्यकख ख्यथ, चॉन्य तु म्यॉन्य दोस्ती रोज़ि वॉसन कॉयिम। हरगाह अथ शर्तस प्यठ वुतरख नु तेलि हा बी ख्यमथ।'

काव सुंद गुप्तार बूज़िथ तु खोट नेथ वुछिथ तोर चरि फिकरि जि कावु बबस छे बद खाँही वुनु वॉजमुत्र। कोठि हुंदिस माज़स प्यठ छुस तवय टोर प्योमुत। अमा करिहे क्याह? स्व आँस कौल दिथ गॉमुत्र। कावस सुत्य यारज़ वरतावनुक्य दम ति आँसिन दित्यमुत्य। यिथु तिथु लॉगिन मर्चुवांगन खेन्य। मगर वुनि ओसुन नु बिचारि ओड ति ख्योमुत जि वॉलिंजि प्योस वेह। कावस कुन वँछ खूच्य खूच्य 'कावु बबा! म्यॉन्य ना छनु बाथ। वॉलिंजि हा प्योम ज़हर।' सु तावन ज़द ति ओस च़कि यी यछान। तस आव बहानय अथि तु बडि हटि वोथुस 'शर्त हबी हूरुथ। वन क्याह छु व्वन्य सलाह। व्वथ पनुन कौल अन बजाह।' चँर योदवय कम पायि ति आँस, मगर बेयि तर्फु आँस स्यठाह गाटुज। दर जवाब वँछुस 'कावु बबा! च़ मा गाबर। बु हा छस पनुनिस कौलस प्यठ कॉयिम। अमा च़ यितु ग्वडु दँरियावु प्यठ पनुन्य यि नापाक च़ोँछ छँलिथ, ति क्याज़ि वुमरि छुय मोकरुय सौकरुय ख्योमुत।' काव वोथुस 'यि क्वसु कथ छि? बु हय गछु वुडव दिथ वुन्य दँरियावस प्यठ तु यिम चाने कौल पनुन्य

नापाक च्छो छलिथ।' च्छरि वोनस 'अदु क्या गछ दवान दवान। बु छसय येती प्रारान।' च्छरि तिकु तिकु ख्यनुकि नीतु द्राव कावु बब दॅरियावस कुन वुडव दिथ। दॅरियावस निश वॉतिथ वॅरुन तस आबु थोबाह दिनु खॉतरु जॉरी। दॅरियाव वोथुस 'गोबराह! आब निनुच क्याह सॅबील छय च्छे निश? कुनि अनतु बानु खँडाह शानु खँडाह। अदु यूताह च्छे आब गछी, त्यूताह नितु।' काव गव मायूस तु वोनस 'यि बानु कति बन्यम?' 'सु हा बनी गोबराह कालु बॉयिस निश।', दॅरियावन वोनस तोरु। यि बूजिथ द्युत कावन वुडव तु वोत कालस निश। काव वुछिथ वोथ काल तस कुन 'काव बब किथु वॅन्य अज योर लोगमुत?' सु वोथुस 'हाजथाह अख लोगुम च्छे निश।' 'कुस सना हाजथ', काल वोथुस योर। दोपुनस 'मे छु दॅरियावु प्यठ आबु थोबाह अनुन, तु तमे खॉतरु दितम कांहा बानाह।' यि बूजिथ द्युतुनस कालन जवाब जि 'बु हबा दिमहय चश्मन हुंदि रतु, यि क्वसु कथ ऑस? अमा मे छय राथुय च्छेचि हुंज लथ फुटमुच। हां, अम्युक क्युल हा क्युल, सु छुम खारस निश संबालनु खॉतरु त्रोवमुत। तु येलि सु शीरिथ संबॉलिथ दियि, अदु ह्यकु बु बानु बठ दुबारु बनॉविथ। च्छु गछतु खारु बबस निश तु तस वनतु म्योन तु पोत खोरे अनतु च्छेचि हुंदि क्युल तोरु।' कावन द्युत यि बूजिथ वुडव तु वोत खारस निश। सलामाह वॅरिथ कोरनस अर्ज जि 'खारु बबा, चॉनिस वानस प्यठ छु कालु यारन पनुनि च्छेचि हुंदि क्युल संबालनु बापथ त्रोवमुत। तॅमी सूजनस च्छे निश सु निनु खॉतरु।' सु वोथुस 'च्छे क्याह छुय क्युल निथ पतु करुन?' काव वोथुस, 'छुख ना बोजान! मे छु च्छरि हुंदि बापथ चॉठ साफ करुन। तमि म्वखु छुम आब दरकार, युस बु दॅरियावु प्यठ अनु। मगर तथ क्युत गछ्यम बानु आसुन युस कालु बोय बनॉविथ दियि। खार वोथुस यि लॉल बोजनु पतु 'दोस्ताह! बु हसॉ तावु हॉ वान। अमा मे छु नु त्योंगलाह शॉंगलाह कॅह ति। च्छु कर कांमाह, कुनि दि त्योंगुल अॅनिथ, अदु ह्यकय फटोफट क्युल बनॉविथ दिथ।'

काव गव यि बूजिथ मोयूस। दोपुन च्छर आसि बिचॉर प्रारान प्रारान थॅचमुच। तु स्व आसि म्यान्यन वतन वुछान। ह्यमथाह वॅरिथ द्राव तु दितुन त्योंगुल अननु बापथ गाम कुन वुडव। अति वुछिन बुजि माजि हुंजि पॅहरि मंजु दुह नेरान। दोपुन अगर त्योंगुल बनि तु अॅती बनि। ऑखुर वोत बुजि माजि निश। लोलु हॅच सलामाह वॅरनस। वॅछुस बुडु मॉज 'गोबरस क्याह गछि? अज कति यॅच काँल्य योर कुन लोगमुत।' कावस पेयि बुजि माजि निश सॉरुय दासतान बावन्य। स्व वॅछुस 'गोबराह! च्छे हय बु त्योंगुल दिमय, निख कथ मंजु?' कावस ऑस बद खॉही तमि विजि पूर वुतल वॉजमुच। सु ओस तमि विजि च्छरि माजुय च्छरि माजु खॉब्य मॅज्य वुछान। तवु किन्य ओसुस नु द्यमाग ति काँम करान। सॉचनय समजनय दार्यन त्योंगुल निनु म्वखु पखु बुजि माजि कुन। तमि त्रोवुस नारु क्रोछाह अख पखन प्यठ तु त्रोवुन वुडव दिथ खारु वान कुन रव। अमा वुनि ओस तावन जद खारु सुंदिस वानस प्यठ वातुनय जि हवसुक्य नारन त्रॉवुस वुछान वुछान च्छुन्य वॅरिथ तु यिथु पॉठ्य वॅछु च्छरि कावु सुंदि शरु निशि थफ।

★ ★ ★

ताँज्य बटुन कान

वनन वोल छु वनान जि पथ कालि ओस अँकिस राजस रानि हुंद त्युथ म्वख्तु हार, यथ नु कांह म्वल ओस। यि म्वख्तु हार आँस राजु बाय खास खास मोकनुय प्यठ नॉल्य छुनान। अकि दूह आँस स्व राजस सुत्य कथ तान्य कुन मॉलन तु सॉलन गॉमुत्र। वापस यिथ चायि पनुनिस गुसुल खानस मंज गुसुल करनु खॉतरु। पनुन म्वख्तु हार कोडुन तु लँज स्नान करनि। फॉरिग सपदिथ रूदुस नु म्वख्तु हार नॉल्य त्रावनुक कांह खयालय तु यिथु पॉठ्य गोस म्वख्तु हार अति तुलुन मँशिथ। शाम वख्तस छु राजु अँमिस वनान जि म्वख्तु हार कति छुय ? अमि विजि छु तस पनुन म्वख्तु हार याद प्यवान। वँल्य वँल्य चायि गुसुल खानस अंदर म्वख्तु हार अनुनि। अमा अति वुछुन नु कुनि ति। पँत्युम शाह गोस पथ कुन तु ब्रूँठ्युम ब्रॉह कुन। वापस यिथ छे राजस वनान जि म्वख्तु हार छुख तुलिथ न्यमुत। यि बूजिथ गव सु सख बेकरार तु राजु बायि लँज वुठन पँतरु। स्व छे फकत अथु मूरान। अमि विजि आव मँहलु खानुक्यन नोकरन चाकरन, दायन, च्वंजन तु बाकी मुलॉजिमन रजु गज करनु। मँहलु खानुक अख अख कून आव वुछनु मगर म्वख्तु हार आव नु कुनि ति अथि। बेयि दूह लँग्य दुबारु राजु सुंद्य कारंदु म्वख्तु हार छांडनि। कांह अखाह ति छुनु मटि ह्यवान। दून च्वन दूहन छांडनु पतु ति आव नु राजु बायि हुंद यि म्वख्तु हार कुनि ति अथि। यपॉर्य त्रोव राजु बायि ख्योन तु चोन। स्व लारेयि वुरनि तु वथरुनि। आँखुर आयि अँमीरन वँजीरन सुत्य मशवरु करनु पतु सॉरिसुय सलतनुतस खास कर राजदानि अंदर पारय दिनु जि युस अखाह राजु बायि हुंदि म्वख्तु हारुक पय दियि, या कुनि जायि लँबिथ दियि, सु यियि हॉथी करनु तु बेयि दिमोस खलते शॉही ति। यूताह वँरिथ ति द्राव नु राजु बायि हुंदि म्वख्तु हारुक कुनि तर। राजु सुंद्य हरकारु, सजोवुल, पुलसु अफसर तु सुराग रसान आँस्य म्वख्तु हार बाज बर आमद करनु खॉतरु जस्तु खॉज करान, मगर सोरुय बे सूद।

दपान अँथ्य शहरस अंदर ओस अख नादार शख्साह अख ताँज्य बटु नावुक। तस ओस नु जांह ति जीनिथ जँखिथ पूरान। शुर्यन न ओसुस बतु जूरान तु न जँट। अरनि अनुन तु परनि छानुन ओस तस गँरीब शख्सु सुंद मुक्कदर बन्योमुत, तवय ओस सु पनुनि जिंदगी निश आँजिज आमुत तु कुनि नतु कुनि बहानु ओस मरुन यछान। तँम्य ति आँस राजु बायि हुंदि अमि म्वख्तु हार लँबिथ दिनुच तु यनामु गीवनुच पारय बूजमुत्र, तु तसुंदि कौल ओस यि ताँज्य बटु सुंदि खॉतरु जिंदगी निशि आजाद सपदनुक अख जान मोक।

बादशाह संज पारय बूजिथ आव नु कांह अखाह ति ब्रोंह कुन जि सु दियि म्वख्तु हार लॅबिथ। अख ज़ु द्वह गछनु पतु द्राव तौज्य बट पनुनि आशनि पृछनु वरॉय तु वोत राज़ु दरबार। दरबानस वोनुन सु छु राज़स तसंजि रानि हुंद म्वख्तु हार लॅबिथ दिनु म्वखु तस समखुन यछान। राज़स आव यि पॉगाम वातुनावनु। तॅम्य द्युत होकुम जि फोरन कॅर्यून दरबारस मंज हॉजिर। राज़स निश पेश सपदनु पतु कोरुन तस गुल्य गॅडिथ इल्तिमास जि राज़, बु आस तुहँज पारय बूजिथ तु बु छुस वादु करान जि बु दिमु राज़ बायि हुंद म्वख्तु हार लॅबिथ। राज़ु गव यि बूजिथ शाद तु दोपुनस तेलि कमिच तौर छे। च्वंजव तु दायव वातुनॉव यि ख्वश खबर राज़ु बायि निश ति। तौज्य बटस आव वननु हरगाह सु राज़ु बायि हुंद म्वख्तु हार लबिथ दियि नु, तेलि क्याह सलूक गछि तस सुत्य करनु युन। तस ओस जिंदुगी तोस तुलमुत, अवु किन्य कोरुन राज़ु दरबारस मंज इकरार जि अगर सु म्वख्तु हार लॅबिथ दिनस मंज सतन द्वहन अंदर अंदर पनुन कौल पूर हेकि नु कॅरिथ, तस गछि गरदन दिनु यिन्य। गरु वॉतिथ वॅनिन सॉरुय दासतान पनुनि आशनि। स्व वॅछुस 'शिकस लदु! त्रे मा ऑसुय बंगु चेमुन्न? यिमन शुर्यन क्या बनी। येलि नु राज़ु मॅहलस मंज हरकारन तु सजोवलन ति म्वख्तु हार अथि आव, त्रे शिकस लदस कति यियी अथि। दर अस्ल ओसुय त्रे मोत नन्नानवान। खस तु यिथु तिथु व्वं फासि कूटिस। छुनथमु यथ पूत्य खेलिस वा?'

आशनि हुंज यि पद वननु पतु तोर तौज्य बटस काड्यन मंज फिकरि जि कोठन छु पॅज्य पॉठ्य अख त्युथ अतुर कोरमुत येमि निशि कांह बचन पाय छुनु। सु लोग व्वं अथ मूरनि तु ऑही तु वॉही करनि। ख्यन वन ति कति ओसुस, सु ति गोस मॅशिथुय। मोयुस गॅछिथ वोथ फुटमुत्यव क्वठ्यव तु च्चाव अॅकिस मॅशीदि अंदर तु ह्योतुन तॅती वदुन तु ब्रछुन। अॅथ्य मंज गॅयि यिथय पॉठ्य ज़ु चोर द्वह तु वादस ताम यूताह यूताह वक्तु छु कम रोज़ान, त्यूताह छु तौजी बटस क्वठ्यन जुव च़लान नीरिथ। व्वं ओसुस द्वयी दोह्य राज़ु दरबारस अंदर वॉतिथ फहि खसुन। अमि हॉबतु सुत्य लोग मॅशीदि अंदर विर्द करनि जि 'हतय ज़ेवी च़ नय फरहॅख, पगाह कति लगुहख फहि' ... 'हतय ज़ेवी च़ नय फरहॅख, पगाह कति लगुहख फहि'। अॅथ्य अॅकिसुय कथि छु तौज्य बट विर्द करान तु बाकु छटान। मॅशीदि नेबुर्य पकन वॉल्य ति छि अॅम्यसंज यि जलाफत करुन्य बोज़ान। व्वन्य ओसुस म्वख्तु हार लॅबिथ दिथ सु राज़स निश वातुनावनस मंज अकुय द्वह, बाकुय। तौज्य बट छु मॅशीदि अंदर युतुय योत वनान 'हतय ज़ेवी च़ नय फरहॅख, पगाह कति लगुहख फहि'।

क्वदरतुल कार अपौर्य पंच अलु गँब सियाह सराह अख। स्व ऑस महलस अंदर प्रथ दूह गँछिथ तति डुवन फश दिवान। तमि येलि मँशीदि नेबर्य किन्य तौज्य बटुन्य व्वखनय बूज, तमि ठँहरोव कदम। दितुन कन जि यि क्याह व्वखनय छे अँदरु गछान। यी बूजिथ चँज तस खवरव तलु मेच नीरिथ। हेरि ब्वन गोस गुमु स्नान। दोपुन खलास, म्यानि चूरि हुंद पय हय छु कस ताम लोगमुत। तौज्य बटुन्य यि व्वखनय बूजिथ चायि खूच्य खूच्य मँशीदि अंदर। अति वुछुन शख्साह अख रोबु कँबिलु बिहिथ वनान 'हतय जेवी चु नय फरहँख, पगाह कति लगुहख फहि'। यकदम पेयस परन प्यठ। दोपुनस 'हतु जू ख्वदायि सुंदि पासु मतु हेतु म्योन नाव। बु हा जू लगय बलायि। कोठ मतु खालुनावतन फहि कूटिस। बु वंदय रथ। राजु बायि हुंद म्वख्तु हार दिमय बु छवपु कँरिथ यूर्य अँनिथ। अमा म्योन मतु वनतु काँसे जि जेवि ओस यि म्वख्तु हार न्युमुत।' तौज्य बट छु अँछ वँटिथुय यि सोरुय कँह बोजान। तस खँच अँदुर्य किन्य वॉलिंज बोठ। क्वठ्यन फ्यूरुस होश तु बशाशत सपजुस पाँदु। स्यठुहय गॉज कँरिथ वोथुस 'वोथ गछ दफाह येति वँल्य वँल्य तु म्वख्तु हार दि दवान दवान अँनिथ। नतु खालुनावथ पगाह फहि।' 'हतु जू, जुव वंदय। चु कर तु ख्वदायि सुंदि पासु छवपु। हमी दमु दिमय म्वख्तु हार यूर्य अँनिथ' जेवि वोनस ओश हारान हारान। यि वँनिथ द्रायि स्व म्वछि जु वँटिथ तु गरि जोराह गँछिथ ओनुन राजु बायि हुंद म्वख्तु हार तु त्रोवुन तौज्य बटस ब्रॉह कनि। तौज्य बटन तुल म्वख्तु हार तु त्रोवुन चंदस। अमा जेवि वोनस 'ग्वडु वन च्ने किथु पाँठ्य ओसुय यि म्वख्तु हार चूरि ओनमुत'। स्व वँछुस 'हतु जू वँछ कोठि लानथ तु यि वशफु गोम। बु हा जू गँयस राजु बायि हुंदिस कुठिस डुवन फश दिनु बापथ तु पतु कौरुम तसुंद गुसुल खानु साफ। तँती वुछुम यि म्वख्तु हार किलिस अवेजान। दिलन कँडनम व्वठ तु शेतान चाम नस्ति किन्य तु म्योन स्नानु कुठिस मंज अँचिथ तु म्वख्तु हार चूरि न्युन छुनु काँसि अँकिस ति च्ने वरॉय पय।' तौज्य बटन दोपुस 'अछा तु नेर येति। व्वं छु मे राजस चु बचावनु बापथ अपुज मपुज वनुन।'

ज्यव गर कुन नेरनु पतु छनु तौज्य बटस पछ यिवान जि यि ति छा पोज मे लोब राजु बायि हुंद सु म्वख्तु हार युस नु राजु सुंदान सजोवलन ति अथि आव। मँशीदि मंजु नीरिथ वोत गर तु नेबरय लॉयिन आशनि बडि हटि क्रख जि 'हतय यिछी तिछी, छुयय कँह ख्यनु खॉतरु तयार कोरमुत। मे हय छे ब्वछि सुत्य अँछन जून लँजमुच।' स्व वँछुस 'अवु, च्ने छुय ना पगाह फासि खसुन, तवय छुय यि ताव। तावन ज़दु यिमन शुर्यन हुंदुय सूचिजिहे!' तौज्य बट वोथुस 'अज हय गव तौज्य बटुन कान स्योद। वुछ मे क्याह छु

यि अथस मंज। योहय गव राजु बायि हुंद म्वख्तु हार।' आशनि तसंजि येलि पॅज्य किन्य तसुंदिस अथस अंदर म्वख्तु हाराह जर्कु त्रावान वुछ, तस आयि नु पछुय जि यि छा पॅज्य किन्य राजु बायि हुंदुय म्वख्तु हार तु पॅज्य पॉठ्य छा यि म्यॉन्य खानु दारन लॅबिथ ओनमुत। तस खोत ब्वकव पेठ्य माज। तॉज्य बट वोथुस 'व्वन्य हय फीर्य सॉन्य ति दूह।' पगाह द्राव राजु दरबारस कुन तलवार हॅलिस गँडिथ तु राजस ब्रोंह कनि वॉतिथ कोरुन राजस अर्ज जि राजु तुहंजि राजु बायि हुंद म्वख्तु हार ओस नु दर अस्ल काँसि ति मनोशन चूरि न्युमुत बॅल्यकि ओस अँक्य कावन स्रानु कुठिकि रोशन दानु किन्य तुलिथ न्युमुत। मे किथुवॅकन्य कोर यि म्वख्तु हार कावस निशि हॉसिल, ति मतु पृछ्यतव।' राजु गव म्वख्तु हार वुछिथ स्यठाह ख्वश। तॉज्य बटस आव नु सिर्फ वादु मुतॉबिक यनाम तु खलत शॉही योत दिनु, बॅल्यकि आस राजु दरबारस अंदर थोद मनसब ति दिनु।

★ ★ ★

तकदीर तु रोजे अब्बल

वनन वोल छु बावथ करान जि यि ओस बादशाहा अख। दूह अकि द्युत तँम्य होकुम जि फलॉन्य दूह गछि नु कांह अखाह पनुनि गरु मंजु दोह्य दूहस गरु न्यबर नेरुन। अगर कांछा अमि हुकमुच खलाफ वर्जी करि, सु यियि रामु होन्यन त्रावनु। अमा तमे दूह द्राव पनुन्य केंह अँमीर वँजीर ह्यथ शिकारस। दूहकिस दूहस रूद जंगलस अंदर शिकारस सुत्य आवुर। दूह लूसिथ द्राव पनुनि राजदानि कुन वापस। शाम वख्त युथुय सपुद, अँमीरन वँजीरन वोनुन तोह्य पँकिव तु बु दिमु न्यमाजि सँजदाह। गुरि प्यठु ब्वन वँसिथ थोवुन सु अँकिथ कुन तु पानु सपुद न्यमाजि सुत्य महव। युथुय न्यमाजि पँरिथ म्वकल्यव तु खसिहे दुबारु गुरिस, अति वुछुन गुर चोलमुत। फिकराह वँरुन जि बनि क्याह? यपॉर्य ओस मँजिलु ज्यूठ, राजु संज तनहॉयी तु कुन्यर। बडि पायि ओसुन अमि दूह लुकन गरन मंज बंद रोजनुक होकुम द्युतमुत। व्वन्य हय करि तु करि क्याह? चारो नाचार गँछिथ लोग ब्रॉह कुन व्वखली कदम दिनि। पकान पकान वोथुस खयाल, अगर काँसि रोटनस, तेलि क्याह बनि? तु कस अँकिस बिहि जि बय क्याह छुस येमि शहरुक बादशाह? अमे खँदशु च्राव बँस्ती मंज अँचिथुय अँकिस गर वॉल्य सुंदिस गुपन गानस मंज। दोपुन राथ टपावव येती तु ती रोजि जान। अँथ्य मंज वुछिन गुर्य सवार जोराह चमु खमु पकान। युथुय तिम अथ गरस निश वॉल्य, गुर्यव प्यठु ब्वन वँसिथ च्रायि अथ मकानस अंदर। केंह काँल्य पतु द्रायि वापस तु लँग्य दुबारु गुर्यन खसनि। अमा बादशाह द्राव वुछु तु रूदुख ब्रॉठु कनि। दोपुनख 'त्वहि छुव तसुंद कसम येम्य तोह्य पाँदु छिवु वँर्यमुत्य। मे वँन्यतव तोह्य कम छिवु तु योर क्याह करनि आँसिवु आमुत्य?' बादशाह सुंद कसम दिनु पतु वोथुस तिमव मंजु अख तु दोपुनस 'बु गोस तकदीर।' बादशाह वोथुस 'बु क्याह करनि ओसुख योर आमुत?' सु वोथुस तोरु 'येमिस गर वॉलिस छु वुन्य वुन्य अख नेचुव ज़ामुत। येलि योहय बचु बालिग सपदि, फलॉन्य शहरुक अँमिर कँबीर दियि तस पनुन्य कूर नेथुर। यँहय कथ आँसुम अँमिस साह्यबे औलादस वनुन्य।' अमि पतु वोथुस दोयुम शख्स जि मे छि रोजे अज़ल वनान। बादशाह वोथुस 'त्रे क्याह ओसुय अति करुन?' रोजे अज़लन दोपुनस, 'युस यि बचु ज़ाव, अँमिस येलि खांदर यियि करनु, तु महारेन्य ह्यथ आसि गरु कुन वापस यिवान, बिचॉरिस वति अंदर पेयस सुह तु दियस हँटिस तल दाम। ती ओसुस बु अँमिस साह्यबे औलादस वनुनि आमुत।' अमि पतु गँयि यिम दूशवय गुर्य सवार गाँब।

यि तमाशाह वुछिथ गव बादशाह स्यठाह हॉरान ति तु परेशान ति। दोपुन 'बारे इल्लोही, यि तकदीर तु रोजे अज़ल क्याह गव, फिकरे छुम नु तरान।' यि वाकह बननु पतु चाव दिल वॉरिथ गर वॉलिस निश तु द्युतुनस मुबारक। गर वोल वोथुस च्चु कुास छुख? यि वोथुस योरु 'बुय छुस येमि शहरुक बादशाह। बु ओसुस शिकारस गोमुत। वापसी प्यठ लोगुस न्यमाज़ परनि, अदु पॅत्य किन्य च्चोलुम गुर ति तु अँमीर वॅज़ीर ति। योर वॉतिथ चायोस चॉनिस गुपन गानस मंज़ राथ टपावनु म्वखु। अमा शख्स जोराह वुछिम गुर्न प्यठ योर अज़ान। तिमव यि केंछा मे नेबरु वोन, ति आसिहे च्चे ति वोनमुत। व्वन्य छुय च्चे ख्वदायि सुंद कसम यथ कथि जि येमि दूह च्चे येमिस बचस बालिग सपदिथ खांदर आसि करुन, तमि दूह अगर बु जिंदु ओसुस, मे ति कॅर्य जि शेछ, युथ अँम्य सुंजि बरॉच सुत्य बु ति पनुन लाव लशकर ह्यथ अँम्य सुंदिस खांदरस अंदर शॅरीक सपदु।' बचु सुंद्य मॉल्य द्युत बादशाहस वादु जि ती सपदि। राथ अति गुज़ारनु पतु द्राव सुबहस बादशाह राजु महलस कुन वापस। अँमीर वॅज़ीर सपदिस अँद्य अँद्य जमह, अर्ज कोरहस जि बादशाह सलामत कति आँस्य रातस? सु वोथुख, मे वुछ अज़ रोजे अज़ल तु तकदीर। तिमव यि केंछा वोन ति छुम शुराहि सदाहि वुहुर्य सरु करुन, अगर जिंदु रोजु।

दूह दूह गव गुज़रान तु वोत अकि दूह पादशाहस तस गर वॉल्य सुंद सालु कार्ड येति तँम्य तकदीर तु रोजि अज़ल वुछमुत ओस। सालु चिठि अंदर ओस बादशाहस अर्ज करनु आमुत जि फलॉन्य दूहस प्यठ छु महाराज़स बराथ ह्यथ फलॉन्य शहर कुन रवानु सपदुन। बादशाहस ओस चूँकि तकदीर तु रोजे अज़लुक वनुन सरु करुन, लिहाज़ा सपुद सु अँमीर वॅज़ीर तु लाव लशकर ह्यथ बरॉच सुत्य गछनु खॉतरु तयार। आँखुर वोत सु बचु महाराज़ु बँनिथ होवुर तु वापसी प्यठ छि महारेन्य महाराज़ु शॉही ह्यफाज़तस मंज़ मँज़िलु पतु मँज़िलु पकुनावनु यिवान। वति लँज आँथ्य कॉफिलस राथ। महारेनि महाराज़ु सुंदि खॉतरु आव अख अलग खमु दिनु तु अथ अँद्य अँद्य आव तमि तँरीकु फोज थावनु युथ ज़न नु मँछ ति ओर हेकि अँत्रिथ। दोयिमि अंदु लागुनोव बादशाहन ज़बरदस्त जश्नु। अमा बादशाहस ओस रोजे अज़लु सुंदि वनुनु मुताँबिक सुहु सुंदि यिनुक खदशु। यपाँर्य ओस महाराज़स ति पूर यकीन जि यिछि हिशि फोजी ह्यफाज़ँच अंदर कपाँर्य हेकि सुह यिथ। क्वदरतुक कार, महारेन्य वँछ महाराज़स कुन जि तमि छुनु ज़ांह ति सुह वुछमुत। महाराज़ु वोथुस, 'क्याह च्चे छुथ ना ज़ांह ति सुह वुछमुत तु न तसुंज शक्ल ति?' महारेन्य वँछुस तोरु, 'न।' तान्य हेच महाराज़न पनुनि महारेनि सुहु सुंज शक्ल हावन्य। तँम्य बनाव अँती ज़मीनस प्यठ सुहु सुंज शक्ल। ख्वदायि सुंद करुन जि अँथ्य सुह शक्लि बन्योव

पँज्य किन् जिंदु सुह, येम्य महाराजस कुनी जेफ्य छुन्य तु द्युतुनस हँटिस तल दाम। यि वुछिथ लँज महारेन्य पान मारनि, मस कडनि तु वरदन पलव च़टनि। खुमु मंजु महारेनि हुंद शोर शर बूजिथ वँछ नेबर्य किन्य अफरातफरी। अँमीर, वँज़ीर तु बादशाह ति आयि लारान जि कसु क्याह छु? यूथुय तिम महारेन्य महाराजु सुंदिस खुमस चायि तु महाराजु खूनस अंदर छूठ दिवान वुछ, तिम पेयि असमानु। बादशाहन प्रुछ यि क्याह सपुद तु सुह कर्पोर्य चाव योर? स्व वँछुस वदान वदान, पादशाह सलामत! मे ओस नु ज़ांह ति सुह वुछमुत तु वोनुम महाराजस। यि बोज़नु पतु बनोव महाराजन मेचि प्यठ मे हावनु खौतरु सुहु संज तसवीर तु युथुय सुह तयार गव, सु बन्योव पँज्य किन्य जिंदु सुह तु अकय जेफ्य त्रौवन महाराजस तु द्युतुनस हँटिस तल दाम। महाराजस खून चनु पतु गव सुह म्यान्यव अँछव निशि गौब तु तसंज तसवीर रूज तसवीरुय हिश। यि हाल वुछिथ तोर बादशाहस फिकरि जि रोजे अज़ल छु ज्यनु ब्रौटुय बंदस मुक्कदर आसान बन्योमुत।

★ ★ ★

रंगर कूर

दपान अकि दूह आसु यारबल काकनि जोराह यारबलस प्यठ पानुवॉन्य कथन मेठेमचु। अख ऑस बेयिस वनान जि राथ द्युतुनम खानुदारन नहकय पहकय मार। वुनि ऑस स्व पनुन बिदाद वनानुय जि अख ख्वश शंकील तु फटु फटु करवुन्य अनहॅरिश रंगर कूराह ति वॉच यारबलस प्यठ आबु नोट निनि। हमसायि बायि हुंद बिदाद बोज़नु पतु द्युतुन यल तु दोपुन 'सु कुस मर्द वॅर्यज्यन युस पनुनि आशनि शलख करि तु स्व क्वसु ज्ञाननु वॅर्यज्यन ख्वसु खानुदारस शलख करनुक मोकु दियि।' अमि विजि ओस अमि शहरुक शाहज़ाद पनुनिस वॅज़ीर ज़ादु यारस सुत्य हवा खूरी करनि द्रामुत तु तिम ति ऑस्य छायि हॅलिस कुन रूज़िथ रंगर कोरि हुंज़ कथ बोज़ान। वापस फीरिथ वोन शाहज़ादन वॅज़ीर ज़ादस - रंगर कोरि छु पानस प्यठ सख नाज़। दपान छुस अॅमिस दिमु हा हॉविथ जि मर्द किथु पॉठ्य हेकि कुनि ति बहानु वरॉय आशनि शलख कॅरिथ। रंगर कूर द्रायि आबु नोट ह्यथ गरु कुन। बादशाह ज़ादु तु तसुंद यार ति द्रायि अॅमिस पतु पतु यि सरु करनु बापथ जि रंगर कूर कति छि रोज़ान तु मोल कुस छुस। रंगर कूर यथ गरस अंदर चायि, सु थोवुख वनि तु मॅहलु खानस मंज़ वॉतिथ ब्यूठ शाहज़ाद कुठ त्रोपरिथ। कथ वॉच बादशाहस ताम। अॅमीरन तु वॅज़ीरन ति लॅज खबर। अमि पतु आव शाहज़ादस वननु सु कथ प्यठ छु कुठ त्रोपरिथ बिहिथ? शाहज़ादन सूज़ुख शेछ जि तस छे खांदर करनुच खॉहिश। येलि यि बादशाहन बूज़, तॅम्य सूज़ शाहज़ादस पॉगाम जि ठीख छु, वुछेन कांह पादशाह कूराह तु शाहज़ादस करव ठकु ठकु नेथुर। लिहाज़ा त्रॉविन सु कुठ त्रोपरिथ ब्युहुन। येमि विजि बादशाह सुंद पॉगाम शाहज़ादस वातुनावनु आव, सु रूद तोति कुठ त्रोपरिथुय। तस आव दुबारु वननु जि सु कस बादशाह सुंजि कोरि सुत्य छु नेथुर करुन यछान? शाहज़ादन सूज़ुनस शेछ जि तस छु फलॉन्य रंगर कोरि सुत्य नेथुर करुन ख्वसु फलॉन्य रंगरु सुंज कूर छे।

बादशाह गव यि बूज़िथ परेशान जि कति शाहज़ाद तु कति रंगर कूर? शाहज़ादस आव फिकरि तारनु जि यि रिश्तु रोज़ि नु शॉही आदाबन तु शाहानु लसनस बसनस क्युत जान। कांह पादशाह कूराह वॅर्यतन पसंद, तॅस्य सुत्य करोस दुम दामु खांदर। अमा शाहज़ादन वॅनिनख क्वकरस कुनी जंग। बादशाह गव शाहज़ाद सुंद ज़िद वुछिथ मजबूर तु ऑखुर आव रंगुर दरबारस मंज़ तलब करनु तु तस आव वननु जि शाहज़ाद छु तसुंजि

कोरि सुत्य नेथुर करुन यछान। यि बूजिथ गव रंगुर हँक्य नतु बँक्य। पादशाहस वोनुन गुल्य गँडिथ, पादशाहम! यि कथ हेकि नु वँनिथ तिव्याजि कोठ छु अख अदना शख्स। म्योन बितुर कति चु पादशाहस सुत्य हमसँरी करनस। रंगरस आव अमि पतु वननु जि यि छे शाहजादु संज खॉहिश। तस छे फकथ चॉनी कूर टारि खँचमुच। यपॉर्य ऑस नु रंगरस पछुय यिवान जि यि छा पजर ? ह्यवान दिवान गव रंगुर नेथुर दिनु खॉतरु आमादु। यि बोजन पतु द्राव शाहजादु कुठि मंजु। दूह आयि गंडनु तु खांदरुक्य सॉरी लवॉजिमाथ आयि पूर करनु, तु बडि हशमतु तु ठकु ठकु सान आव शाहजादस रंगर कोरि सुत्य नेथुर करनु। अमा शाहजादस ओस ब्याखुर्य मक्सद। सु गव यी जि सु दियिहे रंगर कोरि हॉविथ जि खावंद हेक्या पनुनि आशनि कुनि ति हालस मंज शलख कँरिथ।

दपान युथुय शाहजादस कुठ द्युतुख, तँम्य कोड खवरव मंजु कौंशि खवर पनुनि आशनि शलख करनु म्वख। अमा स्व ऑस स्यटुह्य गाटुज तु हुशार। शाहजादस अथस अंदर कौंशि खवर वुछनु पतु वोन तमि शाहजादस, 'अज छे सानि खांदरुच ग्वडनिच राथ, लिहाजा नु अज मार कँह ति। यि गव पगाह प्यठ त्रावुन।' यि बूजिथ त्रव शाहजादन कौंशि खवर अथु मंजु पथर तु खोत पलंगस प्यठ शंगनु बापथ। दोयिमि दूह समखुस वँजीर जादु। पृछुनस क्याह कोरुथ ? पनुनिस मकसदस मंजु गोखु कामयाब किनु न ? शाहजादु वोथुस 'तमि हा वोननम अज छे ग्वडनिच राथ।' वँजीर जादन दोपुस 'थाव सॉ, च्ने छी तस निश होरमुत। व्वन्य वनतम शामस कुस बहानु करहस शलख करनु बापथ?' अथ ह्योकुस नु शाहजादन कँह वँनिथ। वँजीर जादन वोनुस 'बोजु बु वनय च्नु क्या बहानु कँर्यजि अज मार दिनस मंजु।' सु वोथुस, 'अवु वन जल्द क्याह हीथ ह्यमस?' वँजीर जादन वोनुनस, 'जनानन छु जर ज़ेवर तु गहनु पाथ स्यटुह्य टॉठ्य आसान। येमि विजि शामस बॉग्य कुठिस मंजु शंगनु बापथ अचख, तस वँनिजि पनुनि माल्यनिक्य तु वॉर्यविक्य तमाम गँहनु तु ज़ेवर अन मे निशि दजि अंदर गँडिथ। स्व हा अनी नु हरगिज ति। गँहनु पातन हुंद नाव बूजिथुय तुलि स्व तम्बलु। च्ने यिथी पानय तस शलख करनुक अस्ल बहानु अथि।' दोयिमि रॉच कुठिस मंजु अँचिथुय कोर शाहजादन योहय पॉथुर। अमा वुनि ओस सु यि वनॉनी जि रंगर कोरि थॉव्य पनुन्य सॉरी गँहनु तु ज़ेवर रुमालि मंजु गँडिथ तस ब्रॉठ कनि तु तस शलख करनुच न वॉच नोबत तु न द्युतुनस तमि मोक्य। सुबहस येलि वँजीर जादन शाहजादस प्रुछ क्याह कोरुथ, सु वोथुस 'हता हे! बु ना ओसुस नु वुनि पूर पॉठ्य वँनिथ म्वकल्योमुतुय जि तमि बिचारि थॉव्य पनुन्य सॉरी गँहनु मे ब्रॉठ कनि।' सु वोथुस, 'थाव

साँ, च़े होरुथ तु तमि ज़ून। च़ु ह्यकुहन नु स्व ज़ांह ति कोबू कॅरिथ तु दूहय छय च़े तसुंज ग्वलॉमी करुन्य, तिक्व्याज़ि स्व छे पॅज्य किन्य गाटुज।’

युपॉर्य ओस समंदर अपारि बेयिस शहरस अंदर ततिकिस बादशाह सुंज़ि कोरि शर्त थोवमुत ज़ि युस अखाह तस त्रे कथु करनावि, तॅस्य सुत्य करि स्व नेथुर। युस हारि, तस यियि गरदन दिनु। दपान कम कम गंदर, शाहज़ादु, ख्वश लोठ नव जवान तु आशक ऑस्य तस सुत्य यि शर्त हारनस मंज़ मारु गॉमुत्य तु अमिच खबर ऑस तरफातन वॉंनमुच़। अमे शोकु द्राव रंगर कोरि निश हार ख्यथ अॅम्यसुंद रून शाहज़ादु तु पुलु पोतव गॅडिथ शाहज़ादु ज़ेनुनि। नेरनु विज़ि थोवुन पनुन मोल बे खबर। अमा रंगर कोरि वोनुन ज़ि ‘म्यानि वापसी प्यठ गछ़ख च़ु अॅकिस हलाल बच़ु सुंज़ मॉज बनेमुच़ आसुन्य तु बेयि गछ़ी शाहानु मकानु तु तथ ब्रॉंठु कनि ख्वशनुमा बाग आसुन। यिम ज़ु चीज़ अगर च़े निशि आसन नु, च़ु यिख मारु वातलन हवालु करनु।’ ज़नानि हुंद गॅहनु पात तु ज़र ज़ेवर तुलुन पानस सुत्य। रंगर कूर वॉंन अमि पतु पनुनिस मॉल्य सुंद गरु वापस। रंगरन येमि विज़ि पनुन्य कूर अथु छेनी वापस यिवान वुछ, सु लोग पान मारनि। अमा कोरि वोनुनस, ‘बबा! गम मु बर। वुछ ख्वदा क्या करि?’

शाहज़ादु छु हुपॉर्य वारियाह मॅज़िलु तय कॅरिथ बेयिस अॅकिस पादशाह सुंदिस शहरस अंदर वातान। अॅमिस पादशाहस ति ऑस कोरि हना आफताबुक अड हिश। येमि विज़ि यि शाहज़ादु बादशाह सुंदि महलु खानु नेबर्य किन्य ओस पकान, तमि वख्तु ओस बादशाह दॅरीचस प्यठ बिहिथ नेबर्युम नज़ारु वुछान। अख ख्वश जमाल नवजवान वुछिथ गोस गुमान ज़ि यि तु गछ़ि कुसताम शाहज़ादु आसुन। नाद दिथ खारुनोवुन पानस निश। वोनुनस, ‘गोबरा! च़ु कति आख तु कोत कुन गछ़ख तु इरादु क्याह छुय?’ यि वोथुस ‘समंदरु अपारि फलॉन्य बादशाह सुंज़ि कोरि छु शर्त थोवमुत, सुय ज़ेनुनि छुम गछुन।’ यि बोज़नु पतु वोथुस बादशाह ज़ि ‘अमि खयालु निशि अगर बाज़ यिख, ती छु जान। अज़ ताम गॅयि च़े हिव्य कम कम शाहज़ादु तोर। अदु वापस आयि नु कॅह।’ शाहज़ादन दोपुस ‘बादशाह आलम! मे छु पनुनि जायि यकीन ज़ि बु करुनावन स्व कथु। बेयि वुछुहा बु तस क्याह छु पनुनि जायि गुमन्ड।’ बादशाह वोथुस योरु ज़ि ‘मे छनु च़े अंदर पादशाह ज़ादन हुंज़ श्वद ब्वद लबनु यिवान, बेयि छुम नु ब्यहान च़ु क्या गछ़ख नेथरु वरॉय आसुन।’

शाहज़ादन वॅन्य तस अमि पतु पनुन्य सॉरुय दासतान। रंगर कोरि हुंद यारबलस प्यठ पानस थज़र द्युन, तस सुत्य पतु नेथुर करुन, तस कौंशि ख्वरु सुत्य पतु शलख करनुक इरादु करुन, तस माल्यनिक्य तु वॉर्यविक्य गॅहनु पात हेन्य, यि वनुन ज़ि वापसी

प्यठ गछख हलाल बचु संज मोज बनेमुन्न आसुन्य, गर्ज तमाम कुसु कोरुन बॉनु बॉनु तस निश बयान। यि बूजिथ तौर बादशाहस फिकरि जि रंगर कूर गछि स्यठहुय गाटुज तु पोरुश आसुन्य, अउ किन्य सपदुस रंगर कोरि सुत्य नेथुर करनुक शोक। शाहजादस मुतलिक ज़ोनुन यि गछि मुलु बेकल आसुन। अमि पतु द्युतुन होकुम जि यि नवजवान गछि तिलुवॉन्य वानस युन लागनु। पनुन्य खॉहिश तु शोक पूर करनु बापथ सूजुन पनुन अख वॅज़ीर रंगर कूर अननु खॉतरु तसुंदिस शहरस मंज़। अखतुय दितिनस तसुंद गॅहनु पाथ ति सुत्य। वॅज़ीर द्राव रंगर कोरि हुंदिस शहरस कुन। तोत वॉतिथ कडनोव तॅम्य तसुंद पय पताह तु तस निश वॉतिथ दोपुन तस जि सु छु फलॉन्य शहरुक सोदागर। 'चोन गाटुजार बूजिथ आस च्चे सुत्य नेथुर करनुकि शोक।' तसुंद कलाम बूजिथ दोपुस रंगर कोरि जि 'चु छुख अख परदेसी आसनु किन्य येति अख व्पॉड्य। न छय येति पनुन्य प्यँड पुरन तु न ज़मीन जागाथ। गवडु कर यिम चीज़ हॉसिल तु बनाव म्यानि बापथ हावुन तु बावुन लायख बुंगलाह। ब्रॉह कनि थावुस ख्वशनुमा बागु हन तु अदु गव च्चे सुत्य नेथुर करनु।' वॅज़ीरन कोर रंगर कोरि हुंद यि शर्त कबूल तु ह्योतुन अख जॅमीनि प्लाटाह मॅल्य। कमु काल गॅछिथ करनुवुन फर्शि फरोश कॅरिथ ऑलीशान बुंगलाह तॉमीर। स्व गहनु फुटुज दिचुन रंगर कोरि ख्वसु शाहजादस ह्यनु ऑस आमुन्न। स्व सपुज़ यिम गहनु वुछिथ हॉरान। वॅज़ीरस दोपुन 'यिम गॅहनु कति छी च्चे अॅन्यमुत्य।' सु वोथुस, 'छख ना बोज़ान, सॉनिस बादशाह सलामतस निश आव येमी शहरुक अख शख्साह। तस ओस समंदरु अपारिकिस बादशाह संज कूर ज़ेननि गछुन। अमा पनुनि बेकलॉज़ी किन्य आव तिलुवॉन्य वानस लागनु तु तॅस्य निश ऑस्य यिम ज़ेवर।' रंगर कूर सपुज़ तसुंद हाल ज़ाननु म्वखु बेताब तु वॅज़ीरस हेचुन खांदर करनस मंज़ केंचन दूहन हुंज़ मोहलथ तु सु थोवुन नॅविस बुंगलस अंदर पनुनिस इन्तिज़ारस तु पानु द्रायि मर्दानु लिबास लॅगिथ खावंदु सुंद हाल मोलूम करनु बापथ। गुरिस प्यठ सवार सपदिथ मँज़िलन प्यठ मँज़िल तय कॅरिथ वॉन्न तथ शहरस, येति खावंद तिलु वॉन्य वानस लागनु ओस आमुत। येलि रंगर कूर मर्द बॅनिथ अतिकिस बादशाह सुंदिस मॅहलस नेबुर्य किन्य पकान ऑस, बादशाह ओस तमि विज़ि ति दॅरीचस प्यठ नज़ारन हुंद हज़ तुलान। तस युथुय तस ख्वश जमाल नवजवानस प्यठ नज़र पेयि, रॅहिथ गव। दोपुन म्यानि शाहजादि अगर खावंद शूबि, बस योहय शूब्यस। बुलॉविथ खारनुवुन पनुनिस मॅहलु खानस मंज़ तु स्यठहुय खॉतिर कॅरिथ पृछुनस जि 'ऐ जवानु, च्चे कति प्यठु आख तु कथ शहरस कुन छुय गछुन।' रंगर कूर वॅछुस 'बु छुस फलॉन्य शहरुकिस बादशाह सुंद शाहजादु तु समंदर अपारिकिस बादशाह संज स्व कूर

छम ज़ीनिथ अनून्य येमि यि शर्त छु थोवमुत जि युस अखाह तस त्रे कथु करनावि, तस सुत्य करि स्व नेथुर।' तसुंद गुप्तार बूजिथ सपुद पादशाह दिल ओजुर्दु, अवु किन्य जि यि यियि नु तोरु जिंदु वापस। बादशाह वोथुस 'ऐ शाहज़ादु! यि खयाले खाम छुन तु द्यमागु मंजु केंडिथ। तति गॅयि अज ताम च़े हिव्य कॅहिया शाहज़ादु मारु। च़ु योदवय येती करार करख, बु दिमनय पनुन्य कूर नेथुर्य, बेयि करय हकूमथ च़ेय हवालु।'

रंगर कोरि दोपुस 'बादशाह सलामत! मे छुनु चानि शाहज़ादि सुत्य नेथुर करनस कांह ति एतिराज। अमा ग्वडु अनन समंदरु अपारिकिस बादशाह सुंज कूर ज़ीनिथ। मे छु अहद कोरमुत जि कुनि ति कुमतस प्यठ अनन स्व ज़रूर।' बादशाह वोथुस 'अदु यि ति गव ज़बर। च़ु छुख यूताह ज़्यूठ सफर केंडिथ थोकमुत। ज़ु पांछ दूह रोज़ येती युथ आराम ह्यकख कॅरिथ, तिक्याजि बुथि ति छुय वारियाह सफर तय करुन।' रंगर कूर सपुज अथ प्यठ रॉजी। अति रूजिथ वॅछ स्व पादशाहस जि 'बु वुछुहा चोन महल तु अम्युक औंद पोख।' सु वोथुस 'अदु च़े छुया कुनि कुस्मुक ठाख।' अमि पतु लॅज स्व महल खानु वुछनि तु अँथ्य मंजु पेयस तिलु वॉन्य वानस कुन नज़र अति वुछुन पनुन खावंद तिलु वॉन्य वानस दांदु बदलु लगावनु आमुत। तस ओस अकि हालु ब्याख हास सपुदमुत। मस ओसुस कनव पेठ्य वोथमुत। नम ओसिस ज़ेठेमुत्य तु हुबु किन्य ति ओस वोथमुत। बादशाहस कोरुस अर्ज, 'पादशाहम! यि नवजवान बिचोर छु साने शहरुक। गरस अंदर छुस बुडु माजि सख बुर हाल। यि कथ प्यठ छुवॅन दांदस बदलु लोगमुत।' बादशाह वोथुस, 'अँम्य छु अँकिस दाना तु गाटजि कोरि सुत्य मज़ाक कोरमुत तु तस छुन दगा द्युतमुत।' यि वॅछुस 'अछा, म्यानि म्वखु कॅड्यतोन येमि अज़ाबु मंजु। अखतुय निमुहन बु पानस सुत्य अथु डखवुन तु वापस यिथ करहन माजि हवालु। तस यियिहेस अन्यन अँछन गाश।' बादशाह वोथुस 'कांह एतिराज छुनु, चानि मूजुब करोन वुन्य आज़ाद।' अमि पतु आव तस मस कासनु, स्रान करनु तु नोव लिबास लागनु। बेयि दूह द्रायि यि रंगर कूर यि जवान ह्यथ पनुनिस मँज़िलस कुन। केंचन रॉचन तु दूहन हुंद सफर तय करनु पतु वॉत्य यिम अँकिस म्यवु बागस अंदर। अति लॅजुख राथ तु अँमिस वोनुन जि 'बु मर्द कॅह छुस नु बॅल्यकि छस अख सियाह सर। मे क्याजि छु यि मरदानु लिबास लोगमुत, अथ अंदर छे चॉन्य बजॉयी। बु नय यि ति करुहा, च़ु कति म्वकलुहॅख तिलु वॉन्य दांदु सुंद्य पॉठ्य लमनु तलु। अमा म्योन यि राज़ थॉव्यजि राज़ुय। योदवय अथ फाश करख, पानसुय वाती च्वखसान।' अति न ओस आदम तु न आदम ज़ाद। यि मोकु गॅनीमथ ज़ॉनिथ कोर यि रंगर कोरि पानस सुत्य हमबिस्तरी करनस प्यठ मजबूर। तु अमि विजि छे रंगर कूर

शाहज़ाद सुंज़ि ओंगजि मंज़ु वॉज कॅडित पनुनि ओंगजि मंज़ु त्रावान। ख्वदायि सुंद कार, जि अमी वख्तु लोग रंगर कोरि बचु डम्ब। अमि पतु छे अँमिस शाहज़ादस गोब नैदुर प्यवान। अमा रंगर कोरि छि नैदुर दँज़मुन्न तु अँथ्य मंज़ु चाव अमि बागुक मॉलिक ब्याख अख शख्साह सुत्य ह्यथ। यिमन दूशवन्य आँस अथन मंज़ु लशि बडर। युथुय यिमव रंगर कूर तु शाहज़ाद अति वुछ, छिँहख तोह्य क्याह येति करान। रंगर कोरि वोनुनख 'अँस्य छु मुसॉफिर। येति लँज राथ तु तवय चायि योर लर त्रावनि।' बागुक मॉलिक वोथुख 'असि छु येति बागस मंज़ु मांछ गन। यि छु दूहलि असि बुछिथ त्रावान तु अमि मंज़ु मांछ कडनुक छुनु सवालुय कांह।' रंगर कूर छख वनान 'ख्वदायि सुंदि पासु मतु ज़ॉल्युतोन यि मांछ गन। आँखुर यिमन ति हय छु जुव, त्वहि क्याह कोरनव। यिम पाफ मतु हेयतव।' अमा यिम छिस नु हरगिज ति मानान। यि रूज़ुख योरु सवाल दिवान, 'मतु हेयतव मांछ तुलर्यन हुंद खून।' आँखुरकार सपुद्य यिम ति मांछ गन न ज़ालुनस प्यठ रॉज्य तु द्रायि बागु मंज़ु वापस। रंगर कूर सपुज ख्वश जि तसुंदि ज़ारु पारु करनु सुत्य बचोव मांछ गन।

अहँदि बागु मंज़ु नेरनु पतु सपुद मांछ गनुक मोकल नमूदार तु रंगर कोरि कॅरुन आँही। दोपुनस 'चानि सुत्य बचोस बु दज़नु निशि। च़ नय येति आसुहँख, मे थविहे बागुक मॉलिक बुजिथ।' अमि पतु छुस यि मोकल वनान, 'अछा त्रे कोत छुय गछुन।' स्व वँछुस समंदर अपारिकिस बादशाह सुंज़ कूर ज़ेननु खॉतरु छुस गरि द्रामुत।' यि बूजिथ वोथुस मोकल, 'म्योन अगर बोज़ख, तोर न गछनुय गव जान। तिक्याजि तोरु यिख नु जिंदु।' रंगर कोरि दोपुस, 'बु आस यूताह मँज़िलु च़ँटिथ, बु कति हेकु पनुन इरादु बदलिथ। बेयि छु मे पूर यकीन जि बु अनन स्व बादशाह कूर ज़ीनिथ।' मोकल छुस अमि पतु वनान जि 'त्रे कोरुथ मे सुत्य रुत, बु कति हेकु चॉन्य यि नीकी नख वॉलिथ। च़ अगर व्वन्य गछख ति, रठ यिम छुय म्यानि तरफु त्रे तुलरि सुत्य। अख रोज़ख पानु ति कुनि शरु निशि महफूज़, बेयि अनुहन बादशाह कूर ति ज़ीनिथ।' रंगर कूर वँछुस, 'यिमन क्याह छुम करुन?' मोकल वोथुस 'युथुय च़ तस निशि अन्नख, यिमव मंज़ु व्वथि पानय अख तुलुरु तु करुनाव्यस अख कथ। तस पतु व्वथि ब्याख तु करुनाव्यस दोयिम कथ। पतु व्वथि त्रेयिम तु करुनाव्यस त्रेयिम कथ। अमि तँरीकु अनुहन च़ बादशाह कूर ज़ीनिथ।' यि वननु पतु गव मोकल गॉब। रंगर कोरि दिन्न हुमिस दांदस ज़ीर तु कोरुन बेदार। ताम आव गाश तु द्रायि तिम दूशवय ब्रॉहकुन तु दूह दर लगनु ब्रॉदुय वॉत्य शाहज़ादि हुंदिस शहरस मंज़ु। तति ओस यि दस्तूर जि युथुय कांह शाहज़ादु बादशाह कोरि हुंद शर्त पूर करनु खॉतरु

ओस वातान, तस ओस शाहजादि हुंद मोल पनुन मेहमान जॉनिथ रातस खॉतिरदॉरी करान तु बेयि ओसुस नस्ब नामु ति पृछनु यिवान ।

बादशाहस युथुय रंगर कोरि प्यठ नज़र पेयि, तसुंद हुस्न व जमाल वुछिथ वोथ तसुंजव अँछव मंज़ु ज्वयि ओश । तिव्याज़ि सु ओस ज़ानान ज़ि अँम्य सुंद हशर ति आसि सुय युस अँमिस ब्रूटिम्यन गंदरन हुंद सपुद । बादशाहन करनॉव अँमिस जान खॉतिरदॉरी तु सुती वोननस, 'ऐ शाहजादु! पनुनि इरादु निशि यितु बाज़ ।' अमा रंगर कोरि दोपुनस 'बु ति कासु पनुन्यन च्वचन सूर तु वुछु मे कोत ताम हेकि चॉन्य शाहजॉद्य बॉज्य तॉरिथ ।' मजबुर सपदिथ द्युतुनस बादशाहन इजाज़थ तु ऑखुर चायि रंगर कूर बादशाह कोरि हुंदिस कुठिस मंज़ । स्व ऑस तमि विज़ि स्यठहुय चाव रँटिथ यँदुर कतान । अचान अचानुय वँछ रंगर कोरि हुंदव शानव प्यटु मांछ गनु किस मोकलु सुंज अख मांछ तुलुर तु बीठ बादशाह कोरि हुंदिस यँदुरस प्यठ । यकदम गव यँदुर बंद । बादशाह कोरि दिच क्रख ज़ि 'यि कुस कॅर्यज्यन, येम्य म्योन यँदुर बंद कोर ।' अँम्य सुंद युतुय ऑसु कडुन ज़ि नेबर्य किन्य गँयि तुरय पादशाह कोरि हा कॅर अख कथ । दोयिम तुलुर युथुय रंगर कोरि हुंदि फेकि प्यठु वँछ, तमि दिच पादशाह कोरि बुथिस ट्वफ । तस च़ोल नीरिथ 'यि कुस छु येम्य तसुंदिस नाज़नीन बुथिस म्यूठ कोर ?' यि बूज़िथ वोथ शोर ज़ि पादशाह कोरि हा कॅर दोयिम कथ । त्रेयिम मांछ तुलुर वँछ अमि पतु तु चायि अँमिस येज़ारु नरि किन्य, येमि सुत्य स्व थोद गँयि वँथिथ । बादशाह कोरि तुल शोर 'यि कुस मनुश छु येम्य बु थोद तुजनस ।' योरु वँछुस रंगर कूर, 'यि छस बु । व्वथ शर्त हूरुथ । पनुनि शर्तु मुताँबिक बनेयख च़ु म्यॉन्य ।' अमि वाकह सुत्य आव सोरुय शहर च़ंसिथ । बादशाहस ति सपुद दिल शाद । दोपुन यि ति छा ज़ि तसुंज कूर करनॉव काँसि ख्वश कुसमतन कथ । अमि दूह आव सॉरिसुय शहरस अंदर जश्नु करनुक हुकम दिनु ।

बादशाह लोग अमि पतु कोरि हुंदि खांदरुक संज करनि । अमा मर्दानु लिबास लॉगिथ कोरि वोननस, 'बादशाहम ! च़ु कर अंदाज़ु म्यॉनिस मॉल्य सुंद, युस म्यान्यन वतन वुछान आसि तु यस नु यि व्वमेद आसि ज़ि तसुंद शाहजादु क्याह आसि सँही सलामथ मँज़िलस प्यठ वोतमुत । मे छु पनुनि गरि येमिस चानि कोरि सुत्य नेथुर करुन ।' तसुंद जवाब बूज़िथ गव बादशाह मजबूर तु ऑखुरस कॅरुन पनुन्य कूर बे शुमार दौलथ तु लाल जवाँहिरात दिथ पनुनि गरि वखसथ । अति नीरिथ वॉत्य यिम त्रेशवय मंज़ बाग शहरुकिस बादशाह सुंदिस शहरस मंज़ । यिहँदि वापस यिनुच खबर बूज़िथ द्राव सु पनुन्य अँमीर वँज़ीर ह्यथ यिहँदिस इस्तेकबालस । बडि पायि गँयस येमि कथि हुंज़ ज़्यादु खुशी ज़ि

तसंजि कोरि बन्यव युथ ह्यू बहोदुर तु ख्वश जमाल शाहज़ादु जिंदगी हुंद शरीक। अमि पतु लोग सु ति यिहंदि खांदरुच तयोरी करनि। अमा रंगर कोरि दोपुनस, 'बादशाहम! खांदर छु मे पनुनिसुय शहरस अंदर करुन।' तँम्य ति दिन्न यिमन बे शुमार दौलथ सुत्य तु यिमन निश वरखसथ सपदनु पतु वॉत्य यिम पनुनिस असली शहरस नँजदीख तु शहरु न्यबर कयाम करनु पतु सूज़ रंगर कोरि हुंद्य खावंदन पनुनिस मॉलिस शेछ जि सु आव शर्त थावन वाजनि बादशाह कोरि अलावु ब्याख शाहज़ादी ति जीनिथ। रंगर कोरि बचु डम्ब लगनु पतु ओस यि तस नँविम र्यथ। पनुन यि सिर सिर थावनु पतु सपुज़ स्व अथ मकामस प्यठ खावंदस तु दून शाहज़ाद्यन निशि गॉब तु वॉन्न स्व पनुनिस नँविस बंगलस अंदर तु अति ज़ाव तस आफताब अड ह्यू शाहज़ादु।

बादशाह द्राव पनुनिस शाहज़ादस बुथि सोरुय लाव लशकर ह्यथ तु शाहज़ादन द्युत यिवान यिवानुय रंगर कूर पनुनिस दरबारस मंज़ तलब वँरिथ स्व मारु वातलन दिनुक होकुम। दबोदब आयि रंगर कूर दरबारस अंदर अनुनावनु। हुमव बादशाह कोर्यव पर्ज़नॉव यकदम, अमा अति वुछिख स्व अमि वक्तु ज़नानु शक्लि अंदर। दोपुख, 'बार इल्लॉही! यि क्याह तमाशाह? यि हय मर्द ओस तु अँम्य हय अँस्य दूख तु मुसीबथ त्रॉलिथ जीनिथ अनि तु यि क्याह?' रंगर कोरि कोर शाहज़ादस तु पनुनिस रुनिस सवाल जि स्व कथ जुर्मस प्यठ छे मारु वातलन सुपर्द करनु यिवान। 'तिक्याज़ि त्रे ओसुय अक ऑलीशान मकानु बाग ह्यथ हावुन तु बेयि हलालुक बचु, यिम दूनवय चीज़ ह्यकख नु चु पेश वँरिथ', वोनूनस दर जवाब शाहज़ादन। रंगर कोरि कोड अति बेबि मंज़ु शाहज़ादसुय ह्यू बचु तु वँछुस, 'यि क्याह छु मे ख्वनि अंदर?' 'अमा यि कति गव म्योन', शाहज़ादन कोरनस एतिराज़। 'मे छा ज़ाह त्रे सुत्य हम बिसतरी वँरमुन्न? यि छु नाज़ायिज़ बचु।' रंगर कोरि कँड पनुनि अथुचि ऑंगजि मंज़ु वॉज तु हॉवनस, यि वँनिथ जि 'शाहज़ादु! याद कर यि वॉज कथ जायि तु कथ हालस मंज़ वॉन्न म्यानि ऑंगजि अंदर। रूद सवाल मकानुक, सु छु हुक्या चानि मँहल खानु हुमि पासु।' यि वँनिथ वँड रंगर कोरि ब्याख फुटुज यथ अंदर शाहज़ादु सुंद मस तु नम ऑस्य। दोपुनस 'यि मस तु नम कति वॉत्य मे निश, च्यतस पाव। आज़ाद वँम्य करनोवुख? जवाब दि यिमु बादशाह कोरि ज़ु वँम्य अनि जीनिथ।' यि सोरुय तमाशु वुछिथ गव बादशाह ज़ादु दम ब-ख्वद। रंगर कूर वँछ तस जि 'मे युस पॉथुर अज़ ताम चोरमुत ओस, तमि तलु ओस मे त्रे हॉविथ द्युन जि स्व गँयि नु ज़नानय ख्वसु मर्दस शलख करनु दियि। यि बूज़िथ प्यव शाहज़ादु पनुनि अँमिस आशनि परन तु दोपुनस 'त्रे ज्यूनुथ तु मे होर।' स्व आयि अमे दमु बादशाह बाय बनावनु तु पानु बन्योव सु शहरुक

नोव पादशाह। समंदर अपारि बादशाह संजि कोरि आव तस वॅज़ीरस सुत्य खांदर करनु
युस रंगर कोरि मकानस अंदर पनुनिस इन्तिज़ारस ओस थोवमुत। बेयिस बादशाह कोरि
आव वॅज़ीर ज़ादस सुत्य नेथुर करनु।

★ ★ ★

दानाँयी

कथु गोर वनान जि यि ओस शाहज़ादाह अख तु दूह अकि ओस सु पनुनिस अँकिस जॉनी यारस सुत्य दँरियावु बँठ्य बँठ्य हवा खूरी करनि द्रामुत। अँमिस शाहज़ादु सुंद यि यार ओस हदु खोतु ज़्यादु गाटुल तु दाना। य्वसु मुश्किल खोतु मुश्किल कॉम ति ओस मटि ह्यवान, स्व ओस पनुनिस हँटिस च़ुनि रुख वँरिथ बामल अनान। अवय ओस नु शाहज़ादु तस च़िहिस ति पानस निशि छ़्यनु दिवान गछ़नु। दपान येलि तिम दँरियावु बॉल्य बॉल्य अँकिस पुर फिज़ा जायि वॉत्य, अति ओस स्वर्गु शेहजाराह हू तु अँती ठँहरोवुख कदम। वुछान वुछान खँच़ुख दूशवन्य नँदर। पहर ज़ु पहर गँछ़िथ सपुद शाहज़ादु बेदार तु अमे विज़ि ऑस अख शँकील नवजवान कूरा ति नावि अंदर हवा खूरी करनि द्रामुत्त। अँम्य सुंद हुस्नो जमाल ओस यूताह जि शाहज़ादु गव वुछिथुय तस प्यठ फलवाह। तसुंद दीदार करनु बापथ दिच़ुन पनुनिस यारस ति ज़ीर, युस वुनि ति मच़ि नँदरि ओस। सु यीतिस कालस हुशार गव, तितिसुय कालस गँयि स्व नीरिथ। शाहज़ादु गव बे-करार तु लोग तसुंदि खॉतरु ब्रछ़नि। यार वोथुस 'यीचाह किहो ऑस स्व दिलि हुंज थफ जि च़ु गोख बेताब।' 'या तु गोछ़हन च़ु पनुन्यव अँछव वुछुन, स्व क्याह त्रठ ऑस', शाहज़ादु वोथुस दर जवाब। अँशुकुन्य कानन ऑस निशानस प्यठ लँगिथ पनुन्य कॉम वँरमुत्त, येमि किन्य शाहज़ादु थोद वोथनुक नावुय छुनु ह्यवान। यारस दोपुन अगर सु खांदर करि, सु गछि तस अँम्यसुय कोरि सुत्य सपदुन। यार वोथुस 'या गव च़े पय छुय, छे कति रोज़ान, नाव क्याह छुस, तु कमि ज़ॉन्न हुंज छे?' शाहज़ादन द्युतुस जवाब, 'येलि पय आसिहेम, तेलि क्याह गँयोव?' यारन वोनुनस, 'चठ तु कथाह तु त्राव तु तसुंद खयाल।' शाहज़ादु छु अमि पतु पनुनिस यारस वनान, 'अगर च़ु म्योन पँज्य किन्य यार छुख, मे दिन कुनि वुनि स्व हॉसिल वँरिथ। नतु मारु बु पान। तस वरॉय कोठु सुंद जिंदु रोज़ुन छु मुश्किल।'

ऑखर द्रायि तस कोरि छांडनु बापथ दँरियावु बँठ्य बँठ्य स्यठाह दूर ताम। स्व खबर कथ शहरस आसिहे वॉन्नमुत्त ? थँकिथ छेनिथ फीर्य वापस तु वॉत्य गरु। शाहज़ादन त्रोव ख्यन चन तु पनुन कार रोज़गार ति गोस मँशिथ। स्यठाह छाँड दिनु पतु लोग तिमन पय जि स्व छे फलॉन्य बादशाह संज कूर। शाहज़ादन वोन अमि पतु यारस जि अगर सु तस निश वाति नु, तसुंद जिंदु रोज़ुन छु महाल। मजबूर गँछिथ वोनुस यारन, 'तेलि गव पुलु पॉतव गँडिथ स्व छांडनु बापथ नेरुन', तिक्याजि तसुंद हुस्नो जमालन ओस सु

बोवल् बनोवमुत। ऑखुरस प्यठ कोर यिमव दूशवयव सफरस प्यठ नेरनुक संज त्नु ह्यवान दिवान वॉत्य बादशाह कोरि हुंदिस शहरस अंदर। तस निश वातनु बापथ कोरुख पय वॉडिथ अँकिस बुजि माजि निश करार, य्वसुप्रथ दूह बादशाह कोरि किन्न पोशि माल बनॉविथ तस पेश ऑस करान त्नु तथ बदल ऑसुस बादशाह कूर स्वनु संज अख अशर्फी दिवान। दूहा दूहा गुजरनु पत्तु ऑस बुडु मॉज आदत्तु मुतॉबिक पोशि माल बनावान जि शाहज़ादु संघ यारन वोनुस 'मोजी! दिख ना यि पोशि माल असि कुन अज त्नु अँस्य दिमुहोय तयार वॉरिथ।' स्व वॉछुख 'अदु अथ अंदर क्याह हर्जु छु। हत्तु तोही बनॉव्यतव।' अमि पत्तु लँग्य यिम दूशवय पोशि माल बनावनि त्नु अँथ्य अंदर थॉवुख बादशाह कोरि हुंदि नावु अख चिठ्य ति। पोशि माल तयार सपदिथ द्रायि बुडु मॉज त्नु वॉरुन बादशाह कोरि पोशि माल पेश। पोशि माल वुछिथ वोन बादशाह कोरि अँमिस बुजि माजि जि 'मोजी, अज छी च्ने गरि कम ताम पँछ्य आमत्य तिक्याजि येमि पोशि मालि हुंद तुलु त्राव छि वनान जि अज छय नु च्ने पोशि माल पनुन्यव अथव बनॉवमुन्न। वोथ गछ गरु त्नु सोजुन तिमव मंजु अख पोछ मे निश।' बुडु मॉज येलि पनुन गरु वॉन्न, पनुन्यन पछ्यन वोनुन जि अज सपुज बादशाह कूर त्वहि प्यठ मेहरबान त्नु अख नफर वॉतिव हमी दमु तस निश। यि बूजिथ छनु शाहज़ादस पछ्य यिवान जि यि छा पजर किनु खाब? अमा दोस्तन दोपुस 'येलि हा च्नु बादशाह कोरि निश अन्नख, तति आसी फर्शो फर्श वॉरिथ। च्नु अँच्यजि बेवायि त्नु फर्शु फरोशि प्यठु पँक्यजि बे खोफ सपदिथ, युथ तस स्यकु बिहि जि च्नु छुख पँज्य पॉठ्य शाहज़ादय, मगर कलाम वॉर्यिज ह्यस वॉरिथ।'

शाहज़ादु द्राव सँरिथ सखरिथ त्नु वोत बादशाह कोरि निश। तमि आसु तस किचु रंगु रंगु जिंयाफँच तयार करनाविमन्न। पानुवॉन्य हमकलाम सपदनु पत्तु आयि शाहज़ादस जिंयाफचु पेश करनु। अमा यिमु जिंयाफचु ख्यवान ख्यवान प्यव तस पनुन यार च्यतस त्नु खयाल वोथुस जि तस किन्न ति निमु हा कँछा। यि सॉचनु पत्तु वॉडुन चंदु मंजु रुमाल त्नु थोवुन क्वकर तानाह अक तथ अंदर। यि वुछिथ खँन्न बादशाह कोरि च्नुख त्नु दोपुन यि छु च्नुकि कुस ताम बोछ। अमी सातु कडुनोवुन कलु दगान दगान पनुनि मँहलु खानु मंजु। शाहज़ादु वोत दुयान दुयान यारस निश। तँम्य वुछ तस बुथिस प्यठ बोम त्नु दोपुनस दँलील क्याह छे? शाहज़ादु वोथुस 'सोरुय गँयोव जान, अमा चानि बापथ तुजाम रुमालि मंजु क्वकर तानाह अख त्नु तँथ्य प्यठ गँयि बादशाह कूर च्नुखि त्नु कोडनस बे यज्थ वॉरिथ।' यि बूजिथ लोग तसुंद यार अथन च्नुप्य हेनि। दोपुनस 'थाव सॉ! च्नुकि छय तति च्ने शिकसलदुगी हॉवमुन्न। च्ने वॉम्य वन्योव म्योन हुस्ने गम-खार लागुन? आमुन्न क्वकर

छुन्यथन पॅत्य कॅरिथ।' शाहज़ादु गव पनुनि जायि सख पशेमान। यारस वोनुन, 'व्वन्य क्याह छु सलाह?' सु वोथुस, 'यि गछुन गोछ ति गव। बु क्याह ह्यकय व्वं कॅरिथ?' शाहज़ादन त्रुवुस डांब तु दोपुनस 'अगर बादशाह कूर बदस यियम नु, कोठ मारि पान।' सौंचाह समजाह कॅरिथ वोथुस सु जि च्चे छुय व्वं दरवेश बनुन तु बु बनु चोन सूफ्य। बुजि माजि सुत्य थॉवुख कथ कॅरिथ जि असि छे यि छ्वम्ब करुन्य, अदु हय बादशाह कूर हॉसिल सपदि। मगर खबरदार, कथाह बाथाह छय नु हरगिज़ ति करुन्य। फकत छय च्चे जिकिर करुन्य। यि पॉथुर करनु पतु द्रायि यिम दूशवय यार पनुन हुलियि बदलॉविथ बुजि माजि निशि तु बीठ्य शहरस मंज़ अँकिस खलवख जायि। कॅचन दूहन अंदर सपुज़ यि कथ मशहूर जि कुस ताम बा कमाल दरवेशाह छु शहरस मंज़ करामॉन्न हावान। लुख लॅग्य छ्वकव छ्वकव यिमन निश पनुन्य हाजत ह्यथ यिनि। दरवेश छु फकत जिकिर करान तु तसुंद यार छु हाजत मंदन इशारव सुत्य हाजत रवॉयी हुंद यकीन दिवान। यिमव ओस बुजि माजि वोनमुत जि कॅह दूह गॅछिथ वनि स्व बादशाह कोरि दरवेशु संज़न करामॉन्न मुतलिक तु स्व गछि तस निश यिनु खॉतरु मजबूर। बेयि अख ज़ु दूह गॅछिथ द्रायि बादशाह कूर ति पनुनि हाजत रवॉयी खॉतरु तु वॉन्न दरवेशस ब्रॉह कुन। स्व लॅज ज़ॉरी करनि जि तस गोछ वननु युन जि तसुंदिस तकदीरस मंज़ क्याह छु लीखिथ। दपान स्व ऑस वुनि पनुन दोद बावानुय जि शाहज़ादस च्चोल नीरिथ चोन मुश्किल गछि हल, अमा च्चु कर मे सुत्य नेथुर। तसुंद युतुय वनुन जि बादशाह कूर गॅयि नारो नार तु तुलुन शोर जि यि कुस ज़नानु च्चूर तु बदमाश छु शहरस अंदर दरवेश बॅनिथ आमुत। यि गछि शहर बदर युन करनु। शाहज़ादु सुंद यार लोग अथु मूरनि जि येमिस तावन ज़दस हय प्यार च्चोल नीरिथ, व्वं क्याह बनि? सु छु अँमिस वनान कोठ ति करनोवथन खार तु ज़ॅलील। यिमन आयि नु व्वन्य चलनस ति वथ तु ह्यवान दिवान च्चॅल्य अमि शहर मंज़।

बेयिस जायि लोगुस शाहज़ादु बेयि वनुनि, अगर तस बादशाह कूर हॉसिल सपदि नु, सु मारि पान। यार वोथुस 'यिम ति छल वरतावन्य पज़हन, तिम वरतॉव्य। अमा च्चकि हय च्चय मुलु चोर तु बेकुल छुख। अथ क्याह बनि? पनुन छुय तकसीर, बु क्याह करय व्वन्य।' मगर शाहज़ादु रूदुस तोरु क्वकरु संज़ कुनी ज़ंग वनान। अमि पतु लोग तसुंद यार सौंचनि जि व्वन्य क्वसु चालॉकी पज़ि वरतावन्य तु ऑखुरस आस खयालाह अख। दोपुन शाहज़ादस, रछ साँ च्चु र्यतन सतन ऑठन मरन मस तु अदु वनय क्याह छु करुन। शाहज़ादन ह्योत मस रछुन तु अँमिस गव त्यूताह मस ज़्यूठ, यूताह सियाह सरन छु आसान। सति ऑँठि रैत्य ह्यैत्य यिमव पांछ सथ खर ति मॅल्य तु द्रायि ठेकुदर बॅनिथ दुबारु

बादशाह कोरि हुंदिस शहरस कुन। तति लॅग्य अकि जायि हुंज मेच्र बेयिस जायि त्रावनुचि कामि। यिथय पॉठ्य गॅयि र्यथ जोराह अदा तु शहरस अंदर सपुद शोहरु जि यि छु बोड बारु ठेकुदर। पानु बन्योव मर्द तु शाहजादु तसुंज आशेन्य। दूह अकि वोनुन शाहजादस जि 'बु हा वातनावथ ज़नानि हुंजि शक्लि बादशाह कोरि निश। च़े छुय तति ज़ु च़ोर दूह कयाम करुन। अमा ख्वदायि सुंदि पासु कॅर्यजि नु तति तिछ कांह हरकत येमि सुत्य च़ु पतु मारु गछख। तिक्याजि व्वन्य छु चानि जिंदुगी तु मोतुक सवाल। खबर च़े मा सावी कुनि बादशाह कूर पानस निश। च़े छुय नु हरगिज तस यि बास द्युन जि च़ु क्याह छुख मर्द। बादशाह कोरि निश ज़ु च़ोर दूह गछनु पतु नीर्यजि च़ु तस निशि रॉच़ हुंजि अनि गटि मंज तमि वख्तु येलि स्व मच्चि नैदरि मंज आसि तु वॉत्यजि मे निश।' यिमु कथु शाहजादस वॅनिथ द्राव ठेकुदर पनुन्य यि ज़नानु ह्यथ तु वोत बादशाह कोरि हुंदिस मॉलिस निश। अर्ज कोरनस, 'बादशाह सलामत! बु छुस तुहुंदिस यथ शहरस मंज ठेकुदरी करान। वारियाह काल वोतुम गरु गछनुस तु केंच़न दूहन हुंदि बापथ पेयम गरु गछनुच मजबूरी। अमा सोंचान छुस यि आशेन्य कति तु कस निश थावन, तिक्याजि यि ह्यकन नु अज पानस सुत्य वापस निथ। यथ शहरस मंज छुम नु कांह अखाह ति जॉन्यकार। बादशाह सलामतस अगर नागवार गछि नु, म्यॉन्य यि आशेन्य रोज़िहे केंच़न दूहन हुंदि बापथ त्वहे निश।' बादशाहन वोनुस अदु असि क्याह हर्ज छु? केंच़न दूहन्य हुंज छे कथ।' अमि पतु द्युत बादशाहन होकुम जि ठेकुदर सुंज आशेन्य गछि सानि शाहजादी निश थावनु यिन्य तु अमे सातु सपुद तसुंदिस हुक्मस तॉमील। व्वन्य छु शाहजादु ठेकुदर सुंज आशेन्य बॅनिथ बादशाह कोरि निश तसुंद्यन राजन ताम वॉकुफ गोमुत तु स्व छस पानस सुत्य कुठिस अंदर सावान तु पनुन अँदर्युम व्वंदु ति बावान। ज़ु पांछ दूह गछनु पतु द्राव शाहजादु बादशाह कोरि हुंदि कुठि मंजु न्यस्फ रॉच़ तु वोत ठेकुदरस निश। दौयिमि दूह आव ठेकुदर क्याहताम डॉल्याह ह्यथ बादशाहस निश तु अर्ज कोरुनस, 'बादशाह सलामत! मे गोछ पनुन अमानथ वापस युन करनु।' अमा सु कति ओस, कुनी नु। बादशाह सपुद यि बूजिथ परेशान। तस गॅयि गलि ज़्यव। बादशाह सलामत, 'बु क्याह छुस अर्ज करान?' वोथुस ठेकुदर। सॅरिसुय शहरस अंदर वोथ शोर जि बादशाहन हा छि कस ताम ठेकुदर सुंज आशेन्य अगवा वॅरमुच़। फोरन आव शहरुक कौज्य फॉसलु दिनु खॉतरु मंगुनावनु। दूशवुन्य दर्यन हुंद बयान बोज़नु पतु द्युत तॅम्य फॉसलु जि बादशाह दियिन ठेकुदरस या तु पनुन्य आशेन्य नतु कूर डंडु। आशनि क्याह दियिहे सु? स्व ऑस तसुंदिस निकुहस तल, तु अथ मुकाबलु ऑस बादशाह कूर वुनि अनहॅरिशुय। बादशाह गव स्यठाह मजबूर तु पनुनि कोरि द्युतुन

ठेकुदरस सुत्य रवानु सपदनुक हुक्म तु यिथु पॉठ्य वॉन्न स्व शाहज़ादस निश यारु संज़ि
दानॉयी सुत्य ।

★ ★ ★

तिलु क्राय

दपान अकि शहरकिस बादशाहस ओस कैकुबाद नाव तु तसुंघव वॅज़ीरव मंज़ु ऑस्य ज़ु वॅज़ीर पानुवॉन्य सख दोस्त। दूशवय यार ऑस्य अख अँकिस प्यठ जान फिदॉयी करनस मंज़ नामावार तु अख अँक्यसुंदिस स्वखस दूखस मंज़ ऑस्य पानुवॉन्य अकार बकार यिवान। यिमव वॅज़ीरव मंज़ु ओस अँक्यसुंद नाव बख्त यार तु दोयिम्य सुंद बख्त जमाल। दूह अकि कथु करान करान वोथ बख्त जमाल बख्त यारस कुन ज़ि च़ु प्यख ब्यमार तु दूहन च़तजीहन मरन पेयी बिस्तरस मंज़ रोज़ुन। बख्त यारस आयि यि बूज़िथ च़ख तु वोनुन बख्त जमालस ज़ि च़ु हबा छुख फेशुल कठ। च़े क्या यिनय म्यानि ब्यमारि सुत्य बानु बरनु? सु वोथुस दुबारु ज़ि मे हा आव यी बोज़नु तु अथ अंदर क्याह छि बानु बरनु यिनुच कथ? बख्त यारन दोपुस, 'अदु सॉ तु कोठस मा छु अथ ब्यमारि मंज़ मरनुक कांह खतरु।' बख्त जमाल वोथुस दर जवाब, 'मरख नु केंह ति, अमा तकलीफ तुलख स्यठाह।' यि वननु पतु केंचि दोही गव बख्त यार हंगु मंगु ब्यमार तु बराबर प्यव च़तजीहन दूहन वुरनि तु वथरुनि। सेहतयाब सपदिथ येलि सु गुज़हस च़ाव, हँकीमव वोनुस वं गच्छिप्रथ दूह शाम वख्तस चकर करनि नेरुन युथ जंगन होश ह्यू यियी। अमि पतु लोग बख्त यार अथस अंदर लूर ह्यथ गरि निशि मील ड्वड मील दूर चकरस नेरनि तु अकि दूह गव ज़्यादय पहन दूर। वख्त ओस शाम तु वुछुन असमानु डोल पोशाह ह्यू वसान तु ब्यूठ बख्त यारस ब्रौठु कनि। यि वुछिथ आव तस दहशथ तु अथ अंदर क्याह छु, यि वुछनु वरॉय द्राव गरु कुन वापस। अमा केंह कदम कडनु पतु वोथुस खयाल ज़ि वुछव अथ अंदर क्याह छु? दिल वॅरिथ वोत ऑखुर अथ डोल पोशास निश तु लोरि सुत्य तुलुन अथ परदु अकि पासु थोद। अति वुछन अथ अंदर मोहरय मोहरु, यिमन विं आसु व्वथान। यिमु मोहरु वुछिथ वॅडनस दिलन वोठ ज़ि यिमु वातुनावु हॉ गरु। मगर अथ सुम्ब कति ऑसुस ब्यमारि सुत्य ह्यकथ? सूंचुन बु क्याज़ि करु नु यारस बक्त जमालस सुत्य यि मोहरु खज़ानु निनु बापथ सलाह मशवरु। यिथु तिथु वोत सु बख्त जमालस निश तु बोवुनस यि राज़। सु वोथुस, 'हता यारु, स्व ना गॅछ नु तति तिछ बलायाह आसुन्य, य्वसु असि दूशवुन्य खत्म छुनि वॅरिथ। बेहतर रोज़ि अमि खॉतरु केंह सिलाह सामानाह सुत्य तुलुन', तु तुज बख्त जमालन पानस सुत्य अख शमशेर। येलि तिम दूशवय यार अथ खज़ानस निश वॉत्य, बख्त जमालस डॅज नेत तु बॅडिथ तु बूलिथ वोथ बख्त यारस कुन ज़ि तीतिस कालस

व्वथि नु यि खज़ानु यीतिस कालस नु अथ रतु छफ यियि दिनु। बख्त यार वोथुस ति क्याह गव रतु छफ ? बख्त जमाल वोथुस इनसानु संज़ क्वरबॉनी। 'हता हे, च़ु क्याह छुख यि वनान ? स्व इनसाँन्य क्वरबॉनी कति बनि', बख्त यार वोथुस योरु। तँम्य द्युतुस जवाब 'क्याज़ि बनि नु ? च़ु कथ क्युत छुख ?' 'अदु साँ तु मे क्या कोरमय ? बु पानु ब्यमार तु दितु रतु छफ। व्वथ साँ छनुस बलाय', योरु छुस यि बख्त यार वनान। बख्त जमाल रूदुस योरु अगस मकृन्न लॉगिथ ज़ि यि रतु छप छय च़े कुनि ति सूरतस मंज़ दिन्य तु लोग सु पनुनि शमशेरि फश दिनि।

बख्त यारस येलि फिकरी तोर ज़ि बख्त जमालस कोड तमुहन कलु तु यि मारि कोठस पँज्य पॉठ्य, तँम्य वोन तस ज़ि 'च़ु ओसुख मे ल्वकचारु प्यठुक यार। येलि व्वं च़ु कोठस मारखुय, मे पतु छुय म्योन अयाल हवालु।' यि वँनिथ मुन्नरोवुन पनुन मछि बंद तु अमि अँदरु कोडुन अख लाल तु जमाल बख्तस दोपुन, 'मे छे आशेन्य बेयि जुव। यि लाल थाव पानस निश। हरगाह तस कूर ज़ेवि, स्व रँछिज्यन तु बालिग गँछिथ वँर्यज्यस यि लाल खरचॉविथ खांदर। अगर नेचुव ज़ेव्यस, तस गँडिज़ि यि मछि तु नाव थॉव्यज्यस बख्त नसर।' अमि पतु कँड बख्त जमालन शमशेर तु अके दबु च़ोटुन पनुनिस यारस कलु। पनुन यि जुर्म च़ूरि थावनु खॉतरु डॉजिन अथ जायि स्यख ओरु योरु तु वँडरोवुन बख्त यार। अमा अमि वख्तु द्युत हातफीयन जँमीनस कुन सदा ज़ि यि लाश थॉव्यज्यन फलॉनी वख्तस ताम सरि सोबूत तु पनुनिस असली हयतस मंज़। बख्त जमाल लोग अमि पतु यि मोहरु खज़ानु तुलनि, मगर तथ ओस यीतिसुय कालस सीमठ गोमुत। लाचार गँछिथ द्राव यि लालची गरु कुन तु सेदि स्योदुय वोत यारु संज़ि आशनि निश तु वोथुस ज़ि बख्त यारस गव फलॉन्य जायि गॉयलु तु वुछान वुछान द्रास जुव। अमा मरनु ब्रॉठ द्युतुन मे यि मछि बंद तु दोपुन 'मे छे आशेन्य ओज़ुर बंद। तस अगर कूर ज़ेवि, यि लाल खरचॉविथ गछि तस बालिग सपदिथ खांदर युन करनु। व इला नेचुव ज़ेव्यस, तस गछि तेलि यि मछि गंडुन तु नाव गछ्यस बख्त नसर करनु।' यी बूज़िथ द्युत तसंज़ि आशनि पलवन त्रुथ तु लँज पान जान मारनि। यारु संज़ि आशनि तसलाह दिनु पतु रूद बराबर च्वन दूहन अति तु अमि पतु तुलिन कँह नोकर चाकर तु द्राव रॉन्न हंज़ि अनि गटि अंदर मोहरु खज़ानु अननु बापथ। मगर सु खज़ानु कति व्वथिहे ? तथ ओस शँस्तुर गोमुत। नाकाम गँछिथ आव गरु वापस तु पनुनिस वँर्यमतिस प्यठ लोग सख अफसूस करनि। वारु वारु वॉन्न मोहरु खज़ानुच शैछ बादशाह संद्यन कनन ताम। सु ति गव तथ जायि तु तमिकि ह्यफाज़तु खॉतरु बेहनोवुन तथ गारथ तु बेयि गंडुनोवुनस अँद्य अँद्य प्वख्तु देवार। यिथु पॉठ्य आव

यि म्वहरु खज़ानु महफूज़ थावनु। अमिकिस हातस अंदर ऑस अख आबु ज्वयि हना ति नेरान येमिकि आबु सुत्य बादशाहन सबज़ी व्वपदावनुक होकुम ति द्युत तु अमि बापथ आव अति अख बागवान ति थावनु। हुपॉर्य लेंज बख्त यारु संज़ आशेन्य गॅरीबी हुंज़न ठोंचन। तस बिचारि पेयि बादशाही ऑसिथ पासवॉनी तु अँथ्य बेकसी अंदर ज़ास केंह वख्त गुज़रिथ अफताबु अड ह्यू नेचुव तु नाव आस बख्त नसर करनु। त्रे चोर वॅरी गछनु पतु आव यि ल्वकुट बचु मकतबस मंज़ तॉलीम परनु खॉतरु त्रावनु। ओखनन येलि बख्त यारु सुंद नेचुव वुछ, तँम्य दोप तसंज़ि माजि ज़ि तोह्य दूशवय माजि पोथुर बिहिव म्यॉनिसुय गरस अंदर, तिव्याज़ि त्वहि न छु कांह बुथि तु न पथ। अमा वॅज़ीरु संज़ि आशनि आव अथ अंदर क्याहताम र्यगानु बोज़नु। मगर ओखन सॉबन वोनस च़ु गॅयख बेनि तु बु गोसय बोय। अगर च़ु बॉयिस निश बेहख नु, तेलि कस निश बेहख ? यि बूज़िथ कोर बख्त यारु संज़ि आशनि ओखनसुय निश रोज़नुक फॉसलु। अँम्य सुंदिस नेचिव्य सुंद ज़ेहन ओस युथ ज़ि अकि र्यतुक सबक ओस सु अँकिस हप्तस अंदर म्वकलावान तु यिथु पॉठ्य कॅर तँम्य केंचनय वॅरियन अंदर तॉलीम हॉसिल तु ओखनस सपुद अँम्य सुंद ज़ेहन वुछिथ यकीन ज़ि यि करि पँज्य किन्य कमाल हॉसिल।

तॉलीम हॉसिल करनु पतु वोन अकि दूह बख्त नसरन पनुनि माजि ज़ि अँस्य कूतिस कालस बेहमव ओखन सॉबस बतु खेनि ? जान गव पनुन गरु गछुन। ऑखुर वॉत्य यिम माजि पोथुर ओखनस इजाज़थ ह्यनु पतु पनुन गरु। मगर ख्यनु चनु खॉतरु ओसुख नु गरस अंदर किहीं ति मूजूद, तु न ओसुख पोंसा टूका। यि हाल वुछिथ वोथ बख्त नसर पनुनि माजि ज़ि मॉलिस निश मा ओसुम त्युथ कांह सरमायाह, युस कृनिथ दुनिथ लसनुक बसनुक संज़ ह्यकहँव वॅरिथ। स्व वॅछुस तस निश क्याह ओस ? हतु हुथ संदूकस मंज़ वुछ तु केंह मा नेरी। माजि निश कुंज़ रॅटिथ मुच़रुन संदूकस कुलुफ तु अमि मंज़ु द्रायस अख किताब तु लोग अँथ्य फ्युर फ्युर दिनि। किताब वुछिथ कोरुन ग्वडु यड बॅरिथ वदुनाह तु अमि पतु त्रोवुन ठाह ठाह करान असुन। मॉज वॅछुस ज़ि 'गोबरा! वोदुथ क्याज़ि तु ओसुथ कवु म्वखु ?' नेचुव वोथुस, 'वोदुम अमि म्वखु ज़ि येमि किताबि सुत्य ह्यकु पँतिम्यन वुहन पंचुहन वॅरियन हुंघ हालात ज़ॉनिथ, तु ओसुम अवु म्वखु ज़ि यिनु वाल्यन पंचुहन शेठन वॅरियन हुंघ हालात यिनम येमि किताबि हुंदि मदतु सुत्य ब्रोंदुय बोज़नु।' किताब बंद वॅरिथ द्राव बाज़र तु गव अँकिस पुज वानस प्यठ। तति वोनन अँकिस पुजिस ज़ि माज़ सेराह अख दितु, पगाह दिमय पोंसु। तँम्य कोरुस तोरु माज़ दिनु निशि इनकार ज़ि व्वजुम बनि नु केंह। बख्त नसर वोथुस योरु, 'यि वनतम अथ तख्तस तल क्याह छुय

दबाँविथ थोवमुत?’ तस गव यि बूज़िथ पँतिम शाह पथ कुन तु ब्रुंहिम ब्रौह कुन। यि बूज़िथ लोगुस पुज ज़ारु पारु करनि जि ‘व्वन्य रठतु च़ु माज़ सेर, अमा म्यॉनिस सिरस मतु करतु फाश।’ पुज्य ओस अँकिस हमसायि सुंद कत्ल कोरमुत तु तसुंज लाश ऑसुन निकरिथ माज़ दगनु किस तख्तस तल दबाँविथ थँवमुच़। तु अम्यक ओस नु अथ वख्तस ताम काँसि ति पय। पुज वोथ वँल्य वँल्य तु दिच़नस कटु माज़ रानाह अख च़ँटिथ तु दोपुनस, ‘अँज्यकि प्यठु आसी च़ेप्रथ दूह अख अख सेर माज़ गरु वातान।’ अमि वाकह पतु छि माजि पोथुर दूहय यड बँरिथ माज़ ख्यवान तु ऑशाह च़टान।

माज़ खे खे येलि यिम माजि पोथुर ऑजिज आयि, दोपुख अज़ ख्यमुहव हाक हना। अमा बख्त नसरस ओस नु हाख ह्यनु बापथ पोंसाह टुंकाह केंह ति। खयाल वोथुस, अमा गछव ना मोहरु खज़ानुकिस बागवानस निश। तति बनि हाख ज़रुर। यि खयाल कँरिथ द्राव बागवानस निश तु तस दोपुन हाक सेराह अख दितु, पगाह दिमोय पोंसु। सु वोथुस, ‘नकद नितु या वोज़ुम, हुक्या छुय वँज़ीर बख्त जमाल। अँम्य सुय निश अनतु लीखिथ म्यानि नावु।’ यि बूज़िथ दोपुस बख्त नसरन जि ‘हतो बागवानाह! च़े छुय अँमिसुय वँज़ीरु सुंजि कोरि सुत्य इश्क गोमुत तु तस सुत्य छुख च़ु नेथुर करुन यछान।’ बागवानस गव यि बूज़िथ हॉरथ जि यि छु कुस ताम कमालस वाँतिथ दरवेश। अँमिस कति च़ु यि पय? तस ओस पँज्य किन्य वँज़ीरु सुंजि कोरि हुंद सख अमार, मगर वँनिथ ओस नु काँसि निश ह्यकान। वनिहे ति किथु पाँठ्य? कुजा वँज़ीरु सुंज कूर तु कति अख बागवान। फोरन वोथुस, ‘हे दरवेश साँबाह! बु हज़ लगय बलायि। केंछा कर, तु हाव तु करामाथाह।’ बख्त नसर वोथुस, ‘यि चोन खांदर सपदि म्यानिवुय अथव। व्वथ अन हाख।’ बागवान च़ाव दवान तु दोरान बागस अंदर तु ओनुन अँम्य सुंदि खॉतरु हाकु त्रखाह अख। सुत्य दोपुनस जि ‘अँज्यकि प्यठु हज़ आसि त्वहिप्रथ दूह गरु हाख वातान। अमा यथ कथि कर तु वुछ।’ अमि पतु छु बख्त नसरसप्रथ दूह ताज़ु ब ताज़ु हाख गरु वातान। अँमिस येमि विजि ति कांह चीज़ ज़रुरथ छु प्यवान, यि छु मॉल्य सुंज किताब मुच़रान तु सु चीज़ छुस गरु वातान। अमि तँरीकु लोग आम लूकन अँम्य सुंजि पेशनगोई हुंद पय। अँथ्य दोरान वुछ कैकबाद बादशाहन अकि दूह खाब तु युथुय बेदार सपुद, तस गव सु खाब मँशिथ। हज़ार कूशिश करनु बावजूद ति छुस नु खाब च़्यतस प्यवान। बादशाहन अँन्य तमाम अँमीर वँज़ीर बुलाँविथ। दोपुनख, ‘छा कांह त्वहि अंदर युस मे वनि जि मे क्या खाब वुछ?’ कांह अखाह ति ह्योक नु तस खाब च़्यतस पाँविथ। बादशाह गव अँमीरन वँज़ीरन प्यठ तुथ च़खि जि सारिनुय वँज़ीरन मा सिवाय बख्त जमाल कोरुन रज़ तु गज़। अमा बख्त

जमालस चायि पनुनि जायि नठ जि शोठस गोछ नु बादशाह जेरि तफतीश अनुन। अव म्वखु गव सु बागवानस निश तु तस वोनुन जि च्चु मा ह्यकख वॅनिथ बादशाहन सॉन्य क्याह खाब छु वुछमुत ? सु वोथुस तोरु दर जवाब, 'अगर काँसि अँकिस खाब नेरि, सु गव फलॉन्य दरवेश।' बख्त जमालन दोपुस, 'तस दरवेशस क्याह छु नाव ?' बागवानन वोनुनस नाव छु तस बख्त नसर। फोरन आव अमि पतु बख्त नसर वॅज़ीर बख्त जमालस निश पेश करनु। तु तस आव वननु जि सु हेक्या बादशाहस च्यतस पाँविथ जि तॅम्य क्या खाब छु वुछमुत। बख्त नसरन दोपुस, 'बु दिमु बादशाह सलामतु सुँदि नावु चिठ्य तु तॅथ्य अंदर आसि सोरुय केंह दर्ज। अमा चिठ्य गछि नु मुच्चरावनु यिन्य।' अमि पतु लीछ बख्त नसरन बादशाह सुँदि नावु चिठ्य यथ अंदर तस ओस वननु आमुत जि सु गछि बख्त नसरस निश इनसॉनी च्चमि हुंद दु ज़ोंगुल गुर साज़ कॅरिथ सोज़ुन, यस प्यठ बख्त नसर सवार सपदिथ बादशाह सलामतु सुँदिस खँदमतस मंज़ हॉज़िर सपदि तु तस पावि खाब च्यतस, तु यि कारवाँयी गछि आम लुकन अंदर सपदुन्य।

बख्त नसर सुंज़ चिठ्य आयि बादशाहस निश वातनावनु, मगर सु गव इनसॉनी च्चमि हुंद गुर सोज़नु बापथ परेशान। सोंचनि लोग जि युथ गुर कति बनि ? अमि कथि हुंद छुनु बादशाह कांह ति हल छँडिथ ह्यकान। आँखुर अख ज़ु दूह गॅछिथ प्योस खयाल जि क्याज़ि सोज़ोन नु योहय बख्त जमाल वॅज़ीर साज़ कॅरिथ बख्त नसरस। यि सोंचनु पतु द्युत बादशाहन बख्त जमालस होकुम जि यि काँम छे तॅस्य अंजाम दिन्य। बादशाह सुंद यि होकुम बोज़नु पतु गव वॅज़ीर बख्त जमाल परेशान। तॅम्य कॅर्य वारियाह हीलु बहानु, मगर बादशाह सुंद ओस होकुम, येमि किन्य तस लाचार गॅछिथ शॉही होकुम मानुन प्यव। अमि पतु आव बख्त जमालस साज़ करनु तु आव बख्त नसरस निश गुर्य सुँदि अनमानु सोज़नु। बख्त नसर सपुद स्यठाह चावु सान बक्त जमालस सवार तु लोग तस बादशाह सुँदिस दरबारे आमस कुन पकृनावनु। बख्त जमालस ओस अमि विज़ि अख अख च्यूह कयामतु खोतु सख बोज़नु यिवान। ह्यवान दिवान वोत बख्त नसर दरबारे आमस मंज़। बख्त जमाल ओस अँदरी हसरतु कि नारु दज़ान जि येम्य तावन ज़दन बनोवुस बु गुर तु सवार सपदिथ हॉव्यनम दूहली तारख। तस बदलु ह्यनु कि नीतु वोनुन बादशाह सलामतस जि 'यि शिकस लद दरवेश छु च्चकि अख बोड बारु ठग तु यि कति हैकि जहां पनाहस मोठमुत खाब च्यतस पाँविथ ? लेहाज़ा गछि अँमिस शर्त युन थावनु जि अगर नु सु यि पज़र हैकि वॅनिथ, सु यियि तेलि तिलु क्रायि अंदर बरनु।' बादशाहन कोर बख्त जमालु सुंद यि वनुन तसलीम तु बख्त नसरस आव वननु जि अगर नु सु बादशाह सलामतस खाब च्यतस पावि,

सु यियि तिलु क्रायि बरनु। बख्त नसरन कोर यि शर्त पानस प्यठ कबूल तु दोपुन 'बादशाहस युस मोहरु खज़ानु फलॉन्य जायि छु, अगर सु योर वातुनावनु यियि, बादशाह सलामत क्याह दिन बख्त नसरस?' यि बोज़नु पतु वोथुस बादशाह जि अगर सु मोहरु खज़ानु तसुंदिस महल खानस अंदर वातुनॉविथ ह्यकख, न्यस्फ खज़ानु यियी च्ने बखशनु। बख्त नसरन दोप बादशाहस गॅछिव अनुनॉविव खज़ानु। यि बोज़नु पतु सूज़्य बादशाहन पनुन्य कारंदु खज़ानु अननु बापथ तु केंह कालाह गॅछिथ आव पॅज़्य पॉठ्य मोहरु खज़ानु तस पेश करनु। बादशाह गव बक्त नसरु संज़ यि करामाथ वुछिथ स्यठहुय शाद तु ज़ोनुन जि बख्त नसर हेकि पॅज़्य पॉठ्य तस खाब च्यतस पॉविथ।

अमि पतु वोथ बादशाह कैकबाद बख्त नसरस कुन, 'यि गव ओत ताम रुत। वं वन तु मे क्याह खाब छु वुछमुत, युस नु मे च्यतस प्यवान छु।' यि बोज़नु पतु वोथुस बख्त नसर जि 'जहां पनाहन ओस खाबस अंदर पनुन अख वॅज़ीर बख्त यार वुछमुत, युस तस ग्राव ओस करान जि अगर सु कत्ल आव करनु, बादशाहन क्याजि कोर नु तसुंदि मारनुक तहकीकात तु तसुंज़ रतु बॅरुन्न लाश क्याजि आयि नु सेकि तलु कॅडिथ स्व कफन दफन करनु?' बख्त नसरु सुंद यि बयान बोज़ान बोज़ान सपुद बादशाहस महसूस जि ज़न तु छु सु अमे विजि यि खाब हू ब हू वुछान। अमि पतु वोथुस बादशाह, 'अदु सॉ तु असि कति लागि पय जि सु कति आव कत्ल करनु तु कथ जायि छे तसुंज़ लाश तु तसुंद कौतिल कुस छु?' बख्त नसर वोथुस 'यि पृछ्यतव पनुनिस वॅज़ीर बख्त जमालस, येम्य तसुंद मछि बंद म्यानि माजि ओस यि वॅनिथ हवालु कोरमुत जि चोन खानुदार गव फलॉन्य जायि रहमते हक तु तॅम्य कोर सु मोहरु खज़ानु किस बागस अंदर पानय दफन।' बख्त नसरु सुंद जवाब बोज़नु पतु आयि केंह शॉही कारंदु मोहरु खज़ानुकिस बागस अंदर सोज़नु येति बख्त यारु संज़ लाश सेकि तलु सरे सोबुत कडनु आयि। अमे दमु आयि तहकीकात करनु खॉतरु बख्त जमालस पृछु गॉर करनु तु तॅम्य कोर इकबाले जुर्म तु ख्वसु तिलु क्राय बख्त नसरु सुंदि खॉतरु बख्त जमालन तयार ऑस करनॉवमुन्न, तॅथ्य मंज़ आव सरे आम दॉरिथ दिनु। बख्त नसरस आव न्यस्फ मोहरु खज़ानु दिनु अलाव वज़ारतुक मनसब ति पेश करनु।

★ ★ ★

दाना वँज़ीर

वनन वोल छु बावथ करान जि अँकिस शहरस प्यठ ओस बादशाहा अख हकूमत करान। सु ओस पनुनि सखावतु किन्य मशहूर तु पनुनि जायि ओस तँमिस येमि कथि हुंद फख्र जि सु छु सखावत करान, येमि सुत्य तसुंज सखावत निनु वॉल्य पनुन तकदीर छि बदलॉविथ ह्यकान। अमा तस ओस स्यठहुय अक्ल मंद वँज़ीराह अख तु सु ओस कथि कथि प्यठ वनान जिप्रथ कांसि चु पनुन्यन कर्मन हुंद फल मेलान। बादशाह ओस नु तसुंदिस अथ वनुनस सुत्य कुनि रंगि ति इतिफाक करान। दूह अकि वोन बादशाहन पनुनिस तस वँज़ीरस जि म्यॉनिस खॉरात करनस ब्रॉह कनि क्याह करि चान्यन कर्मन हुंद ज़ोर। वँज़ीर रूदुस योरु बार बार वनान जिप्रथ कांसि छु पनुन्यन कर्मन हुंदुय फल मेलान। बादशाह सलामतु सुंदि खॉरात करनु सुत्य हेकि नु कांह ति पनुन्य हालत तोताम बदलॉविथ योताम नु सु पानु पनुन्य हालत बदलावनु बापथ पनुन्यन जंगन प्यठ थोद व्वथि। अथ कथि प्यठ सपुद बादशाहस तु वँज़ीरस पानुवॉन्य बहस व मुबाहसु, तु छेकरस वोननस बादशाहन जि पगाह रूज़िज़ि च़ नेह फवलनु प्यठय मे सुत्य, तु युस ति कांह शख्स सारिनय ब्रॉठ मे निश खॉरात निनु बापथ यियि, तस दिमु बु तीचाह मोहरु जि तिमु निथ हेकि सु ति च़े सुत्य हमसरी वँरिथ। वँज़ीरन कोरुस अर्ज़ जि बादशाहम! मे छु यि तसलीम।

दोयिमि दूह सुबहॉय आव बादशाह सुंदिस खँदमतस मंज़ जिन्य मोज़ूराह तु कोरुन तस अर्ज़ जि 'नम च़म च़ँटिथ ओसुस जंगलु मंज़ु ज़्युन च़ँटिथ अनान। सु ओसुस बाज़रु कुनान तु यिथय पॉठ्य ओस शोठ दूह दूह कडान। अमा व्वन्य गोस बुडु तु ह्यकथ ति रूज़ुम नु केंह जंगलु मंज़ु ज़्युन च़ँटिथ अनुनस। अज़ छुस स्यठाह नादार सपद्योमुत। बॉच़न छिम फाकु लगान। तवय गोस अज़ त्वहि निश यिनु खॉतरु मजबूर। केंछा कॅर्यतोम अथु रोट।'

बादशाहन ज़ोन मोकु गॅनीमथ तु दिच़न तस तीचाह मोहरु, यीचाह तँम्य निथ हेचि। गरु युथुय वोत, आशनि दिच़न नेबरु प्यठय क्रख जि 'दोपुमय व्वलु यूर्य। वुछ अज़ सुबहॉय क्याह गॉबी खज़ानु सूज़ दयन। व्वं कडव अँस्य ति मसोस तु अथु दारनु निशि लबव नजाथ।' मगर अति क्याह जवाब यियिहेस? आशेन्य ऑसुस कथ ताम गरस अंदर दूगु मुनवँन्य करनु बापथ गॉमुच़। येलि नु अति आशेन्य वुछिन, यिमु मोहरु थाव्यन कुठिस

अंदर तु द्राव तस छांडनि। आंगनु मंजु न्यबर नीरिथ वुछिन स्व लोंचि अंदर तोमलु सेराह ह्यथ ओरय पकान तु दोपुनस, 'व्वलय अँज्य कि प्यठु हय द्युत असि दयन नजाथ।' अमा युथुय गरस अंदर आशेन्य ह्यथ च्राव, अति वुछन नु कुने तिमु मोहरु यिमु बादशाहन दिचमच्च आसनस। यि वुछिथ गोस पँतिम शाह पथ कुन तु ब्रुहिम ब्रोंह कुन। स्यठाह पान जान मोरुन पनुनि अथ बद नँसीबी प्यठ। दोपुन ख्वदायन दिच्राव, अमा ग्रटु वॉलिस आव नु ख्वश। सूंचुन जि दर अस्ल छुनु कोठन हुंदिस कुसमतस मंज बे-गम रोजुन लीखिथुय। दोयिमि दूह वोत बेयि बादशाह सलामतस निश तु लोग पनुनि बद नँसीबी प्यठ पँरियाद करनि। वदान वदान वँनिनस पनुन्य सॉरुय लॉल तु बादशाहस ति गव अथ प्यठ सख सदमु। ऑखुर तुल तँम्य अख म्वलुल लाल तु दितुन तस यि वँनिथ जि गछ छुन पनुनिस शिकसस लार वँरिथ। मोज़ूर गव स्यठाह शाद तु लोग गरु कुन कदम दिनि। अमा खयाल वोथुस जि ब्रुंह्यामि लटि बादशाह सलामतस निश मोहरु रँटिथ पजिहे तस दयि सुंद हमुद बजा अनुन। ति कोरुम नु केंह। लिहाजा करव वुन्यक्यन तसुंद ग्वडु शुकर अदा तु अदु गव गरु अचुन। यि वँनिथ लोग अँकिस आबु तलावस प्यठ अथु बुथ छलनि, तु यि लाल थोवुन पनुनि कपर च्रादरि प्यठ। ख्वदायि सुंद करुन जि अमि तलावु अँदरु खँच गाडाह अख तु छुनुन यि लाल न्यंगलिथ। जिन्य मोज़ूर येलि अथु बुथ छँलिथ लाल तुलनि लोग, अति वुछुन सु गॉब गोमुत। यि वुछिथ ज़न पेयस नबु त्रठ। स्यठाह पान जान मोरुन, मगर अमि सुत्य क्याह बनिहेस। यि गछुन ओस, ति गव। पनुनि बद-नँसीबी प्यठ असिहे किनु वदिहे? फुट्यमुत्यव क्वठ्यव वोत गरु तु आशनि वोनुन जि अज़ गँयोव बादशाह सलामत बेयि मेहरबान। अमा सॉनिस शिकसस क्याह बनि? यि दियि नु असि व्वतलुनय। नतु हय बादशाहन ओतरय मोहरु दिच्रायि तु अज़ दिचोन अख कुमती लाल। स्व वँछुस तोरु 'छुनुस बलायि, व्वलु बेह पानस, वुछव दय क्याह करि?'

बेयि दूह गव जिन्य मोज़ूर बादशाह संजि डेडि तल। अमि विजि ओस सु पनुनिस वँज़ीरस वनान जि जिन्य मोज़ूरन आसि कुनि ति हालतस मंज पनुनिस शिकसस लार वँरमुच्च। वुनि ओस वँज़ीरस बादशाह संजि कथि जवाब दिनय जि जिन्य मोज़ूर च्राव वदान तु रिवान बादशाहस निश तु लोग पनुन बिदादु वनुनि। बादशाह वोत वँज़ीरस कुन जि यि बुडु छु मुलु बेवकूफ लबनु यिवान। वँज़ीरन द्युत बादशाहस जवाब जि 'जहां पनाह! बेवकूफ छुनु। दँपिव पनुन्यन कर्मन हुंद फल छु बुगतान तु बेयि नु केंह।' यि बूजिथ खोत बादशाहस खशम तु बडि हटि वोथ पनुनिस वँज़ीरस कुन, लोगुथ च्चे बेयि ती वनुन। व्वलु अज़ दिमोस कम कुमतुच कनि हेना, पतु वुछव क्याह बनि? यि वँनिथ दिच बादशाहन

ज़िन्य मोज़ूरस कुन चमकवुन्य कनि हेना अख। मोज़ूरन तुज यि म्वछि अंदर तु द्राव गरु कुन। अँकिस जायि लोग ज़िन्य मोज़ूर म्वठ मुचरॉविथ वुछनि ज़ि यि वँन्य मा गँयम अथु मंज़ु गाँब। वुनि ओस नु अँम्य शिकस लदन अथु पूर पाँठ्य मुचरोवमुतुय ज़ि हेर्य किन्य आयि अख गाँठ तु दितुनस कुनुय जोंटु तु चँजिस यि वँन्य ह्यथ। ज़िन्य मोज़ूरस गव यकीन ज़ि काँसि हंदि अथु रोट करनु सुत्य छुनु केंह ति बनान। ख्वदायस येलि कांह थोद तुलुन आसि, तेलि छे कथुय बदल आसान। गरु वॉतिथ वोनुन आशनि यि सोरुय कुसु तु दोपुनस व्वलु दि तबर, तु मरान जुवान अनव जंगलु मंज़ु बेयि स्वय ज़िन्य ग्यँड ग्यँड तु करव र्वनु ज्वनु। हुपॉर्य ओस बादशाह वँज़ीरस वनान ज़ि मोज़ूर आसि ज़रूर पनुन्यन क्वठ्यन प्यठ व्वदनी गोमुत। मगर अक्ल मंद वँज़ीर ओस ज़िन्य मोज़ूर सुंदि हालु निशि बा खबर तु सु वोथ बादशाह सलामतस कुन ज़ि 'आलम पनाह! यि तोह्य छिवु वनान, ति सपुद नु केंह ति। बँल्यकि छु सु वुनि ति तिथुय छतीस। अव व्वन्य छु मुमकिन ज़ि सु मा बदलावि व्वन्य पनुन्य हालथ, तिक्याज़ि सु लोग बेयि पनुन कार रोज़गार करनि।' अमि दूह द्राव ज़िन्य मोज़ूर तु ओनुन बोड बारु ज़िन्य बोराह तु अथ्य आस बाज़रु जान म्वल तु ह्योतुन ओट, गाडु बेत्रि तु गरु वातुनॉविथ गॉस शुर्य बाँच यि वुछिथ ख्वश। अमि दूह ख्यव तिमव यड बँरिथ बतु। दोयिमि दूह येलि ज़िन्य मोज़ूर जंगलस अंदर ज़्युन च़टनि लोग, क्वदरँती वँछ तसंज तबर कुलिचि तथ लंजि यथ प्यठ गाँटि हंड ओल ओस, तु लँड पथर प्यथ प्यव सु लाल ति युस गाँटि ओस न्युमुत। यि वुछिथ गव मोज़ूर स्यठह्य शाद तु तसंजि खुशी हंड रूद नु कांह ति हद। तबर तु ज़्यन अँत्य त्रॉविथ वोत मोज़ूर गरु क्रकु दिवान ज़ि च़ूर लोब, च़ूर लोब। हुपॉर्य यिमु गाडु कालु मोज़ूरन अनिमच़ु आसु, तिमु फ़ुहान फ़ुहान द्राव अकि गाडि हंदि शिकमु मंज़ु अख चमकवुन लाल। यि ओस सुय लाल युस गाडि तमि वख्तु न्यंगलिथ ओस न्युमुत, येलि मोज़ूर क्वलि प्यठ अथु बुथ ओस छलान। स्व ति दोरेयि खानुदारस कुन क्रकु दिवान ज़ि च़ूर लोब, च़ूर लोब। अहँज़ु क्रकु बुज़िथ च़ँज यिहँज़ि तस हमसॉय बायि ख्वरव तलु मेच़ नीरिथ, येमि ज़िन्य मोज़ूर संज तिमु मोहरु च़ूरि आसु नीमच़ु, यिम मोज़ूरस बादशाहन ग्वडनिचि लटि आसु दिच़मच़ु। तमि हमसायि बायि ज़ोन ज़ि शोठि मा रटुनावन यिम बादशाह सुंघन सज़ोवलन हंदि ज़ँरियु, तु अमि ब्रॉंदुय तुजि तमि मोहरु तु वॉच़ च़ूरि पाँठ्य यिमन बाँचन निश तु करिनख तिमु मोहरु हवालु। दोपुनक 'ख्वदा बख़्शान, रसूल बख़्शान, मे दीतव यथ अत्रिस प्यठ माँफी तु बादशाह सलामतस मतु वँन्यतव म्यानि येमि च़ूरि हंड।' यि वुछिथ गँयि यिम बाँच ज़ु स्यठह्य शाद तु लँग्य ऑशु सान ज़िंदगी बसर करनि। यिहंड हाल येलि बादशाहस

वैज़ीरन बौव, तैम्य दौपुनस तौर, 'अवु चोनुय ओस पोज़ ज़ि इनसानस छु सौरुय पनुन्यन
कर्मन हुंद फल व्यतरावुन प्यवान तु काँसि हुंद डोख थावनु सुत्य छुस नु कैह ति बनान।'

★ ★ ★

स्वनहॅरी आब, सज़ कुल तु कथ करवुन्य चॅर

दपान यि ओस अँकिस शहरस अंदर बादशाहा अख तु ज़नानु आसस नमनमथ। अमा शुराह मुराह ओसुस नु अँकिस ति ज़ामुत तु अम्युक ओस बादशाहस सख अरमान। दूह अकि ओस पनुनिस अँकिस वँज़ीरस सुत्य हवा खूरी करान। अँकिस जायि वॉतिथ वुछ तिमव अनहॅरिशि कोरि तारु पानुवँन्य कथन मेठेमचु। तिमव मंज़ु ऑस अख कूर बेयन वनान जि 'मे अंदर छु यि वस्फ जि अगर सुन्ननि पन तारु, तमि अकि पनु दावि सुत्य ह्यकु येमि शहरुक्यन तमाम लुकन हुंघ पलव सुविथ तु तोति म्वकलिनु स्व पनु दाव।' अमि पतु वँछुख दौयिम कूर, 'मे मंज़ु छु यि वस्फ जि अगर नॅटिस मंज़ु आबु नोट अनु, तमि मंज़ु हेकि अख शहरुक शहर त्रेश चथ तु बेयि करु शहरुचन तमाम सडकन तु कोचन छिरुकाव, तोति सोरि नु तमि नटि मंज़ु आब।' त्रैयिम कुर लॅजिख पनुन वस्फ बयान वॅरिथ वनुनि जि युस अखाह ति तस सुत्य नेथुर करि, तसुंदि खॉतरु करन स्वनु सुंद गोबुर तु र्वपु सुंज़ कुर पॉदु। बादशाहस आव अँम्युसुय त्रैयिमि कोरि हुंद वस्फ पसंद तु तस वोथ दिलु मँज्य खयाल जि तस छुनु शुराह मुराह ति कांह, छुना बेहतर अँमिसुय सुत्य नेथुर करुन युथ बु ति साह्यबे औलाद बन। अति नीरिथ बोव बादशाहन पनुन यि खयाल वँज़ीरस तु सु वोथुस तोरु, 'जहां पनाह! यि क्वसु कथ छि? पगाह अनोन कोरि हुंद मोल दरबारस मंज़ु नाद दिथ तु ह्यमोस तुहँदि बापथ नेथुर।' दौयिमि दूह आव कोरि हुंद मोल दरबारस मंज़ु हॉज़िर करनु। तस आव वनुनु जि बादशाह सलामत छु तसुंजि कोरि सुत्य नेथुर करनुक खॉहिश मंद। सु बिचोर गव यि बूज़िथ दम फुट्य जि कति बादशाह तु कति अँकिस पँहरि मंज़ु मुसीबतुच जिंदगी गुज़ारन वोल अख नादार शख्स। बादशाहस कोरुन अर्ज़ जि 'जहां पनाह! तोह्य छिवु येमि शहरुक्य बादशाह तु कोठ छु अख अदना शख्स। यि रिशुतु कति हेकि मुमकिन बँनिथ।' बादशाह वोथुस, 'मे छु कुनि ति सूरतस मंज़ु यि नेथुर करुन।' यि बूज़िथ कोरुस कोरि हुंघ मॉल्य दुबारु अर्ज़ जि 'बादशाहम! मे दियिव अकि

रॉन्न हंज़ मोहलथ। बू ति पृष्ठु पनुनि कोरि।' बादशाह वोथुस, 'अथ अंदर क्याह एतिराज छु। पगाह गछि दरबारस मंज़ येमी वख्तु हॉज़िर सपदुन।'

कोरि हुंद मोल येमि वख्तु गुरु वोत, सु ओस स्यठाह दिल मलूल। कूर वॅछुस, 'बबु यि वनतम जि चू क्याज़ि छुख यिथय ह्यू?' तॅम्य दोपुस येमि कथि छि यि कथ। स्व वॅछुस दर जवाब, 'अदु चू क्याज़ि छुख ग्वतन गोमुत? गछ बादशाह सलामतस दि वादु। दपुस, आ, मे छु यि रिशु मंज़ूर।'

दोयिमि दूह वोत कोरि हुंद मोल बादशाह सुंदिस खँदमतस मंज़ तु कोरुनस अर्ज़ जि 'बादशाहम! मे छु यि रिशु कबूल।' अमि पतु कमय काल गॅछिथ आव अँम्य सुंजि कोरि बादशाहस सुत्य बडु चावु सान खांदर करनु तु ग्वडनिचि रॉन्न अंदरुय वोनूनस नवि बादशाह बायि जि तस ज़ेवि स्वनु सुंद गोबुर तु र्वपु सुंज कूर अथ शर्तस प्यठ येलि बादशाह सलामत त्रन र्यतन तु दहन दूहन तस सुती राथ दूह बिहि। बादशाह ओस शुरुय बोछ, लिहाज़ा प्यव तस बादशाह बायि सुत्य खांदर वॅरिथुय बराबर त्रन र्यतन तु दहन दूहन कुठिसुय मंज़ रोज़ुन। नवि बादशाह बायि हुंद यि वॅतीरु वुछिथ लजि बादशाह सुंजु बाकय नमुनमथ हरमु अँदरी दज़नि तु तिमन ओस अँदरुय किन्य यि दूख ति जि स्व बनि व्वन्य साहिबे औलाद तु तसुंदुय गोबुर बनि पतु तख्तुक वॉरिस। अमि कथि हुंद ओस तिमन सख दोद। अवु किन्य लजि तिमु सारेय अँमिस बिचारि खलाफ च्वयि करनि। पानुवॉन्य मशवरु वॅरिथ अनुनॉव तिमव चूरि चूरि शॉही वारेन्य नाद दिथ तु दोपुहस, 'नवि बादशाह बायि छे व्वमेद वॉरी। तस येलि खलास गछनुक वख्त वाति, तमि विजि छुय च़े तसुंदि शुरि बदलु ख्वाह नेचुव ऑसिन या कूर, तस होनि बचु थावुन। अमि खॉतरु दिमोय अँस्य च़े थँज़ बखशॉयिश।' यि बूज़िथ सपुज़ वारेन्य आमादु यि कॉम करनु खॉतरु। येलि नव र्यथ बराबर अदा गॅय, बादशाह बायि सपुद खलास गछनुक आज़ार तु दबोदब आयि वारेन्य मंगुनावनु। स्व वॅछु बादशाह बायि, 'कूरी, यथ शहरस अंदर छु यि र्यवाज जि येमि विजि कांह सियाह सर प्रसुन छे ह्यवान, तस छे अँछन पॅट यिवान दिनु तु अदु छे स्व कुनि आज़ारु वरॉय प्रसान। पॅट गंडनु वरॉय छुनु शुरुय थनु प्यान।' स्व वॅछुस तोरु, 'अगर यथ शहरस मंज़ सुय रस्म छु, स्व किथु पॉठ्य हेकि सु रस्म फुटरॉविथ।' अमि पतु आयि तस अँछन पट गंडनु तु ज़ास पॅज्य किन्य स्वनु सुंद ह्यू गोबुर तु र्वपु सुंज हिश कूर दुकि हंज़ि शक्ति। अमा वार्यनि थँविनस यिमव बदलु होनि बचु जोराह तु वुछान वुछान गॅयि सॉरिसुय शहरस अंदर शोहरत जि बादशाह बायि ज़ायि होनि बचु। यि खबर बूज़िथ गव बादशाहस हेह। दोपुन ख्वदायन दिच़ायि औलाद, अमा होनि बचु हिव्य। तस खोत अथ प्यठ सख

खशम तु होकुम दितुन जि होनि बचन हुंज मोज गछि शॉही मँहलु अँदरु कँडिथ मारु वातलन हवालु यिन्य करनु। अमा हुम्य वँज़ीरन कोरुस अर्ज़ जि 'पादशाहम! अमि बिचारि क्याह कोर? दर अस्ल ओस ख्वदायस यी करुन तु अथ प्यठ यि बिचॉर मिलजिम बनावुन्य न छु इनसाफ तु न दानॉयी। जान गव यि जि शॉही मँहलु मंजु कँडिथ थावोन यि शॉही अस्तबलस मंजु तु तँती आसि गुपनन हुंद गुह बेत्रि कडनुच कॉम करान।' यिथु पॉठ्य आयि बादशाह बाय मारनु निशि बचावनु।

अँमिस बद कुस्मत बादशाह बायि हुंघ यिम शुर्य जु बरनॉव्य हुमव नमुनमथ हरमव अँकिस संदूकस अंदर तु द्यावनोवुक सु संदूक दँरियावस अंदर बँरिथ। अथ दँरियावस प्यठ ओस अँकिस जायि दोब तु दोब्य बाय पलव छलान। तिमव येलि दँरियावु मँज्य संदूकाह वुछ वसान, कसम द्युतुहस जि अगर बोरुत छुख, तेलि व्वलु यूर्य कुन, व इला खॉली छुख, तेलि नेर स्योदुय। ख्वदायि सुंद कार, संदूक आव यिहँदि कसम दिनु पतु यिमन बॉचन दून कुन, तु यिमव येलि आबु मंजु खॉरिथ सु संदूक मुचरोव, तथ अंदर वुछिख ज़ा शुर्य जोराह स्यठह्य मॉर्य मँद्य तु ख्वश शँकील। तिमन आव अन्यन अँछन गाश तिक्याजि तिमन ति ओस नु औलादु रँग्य कुहुन्य। अमा सवाल ओस तिमन दूदुक। फिकिर पेयख जि यिमन शुर्यन किच गँछ दूद मोजाह। कॉफी जुस्तजू कँरिथ ति बिट्याख नु कुनि ति दूद मोज। ऑखुर बूजुख जि बादशाह सुंदिस गुपन गानस अंदर छु ज़नानि अँकिस दूद नीरिथ च़लान तु तस छुनु शुराह मुराह ति कँह। यि बोज़नु पतु गँयि तस निश। दोपुहस जि पासि लिल्लाह दितु सान्यन ज़ा शुर्यन अँज्यकि प्यठ दूद। स्व गँयि यि बूजिथ शाद तु लँज तोर गँछिथ तिमन दूद दिनि। जु च़ोर वँरी गँछिथ त्रॉव्य तमि दोब्य बायि यिम बॉय बारुन्य च़ाटु हाल, येति तिम र्यतन हुंद सबक दूहन अंदरुय च्यतस थावनि लँग्य। दूह अकि गँयि दोब्य लँडकस पनुन्यन च़ाटु बाजन सुत्य कथ ताम कथि प्यठ लडॉय तु द्युतुहस तिमव सँमिथ मार। दोयि च़ोरि दोह्य गँयि तस बेयि तिमन सुत्य लडॉय तु अमि दूह वोनुहस जि 'च़ु हबा छुख च़कि हरामुक। न छुय मॉल्य सुंद पय तु न माजि हुंद। च़े आसुनय नु यिथ्य अतवार तु अदु किथ्य आसुनय।' यि गव यिमन सख मुश्किल तु गरु वॉतिथ लँग्य मॉलिस माजि वनुनि जि असि वँन्यतव अँस्य छा तुहुंघ औलाद किनु बेयिस काँसि हुंघ? तिमन गँयि गलि ज़्यव। दोपुहख त्वहि क्या यिमन कथन सुत्य? मगर यिम रूदिख योरु बार बार वनान जि असि वँनिव अँस्य कँहँद्य छि? दोब्य सुंघव बॉचव दूयव वोनुहँख जि 'असि ओस नु कांह ति औलाद। अकि दूह अँस्य अँस्य बॉच ज़ु गाठस प्यठ पलव छलान। तामथ आव आबु पेट्य यीरान यीरान अख बोरुत संदूकाह अख। सु

रोट असि तु तमे मंजु द्रॉव तोह्य बाँय बारुन्य जु तु तनु प्यठ छिव तोह्य साँन्य औलाद। नतु छिव नु तोह्य सानि मरि आमृत्य।' यि बूजिथ गव दोब्य लँडकु सख ओजुर्दु तु गरि नीरिथ वोत अँकिस माँदानस मंज। अति छु अथ कथि प्यठ ज़ार ज़ार वदान। ख्वदायि सुंद करुन जि हज़रत ख्वाजु खँज़ुर गव नमूदार। दोपुनस, 'गोबराह, च़ु क्याजि वदान?' सु वोथुस जि 'ऐ दोस्ते ख्वदा! मे छुनु पय जि बु कुहुंद छुस? लुख छिम वनान जि च़ु छुख हरामुक। तवय छुस दिल ओजुर्दु।' हज़रत ख्वाजु खँज़ुर वोथुस, 'गम मु बर! चाँन्य ति फेरन दूह।' अमि पतु द्युतुनस तँम्य अख हचुव गुर, रज़ तु गज़। दोब्य लँडकु वोथुस, 'यिमन चीज़न क्याह छुम करुन?' ख्वाजु खँज़ुर वोथुस तोरु जि 'येमि विजि कुनि ति जायि आसी गछुन आसान, यथ हचिविस गुरिस आँस्यजि कसम दिवान। पतु आँसी यि अँछ टिँडि अंदर च़े तोत वातुनावान। येलि काँसि सुत्य लडॉय आसी गछान, यि रज़ आसि तस गँडिथ थावान तु गज़ आस्यस मार दी दी तोह थावान कँरिथ।' यि वँनिथ गव ख्वाजु खँज़ुर गॉब तु दोब्य लँडकस ति च़ोल दिलुक गुबार तु वोत गरु असान तु गिंदान।

दोब्य लँडकु ओस ज़ानान जि सु तु तसंज बेनि छिनु दोब्य सुंद औलाद अवु किन्य वोथ तस खयाल जि कँछा करुहॉ बु पनुन वनु ज़वनु, तिक्याजि यपॉर्य छम बेनि ति वॉच़मुच़। लिहाज़ा गव अकि दूह बादशाहस निश तु तस वोनुन पनुन सोरुय हाल अहवाल तु आर यिथ थोव तँम्य पनुनिस महलु खानस अंदर कथ ताम कामि प्यठ। बादशाह ओस अँमिस सख यछान तु अज़ली ओसुस तस सुत्य महबत ति गोमुत। च़कि ओसुख ना अज़ली रिशतय, तवय आँस बादशाहस दोब्य लँडकु संज कल गनेमुच़। अकि दूह वोनुनस बादशाहन जि च़ु कर अँज्यकि प्यठ तसुंदिस बागुकिस मकानस मंज बेनि ह्यथ कयाम। यि बूजिथ आयि नु दोब्य लँडकस पछुय। सु गव दोबिस निश तु ह्योतुनस कुनि वख्तु बापथ बादशाह सुंदिस बागुकिस मकानस अंदर रोज़नुक इजाज़थ। यपॉर्य ओस बादशाह संजान सारिनय ज़नानन किथु ताम पॉठ्य पय लोगमुत जि य्वसु चाल तिमव गिँजमुच़ आँस, स्व आँस नु कारगर गॉमुच़। तिमन ओस येमि कथि हुंद ति नेब लोगमुत जि स्वनु सुंद गोबुर तु र्वपु संज कूर कति छि। अमि किन्य लजि तिम दोब्य लँडकु मारुनावनुचन च़वयन। अकि दूह मंगुनॉवख शॉही वारेन्य तु दोपुहस जि 'बादशाह सलामतन छु पनुनिस हुथ बागस अंदर अख नवजवानाह पनुन्य बेनि ह्यथ थोवमुत। च़ु गछ च़ूरि पॉठ्य बागस अंदर तु नवजवानु संजि बेनि कड तु कल जि स्व वनि पनुनिस बाँयिस जि यथ बागस अंदर गोछ स्वनहरी आबुक तलाव आसुन। स्व वनि यि बाँयिस तु नेरि सु स्नहँरी आब अननुकिस सफरस प्यठ तु तपॉरी गलि सु। अदु ह्यकव अँस्य साँरी बँचिथ। नतु छु च़े ह्यथ असि

सारिनय खतर।' केंह दूह गँछिथ वॉन्न वारेन्य तमि वख्तु दोब्य कोरि निश, येमि विजि तस तति कहुन्य ओस नु। वार्यनि लॉज दोब्य कोरि मुठ्य पेचन्य तु मकायि मास। कलस वडि फ्युराह दिवान दिवान वँछुस, 'वुछ क्याह मॉर्य मॉद बागाह छु! दिल छु दपान च्वन पँहरन रूज्यजि येथ्य कुन वुछान। क्वदरतन छु ज़न तु पानु यथ अथु डोलमुत। य्वदवय यथ अंदर स्वनहँर्य आबुक तलाव आसिहे, अदु वुछहख च़ु बाग क्याह वनिहे।' स्व वँछुस, 'यि स्वनहँर्य आब कति छु बनान?' वार्यनि दोपुस, 'हु क्या हुथ दोयिमिस शहरस अंदर तु बेयि कति?' शाम वख्तस येलि बोय आस, यि बीठ बुथिस हुमल थमल खॉलिथ तु कथाह बाथाह ति छनु बॉयिस सूत्य केंह करान। यि वुछिथ दोपुस बॉय, 'च़ु क्याजि छख अज़ मगमूम? ऑखुर वजह क्याह छु चानि छ्वपि हुंद?' बेनि वँछुस, 'यथ सॉनिस बागस अंदर गोछ ना स्वनहँर्य आबुक तलाव आसुन?' बोय वोथुस, 'ति क्याह गव स्वनहँर्य आब तु सु कति छु बनान?' दोपुनस, 'हुथ हमसायि शहरस मंज़ छु स्वलबु स्वलबु बिटान।' यि बूजिथ वोथुस बोय, 'अदु यि ति छा कांह कथ। बु हय चानि बापथ यिम संगलाख प्रॉटिथ त्रावख। व्वथ त्राव यि मन्नर तु पगाह नेरु बु चानि बापथ स्वनहँर्य आब अनुनि। च़ु कांछ तु फकत म्यॉन्य जिंदगी।'

दोयिमि दूह सुबहॉय द्राव दोब्य लड़कु तु दितुन हचिविस गुरिस कसम जि मे वातुनाव तथ शहरस अंदर, येति स्वनहँर्य आब छु आसान। यि बूजिथ आयि हचिविस गुरिस ज़व तु दोपुनस, 'तोत वातुन छु चानि खॉतरु ना मुमकिन। व्वन्य अगर वातख ति, तति गछख मारु।' दोब्य लँडकु वोथुस, 'मारु क्याजि गछु?' हचिव्य गुर्य वोनस, 'सु छु द्यवन, जिनन तु पँरियन हुंद शहर तु तथ नागस प्यठ छे तिहँज्य अमलदॉरी। तोत वातुन छु अवय म्वखु मोतु किस ऑसस मंज़ गछुनस बराबर।' अमिकिस जवाबस मंज़ वोनस दोब्य लँडकन, 'अमिच वनतम कांह चारु जूयियाह।' हचुव गुर गव मजबूर तु वोनस जि 'युथुय च़ु तोत वातख, तति यिनय च़े हतु वादु रामु हून्य लारान। तिम आवुर्य थावनु म्वखु छय च़े यीचाह ह्यकक तु तीचाह च्वचि सूत्य तुलनि। डेडि अँच्यथुय युथुय तिम लारान यिन, योरु छे तिमन च्वचि त्रावनि। तिम लगन च्वचि ख्यनस तु च़ु अन्नख दोयिमि डेडि अंदर तु अँचिथुय त्रावख च़ु रज़ तु गज़ यलु। यिम थवन सारिनय जिनन तु द्यवन मॉर्य मॉर्य तोह बनॉविथ। अदु ह्यकख च़ु स्वनहँर्य आबुकिस तलावस प्यठ वॉतिथ। तमि मंज़ तुलि जि वँल्य वँल्य आबु नोटाह अख तु नीर्यिज़ पोत खोरे, युथ रामु हून्य वुनि च्वचय आसन ख्यवान। सुय आब छुय च़े गरु अँनिथ बागस मंज़ बाग त्रावुन तु वुछान वुछान बनि स्वनहँर्य आबुक मॉर्य मॉद तलाव।' यि बूजिथ अनि दोब्य लँडकन च्वचि बोहरि जोराह तु

दितुन हचिविस गुरिस कसम जि वातुनाव मे तथ शहरस मंज येति स्वनहॅर्य आब छु आसान। वुछान वुछान वोत दोब्य लॅडकु पॅरिस्तानस मंज तु कालु कालय वोत स्वनहॅर्य आब ह्यथ तु त्रुवुन सु मंज बागस। बेनि येलि सुबहस बेदार गॅयस, स्व गॅयि स्वनहॅर्य आब तलाव वुछिथ स्यठह्य शान। यि आब वुछुन विह्य बदलावान। यि पय येलि बादशाह संज्जन ज्ञानानन लोग, तिम पेयि अकि अकि त्रेशि। दोपुख यि तावन ज़द हय छु मोतुकि ऑसु मंजु ति वापस आमुत तु व्वन्य क्याह बनि। तिम गॅयि बेकरार। गछुहन ना? मोथ ओसुख कलु पेठ्य नञान। लिहाजा मंगुनॉव तिमव दुबारु वारेन्य तु दोपुहस, 'चु गछ पगाह दोब्य कोरि निश तु ओरुच योरुच कथाह बाथाह वॅरिथ वॅन्यज्यस जि यथ तलावस गोछ ना सजु कुल तु कथु करवुन्य चॅर आसुन्य। स्व दपी यिम चीज कति छि बनान? चु वॅन्यज्यस फलॉन्य पॅरिस्तानस मंज तु अमे छवम्बि सुत्य गलि तसुंद बोय। अदु व्वथि असि थफ, नतु गछव मारु।'

कॅह दूह गॅछिथ द्रायि वारेन्य तु वॉच दोब्य कोरि निश। अञान अञॉनी दोपुनस, 'कूरी! च्ने छुय बुबारक येमि स्वनहॅरी आबुक। वुछ क्याह छु अज बाग विसान तु चसान। सॉनिस बादशाहस ति बनि नु युथ ह्यु बाग तु स्वनहॅरी आबुक तलाव खाबस मंज ति। व्वन्य गोछ कूरी यथ अंदर सजु कुल तु कथु करवुन्य चॅर आसुन्य। अदु वुछहख जि बड्यन बड्यन शाहजादन किथु पॉठ्य लगुहॅन चॉनिस ब्रांदस प्यठ दकु तु डुलु।' यि बूजिथ वॅछुस दोब्य कूर, 'यि कति छु बनान तु वस्फ क्याह छुख?' वार्यनि दोपुस, 'यिम दूश्वय चीज बनन फलॉन्य पॅरिस्तानस मंज। सजु कुलिस छु यि वस्फ जिप्रथ दूह छि तति नवि नवि कुस्मुक्य तु रंगुक्य पोश नेरान तु य्वसु कथु करवुन्य चॅर तथ प्यठ बिहिथ छि आसान, स्व छे पथ कुन गॉमति वख्तुक्य हालात तु कथु वनान।' यि वननु पतु द्रायि वारेन्य, तु दोब्य कूर बीठ बेयि हुमल थुमल ह्यथ। शाम वख्तस येलि बोय आस, तॅम्य वुछ बेनि बुथ गोब्योमुत। सु गव यि वुछिथ शश पंजस जि कुनि मा छुनस काँसि कॅह वोलु दोलु वोनमुत। बोय वोथुस, 'च्ने क्याजि छुय बुथ गोबिथ?' बेनि वॅछुस, 'गव्यम ना? स्वनहॅर्य आब तु अन्योथ। व्वन्य अँन्यजि हा सजु कुल तु कथु करवुन्य चॅर ति अथ किञ।' सु वोथुस योरु, 'यि सजु कुल कति छु बनान, खॉसियथ क्याह छस तु कथु करवुन्य चॅर कति बनि तु तस क्याह वस्फ छु?' बेनि वॅछुस, 'यिम दूश्वय चीज छि दोयिमि शहरुकिस पॅरिस्तानस मंज मेलान। सजु कुलिस छिप्रथ दूह नवि नवि रंगुक्य पोश नेरान तु चॅर छे गुजरेमति वख्तुक्य कुसु बावान।' यि कुसु बूजिथ वोथुस बोय, 'अदु यि ति छा बॅड

कथाह ? चानि बापथ पेय तन मे केंह ति करुन। व्वथ त्राव यि मच्चर। पगाह तामथ दिमय यिम द्वक्षय चीज़ अँनिथ।’

ज़ु चोर दूह गँछिथ लोग दोब्य लँडकु हचिविस गुरिस ज़ीन करनि। तस आयि अमि विज़ि ति ज़बान तु दोपुनस, ‘मतु गछतु तोर तिव्याज़ि तति गँयि अज़ ताम च़ेय हिव्य कौत्याह वलुवीर मारु।’ यि बूज़िथ गव दोब्य लँडकु दिल ओज़ुर्दु तु हचिविस गुरिस दितुन कसम जि अमिच वनतम कांह चारु जूयिया। गुर वोथुस तोर, ‘अछा, येलि व्वन्य गछखुय, तेलि तुल पानस सुत्य दालुव प्यालु, दूकुर तु करु सेराह अख। दोब्य लँडकु वोथुस, ‘यिमन चीज़न क्याह छुम करुन?’ सु वोथुस तोर, ‘चु युथुय पँरिस्तानस मंज़ ग्वडनिचि डेडि प्यठ वातख, तति वुछहन अख ओन द्यव। सु वनी व्वलु मे दि शानन दोग दोग। चु तुल्यज़ि दूकुर तु दिज़्यस तमि सुत्य दोग दोग। अमि सुत्य गछि सु च़े प्यठ ख्वश। पतु मंगी सु त्रेश। चु चॉविज़्यन सु यथ दालुविस प्यालस मंज़ त्रेश। अमि पतु दियी सु च़े ख्यनु खौतरु शँस्तुरुव करु। तिम छुनिज़ि चु त्रँविथ तु लॉग्यज़ि पनुन्य करु खेनि। सु गछि वुछान वुछान डेडि प्यठ गौब तु अमि पतु अँच्च्यज़ि दोयिमि डेडि तु त्रॉव्यज़ि रज़ तु गज़ यलु। बुथि यिनय च़े बाह शथ देविनि जोश कँरिथ। चॉन्य रज़ तु गज़ गंडि तिमन अकि अकि तु थाव्यख मार दी दी तोह बनाँविथ। अद ह्यकख चु तथ नागस प्यठ वॉतिथ यथ अंदर सज़ु कुल तु कथु करवुन्य च़र बिहिथ आसि। चु खौल्यज़्यन अके दरु सु कुल तु पोत खोरे फीर्यज़ि वापस।’

दोब्य लँडकन ओन दालुव प्यालु, दूकुर तु करु त्रखाह तु दितुन हचिविस गुरिस कसम जि वातुनावुम तथ शहरस अंदर यथ अंदर सज़ु कुल तु कथु करवुन्य च़र छे। दोब्य लँडकु द्राव अथ सफरस तु राथ अदा सपदनु पतु वोत यिम द्वक्षय चीज़ ह्यथ गरु वापस तु लोगुन यि सज़ु कुल स्वनुहँरी आबु किस तलावस मंज़। बेनि गँयस यि वुछिथ शाद। अमा येमि विज़ि बादशाह संज़व ज़नानव बूज़ जि स्वनु संद्य गोबरन छि सज़ु कुल बेत्रि पँज्य पौठ्य हौसिल वँर्यमत्य, तिमन फुट कमर तु दोपुख ‘व्वन्य छनु सानि बचनुच बाथ। कज़ा छु व्वन्य कलस प्यठ वोतमुत।’

कमसुय कालस मंज़ सपज़ दोब्य लँडकु सुंदि स्वनुहँर्य आबुच, सज़ु कुलिच तु कथु करवुनि च़रि हुंज़ शोहरत सौरिसुय शहरस मंज़। कथु करवुन्य च़र छे प्रथ दूह अख अख कुसु तु दासतान बोज़ुनावान। बादशाह संद्यन कनन ति येलि कथु करवुनि च़रि हुंद्य कुसु बोज़ुनावनुक शोहरु वोत, सु ति आव पनुन्य अँमीर, वँज़ीर तु हरमु ह्यथ अंदर तु अति यामथ तँम्य तु तसुंद्यव अँमीरव तु वँज़ीरव स्वनुहँर्य आबु तलाव, प्रथ दूह नवि नवि

रंगु पोश व्वपदावन वोल कुल तु कथु करवुन्य च़र वुछ, तिम सपुद्य हॉरान। बादशाह वोथ अज़मॉयिश करनु खॉतरु कथु करवुनि च़रि कुन जि अज़ बोज़नाव असि सु कांह कुसु युस नु अज़ ताम असि बूज़मुत आसि। यि दॅपिथ लॅज कथु करवुन्य च़र वनुनि जि 'शहरस अँकिस मंज़ ओस बादशाह स्यठुहय सादु तु बे ह्यस। ज़नानु आसस नमुनमथ तु सारेय आसु गबि बुथि रामु होनि। तवय आसु ख्वदायन ने-पोत्र थाविमच़ु। हँतिम ज़नानु येलि बादशाहन कॅर, तस सपुज़ व्वमेदवॉरी। बादशाहस सुत्य शर्तु मुतॉबिक ओस तस स्वनु सुंद गोबुर तु र्वपु संज़ कूर औलादु रंग्य पॉदु करुन्य। येमि विज़ि तस बिचारि खलास गछनुक वख्त वोत, बादशाह संज़व ज़नानव कॅर च़वय जि नॅव बादशाह बाय किथु पॉठ्य ख्यावुनावोन फ्यख। तिमव थॉव्य तस बद कुसमथ ज़नानि शुर्यव बदलु वार्यनि हुंघ दॅस्य होनि बचु वुरनिस तल। अथ जुरमस प्यठ आयि स्व बिचॉर ग्वडु मारु वातलन दिनु। अमा वॅज़ीरु संज़ि सुफॉरिशि प्यठ आव तस शॉही अस्तुबलु मंज़ु गुपनन हुंद गुह कडनुक सज़ा दिनु। वुनि छे बिचॉर तॅथ्य अज़ाबस मंज़। हुम शुर्य ज़ु आयि संदूकस मंज़ बॅरिथ दॅरियावु बुर्द करनु। संदूक रोट दॅरियावु कि अकि गाठु प्यठु अँक्य दोब्य, येम्य तिमन बचन हुंज़ परवॅरिश कॅर तु तॉलीम दिच़। सुय शाहज़ादु तु शाहज़ॉद्य बनेयि यिथु पॉठ्य दोब्य लॅडकु तु दोब्य कूर तु बादशाहस छु व्वन्य पनुनि सादगी किन्य ला वलद सपदिथ तख्तु निशि अथु छलुन, अगर नु सु वुनि ति पायस पेयि।' बादशाह सपुद यि बूज़िथ दम ब-ख्वद। दोपुन, 'बारे इल्लाही! यि क्या बूज़ मे?' सु लोग अँतिथुय पनुन्यन हरमन रज़ तु गज़ करनि। अमा दोब्य ज़ादन कोरुनस अर्ज़ जि 'बादशाहम! तोह्य कॅरिव च़्यड। यि कॉम दियिव म्यानि यथ रज़ि तु गज़स। यिमय अंज़रावन दूद तु आब।' रज़ तु गज़ वुछिथ कोर बादशाह संज़व नमुनमथव हरमव पनुन जुर्म तसलीम तु तिमव वोन बादशाहस जि दोब्य कूर तु दोब्य लॅडकय छि तसुंघ औलाद। अमे दमु आयि गुपन गानु मंज़ु बादशाह बाय तु औलादन हुंज़ मोज अनुनावनु। वारेन्य तु बादशाह संज़ु नमुनमथ ज़नानु आयि रामु होन्यन त्रावनु। दोब्य लॅडकस आयि ताज पूशी करनु तु आव सुय तख्तस प्यठ बेहनावनु। बादशाहन हेच़ पनुनि बादशाह बायि मॉफी तु यिथु पॉठ्य बनेयि स्व मॉलिकि कुल।

★ ★ ★

शेतान गंड

वनन वोल छु वनान जि बादशाहस अँकिस ओस खोर नेचुवाह, यस खँर आसनु किन्य नेथरुय ओस नु बनान। दपान छि जि स्यठाह जस्तु खॉजी कँरिथ कोरुन अँमिस खँरिस बेयि शहरुकि बादशाह सुंजि कोरि सुत्य नेथुर सँही। आँखुर वोत खांदरुक दूह तु स्यठहुय दुमदामु सान आव महाराजु पॉरावनु। महारेन्य अननु बापथ आव महाराजु अँकिस खास गुरिस सवार करनु तु सुती द्रायस जान जान सालर ति सुत्य। अँमीर वँज़ीर तु लशकर ति द्रायस सुत्य। पानु बादशाह ति द्राव पनुन वँज़ीर ह्यथ नेचिव्य सुंजि अथ बरॉच सुत्य। आँखुर द्रायि बरात बादशाह सुंज न्वश अननु खॉतर। कँह मँज़िलु तय कँरिथ वुछुख अँकिस जायि गूराह अख पनुनि गॉव रछान। अँमिस गूरिस ओस पनुन नेचुव ति सुत्य, युस स्यठहुय ख्वश शँकील, मॉर्य मॉद तु कबूल सूरत ओस। बादशाहस युथुय अँमिस गूर्य लड़कस प्यठ नज़र पेयि, तस गव दिल शाद। दोपुन, नेचुव आसुन तु युथुय। खयाल वोथुस जि 'छुना सलाह योहय गूर्य कोट निमोन महाराजु पुरिथ। यि छु स्यठहुय मॉर्य मॉद। रातस खंडस ह्यमोन येमिस गूरिस पहा, तिक्याजि बनान छु यि सोन खोर महाराजु वुछिथ मा यियि कोरि मोल तु कोरि मोज वुठनु तु असि मा पेयि न्वशि रोस्तुय वापस युन।' बादशाहन बोव पनुन यि खयाल वँज़ीरस तु यि बूज़िथ दोपुस तँम्य स्यठाह रुत हय गव तु अथ छुनु म्वलवुनुय कँह। आँखुर ओनुख गूर नाद दिथ तु बॉवहँस बादशाह सुंज यि खॉहिश। तस आव दारि किन्य अँज तु दोपुनख, 'न हज़ तु तुहँद्य अथु कँम्य छि रँट्यमुत्य ? तुहँद्यन कदमन म्योन यि कुन्य अँछ गाश पेश।' अमि पतु आव बादशाह ज़ादु महाराजु गुरि प्यठ ब्वन वालनु तु गूर्य कँटिस आव स्नानाह दानाह करनु तु लॉग्यहस महाराजु पलव तु कोरुख गुरिस सवार। शाम वख्तस येलि महाराजु तु सालर मँज़िलि मकामस प्यठ वॉत्य, महाराजु सुंज शक्ल सूरथ वुछिथ गँयि सॉरी लुख तु कोरि हुंद मोल तु मोज स्यठहुय शाद। साल ख्यथ त्रॉव सालरव यँहय लर हिश। महार्यनि हुंद मोल मोज लँग्य सँच करनि जि महाराजु लालु छु स्यठहुय कबूल सूरत। जान रोज़िहे यी जि अँस्य रटुहोन महाराजु र्यतस खंडस येती। सुबह वख्तु आव बादशाहस इल्लिजा करनु जि सालर, लशकर तु बादशाह सलामत नीरिन वापस, अमा महाराजु रोज़ि कँह कालाह येती। यि बूज़िथ गव बादशाह हँक्य नतु बँक्य। तस तोग नु किहीं वनुन। सूचुन जि शोठ सुंद खोर नेचुव मा रोज़ि अनहोरुय तु गूर्य कँटिस बनेयि मँज्य महारेन्या, स्व ति शाहजॉद्य।

वँज़ीरस सुत्य सलाह मशवरु कॅरनु पतु दोपुस वँज़ीरन जि 'बादशाह सलामत! त्वहि पेयि मानुन जि खोर छु हमेशु हदु खोतु ज़्यादु चालाख आसान। यि कोरि-मोल वनान छु, ती मॉनिव तोह्य। हावि तुहँदिस शाहज़ादस ति पनुन्य मुहिम पानय वथ।' बादशाहन दोपुस, 'सु किथु पॉठ्य?' वँज़ीर वोथुस दर जवाब जि 'अँस्य थावोन गूर्य कॅटिस सुत्य खोर ति येती तु यि रोज़ि अँमिस हरफस गवाह तु मैडिस शँरीख।' पानु वॉन्य मशवरु कॅरिथ वोनुख कोरि मॉलिस जि 'तस छुनु महाराज़ु सुंदिस येति रटनस मंज़ कांह एतिराज़। अमा पोज़, अँमिस महाराज़स छु यि मोहनिय कटेरु सख पसंद। यि रोज़ि अँमिस आलव वोत्रिस सुत्य सुत्य।' कोरि मॉल्य बादशाहन दोपुनख, 'अदु अथ अंदर क्याह हर्जु छु? अखतुय लगी असि तामथ चारवॉय रछनस।' यिथु पॉठ्य रूद गूर्य कोट तु बादशाह ज़ादु खोर अँती, तु सालर, अँमीर वँज़ीर द्रायि वापस पनुनिस शहरस कुन।

गूर्य कोट छु व्वन्य शाहज़ाज़ि सुत्य आँशाह अशरथाह च़टान तु खँरिस छु यि वुछ वुछ अँदरी कबाबु गछान। तसुंज़ कॉम आँस फकथ गुपन रछुन्य, डुवुन डालुन तु गूर्य कॅठ्य सुंज़ यड बँरिथ खँदमताह करुन्य। पनुन अँदर्युम दोद ह्योक नु सु काँसि ति बाँविथ। अकि दूह सुबहॉय ओस नब अलूंद। खोर येलि गुपन ह्यथ द्राव, तँम्य तुज अख प्रॉन्य लेजाह ति सुत्य। योहय दुपहर सपदनु विज़ि लोगुन सख रूद। यि वुछिथ कॅड्य खँर्य पनुनि नालुक्य पलव तु लँदिन अँथ्य लेजि अंदर तु पानु रूद अँकिस बुदलिस तल। युथुय रूद बंद सपुद, खँर्य कॅड्य लेजि अँदरु पलव तु त्रॉविन बेयि नॉल्य। अमे सातु आव अपॉर्य शेतान, यस रूदु स्नान ओस गोमुत। सु गव खँर्य सुंघ होख्य पलव वुछिथ हॉरान जि येमिस क्याज़ि छिनु पलव रूदु सुत्य अँदरेमुत्य। दोपुनस जि 'हयो खर्या! रूदु श्रानु सुत्य छि मे पलव चीरुन्य लायक गॉमुत्य। अमा त्रे किथु पॉठ्य छी पलव कुलहुम होखी रूद्यमुत्य।' योरु वोथुस खोर जि 'बु वनय मे किथु पॉठ्य रूद्य पलव अँदरुनु वरॉय। अमा पोज़, च़ वनुम ग्वडु च़ कुस छुख तु नाव क्याह छुय?' शेतान वोथुस बुय गोस शेतान। यि बूज़िथ गव खोर स्यटाह ख्वश तु वँनिनस पनुन्य सॉरुय दॉद्य कांगुर। तोरु वोथुस शेतान, 'मे हा छु बूज़मुत जि खँर्य छि सख चालाख आसान तु त्रे क्याज़ि छय यीज़ाह वुनेमुच़। हतु बु दिमय पनुन्य यि डोरि हन। यथ गछि अख गंड त्रावुन तु ल्वति पॉठ्य गछि वनुन 'ब्रेकट'। अति ओर तगी त्रे पानय पनुनिस दॉदिस यलाज करुन।' यि बूज़िथ वोथुस खोर जि 'शोठन आँस्य पनुन्य नालुक्य पलव रूद प्यनु ब्रॉटुय यथ लेजि अंदर थॉव्यमुत्य तु यिम किथु पॉठ्य अँदरहन?'

दूह लोसनु विजि वोत खोर बादशाह गरु गुपन तु तीर्य ह्यथ। तस बिचारस आसु अमि कामि अलावु बेयि ति वारियाह कामि प्यवान करनि, यिमन मंज गूर्य कॅट्य सुंदि खॉतरु तु तसंजि ज़नानि हुंदि बापथ वथरुन शेरुन ओस प्यवान। येलि अमि दूह आदतु मुताबिक यिमन बाँचन दून कित्य ज़ु अलग अलग बिसतरु त्रॉव्य, पानु रूद अँथ्य कुठिस अंदर अँकिस कूनस मंज पतजि तल चूरि। युथुय तिम बाँच ज़ु बिस्तरन अंदर चायि, खँर्य त्रॉव्य डोरि ज़ु गंड तु द्वयि लटि वोनून ल्वति 'ब्रेकट', 'ब्रेकट' तु द्राव पानु छ्वपु कॅरिथ न्यबर। दरवाज़ु बंद कॅरिथ त्रोवुन डोरि बेयि गंड तु वोनून 'ब्रेकट'। अमि पतु वोत तबेलस मंज तु द्युतुन गासस प्यठ दराज़। सुबह वख्तु वँथ्य सॉरी नँदरि। अमा शाहजॉद्य तु गूर्य कोट छि नँदरि मंजुय। स्यठाह चेर गँछिथ सूजुख खोर तिमन वुजनावनि। सु लोग दरवाज़स दकु दकु दिनि। अमा दरवाज़य छुनु मुन्नरावनु यिवान। यि वुछिथ तुल खँर्य शोर जि यिम छिनु अँदुर्य किन्य दरवाज़ु त्रावानुय। यि बूजिथ गँयि गर बाँच सॉरी जमाह तु सख जस्तु खॉज़ी छि दरवाज़ु मुन्नरावनु बापथ करान। मगर तोति छुनु अँदुर्य किन्य न सुर तु न सदा गछान। आँखुर कोर खँर्य ज़ोर तु दरवाज़स लतु लायान लायान मुन्नरुन अँदुर्य किन्य डोरि गंड तु गव दरवाज़ु यलु। लँग्य यिमन बाँचन वुजनावनि। अमा तिम ज़न आँस्य बिस्तरस लॉरिथ गॉमुत्य येमि किन्य तिम थोदुय छिनु ह्यकान वँथिथ। बादशाह बाय लँज यि वुछिथ कोरि पनुनि नरि लमनि, तु खँर्य छुनु छ्वपु कॅरिथ डोरि गंड तु वोनून 'ब्रेकट'। यपॉर्य कॅर बादशाहन गूर्य कॅटिस थोद तुलनु खॉतरु थफ। यि वुछिथ छुनु खँर्य डोरि ब्याख गंड तु ल्वति वोनून 'ब्रेकट'। यिथु पॉठ्य गव सारिनुय अख अँकिस सुत्य वाठ। ताम वॉत्य वँज़ीर तु वँज़ीर बाय तु गरिक्य सॉरी बाँच तु यिमन ति गव हुमन सुत्य गंड। यि वुछिथ वोथ अति हूल हालय तु क्रकु नाद। सोरुय शहर आव यि वाकुह बूजिथ चँसिथ। बादशाह गव यि वुछिथ स्यठहय परेशान ति तु शर्मदु ति। खँरिस आव बादशाह सुंदि तरफु होकुम दिनु जि फोरन अनुन शॉही पीर। खँर्य तुज दोर तु वोत पीर सॉबस निश। तस बोवुन यि सोरुय हाल तु दोपुनस जि तति छि सारिनुय अख अँकिस सुत्य मिलवन गॉमुन्न। यि बूजिथ द्राव पीर तु खोत गुरिस पनुनिस तु खँरिस दोपुन जि रठ सॉ च़ु लाकम। पीर गुरिस खसनु विजे त्रोव खँर्य डोरि गंड तु अमि सुत्य छुनु पीर सॉब गुरि प्यठ ब्वन वँसिथुय ह्यकान। यि ति ओस गुरिस लॉरिथ गोमुत। अजीब गटकाराह वोथ। बादशाह छु अँदरु कनि पीर सॉबस क्रकु दिवान जि पीर सॉबाह, कँह यलाजाह छाँडिव। पीर ओस यिथु पॉठ्य सख चालाक। दिचनस क्रख जि यि सॉरुय शेताँनिल गछि दर अस्ल खँर्य संज आसुन्य। यि बूजिथ कोर बादशाह तु वँज़ीरन खँरिस ज़ारु पारु जि हरगाह च़े निश कांह

तँरीकाह आसि, असि म्वकलाव तु येमि अज़ाबु तलु। खोर वोथुख, 'अमा मे दियिव ग्वडु वादु, बु यि केंछा मंगोवु, ति गछि मे दिनु युन।' बादशाह तु वेंज़ीरन द्युतुस वादु ज़ि यि केंछा ति मंगख, ति यियी त्रे कुनि ति सूरतस मंज़ दिनु। खॅर्य हेत्य डोरि अकि अकि गंड मुचरुन्य। सु युथुय अख अख गंड गव मुचरान, अक अख शख्स गव आज़ाद सपदान। बादशाह तु बादशाह बाय, वेंज़ीर तु वेंज़ीर बाय, गूर्य कोट तु शाहज़ॉद्य, पीर तु बाकय लुख गॅयि मुछि। अमि पतु आव खॅरिस पृछनु ज़ि वन साँ त्रे क्या गछी? यि बूज़िथ वॅन्य बादशाह ज़ादु खॅर्य कोरि मॉल्य बादशाहस पनुन्य तु गूर्य कॅट्य संज़ सॉरुय दॅलील। वादु मुताँबिक आयि बादशाह कूर खॅरिस ज़नानु ज़ॉनिथ हवालु करनु तु गूर्य कोट आव छोनुय तु छेतुय वापस कडनु। बादशाह सुंदिस वेंज़ीरु संज़ यि कथ ज़ि 'अॅमिस हावि पनुन्य मुहिम पानय वथ' सपुद अमली तोर साँबित। अदु तिम गॅयि तोर तु अॅस्य आयि योर।

★ ★ ★

बे अक्ल

दपान अँकिस शहरस अंदर ऑस्य यिम बाँय बारुन्य जोराह। यिमव मंज़ु ओस अख आसन बसन वोल तु ब्याख नादार तु छेतीस। आसन वोल बोय ओस मेहनत मशकत कमुय पहन करान, अमा प्रथ कारस अंदर ओस तस फ्वत्यव फ्वत्यव फॉयदु मेलान। अँमिस बर-अक्स ओस हु नादार बोय पनुन्य किन्य सख जखान तु जुव चटान मगर जँख्य जँख्य ओसुस 'मुनी मुनी खॉती, कुनि नय केंह'। अवं किन्य ओसुस पनुनिस अँमीर बाँय सुंद सख अज़रवुन। दूह अकि हरुद वख्तस अंदर ओस यिमव दूश्रुय बायव हरुद लूनिथ त्रोवमुत तु दानु ओसुख वुनि खाहसुय अंदर। गँरीब बोय द्राव रॉन्न हुंदिस अनि गँटिस अंदर खहस प्यठ तु लोग तति बाँय सुंदव डोर्यव मंज़ु दानि तुलिथ पनुन्यन डोर्यन अंदर सारनि। युथुय लाकु जोराह सार्यन, शख्साह अख गोस नमूदार तु वोनुनस, 'हतो दोस्ताह! यि चूर क्याज़ि छुख करान?' यि बूज़िथ वोथुस यि, 'अदु च़े क्याह? चूर छुस पनुनिस बाँयिस करान, न जि काँसि व्वपरस।' अँम्य शख्सन दोपुस, 'बु छुस चाँनिस बाँय सुंद तकदीर। तसुंदिसप्रथ कुनि चीज़स रॉछ रावठ करुन्य छे म्यॉन्य मटिदॉरी। लिहाज़ा दिमय नु बु हरगिज़ ति तसुंदिस दान्यस चूर करनु। छ्वपु वँरिथ नेर पनुन गरु।' यि बूज़िथ लोगुस सु ज़ारु पारु करनि जि 'म्यॉनिस बाँय सुंदि तकदीरु याराह! मे प्यठ थाव तु मिनथा तु वनतम जि म्योन तकदीर कथ जायि छु शॉगिथ बिहिथ।' बाँय सुंद तकदीरन दोपुस, 'सु हसॉ छुय कामुनिस जुविस मंज़ु लर त्रॉविथ। तस गोय यँचकाल शॉगिथ तु खबर कुतिस कालस रोज़ि शॉगिथुय।' अँम्य न्य-दॉर्य शिकस लदन वोनुस, 'यि वनतम सु हेकि ना कुनि पाँठ्य ति बेदार गँछिथ।' 'अवं क्याज़ि नु', सु वोथुस दर जवाब। 'चु अगर पानु तस वुज़नावनि गछख, न वुज़नुच छनु कथुय।' यि बूज़िथ द्राव यि पनुन तकदीर वुज़नावनु बापथ कामुनिस जुविस कुन।

पकान पकान वोत अँकिस वनस मंज़ु। अति वुछुन अख पादर सुहा ब्वछि सुत्य हँरिथ प्योमुत। सुह ओस ज़ज़ बुडु तु नातवॉनी सबबु ओस नु ओरु योर नीरिथ ह्यकान तु तवय ओसुस नु शिकार ति ब्यटान। तँम्य येलि दूरे इनसानाह पानस कुन यिवान वुछ, स्यठाह शाद सपुद जि दयन सूज़ अज़ यँचकॉल्य जान शिकाराह। सुहन कोर अँमिस मुफलिसस दूरे पानस कुन यिनु खॉतरु आलव तु सुती वोनुनस जि 'चु मु खोच़। बु न बा ख्यमथ नु चु हरगिज़ ति। अमा कथा अख छम च़े पृछुन्य।' मुफलिस शख्सस ऑस पनुन्य

किन्य सख बांबर। दूरे दोपुनस, 'मे नसाँ छनु अख म्वय ति फुरसथ। मे छु कामुनिस जुविस मंज पनुन तकदीर वुजनावनि गछुन।' यि बूजिथ वोथुस सुह जि 'तोति बोज तु म्योन इल्लिमास। सु गव यि जि येलि पनुन तकदीर वुजनावुहन, ख्वदायि सुंदि पासु वोनथस म्योन ति जि मे क्याजि छनु खे खे ति यड यिवान।' अँम्य कोरनस आंकार तु द्राव ब्रोंह कुन। वातान वातान वोत जायि अँकिस तु अति वुछुन गूस्ताह अख पनुनिस जँमीनस मंज बिहिथ सख वदान। यि हाल वुछिथ वोथुस यि मुफलिस शख्स, 'हता यारु, च्चु क्याजि छुख वदान? ऑखुर दँलील क्याह छय?' ग्रीस्य दोपुस, 'हता दोस्तु वनय क्याह? बु छुस वँरी किस वँरियस शुर्य बाँच ह्यथ नम च्रम गालान, लागनय करान। अमा पोज यथ जँमीनस छुम नु कुनि ति हर्दु फसल पपान।' अँम्य गँरीब शख्सन वोनुनस, 'अदु साँ म बर गम। बु छुस पनुन शौंगिथ रूदमुत तकदीर वुजनावनि द्रामुत। चोन ति वनस येमिस ग्रीस्य बाँयिस क्याह वकानु छु यथ जँमीनस गोमुत?'

अति नीरिथ वोत अँकिस शहरस मंज। अति आव व्वपरॉजी सबबु गिरफतार करनु तु आव अतिकिस बादशाहस निश पेश करनु। तिव्याजि अथ शहरस अँदर ओस नु काँसि ति व्वपरस इजाजतु वरॉय अन्नस तु रोजनस इजाजथ। बादशाहस निश वॉतिथ लोग तस सख ज़ारु पारु करनि जि तस गछि माँफी दिनु यिन्य। दोपुनस, 'मे छे सख ताँजील। कामुनिस जुविस मंज गँछिथ छुम पनुन ख्वफ्तु प्योमुत तकदीर वुजनावुन।' यि बूजिथ वोनुनस बादशाहन। 'अछा च्चु नेर। अमा पोज म्योन ति पृछिज्यस ख्वदायि सुंदि पासु तु वँनिज्यस जि बु छुस सारिनय लुकन हुंदि खॉतरु रूतुय रूत कांछान, अमा कांह अखाह छुम नु ख्वश। अखतुय छिम लुख वख्तु वख्तु बगावत तुलान।' यि बूजिथ द्राव सु शिकस लद पनुनिस मँजिलस कुन तु ह्यवान दिवान वोत कामुनिस जुविस मंज पनुनिस तकदीरस निश। सु वुछुन अति मच्चि नैदरि प्योमुत। ख्वरन फशाह फशाह दिवान कोरुन कँह्यताम हुशार। वदुनाह ब्रछुनाह कँरिथ कोरुनस ज़ारु पारु जि 'च्चु क्याजि छुख शौंगिथ बिहिथ? च्चु गछ तु हुशार युथ म्यॉन्य द्दह ति फेरन।' यि बूजिथ वोथुस सु, 'अदु साँ कर छ्वपु। बु शंगु नु व्वन्य हरगिज ति। च्चु हैजि पनुनि अक्लि काँम तु पानय यिनय वतु। बु रोजय सुत्य सुत्य।' अमा नेरनु ब्रोंह दोपुनस जि 'फलॉन्य शहरुक बादशाह समखुम तु वोनुनम जि लुख छिम नु तिहुंद दिल रँछरुनु पतु ति ख्वश।' तकदीर वोथुस, 'च्चु येलि तस निश वापस वातख, वँन्यज्यस जि योताम नु च्चु खांदर करख, तोताम रोजी नु कांह ति ख्वश। वुछ साँ सु छु मर्दु लिबास लॉगिथ च्चकि ज़नानु मोहन्युव। स्व येलि खांदर करि तु खावंद बन्यस, तस रोजन साँरी कापि।' अमि पतु वँनिनस ग्रीस्य संज शोछ। तसुंदि खॉतरु वोनुनस जि

‘तस छि खहस मंज सथ खजानु दोबरिथ। योताम नु सु तिम प्राटि तु नॅन्य कडि, तोताम बनि नु तस तथ जमीनस कांह फसल।’ अमि पतु वोथुस मुफलिस शख्स जि ‘सुहस क्याजि छनु खे खे ति यड यिवान।’ तसुंदि बापथ वोननस जि ‘तस वॅन्यजि योताम नु सु काँसि बे-अक्ल शख्सस रूंटुय खेयि, तोताम गछि नु सु ठीख। युथुय काँसि बे-अक्लस अम करि, अदु लग्यस नु ज़ांह ति ब्वछि।’

पनुनिस तकदीरु संजु यिम कथु बूजिथ फ्यूर यि वापस गरु कुन। वातान वातान वोत यि बादशाहस निश। युथुय तस निश चाव बांबरि होतुय, वोथुस जि ‘चु छुख चकि मर्दु लिबास लॉगिथ ज़नानु मोहन्युव। दोपुनय च्ने पज़ी फूरी तोर नेथुर करुन, अदु रोज़नय लुख ख्वश।’ यि बूजिथ वोथुस सु बादशाह, ‘मे बनि नु अमि कथि हुंद येति शाह्य त्रावुन। लिहाज़ा कर च्युय मे सुत्य नेथुर तु यि कथ रोज़ि यिथु पाँठ्य असि दून दरमियान राज़। अमि सुत्य करख च्युय येति पादशाँही। व्वन्य अगर बु नेबरु नेथुर छारु, लुख गछन मे बुथ्य फिर्य तु म्योन बादशाह आसुन ज़ानन मोयूब ह्यु। अवु किन्य मान म्योन तु कर शोठि सुत्य नेथुर।’ अमा सु शिकस लद आव सख वुठनु। दोपुनस जि ‘यॅचकाँल्य गोम पनुन तकदीर बेदार। मे कथ छि चाँन्य पादशाँही बकार ? बु वुछु युहुस कोताह फस्ल व्वपदि म्यानि खहु मंजु।’ यी वनान वनान द्राव गरु कुन।

ग्रीस्य बोय ति ओस गीरान जि शेछ क्याह वाति ? ऑखुर येलि तस निश वोत तु दोपुनस जि ‘तकदीरन दोपुनय चाँनिस अथ ज़मीनस अंदर छि सथ खजानु दोबरिथ। योताम नु तिम अमि अँदरु कडनु यिन, तोताम हेकि नु चाँनिस ज़मीनस मंजु फसल पॅपिथुय।’ यि बूजिथ कोरुस अँम्य ग्रीस्य ज़ारु पारु, ख्वरन करिनस थपु, ‘हे बु लगय बलायि, न्यसुफ खजानु दिमय च्ने। यिम खजानु कडनस मंजु करुम अथुरोट। तिक्याजि येति बन्यम नु काँसि निश यि राज़ वनुन।’ सु वोथुस तोरु, ‘हता हे यारु, चु क्याह यि वनान ? मे कति गँयि फुरसथ यीचाह जि चाँन्य यिम खजानु कडनि बेहमय च्ने सुत्य। खबर किथु वॅन्य वुज़नोवुम पनुन ख्वफ्तु प्योमुत तकदीर। बु हा यारु गोछुस जल जल गरु वातुन। बु वुछुहा अँज्यकि प्यठु नेर्या म्याँनिस बाँय सुंदिस खाहस ज़्यादु फसल किनु म्याँनिस ?’ ग्रूस वोथुस, ‘हता बायि, शे खजानु रठ च्युय, अकुय दि मे, मगर मे पोश।’ अमा सु शिकसलद कति ओस मानन वोल ? बांबरि होतुय द्राव ग्रीस्तिस निश तु लोग गरु कुन कदम दिनि।

पकान पकान वोत व्वन्य सुहस निश। तँम्य लॉयिस दूरे क्रख जि म्योन क्याह वोननय तकदीरन ? शिकस लद वोथुस जि ‘चोन पृछुमस खास पाँठ्य तु दोपुनय जि कांह

मुडु बे अक्ल शख्साह गछि छांडुन तु सुय गछि ख्योन। अदु लगी नु ज़ांह ब्वछि। हमेशि रोज़ी सीरी।’ ‘अदु सॉ यि वनतम च़े क्याज़ि लोगुय यूताह वख्त?’ सु वोथुस तोर, ‘छुख ना बोज़ान, चॉनी पॉठ्य रोदुनस येति नीरिथ अँक्य ग्रीस्य बाँय तु तस पतु हमसायि मुल्कुक्य बादशाहन। तिमन ति ओस तकदीरन कोस आमुत। त्युहुंद ति पृछुम तकदीरस।’ तु यिथु पॉठ्य वोनुन सुहस बादशाह सुंद कुसु तु ग्रीस्य सुंद हाल। सुहन ज़ोन तसुंद जवाब बूज़िथ, युस तँम्य बादशाहस तु ग्रीस्तिस द्युतमुत ओस, जि ‘येमिस तावन ज़दस खोतु कुस हेकि मुडु तु बे अक्ल आँसिथ। न छे अँम्य बादशाँही कबूल वँरमुच़ तु न सतव खज़ानव मंज़ु शे खज़ानु। बु ओसुस आँदि प्यठु अँदरी सोँचान जि यि बे अक्ल इनसान कति बन्यम? मे हय शिकार पनुन्य बख्तन यूर्य सूज़मुत छु। अँमिस खोतु बे अक्ल कुस आसि बेयि?’ स्यठाह आँजिज़ी सान दोपुनस सुहन, ‘हता दोस्तु! बु हा छुस त्यूताह नोतवान जि किहीन्य छुम नु बोज़नु यिवान। कनन छुम ज़र। बुजरन छुम नाल वोलमुत। मे छुनु पले प्यवान जि च़ु क्याह छुहम वनान? हना यितु नखु पहन, युथ बु वारु पॉठ्य बोज़ु जि तकदीरन क्याह वोनुनय म्यानि खॉतर?’ यि शिकस लद आव यि बूज़िथ सुहस बिलकुल नखु तु यि वुछिथ त्रॉवुस सुहन कुनी व्वठ प्यठ तु छुनुन सरे सोबूथ न्यंगलॉविथ।

★ ★ ★

ठठु गोर

दपान पथ कालि ऑस्य अँकिस जायि बारुन्य जोराह सुलु तु गुलु नावुक्य। सुलु ओस ल्वकुचारु प्यठय कथु वननि ज्ञानान तु गाह बे गाह ओस तिछु कथु बोज़ुनावान जि बोज़न वाल्यन ओस अँस्य अँस्य हँल्य कान्यन गुरुस गछान। तसुंजु यिछु कथु बोज़नु बापथ ऑस्य दूरि गामव प्यठु लुख तस निश यिवान गछान। अमि किन्य ऑस्य लुख तस सुलु ठठु गोर वनान तु सु ति ओस पनुन्यव ठठव मठव सुत्य लुकन हुंज गम दफ़ॉयी करान। दूहा दूहा गँछिथ वॉच यि कथ बादशाहस ताम। तँम्य कोर सुलु दरबारस मंज तलब तु तस निशि कँह कथु बोज़नु पतु बनोवुन सु पनुन दरबॉर्य। सुलुन कार ओस व्वन्य बादशाहस कसमु कसमु कथु बोज़ुनावनि। सुलुन बोय गुलु ओस गरुक कार कस्ब तु ज़मीन ज़िरातुच कॉम करान। सुलुन तनखाह ओस गरुकिस पेट्च वॉन्य खर्चस लगान। अमा गुलु ओस वँरी बतु कमनावुनस प्यठ तु अँमिस ऑस अवु किन्य चँरुय मेहनत मशकत प्यवान करुन्य। बॉय बारुन्य ऑस्य ज़िंदगी हुंघ दूह जान पॉठ्य कडान, मगर गुलस बँर्य पनुन्यव पितर्यव तु हमसायव कन तु दोपुहस जि 'चु छुख नु वँरियिकिस वँरियस पँदिस प्यठ पोद थावान। जुव जान छुख गरु बापथ च़टान। नमन छय म्यँच अचान। पनुनिस पानस डाख वँरिथ छुख दां कुछि हन बँरिथ थावान। अदु सुलुन बख्त, व्वजलि कनि छु च्वपाह च्वपाह वँडिथ पानस ऑश च़टान तु तावुनस छुनख चु लोगमुत। हता, चु ति कर गछ ऑश तु वनुस दोटोक पनुनि खाक डाख गछनुक।'

पितर्यन तु हमसायन हुंद विज़ि विज़ि अँमिस कन बरनु पतु लोग गुलु सौंचनि जि 'अपुज छि नु यिम ति कँह वनान। कोठ हय छु तावनस लोगमुत। ख्वजु छुम बादशाहस कथ अँड वँनिथ ऑश तु आनंद च़टान। यि हय सरासर ना इनसॉफी गँयि। यियिन अज़ शामस तु बु हय बुथिस प्यठ वनस पनुन्य पाव अलग तयार करुन्य। शोठ कथ लोग तपालि? सु शुर्यव मुर्यव रोस्तुय। येलि गरुक जंजाल पेयस प्यठ, अदु वुछु बु क्याह करि बादशाह सुंद हँहँर? फिकरि तर्यस जि गज़ वँह्य छु?' शाम वख्तस येलि सुलु गरु वोत, अति वुछुन गुलु हुमन थुमन ह्यथ क्याहताम पॉन्य पानस वनान। यि वुछिथ वोथुस सुलु जि 'गुला! खॉरुय छा? च़े क्योहोज़ि अज़ बुथिस प्यठ यिमय गाडु हिशि मारिमच़ु? ऑखुर दँलील क्याह छे?' गुलु वोथुस, 'च़े क्या सॉ? आख बादशाहस टर अख ज़ु वँनिथ, तु गरु परेशॉनी छुनिथम नॉल्य वँरिथ। न छुम दूह कुनि तु न राथ। सुबहु प्यठ शाम तामथ

छु कोठस येमि गरु बापथ तु दानु मीरु बापथ रतु चूर लारान। बु हय तावनस छुस लोगमुत। नम चम गॉलिथ छुम चोन यि ज्यूठ अयाल प्यवान पालुन। जान रोज़ि यी जि अँस्य रनव पनुन्य पनुन्य पाव ब्योन। अदु यि मे वाति ति दितम। द्यव बु ति कडुहा योहय व्वशव ह्यु। ऑखुर बु हय तबाह गोस!’

गुलुनि कथु बूज़िथ गव सुलस पँतिम शाह पथ कुन तु ब्रुंहिम ब्रोंह कुन। सूचुन जि योदवय बु योरु तीज़ी करु, मामलु गछि खराब। दोपुनस, ‘चोन वनुन हबा छु शुराह आनु पोज़। अथ कुस करि इनकार। ऑखुर मे ति हय अँछ जोराह छे। बु छुस ना वुछान जि गरुक सोरुय बार छु गुलुन्यनुय शानन प्यठ। अमा बु ति मा छुस बिहिथ आसान। कमय ज्यादु छुस गरस बु ति डोख दिवान तु यि पेठ्य वॉन्य खर्चु अगर आसि नु, अँस्य कति ह्यकव अँथ्य दां म्वछि प्यठ गुज़ारु वँरिथ।’ गुलु ओस हमसायव तु पितर्यव पूरु पॉठ्य आवुरमुत। सु ओस नु सुलुन्य कांह कथ बोज़नु खॉतरु तयार। तवय वोथुस, ‘नसॉ बाया! बु छुस नु यि चोन नोस्तार बोज़नु बापत तारि गोमुत। पगाह प्यठ गछि पानय दजि डूरिस वातुन, चारवायन नज़र गुज़र थावन्य, गरुकिस दून सादस कुन वुछुन, बु आस व्वन्य वँसिथ।’ सुलन येलि गुलुन्य त्राय तेज़ुय वुछ, सु गव स्यठाह व्वदॉस्य तु दोपुनस, ‘मे ना छुनु ज़मीनदॉरी करनस तु गरुकिस कामि कारस मंज़ कांह हर्जु। ऑखुर बु यछा च़े प्यठ गरुक बार त्रावुन? बु हा नेरुहॉ क्वकर बांगे दजि डूरिस प्यठ। अमा सॉचान छुस बादशाहस क्याह वनु तु किथु पॉठ्य म्वकलावु पनुनि ज़ंगु। दरबारस अंदर अगर गछु नु, च़े ति खतरु तु मे ति। ऑखुर मुफ्तुय मा छुस तोर गछान? र्यतु पतु र्यतु वारु कारु मोकूल तलब ति मेलान। बु हा छुस यी सॉचान जि तस क्याह वनव?’ गुलन त्रुवुस ठहा ठहा वँरिथ असुन तु वोथुस बडि हटि जि ‘अगर बादशाह सुंद खोफ छुय, तेलि गछु बु तोर चानि बदलु।’ सुलु वोथुस, ‘ति हा ओस ठीख, दफ सॉ च़े मा तगुनय म्यॉन्य पॉठ्य कथु वनुनि तु टर बनावन्य।’ गुलु वोथुस, ‘येलि इनसान करनस प्यठ यियि, तस हबा छि पनुन्य मुहिम पानय वथ हावान। यि ति छा कांह कथ बादशाहस ब्रोंह कुन गँछिथ सु कथु बोज़नावुन।’ गुलुनि अमि कथि कोर सुलु ला जवाब तु ऑखुर गव फॉसलु जि दोयिमि दूह गछि सुलुनि बदलु गुलु बादशाह दरबारस मंज़ तु सुलु रटि गरु तु अँथ्य कथि प्यठ गव बॉय बारन्यन बेयि पानुवॉन्य सलाह।

गुलु वोत दोयिमि दूह बादशाह सुंदिस खँदमतस मंज़ तु दोपुनस, ‘जहां पनाह! बु गोस सुलु ठठु गॅर्य सुंद बोय। तसुंदि बदलु आस बु योर तिक्काजि तस छुनु जुव ओर, तु योताम नु सु सेहतयाब सपदि, तोताम छु मे योत युन।’ बादशाह वोथुस ति छु ठीख, अमा

चु मा ह्यकख तसुंघ पॉठ्य टर बाज़ ऑसिथ ?' गुलन कोरुस अर्ज़, 'आलम पनाह! क्या बू हैकु ना तसुंदि खोतु जान कथु त्वहि बोज़ुनॉविथ ?' यि बूज़िथ त्रोवुस बादशाहन असुन तु दोपुनस, 'ठीख गव, तु बोज़ुनाव तेलि केंछा।' सौंचनय करनय वोथुस गुलु जि 'बादशाहम, राथ ऑस्य सानि गामु असमॉन्य हून्य वोरान।' बादशाहन दोपुस, 'बेयि केंछा बोज़ुनाव।' गुलन वोनुस, 'जहां पनाह! राथ ओस असि माज़ रोनुमुत तु मे आव च़तजीह गज़ सिन्य फोल हिस्।' यि बूज़िथ त्रोव दरबार्यव अँमिस ठहा ठहा कॅरिथ असुन तु गुलु व्वशल्यव। येमि ब्रॉह जि गुलु नेरि हा दरबारु मंज़ु, बादशाहन वोनुस, 'तोताम ह्यकख नु चु नीरिथ, योताम नु पनुन्यन टरन गंड मुच़रख।' यि बूज़िथ गव गुलु सख परेशान, तिक्याज़ि तँम्य ऑस्य नु अथ वख़्तस ताम ज़ांह ति टर वनुन्य हेछमुत्य, तु न ओसुस पय टरन किथुपॉठ्य गछि गंड मुच़रुन ? गुलन येलि नु केंह वॅनिथ ह्योक, बादशाहन द्युत चोबदारन होकुम जि यि बॅरिवुन कौद खानस अंदर, युथ नु यि दुनियुहुक गाश ति हेकि वुछिथ। बादशाह सलामतु सुंदि होकमुक आव अमे विज़ि तॉमील करनु। गुलु येलि नु दून च्वन दूहन गरु वापसुय आव, सुलन सूंच जि क्याहताम दॅलील गछि आसुन्य। सख बेकरार सपदिथ द्राव दहि बहि दोह्य बादशाह सुंदिस दरबारस कुन गुलुन हाल अहवाल मोलूम करनि। येलि तोत वॉतिथ बूज़ुन जि गुलु छु कौद थावनु आमुत, सख बरतबाह गोस। स्योदुय च़ाव बादशाह सलामतस निश तु कोरनस अर्ज़ जि 'जहां पनाह! म्योन बोय गुलु कथु जुरमस प्यठ छु बाँघवान थावनु आमुत।' बादशाह वोथुस, 'असि छु अफसूस जि असि प्यव चोन बोय कौद थावनु तिक्याज़ि सु ह्योक नु पनुन्यन टरन गंड मुच़रिथ। अगर तस टर बाँज़ी हुंदिस फनस प्यठ अबूर ओस नु, तस कॅम्य वोन अथ पॉजामस जंग छुनुन्य। चु अगर व्वन्य सु म्वकलावुन छिहन यछान, तेलि पेयी च़े तँम्यसुंघन टरन वाश कडुन।' यि बूज़िथ कोरुस सुलन अर्ज़ जि 'जहां पनाह! मे छु मंज़ूर। तुहुंद यि फरमान आसि, ति सपदि पूर।' अमि पतु कोर बादशाहन पनुनिस वॅज़ीरस इशारु जि गुलुन्यन दून कथन हुंज़ बावथ वॅरिव सुलस। वॅज़ीर वोथ थोद तु अर्ज़ कोरुन, 'आलम पनाह! तँम्य वोन जि सानि गामु ऑस्य आसमॉन्य हून्य वोरान।' सुलन कोर क्युंच कालाह सौंच तु अमि पतु रॅटन कथ तु दोपुनख, 'हज़ूर! यि तँम्य वोनमुत छु, ति छु पज़र। अथ छुनु कांह ति शक।' बादशाह वोथुस, 'ति किथु पॉठ्य ? मे ज़न छुनु फिकरि तरान। लिहाज़ा गछि अथ पूर वज़ाहत सपदुन्य।' सुलन दितुस जवाब, 'बादशाहम! सानि गामु ऑस अख हून्य प्यामुच़। अकि दूहु आयि क्वसुताम बलायाह तु न्यून होनि बचु अख पंजन मंज़। सुय होनि बचु ओस पतु हेर्य किन्य वुंगान तु वोरान।' बादशाहस बीठ कथ तु वॅज़ीरस कोरुन तसुंज़ दोयिम कथ

वननुक इशारु। वॅज़ीर वोथुस जि 'जहां पनाह! गुलन दोप जि राथ ओस असि माज़ रोनुमुत तु तस आव च़तजीह गज़ ज़्यूठ सिन्य फोल हिसु, येलि ज़न कांह ति हलाल जानवर यूताह ज़्यूठ छुनु आसानुय तु नाटि फलिच छनु कथुय।' यि बूज़िथ आव सुलस असुन तु अर्ज़ कोरुन, 'हज़ूर! यि ति छु पज़र। पॅतिमि बडि दूह ओस असि माज़ रोनुमुत। तस सुत्य ओस नोह आमुत युस च़टनय ओस। येलि शामस गुलस सुय हिसु आव, तॅम्य म्यून सु तु पॅज़्य पॉठ्य द्राव सु च़तजीह गज़ ज़्यूठ।' यि बूज़िथ गव बादशाह मुतमईन तु तसुंद बोय गुलु आव कौद खानु मंज़ु रिहा करनु तु सुती आव सुलस यनामु ति दिनु। अमि पतु वोन गुलन सुलस कुन जि पज़र छु जि प्रथ काराह छुप्रथ काँसि पनुनि अक्लि मुतौबिक दिनु आमुत आसान।

★ ★ ★

द्यानत

प्राणि ज़मानु ओस अख अयालबार शख्साह। गॅरीबी सबबु न ओस अँमिस राथ कुनि तु न दूह। लमान ओस रादस तु ज़ेठान ओसुस होंज। होंजस दियिहे दरु तु छ्वटान ओसुस राद। आँखुर कोरुन पनुनि गामु मंज़ु चलनुक संज़। शुर्य बाँच तुलिन सुत्य तु वातान वातान वोत अँकिस जायि। ब्वछि आँसुख सख लँजमुच। अमा ख्यनु बापत ओसुख नु केंह ति सुत्य। अनुहन ति कति ? येलि आसिहेख, तैलि मा चलुहन पनुन गरु त्राँविथ ? मगर शुर्य बाँच आँसिस सख ताबेदौरी करान। मानुनस ज़ानुनस मंज़ वातिहेख नु कांह। खबर ति कॅरिथ ति क्याज़ि आँसुख यि गॅरीबी बुड अगादि गॉमुच ? पनुन पनुन कुसमत। यपॉर्य ओस अमि विज़ि वाव ति वुडान। बीठ्य डेरु त्राँविथ अँकिस कुलिस तल। गरुक्य खानुदारन त्राँव कुलिस कुन नज़र तु अति वुछुन अख ख्वश रंग जानावाराह अँकिस लंजि प्यठ बिहिथ, योहय पोशि तुल्य जोराह। वावुकि ज़ोरु सुत्य ओस यि जानावार ति योहय त्रॅहयोमुत ह्यु। अमि गरुक्य खानुदारन वोन अँकिस नेचिविस जि तला यि श्राख दि यूर्य। तँम्य कॅड यि बूज़िथ वॅल्य वॅल्य श्राख तु पिलुनॉवुन मॉलिस कुन। मोल लोग श्राकि फश दिनि तु बेयिस नेचिविस कुन वोनुन, तला मालि च़ु अन तु काठ थोपाह अख सौबरिथ। सु गव ओरु योर दवान दोरान तु औनुन काठ सौबरॉविथ। त्रैयिमिस वोनुन व्वलु सॉ च़ु लाग यथ जायि च़्वल। सु ति वोथ दवान दोरान तु कॅरुन च़्वल तयार। अमि पतु वोथ ज़नानि कुन, 'हँ व्वलु यि ज़ाल नार तु लाग लेज यथ चूलस प्यठ।' स्व वॅछुस बॅडिथ तु बूलिथ, 'च़ु क्या छुख योहय पॉथुर ह्यु करान ? च़्वल ति खनुनॉवुथ, काठ ति अनुनोवुथ सौबरिथ, श्राक पुचिस ओसुख फश फश दिवान। अमा यि वनतम, च़े क्या छुय यि च़ु तयार करख ?' कुलि प्यठुक जानावार ओस यि सोरुय तमाशु वुछान। खानुदार वोथ ज़नानि कुन, 'च़े क्या गम बोरुथ ? यि छख ना वुछान दयन क्या छु सानि खॉतरु यथ कुलिस प्यठ सानि योत यिनु ब्रॉंतुय सूज़मुत।' स्व वॅछुस यि बूज़िथ, 'क्याह छुन सूज़मुत ?' दोपुनस ह्योर कुन कर कुल्य लंजि कुन नज़र। तमि दिच़ नज़र तु अति वुछुन अख ख्वशनुमा जानावाराह अख युस नु अमि अथ वख्तस ताम ज़हुन्य ति वुछमुत ओस। दोपुनस योहय मारोन तु वुन्यक्यनुक डंग नेरि अँम्यसुय।

अँम्य ल्वकट्य म्वकट्य जनावारन ज़ोन जि यिमन छु पानुवॉन्य सांपुत तु अनमॉनी। बु खदवय येमि कुलि प्यठ वुडव दिथ च़लु ति, यिम अनन मे पनुनि सांपति सुत्य

प्रथम सूरतस मंज रँटिथ। ब-क्वदरत आयि अँमिस जानावारस ज्यव तु वोथ यिमन कुन जि
 'म्यानि मारनु सुत्य क्याह नेर्यव ? बु छुस यिथॉय माज छटांग ड्वड छटांग वजनु तु तोह्य
 छिव ज़ु पांछ नफर । त्वहि क्या अंदि म्यानि ख्यनु या मारनु सुत्य ? आ, बूजिव ! हुथ
 कुलिस प्यठ छु काव सुंद ओल तु तँम्य छि वारियाह सांतुनथ अथ अंदर जमह कँरमुच ।
 गँछिव तु योहय ओल वॉलिव तु अथ अंदर जमह करनु आमुच सांतुनथ पोशव वारियाहस
 कालस ताम ।' यि वँनिथ द्युत जानावारन वुडव तु द्राव बेयिस तरफस कुन । अमि पतु वोन
 मॉल्य बँडिस नेचिविस कुन, 'तलु बा च्चु व्वथ तु खस तु हुथ कुलिस प्यठ ।' तसुंद नेचुव
 द्राव अख ज़ु करान तु खोत कुलिस । अति वुछुन काव ओल दजव सुत्य टिपिथ तु द्युतुन
 ब्वन कुन दॉरिथ । ब्वनु कनि ओस अँम्य सुंद मोल । सु लोग यिमु दजि तुलनि तु यिमव मंजु
 द्राव अख म्वख्तु हार युस ज़रक ओस त्रावान । यि वुछिथ आव अथ नादार गरुकिस गरस
 अन्यन अँछन गाश तु यिमन वोथ मोल जि 'यि म्वख्तु हार हबा छु बादशाह सलामतु सुंद ।
 अज ब्रॉठ दाह काह वँरी रोव सॉनिस तस बादशाहस महलु खानु मंजु यि म्वख्तु हार ।
 बिसयार छांडनु पतु आव नु कुनि ति म्वख्तु हार अथि । येमि खॉतरु तसुंद सॉरी नोकर
 चाकर तनु प्यठु कौद खानन अंदर दूदरान छि । मे ति ओस अज ताम खयाल जि म्वख्तु
 हार अगर तसुंदव नोकरव तु दायव च्वंजव न्युव नु, अदु कोत गव असमान खँसिथ । अमा
 अज तोरुम फिकरि जि तिम सॉरी छि बे ग्वनाह बाँद्य वानन मंज बंद करनु आमुत्य । बेहतर
 रोज़ि यी जि बु गछु बादशाह सलामतस निश यि म्वख्तु हार ह्यथ, युथ बे ग्वनाह रिहा
 सपदहन तु बेयि च़लिहा तिमन च़ूर दाग, तु सोन ति ख्वदा ।'

गरु वापस वॉतिथ द्राव दोयिमि दूह सुबहॉय बादशाह सुंदिस मँहलु खानस कुन तु
 दुपहर डँलिथ ह्यु वोत तोत । दरबानस वोनस जि मे ओस बादशाह सलामतस समखुन ।
 अमा सु कति मानिहेस ? दोपुनस नेरखु स्योद स्योद पनुनि वति किनु अंदर बरनावथ ? यि
 वोथुस, 'हता यारु, बु ना छुस नु कांह बेछुवुन, तु न छुम तस कांह चीज मंगुन । मे हा छु
 दर अस्ल दूदुक दूदस तु आबुक आबस अँजरावुन । वँरी दाह मरु गँयि कँचन गँरीबन तु बे
 ग्वनाहन बाँद्य वानन मंज तु तिहुंदुय न्याय अँजरावनु म्वखु छुम बादशाह सलामतस
 समखुन ।' यि बूजिथ दोपुनस दरबानन जि ग्वडु यिमु बु बादशाह सलामतस पृछिथ । यि
 वँनिथ द्राव सु बादशाह सलामतस निश अँम्य सुंदि अंदर अन्ननुक यिजन हेनु बापथ । कँह
 वख्त गुजरनु पतु आव सु तोरु तु वोनस 'व्वलु सॉ ।' यि गँरीब शख्स युथुय बादशाह
 सलामतु सुंदिस खँदमतस मंज वोत, अर्ज कोरनस, 'बादशाहम ! जान बख्शी गछ्यम
 करुन्य ।' सु वोथुस, 'वन क्याह छुय वनुन ? च़े छुय नु वनुनस कांह ति ठाख ।' यि वोथुस

योरु, 'बादशाहम! त्वहि छवु ना-इनसॉफी वॅरमुच। स्यठहय ना-इनसॉफी। ति क्याजि अज ब्रॉह दाह वॅरी येलि त्वहि मॅहलु खानु अँदरु म्वख्तु हार रोव, तमिकिस जुर्मस अंदर छिवख त्वहि जॅन्य दाह मरु बे-ग्वनाह बाँद्य वानन अंदर बंद थॉव्युमत्य, येलि ज़न तिमव म्वख्तु हार चूरि ओस न न्यूमतुय।' यि बूज़िथ गव बादशाह नारोनार। बडि हटि वोथुस जि 'त्रे निश क्या सबूत छु तिहँदि बे ग्वनाह आसनुक, तु अज आख दाह वॅरी गॅछिथ तिहँज वकालत करनि।' अमि पतु कोड अँम्य गॅरीब शख्सन चंदु मंजु म्वख्तु हार तु त्रोवुन बादशाहस ब्रॉह कनि। 'अछा, गव यि ओसुय त्रे चूरि न्यूमत, तु अज ताम ओसुख सान्यव नज़रव निशि छायि।' येम्य कोरुस योरु अर्ज जि 'जहां पनाह! मे येलि न्यूमत आसिहे, तेलि आसुहा बु यथ हालतस मंजु? तु बेयि अनुहा बु दाह वॅरी गुजरनु पतु वापस?' बादशाह वोथुस, 'अदु कति ओनुथ त्रे यि?' अमि पतु वॅनिस अँम्य गॅरीब शख्सन सॉरुय दासतान तु सबूतस मंजु होवनस कावु सुंद ओल ति तु दँज ति। यि बूज़िथ वोथुस बादशाह, 'अछा त्रे क्या यनामु गछि आसुन व्वन्य अथ द्यानतदॉरी प्यठ?' सु वोथुस तोरु जि 'यिम बे ग्वनाह म्वख्तु हारु किस जुर्मस मंजु पँतिम्यव दहव वॅरियव प्यठ काँद खानस अंदर दूदरान छि, तिम गॅछ्य आज़ाद करनु यिन्य। युतुय छुम यनामु दरकार।' बादशाहन वॅर अँमिस नज़राह तु वुछुन अँम्य संजव अँछव मंजु ओश वसान। वॅज़ीरस कुन वोथ जि अँम्य संजव अँछव मंजु वुछ वॅर अँश फेर्य वॅथ्य? वॅज़ीर गव गँज़रान तु अँम्य ऑस्य चोर कतरु ओश हॉर्युमत्य। अँथ्य सुत्य द्युत बादशाहन होकुम जि काँदी वॅर्युख हमी दम दरबारस अंदर हॉज़िर। तसुँदि हुक्मुक आव फूरी तोर तॉमील करनु। बादशाह लोग अमि म्वख्तु हारुक्य दानु गँज़रावनि। यिम ऑस्य काह दानु तु कुद्य ऑस्य सथ। फोरन द्युतुन होकुम जि यि म्वख्तु हार चँटिव तु यिम म्वख्तु दानु दियिव यूर्य। तान्य दितिन यिमव मंजु चोर दानु म्वख्तु हार अनन वॉलिस तु अख अख दानु दितुन पनुन्यन प्रान्यन तिमन सतन नोकरन चाकरन यिम बे ग्वनाह काँद ऑस्य। सुती वॅरिन तिम बहाल तु प्रान्यन दहन वॅरियन हुंद तलब ति कोरनख अदा। तु यि बुडु बनोवुन अमि पतु मुशीरे खास। सु वोथुस तोरु, 'बु करु जहां पनाह सुंद यि ओहदु कबूल, अमा अँकिस शर्तस प्यठ। सु गव यि जि तोह्य हेयिव यिमन बे ग्वनाहन मॉफी।' यि बूज़िथ वोथ बादशाह फोरन तख्तु प्यठ तु हेचुन तिमन कुद्यन अकि अकि मॉफी तु यि बुडु ति गव पनुनि द्यानतदॉरी सुत्य स्वनु सॉव्य।

★ ★ ★

सबरुक ताकत

दपान अँकिस मुल्कस अंदर ओस बादशाह अख हकूमत करान। कोरि आसस शे। अमा नेचुवाह नु कांह तु अम्युक ओसुस सख हमसूस। सोंचान ओस जि कोठस पतु कुस चलावि हकूमत। स्यठाह अँजजी रूद करान। पीरन तु फँकीरन निश रूद नेचिव्य सुंदि ज्यनु खॉतरु गछान तु हाजत मंदन दिल जूयी ति ओस अमे कथि म्वखु करान। अमा ओरु आसु कोरे कोरि ज्यवान। तंग यिथ द्युतुन होकुम जि अगर अँज्यकि लटि ति बादशाह बायि कूरुय ज़ेवि, स्व गछि तमे वख्तु कत्ल यिन्य करनु। बादशाह सुंद ओस होकुम, तथ कुस हेकिहे अदूली कॅरिथ? दाय आयि बुलॉविथ अननु। तस कॅरुख फहमॉयिश जि 'अगर बादशाह बायि अँज्यकि फिरि ति कूरुय ज़ेवि, स्व गछि मारनु यिन्य। व-इल्लाह च्रु यि होकुम बामल अनख नु, तेलि यिख च्रु जिंदय तिलु वॉन्य वानस अंदर चीरनु।' दायि कोर तोरु यि बूजिथ अर्ज, 'बादशाहम! यि तुहुंद होकुम आसि, तथ प्यठ सपदि अमल।' यि कथ येलि बादशाह बायि निश वॉच, स्व बिचॉर च्रमेयि तु हेरि प्यठु ब्वन ताम लँजिस माज़स दुनन। अमा करिहे ति क्याह? तस ओस पय जि बादशाह यि वनान छु, ति छु सु पूर करान। तसुंदि खलास गछनुक वख्त यूताह यूताह नँजदीक यिवान गव, तसुंजि परेशॉनी अंदर ओस हुर्यर सपदान। दोह्य दूहस आँस ख्वदायस मंगान जि बारे इल्लाहा! पर्दु रछतम, मगर ख्वदायि सुंदन कारन कुस हेकि बदलॉविथ। ख्वदायि सुंद करुन जि अथ मोकस प्यठ ति ज़ायि तस बिचारि कूरुय। अमा यि कूर आँस यीचाह कबूल सूरत तु मॉर्य मँज जि दाय ति गँयि यि वुछिथ रँहिथ। तिक्याजि तमि आँस नु अथ वख्तस ताम बेयि कांह कूराह अमि शक्ति वुछमुच्र। दिलन मोनुनस नु हरगिज ति स्व कोरि बच हन ह्यथ मॉरिथ छुनुन्य। मगर खयाल आस अगर बु यि मारन नु, कोठ यियि जिंदय तिलुवॉन्य वानस अंदर चीरनु। यि सोंचनु पतु युथुय तमि तस हँट्य चीर द्युन ह्योत, तमि त्रोवुस तोरु असुन तु अँथ्य असनस सुत्य द्रायि तसुंदि आँसु मंजु ज़ु ख्वशनुमा पोश। यि वुछिथ गँयि दाय स्यठाह हॉरान। युथ ह्यु वाकाह ओस नु तमि अथ वख्तस ताम वुछमुतुय। यि कोरि बच तुजिन अथस प्यठ तु हॉवन बादशाह बायि। पनुनि माजि वुछिथ त्रोव तमि बेयि असुन तु सुती त्रॉविन आँसु मंजु ज़ु सरताजु पोश ति। बादशाह बाय ति सपुज यि तमाशु वुछिथ हॉरान। स्व कॅर पनुन्य डँब्य दॉद्य बे करार तु दायि कोरुन यनामु दिनुक वादु जि यि कूर म्यॉन्य मत्तु मारतन। दोपुनस बादशाह सलामतस वन जि कूर आयि मारनु। तस आव आर

तु सपुज्ज यि करनु बापत तयार। तु अँकिस दून पलवन कोरुन कटु सुंदिस रतस अंदर ल्युथ तु हॉविन बादशाहस तसुंज्ज यि सँतिम कूर मारनुकिस सबूतस मंज्ज। अमि पतु आयि कोरि बचु हन महल खानुकिस तह खानस अंदर चूरि थावनु, येति तस यँहय दाय रछनस तु तरबियत दिनस प्यठ थावनु आयि तु काँसि ति सपुद नु अम्युक इफशा।

दूहा दूहा गव गुजरान। शाहजॉद्य लँज बडनि तु पुर्य त्रावनु बापथ युथुय अमि गवडन्युक कदम कोड, दायि तु बादशाह बायि सपुद यि वुछिथ ज़्यादय हॉरत जि अँमिस शाहजादि हुंदि दँछनि ख्वरु तलु द्रायि स्वनु सुंज्ज अख सीर तु खोवरि ख्वरु तलु र्वपु सुंज्ज सीर। अमि पतु येलि यि शाहजॉद्य पुर्य ऑस त्रावान, दँछनि ख्वरु तलु आसु स्वनु सेरि नेरान तु खोवरि ख्वरु तलु र्वपु सेरि। तु येमि विजि स्व असिहे, ऑसु मंजु ऑसिस कोसम हरान। बादशाह बाय ऑस यिम कोसम तु स्वनु सेरि तु र्वपु सेरि वुछिथ शाद सपदान। अमा तसुंज्ज यि खुशी ऑस अँथ्य तह खानसुय ताम महदूद। तिक्याजि अम्युक इफशा कस निश हेकिहे स्व वँरिथ? कुनि ओसुस वहमु गछान जि बादशाह सलामतस अगर अम्युक पय लगे, खबर क्याह हाल आसि असि त्रेशुन्य हुंद। येलि व्वं शाहजॉद्य बँड सपुज्ज, स्व लँज अथ तनहॉयी अंदर खोचनि तु अकि दूह वौनुन माजि जि म्यानि खॉतरु गछि अलग महल बनावनु युन। यि बूजिथ करनोव राजु बायि बादशाहस वरॉय अख ल्वकुट महल तॉमीर। अथ महलस मंज्ज आयि अँम्युसुंदि पाबथ च्वंजु तु दायि खँदमथ करनु बापथ मुकर्र करनु, यिमन यथ शर्तस प्यठ ज़र व जवॉहिर दिनु आव जि तिम गछन नु यि राजु न्यबर त्रावन्यु। अथ महलस आयि अख ज़ु कुठ्य ति बनावनु, यिमन मंज्ज शाहजादि हुंदव ख्वरव तलु नेरन वाजनि स्वनु तु र्वपु सेरि तु बेयि कोसम पोश जमाह ऑस्य करनु यिवान। वख्त वोत यूताह जि शाहजॉद्य सपुज्ज व्वन्य बालिग तु ख्वदायि सुंद करुन जि मुल्कस अंदर वोथ स्वखु म्वखु ज़बरदस्त कहत। लुख सपुद्य ऑजिज्ज। ख्यनु खॉतरु ओसुख नु सौत ति बनान। कहतस प्यठ कोबू लबनु खॉतरु त्रॉव्य बादशाहन खज़ानन हुंद्य बर यलु तु कँह दूह अदा सपदिथ गँयि तिम ति खत्तम। यि वुछिथ गव बादशाह सख परेशान। तस रोव दुहुक आराम तु रॉच हुंज नँदर। खदशु गोस जि सलतनत गँछ नु अथ मंजु नेरुन्य तु ऑठन पँहरन ओस अँथ्य गमस अंदर परेशान रोज़ान।

अकि दूह ओस अँथ्य फिकरि मंज्ज जि मलकानि दोपुस, 'बादशाह आलम! क्याह वजह छु जि कँचु वख्तु प्यठु छिवु तोह्य दिल मलूल तु फिक्रमंद।' यि बूजिथ वोथुस बादशाह जि 'मुल्कस अंदर छु सख काल वोथमुत। लूख छि बतु दादि मरान। शाही खज़ानु सपुद्य खत्तम। सलतनतुक कारुबार चलावनु खॉतरु गछि दौलथ आसुन्य, तु अगर यि

दौलथ बनि नु, तु डर तु खोफ छुम जि लुख मा करन बगावत। यिथु पॉठ्य गछि सलतनत म्यान्यव अथव मंजु नीरिथ। यि दौलथ हॉसिल करनु खॉतरु छुस तवय फिक्रमंद तु कांह सबील छम नु नज़रि यिवान।’ यि बूज़िथ गॅयि मलकॉन्य त्रन तु त्रुवहन। स्व हेकिहे तस अथुरोट वॅरिथ तु दौलथ ति दिथ। अमा किथु पॉठ्य हेकिहेस वॅनिथ जि यि दौलथ आयि कति? सॉचनि लॅज, ‘अगर दौलथ दिमस नु, सलतनत रावनुक छु इमकान। अगर वनस पोज़, खदशु छुम यि मा छुनि असि त्रेशुन्य मॉरिथ।’ ऑखुरकार होसलु वॅरिथ वॅछु बादशाहस कुन, ‘आलम पनाह! अगर जान बख्शी आस्यम, बु करुहा कॅह अर्ज़।’ बादशाह वोथुस, ‘अथ मंजु क्याह जान बख्शी हुंज कथ छे? वन क्याह छुय वनुन?’ स्व वॅछुस, ‘बु ह्यकु चॉन्य परेशनी दूर वॅरिथ। दौलथ ति ह्यकय दिथ, अमा अमि खॉतरु कर ग्वडु मे सुत्य वादु जि च़ु मा तुलख तुथ कांह कदम, येमि सुत्य म्यॉनिस मारनस प्यठ नोबत वाति।’ यि बूज़िथ द्युत बादशाहन मलकानि वादु जि ‘बादशाह छुय च़े वादु दिवान जान बख्शी हुंद। वन क्याह कथ छे?’

बादशाह बायि कौरुस अर्ज़, ‘बादशाहम! मे निश छे स्वनु संजु तु र्वपु संजु बे शुमार सेरि।’ यि बूज़िथ वोथुस बादशाह, ‘क्याह छख वनान? स्वनु संजु तु र्वपु संजु सेरि?’ हॉरान सपदिथ छुस बादशाह थलि थलि वुछान। ‘अव, स्वनु तु र्वपु सेरि छम बे शुमार’, बादशाह बायि दोपुस। ‘अमा यि वनतम जि तिम कति आयि च़े निशि, बादशाहन कौरुस योरु सवाल। अमिकिस जवाबस मंजु वॅछुस बादशाह बाय जि ‘जहां पनाह! ल्वकुट शाहजॉदी, यसुंदि खॉतरु ज़्यवुनुय त्वहि कत्ल करनुक होकुम ओसव द्युतमुत, येलि पकान छे, तसुंदि दॅछनि ख्वरु तलु छे स्वनु सेरि नेरान तु खोवरि ख्वरु तलु र्वपु संजु। येलि व्वं असान छे, तेलि छिस कोसम हरान। यिमय स्वनु तु र्वपु सेरि छे मे बेहिसाब जमाह करिमच़ु।’ बादशाहस ओस नु पनुनि मॅलकानि हुंजन कथन हुंद यकीन यिवान। सु लोग सॉचनि जि ‘काँसि इनसानु संद्यव कदमव तलु किथु पॉठ्य ह्यकन स्वनु तु र्वपु सेरि नीरिथ?’ हॉरान सपदिथ पृछुन बेगमि ‘यि किथु छु मुमकिन?’ वापस वॅछुस राजुरेन्य, ‘अगर जहां पनाह होकुम दिन, शाहजॉद्य यियि वुन्य तुहँदिस खॅदमतस मंजु पेश करनु, युथ हज़ूर पानु वुछन जि बु मा छस कांह अपुज वनान।’ यि बूज़िथ द्युतुस बादशाहन यिजन तु ताम आयि शाहजॉद्य पेश करनु। अति वुछ बादशाहन पानु यि सोरुय तमाशु तु येमि विजि शाहजॉद्य मॉलिस ग्वडनिचि लटि वुछिथ असान असान सलाम वॅर, कॅह कोसम पेयि पॅथरिस प्यठ। यि वुछिथ गव बादशाह स्यठहुय शाद। अमा कॅछा सपुद शर्मदु जि तॅम्य ओस यिछि कोरि हुंदि कत्ल करनुक दायि होकुम द्युतमुत, ख्वसु अज़ तसुंज

बचावनुच तु लुकन हुंज ब्वछि खत्म करनुच सबब बनेयि। अमि खॉतरु मँज बादशाहन मँल्यकानि तु पनुनि अँमिस टाछि कोरि मॉफी तु अमि पतु आयि तसुंघ खज़ानु बेयि बरनु।

अमि पतु लोग बादशाह अँमिस पनुनि कोरि सख माय महबत बरनि। अमा तसुंज्जुन बेयन शन बेन्यन आव नु बादशाह सुंद यि वँतीरु ख्वश। नँतीजु द्राव यि जि तिमु लजि ल्वकचि बेनि वुछिथ अँदरी दज़नि तु च्वयि करनि। यि वुछिथ करुनोव बादशाहन अँमिस कोरि हुंदि बापथ अलग महल तॉमीर, युथ नु तस बेनि तंग करन या कांह तकलीफ वातुनावुनस। अमि सुत्य ति गव नु तिहँदि हसदुक नार छ्यतु। अकि दूह ओस बादशाहस बेयिस अँकिस मुल्कस अंदर गछुन। सु आव वखसथ हेनि तमाम कोर्यन निश तुप्रथ काँसि पृछुन जि तिहँदि बापथ क्याह डॉल्य गछि वापस यिथ आसुन्य? काँसि कोरि वोनूनस अख चीज़ अननु खॉतरु तु काँसि दोयिमि कुस्मुक। यपॉर्य ओस बादशाहस नेरनस ताम कमय वख्त तु सु ह्योक नु सँतिमि तु ल्वकचि शाहज़ाँदी निश गँछिथ। लिहाज़ा सूज़ुन तस निश पनुन्य अख कनीज़ जि तस किज़ कमि कुस्मुच डॉल्य गछि आसुन्य? येलि कनीज़ तसुंदिस कमरस अंदर चायि, स्व ऑस तमि विज़ि ख्वदायि सुंदिस इबादतस लँगिथ। अमि कनीज़ि येलि तस बादशाह सुंद पॉगाम द्युत, स्व वँछुस सब्र कर, ति ज़न गव ठँहर, मे दि फॉरिग सपदनु। मगर स्व द्रायि पोत खोरे तु वोनून बादशाहस जि ल्वकचि शाहज़ाँद्य दोपुनवु सब्र अनुन।

बादशाह येलि अमि सफरु पतु वापस वोत, सारिनय कोर्यन हुंदि बापथ ऑसिन रंगु रंगु तोहफु अँन्यमुत्य। ल्वकचि शाहज़ाँदी खॉतरु ओसुन अख डबु ओनमुत। वँनीज़ि वातुनोव यि डबु शाहज़ाँदी निश तु दोपुनस यि छुवु बादशाह सलामतन तुहँदि बापथ सब्र ओनमुत। तस गव अँदरी जि बेयन कोर्यन किज़ छे रंगु रंगु डालि, अमा मे क्युत ओस ना येमि डबु वरॉय बेयि कँह ति? डबु रँटिथ द्युतुन महलस अंदर अँकिस कूनस कुन दॉरिथ। कँह दूह गँछिथ ऑस स्व पनुनिस दँरीचस प्यठ बिहिथ जि तस लोग अमि विज़ि सख गर्म। ओरु योर दिचुन नज़र, अमा पोज़ अति आयस नु कांह वँनीज़ नज़रि तु पानय वँथिथ लँज वावुज छांडनि। येलि अति वावुज अथि आयस नु, डबस प्यठ पेयस नज़र युस तस क्युत बादशाहन सफरु प्यठु ओनमुत ओस। सूंचुन क्याज़ि ह्यमव नु अमि डबु किस ठानस तामथ वावुजि हंज कॉम। युथुय तमि अमि डबुक ठानु थोद तुल, अति वुछिन अथ अंदर अख ख्वशनुमा वावुज। यि वुछिथ सपुज़ शाहज़ाँद्य ख्वश तु वावुज डबु मंज़ु वँडिथ लँज पानस वाव करनि। अमि वावुजि सुत्य वाव करुन युथुय तमि शरू कोर, स्वखु म्वखु सपुद तस ब्रॉह कनि अख ख्वश लोट तु कबूल सूरत शाहज़ादु पॉदु। युथ ह्यु

ख्वश सूरत नवजवान ओस नु तमि अथ वख्तस ताम ज़ांह ति वुछमुत। मगर यि अजीब तमाशु वुछिथ सपुज़ स्व वुछान वुछान बेहोश। यि शाहज़ादु आव जल जल तु लोग शाहज़ादि ह्यसस मंज़ अननु बापथ अँमिस आब छकनि। आब छकान छकान वोनून तस खोच़ मु, बु ति छुस अकि मुल्कुक शाहज़ादु तु च़े वाव करनु खॉतरु आस योत। शाहज़ादु आव होश तु लँज तस थलि थलि वुछनि। ‘यि छि सब्र करनुच वावुज तु अमिकि वाव करनु सुत्य आस बु योत’, वोनूनस शाहज़ादन। शाहज़ादु हँदि दिलु प्यठु सपुद अमि पतु खोफ दूर तु लँग्य यिम अख अँकिस सुत्य कथ करनि।

अमि वाकह पतु येलि ति ज़ांह शाहज़ादु कुनी ज़ँन्य अँस कमरस अंदर आसान, वावुज कँडिथ अँस वाव ह्यवान करुन तु फोरन ओस शाहज़ादु हॉज़िर सपदान। पतु अँस्य यिम पँहरन कथ करान तु असान गिंदान। यिथु पॉठ्य अँस्य तिम रोज़ानु पानु वॉन्य मुलाकात करान। येमि विज़ि शाहज़ादस वापस ओस गछुन आसान, शाहज़ादु अँस बेयि वावुज तुलिथ वाव करुन ह्यवान तु शाहज़ादु ओस गॉब सपदान। वारु वारु सपुद यिमन दरमियान सख महबत। तिम अँस्य नु यछान जि तिहँदि महबतुक राज़ गोछ़ नोन नेरुन। अमा तिहँद महबत रूद नु ज़्यादु कालस च़ूरि। महलुचन कँचन वॉनीज़न तु दायन लोग यिहँदि महबत करनुक पय तु वातान वातान वॉच़ यि खबर तसुंघन शेन बेन्यन। तिमव येलि यि बूज़ जि कुस ताम स्यठहुय ख्वश शँकील शाहज़ादु छु ल्वकचि शाहज़ादि प्यठ आशक सपदिथ तस निश च़ूरि छेपि यिवान गछान, तिम लजि ज़्यादय हसदुकि नारु दज़नि। अमि खॉतरु लजि पानुवॉन्य यिमन दून दरमियान फास त्रावनु बापथ च़वयि करनि। अँखुर आयि बेनि तस निश तु वोनुहस, ‘अँस्य हय गँयि यि खबर बूज़िथ स्यठहुय शाद जि च़े छुय कुस ताम शाहज़ादु यछान तु च़ु ति छख तस प्यठ फिरेक्तु सपुज़मुच़।’ अमि तँरीकु वॉजिख यि नावि तु रूद्य अँमिस निश यिवान गछान। अमा मक्सद ओसुख बदल। दूह अकि वोनुहस जि ‘असि ति हावतन पनुन शाहज़ादु। अँस्य ति वुछहोन सु कोताह ख्वश शँकीळ छु। अँखुर येलि नु चानि बेनि ख्वश सपदन, अदु कुस हेकि ख्वश गँछिथ।’ यि बूज़िथ वँछुख यि ल्वकुट बेनि, ‘पगाह हावोनवु अमा वादु वँरिव जि काँसि निश मा बॉविव यि राज़।’ सारिवुय बेन्यव द्युतुहस यकीन जि तिम त्रावन नु कुनि जायि ति अम्युक शक शाह। दोयिमि दूह येमि विज़ि शे बेनि दुबारु अँमिस निशि वाच़, दोपुहस, ‘असि छु तमाह जि अँस्य त्रावुहव चॉनिस शाहज़ादु सुंदि खॉतरु पनुन्यव अथव बिस्तरु।’ स्व बिचॉर अँस सख ख्वश जि तसुंज़ु बेनि छे तस आय कांछान तु माय महबत वरतावान। तस क्याह ओस पय जि तस छे बेनि महबतुकिस परदस मंज़ दर अस्ल दुश्मनी करान। येमि

विजि तिमु शाहज़ादु सुंदि खॉतरु बिस्तरु सजावनि लजि, ल्वकचि ल्वकचि नोकदार शीशु खंजि वाहराव्यख तमि त्रायि बिस्तरस प्यठ जि वुछन वॉलिस हैकिहे नु पयी लॅगिथ। यिमन अहरेज़न प्यठ त्रोवुख स्यठाह ज़ॉव्युल पुर बिस्तरु चादरु ब्राँच। अमि पतु चायि बेनि निश दोयिमिस कुठिस मंज़ त्नु दोपुहस असि कोर शाहज़ादु सुंदि खॉतरु बिस्तर, लिहाज़ा दिस नाद।

शाहज़ादि कॅड डब मंज़ु वावुज त्नु लॅज वाव करनि। तॅम्य सुंजि अमि वावजि हुंदि हरकत करनुच ऑस वुनि तॉरुय जि शाहज़ादु गव नमूदार। युथुय बेन्यव शाहज़ादु वुछ, अकि हालु गोख ब्याख हाल। 'युथ ख्वश सूरत, सर्व कद, ज़ेबा निगार शाहज़ादु छुनु असि अज़ ताम वुछमुतुय', वोन अके ज़बॉन्य तसुंज़व बेन्यव। हसदुक्य नारन त्रावि तिमु सारैय अँदरी च़न्य कॅरिथ। अपज़ुय मपज़ुय लजि शाहज़ादस सुत्य कथ करनि त्नु तमि पतु दोपुहस जि 'च़ आसख थोकमुत। अँस्य नेरव व्वन्य त्नु च़ कर आराम बिस्तरस प्यठ।' अमा युथुय तिमु नीरिथ शाहज़ादन बिस्तरस प्यठ डाफ त्रोव, तमाम अँहरेज़ु सेदेयि तस बदनस त्नु खूनक्य फमवारु लॅग्य व्वथनि। अँथ्य सुत्य गव शाहज़ादु ति बिस्तरु प्यठु गॉब। शाहज़ादु गॅयि यि वुछिथ हॉरान, वॅल्य वॅल्य लॅज वावुज हिलावनि, अमा शाहज़ादु कति गॅयोव पॉदु? सु बिचोर ओस खून हारान। शाहज़ादु लॅज ऑखुर वछ च़ेटनि। फिकरि तौरुस जि बेन्यव वरतॉव मे सुत्य अपुज़ मोहबत कॅरिथ दुश्मनी। अमि पतु ऑस स्वप्रथ दूह वावुज कडान त्नु शाहज़ादु वातनु खॉतरु जस्तु खॉज़ करान, मगर बे सूद। तसुंजि जुदॉयी मंज़ सपुज़ शाहज़ादु खराब हाल। व्वन्य न ऑस्य तस कोसम हरान त्नु न कदमव तलु स्वनु त्नु र्वपु सेरि नेरान। सॉरी ऑस्य हॉरान यि क्याह गव? फिकरे ओस नु तरान यि कुस कहर सपुद? ऑखुर जुदॉयी हुंद दोद! दोपुन बु नेरु व्वन्य पानय शाहज़ादु छ़ांडनि त्नु पनुन्यन बेन्यन हुंदि तरफ़ु ह्यमस मॉफी। अमा मुश्किल ओसुस यि जि शाहज़ादु सुंदि मुल्कुक ओसुस नु कांह पय पताह। छ़ांडिहेस त्नु छ़ांडिहेस कौतिहन जायन? ऑखुर अकि रॉच़ पुलु पॉतव गॅडिथ त्नु मर्दानु लिबास लॉगिथ द्रायि कौंसि वननु वरॉय महल खानु मंज़ु तस छ़ांडनि। कॅच़न दूहन रूज़ स्व अकि जंगलु नेरान त्नु बेयिस मंज़ अच़ान, अकि बँस्ती प्यठु बेयिस बँस्ती अंदर पनुनिस शाहज़ादस छ़ांडनि वातान। युथुय अथ मुसॉफिरी मंज़ ब्वछि ऑसुस लगान, जंगली कुल्यन हुंद्य म्यवु ख्यथ ऑस गुज़ारु करान त्नु यिथय पॉठ्य ऑस स्व बेयि ब्रॉह कुन पकान। यि तामथ ओसुस नु पय जि स्व कथ तर्फ़स छे पकान। ऑखुर वॉच़ अकि दूह अँकिस गॅह्यलिस जंगलस अंदर। पॅक्य पॅक्य ओसुस ट्वकु सूर गोमुत। ख्वरन आसस जायि जायि बस्तु खच़मच़। पोशि बदन ओसुस वुद्य गोमुत। स्व बीठ

अँकिस सायि दार कुलिस तल तु लँजिस कॉफ हिश खसनि। अँथ्य कुलिस प्यठ ओस तोतु तु हॉर। हारि वोन तोतस बोज़ुनावख ना कांह कथाह, युथ वख्त टपिहे। तोतन वोननस, 'हॉरी, च्रय वन वुन्यक्यस केंछा।' हारि दोपुस, 'बु क्याह वनय? मे छु येमिस कोरि मोहनविस प्यठ आर यिवान, खसु यथ कुलिस तल मर्दु लिबास लॉगिथ ज़ामनु छे करान तु यस थकनु किन्य अँछ छे ग्वबेमचु। यि बिचॉर छि अकि मुल्कुच शाहज़ॉदी तु बेन्यन हुंज़ि दुश्मनी तु हसदु सूत्य छे पनुनिस आशकस निशि छेनु गॉमुच। तवय छे वन्य तस शाहज़ादस छांडनि द्रामुच।' अमि पतु वोन हारि तोतस कुन ज़ि यि बद कुसमत छे यिमन जंगलन अंदर हालि हॉरान फेरान तु शाहज़ादु छु पनुनिस मुल्कस मंज़ छ्वकव सूत्य वेहन्य दब दिवान।

यि बूज़िथ वोथुस तोतु, 'तु अथ अंदर क्याह छु पानुय मारुन? अगर यि शाहज़ॉद्य सानि र्यकु ख्वशिक वेंरिथ स्वरमु हिशि बनावि तु तिमय लागि शाहज़ादस ज़खन, सु सपदि ठीख।' हारि वोननस, 'अमा यि बिचॉर कति हेकि शाहज़ादस ताम वॉतिथ, तिक्याज़ि अँमिस छनु वथुय मोलूम।' तोतु वोथुस, 'यि क्याह मुश्किल छु? यि छे शाहज़ादु सुंदि मुल्कुक नाव ज़ानानुय तु सु मुल्क छु येति प्यठु स्यठुहुय नज़दीख। योदवय यि वेंबिलु पासु स्योदुय नेरि, यि वाति शाहज़ादु सुंदिस शहरस अंदर।' यि वँनिथ द्युत तोतन तु हारि अमि कुलि प्यठु वुडव तु च्रॅल्य बेयि कथ ताम तरफस कुन। अहँज़ु कथु आसु शाहज़ादि बोज़ुमचु। अमि कुलि तल तुजन अहँज़ र्यकु तु द्रायि तोतु सुंदि वननु मुताँबिक वेंबिलु तरफु। यिथु व्वं तिथु वॉच केंचन दूहन हंदि सफरु पतु शाहज़ॉद्य शाहज़ादु सुंदिस शहरस मंज़। तति बूज़ तमि लूकन हुंदि ज़बॉन्य ज़ि शाहज़ादु छु सख छ्वकलद गोमुत। अमा तसुंद यलाज करन वाल्यन छु यि शर्त थावनु आमुत ज़ि अगर शाहज़ादु ठीख हेकि नु वेंरिथ, यलाज करन वॉल्य सुंद कलु यियि च्रटनु। अमि शर्तु मुताँबिक छि वुनिस ताम केंचन यलाज करन वाल्यन हुंद्य कलु च्रटनु आमुत्य। यि बोज़नु पतु वॉच शाहज़ॉद्य महल खानस निश तु डेडि न्यबर थावनु आमुतिस डोलस दिचुन च्रँड। शॉही नोकरव वातुनॉव बादशाहस निश। अमि विज़ि ति ऑस यि मर्दानु लिबास लॉगिथ तु काँसि ओस नु पय ज़ि यि छे सियाह सर। बादशाहन कोरनस सवाल, 'चु कुस छुख तु क्याह छुख यछान?' तमि वोनस, 'जहां पनाह! शाहज़ादु सुंद यलाज करनु म्वखु छुस आमुत।' यि बूज़िथ वोथुस बादशाह ज़ि शाहज़ादु सुंदिस यलाजस मंज़ सपद्य अज़ ताम कम कम नॉमी हँकीम येति नाकाम। च्रु क्याह ह्यकख वेंरिथ? अमा पोज़ शाहज़ादि कोरुस अर्ज़, 'बादशाहम! बु बॅलरावन चोन शाहज़ादु दूहन मंज़।' बादशाहन दोपुस ठीख

गव। च्चे छुय यिज़न दिवान यिनि। मगर याद थॉव्यज़ि, अगर शाहज़ाद बली नु, चोन कल यियि च़टनु।' शाहज़ाँद्य वुँछुस, 'मे छु शर्त मंज़ूर।'

शाँही नोकरव वातुनाँव शाहज़ाँद्य अमि पतु शाहज़ादस निश तु तमि कोर तसुंद यलाज करुन शरू। शाहज़ादि लॉज तोतु सुंदि वननु मुताँबिक अँम्य सुंज तबाबत करुन्य। अमा सु ह्योक नु अँमिस पर्ज़ुनाँविथ। केंचनय दूहन मंज़ खोत शाहज़ाद सुंदन छ्वकन अंग तु वुछान वुछान गव सु ठीक। बादशाहन युथुय शाहज़ाद सुंदि सेहतयाब सपदनुच शेछ बूज़, सु सपुद स्यठहय शाद। हुकुम दितुन हँकीम यियिन दरबारस अंदर हॉज़िर करनु, तस यियि यनामु दिनु। येलि शाहज़ाँद्य हँकीमु सुंदिस लिबासस मंज़ बादशाहस ब्रोह कुन पेश आयि करनु, बादशाहन वोन तस, 'हँकीम साँब! अँस्य सपुद्य यि बूज़िथ ख्वश जि चानि सुत्य सपुद सोन शाहज़ादु सेहतयाब। वन अँस्य क्याह ह्यकव चाँन्य खँदमथ वँरिथ?' शाहज़ादि त्राँव बादशाहस नज़दीखुय बिहिथ शाहज़ादस प्यठ नज़र तु वँछ बादशाहस कुन, 'जहां पनाह! मे छु ख्वदायि सुंद तु तुहुंद द्युतमुत हदु खोतु ज़्यादु। मे क्या गछि अमि खोतु जि म्यान्यव अथव सपुद शाहज़ादु ठीक।' बादशाह वोथुस दुबार, 'न अँस्य छि यछान च्चे यनामु द्युन। च्चु यि केंछा ति मंगख, ति यियी पेश करनु।' बेयि वँछुस शाहज़ाँद्य जि मे छु ख्वदायि सुंद तु तुहुंद द्युतमुत वारियाह। बादशाहन वोननुस अमि पतु, 'बु छुसय त्रेयिमि तु आँखरी लटि वनान, च्चु यि केंछा ति मंगुन यछख, ति यियी च्चे दिनु।' अमि पतु वँछुस शाहज़ाँद्य, 'बादशाहम! अमि खॉतरु दियिव मे ग्वडु वादु।' बादशाह ओस अमि विज़ि स्यठहय ख्वश। दोपुनस, 'अँस्य छी च्चे कौल दिवान। मंग यि केंछा मंगुन छुय।' तमि कोरुस अर्ज़, 'बादशाह किशवर! तेलि दीवुन मे पनुन योहय शाहज़ादु।' बादशाह गव यि बूज़िथ सख परेशान। अमा वादु ओसुन द्युतमुत! यपाँर्य ओस शाहज़ादु ति हॉरान जि हकीम क्याह छु वनान? दरबाँर्य गँयि यि बूज़िथ दम फुट्य। तिम छि अख अँकिस कुन वुछान जि यि छे अँजीब फरमाँयिश। शाहज़ाँद्य वँछ अमि पतु थोद। हना पँच बादशाहस नखु तु छुनिन मरदानु पलव वँडिथ। यि वुछिथ गव बादशाह शशदर जि बारे ईल्लाही! हँकीम तु मरदानु लिबासस मंज़ क्वसु ताम हँसीन शाहज़ाँद्य! शाहज़ादु ति गव यि तमाशु विछिथ हॉरान।

अमि पतु वँछ शाहज़ाँद्य बादशाहस जि 'जहां पनाह! बु ति छस अकि मुल्कुकिस बादशाह सुंज शाहज़ाँद्य। बु छस येमिस चाँनिस शाहज़ादस सुत्य महबत करान। अँम्य सुंज जुदाँयी हेच नु मे बरदाश वँरिथ तु द्रायस पनुनि मुल्कु मंज़ अँमिस छाँडनि। जंगलव, बियाबानव तु वाँनाखव मँज्य पँकिथ वाँचुस योर। अँकिस कुलिस प्यठ ओस तोतु तु हॉर

पानुवॉन्य कथु करान। यिहँजु कथु बूज़िथ कर्यम तिहँजु र्यकु जमह तु तिमव सुत्य कोरुम
शाहज़ादस यलाज। व्वन्य छस बु त्वहि ब्रोंह कनि।' यि बूज़िथ सपुद बादशाह ख्वश।
पानस सुत्य बेहनोंवुन शाहज़ाँद्य तु तसुंदिस मॉलिस निश सूजुन काँसिद। अमि पतु आव
अँमिस शाहज़ादि शाहज़ादस सुत्य नेथुर करनु।

★ ★ ★

गुह्य रूज

पथ कालि छु अँकिस मुल्कस अंदर अख बादशाह ओसमुत, युस कंजूसी तु अथु वँटिथ थावनस मंज तुथुय बदनाम ओस युथ सखावतस अंदर हातम मशहूर ओस। अँमिस बादशाहस येति कुनि दौलथ नज़रि गछिहे, तति ओस सु हॉसिल वँरिथ पनुनिस खज़ानस अंदर जमह थावान तु अँम्य सुंद दीन तु दुनियाह ओस बस पोंसु। यि बादशाह ओस पनुनि अथ दौलँच तु खज़ानस वँरियस अंदर दौयि चोरि लटि तिथय पॉठ्य ताफ दिवान, यिथु पॉठ्य दान्यस मुननु ब्रोंह ताफ द्युन ज़रूरी छु आसान। यि करनु सुत्य ऑस बेयि बादशाहस दिलस सख खुशी सपदान। दपान अकि दूह ऑस्य बादशाहन यिम खज़ानु तापस त्रॉव्यमुत्य तु पानु ओस यिमन खज़ानन रॉछ। तामथ आव अख गुह्य रूज़ाह बुडान बुडान तु कुनुय जोंटु मॉरिथ नियन तोंति अंदर अख अशरफी तु थॉवन पनुनिस ऑलिस अंदर। अमा बादशाहस तोर नु फिकरि जि गुह्य रूज़ चोल अख अशरफी ह्यथ। येलि दूह लोसुवन यिम खज़ानु वँटिख, यि गुह्य रूज़ आव तु ब्यूठ बादशाह सुंदिस दँरीचस प्यठ। वोनुन जि 'बादशाहस छु यूताह खज़ानु तु स्वनु सुंजु अशरफियि। मे ति छे पनुनिस ऑलिस अंदर अख अशरफी, यथ वुछिथ विं छे व्वथान। बु ति छुस येमिस बादशाहस बराबर।' बादशाहन युथुय गुह्य रींज्य सुंद कलामु बूज, सु गव नारोनार तु दौपुन, 'अवु यि ह्य ऑद्य पँज्य किन्य अख अशरफी ह्यथ छु चोलमुत। यि तावन ज़द यूताह प्यूत खंड जानावर, तु अँमिस छा युथ बितुर ? यि कर्या मे सुत्य हमसरी ?'

बादशाहन द्युत यि बूजिथ होकुम जि गुह्य रींज्य सुंद ओल गछि फोरन छांडनु युन तु तहकीकात गछि सपदुन जि यि किथु पॉठ्य छु मे सुत्य हमसरी करान तु अँम्य क्याजि वातुनॉव म्यानि खज़ानु मंजु अख अशरफी निथ पनुनिस ऑलिस अंदर। केंह वख्त गुज़रनु पतु आव गुह्य रींज्य सुंद ओल वुछनु तु अथ ऑलिस आव लुरपार करनु। यिथु पॉठ्य वातुनॉवख बादशाहस निश दुबारु यि अशरफी। यि वुछिथ गव गुह्य रूज़ सख ओजुर्दु तु वोत बेयि बादशाह सुंदिस दँरीचस प्यठ तु लोग बारव दिनि जि 'कंजूस बादशाह सुंदव बे रहम तु ज़ॉलिम सज़ोवुलव नियि म्याँन्य बादशाही लूट तु बेयि छुनुहँम ओल लुहरिथ।' यि बूजिथ आव बादशाह सख इश्तिहालस लायनु। होकुम द्युतुन जि 'येमिस गुह्य रींज्य सुंद गरु गछि फुन्य फाख वँरिथ त्रावनु युन। बेयि गछि गिरिफ्तार वँरिथ बाँद्य वानस अंदर पा-ब-ज़ोलान करनु युन।' बादशाह सुंदि होकुम दिनुच ऑस तॉर जि गुह्य रींज्य सुंद ओल

आव कानि कानि करनु तु सुती आव बिचोर गिरिफ्तार कॅरिथ ठिपिस मंज बंद थावनु। बादशाहन थावनोव यि पनुनिस अँथ्य दॅरीचस प्यठ ठिपि सान अवेजान। यि जॉनिथ जि बादशाह मा मारि कोठस, लोग गुह्य रूँज बादशाह संजि कंजूसी तु ओल फुन्य फाख कॅरिथ छुननु बापथ तसंज वागोई करनि तु ज़ोर ज़ोर व्वखनय करनि जि मे ऑस अँलिस मंज बादशाही तु स्व न्याँवुम येम्य मोज़ीख बादशाहन तु प्यठ छुननम डेरु वाव।

बादशाहस गव गुह्य रींज्य सुंद यि वनुन सख नागवार तु कस्द कोरुन जि गुह्य रूँज पजि व्वन्य वति अँदरु हटावन। तान्य अनुनोव बादशाहन त्रेशि दूराह अख तु गुह्य रूँज कडुनोवनु ठिपि मंज न्यबर तु याशाह कॅरिथ न्यून गुह्य रूँज त्रेशि दूरिस सुत्य न्यंगलिथ। बादशाह गव पनुनि जायि ख्वश जि बँड बलाय चँज। तामथ कोर बादशाहन डाकुर तु अँथ्य सुत्य द्राव यि गुह्य रूँज ति तु कुनिय वुडव दिथ वोत कुल्य लंजि प्यठ। यि वुछिथ सपुज सारिनय दरबार्यन, अँमीरन तु वँजीरन हॉरॉनी जि यि क्याह सपुद ? गुह्य रूँज हय बादशाहन न्यंगलिथ छुन्याव, अमा यि किथु पॉठ्य द्राव बेयि वापस। तामथ आव गुह्य रूँज बेयि बादशाह सुंदिस दॅरीचस प्यठ तु लोग तसंज वागोई करनि। बादशाहस सपुज अँम्यसंज ह्यमत तु जुरत वुछिथ हॉरॉनी तु अथ प्यठ छुस माज दजान जि अँमिस माज दानि कोताह ताव तु नशु छु ? गुह्य रींज्य सुंद यि बितुर ओस बादशाह सुंदि खॉतरु बरदाशु न्यबर। पनुनिस फोजस दितुन तलवार कडनुक होकुम तु यपॉर्य आव यि गुह्य रूँज बिचोर दुबारु गिरिफ्तार करनु। अमि विजि थावनाँव्य बादशाहन पानस अँद्य अँद्य शमशेर ह्यथ फूजी तु न्यून बेयि यि गुह्य रूँज त्रेशि सुत्य नंगलिथ। बादशाहन दोपुनख अगर यि नामुराद प्वाँदि या डाकरिस सुत्य बेयि वापस नेरि, त्वसमु गछनस कॅरिथ थावनि। अमा अमि विजि आव नु बादशाहस डाकुर शाकुर कँह, बँल्यकि आयस ज़ोरदार प्वाँद। अँथ्य सुत्य आव यि गुह्य रूँज ति न्यबर लायनु। फूजी ऑस्य तलवार ह्यथ तयार तु यूथुय तिभव गुह्य रूँज नस्ति किन्य बादशाहस नेरान वुछ, अँक्य सिपाहन त्रोव तस कुनुय दब। दरबार्यव तु अँमीरव वँजीरव ज़ोन जि गुह्य रींजिस गँयि ज़ु हिसु। अमा यि शमशेरि दब ओस बादशाह संजि नस्ति वोथमुत तु तस ऑस्य नस्ति ज़ु अड गॉमुत्य। सु लोग टांगु टांग दिनि तु रथ हारनि। गुह्य रूँज आव बेयि तु लोग व्वखनय करनि 'जि अँनिम स्वय, वँवुम स्वय, लँजुम स्वय पानसुय।'

★ ★ ★

तमहुक नँतीज

दपान यि आँस अख गरीब, नादार तु मुफलिस बुडु मोजाह। अँमिस न ओस पथ कांह तु न ब्रोंह। अकसर आँसिस फाकु लगान। कुल दौलत आँसिस पनुन्य हून्य जोराह। अकि दूह आयस बेयि गामु प्यठु कोरि हुंज कूर तु कोरनस साल। अमि ति ज़ोन गँनीमथ ज़ि जान गव, अज़ ख्यमव वारियाहि कॉल्य रस दार बतु डंग अख ज़ु तु वारियाहु वख्तु पतु कडव व्वशुव ह्यू। तमि थॉव्य हून्य ज़ु पनुनि पँहरि रॉछ तु पानु द्रायि ड्वकुर ड्वकुर दिवान। दपान वुनि ओस नु तमि गामुक्यव खहव न्यबर ति कदम थोवमुत ज़ि अख बुडु शालाह गोस नमूदार तु लोगुस अम करनि। बुजि माजि दोपुनस, 'मे ख्यथ किहो अंदी च़े? छुख ना वुछान ज़ि ख्यनु दादि छम बंगँर गमुच़। जान रोज़ि यी ज़ि शाम ताम कर सब्र युथ बु पनुनि ज़ुरि निश रस बतु तु नाटु बतु वाराह ख्यथ हुनु। तोति च़ली च़े ति लूब तु यडु बँरिथ ख्यख म्योन माज़।' शालस आयि बुजि हुंज कथ बराबर। दोपुनस अदु जान हय गव। अँमिस निश नीरिथ लँज ब्रोंह कुन कदम दिनि तु बुथि प्योस हापुताह अख तु लोगुस शिकार करनि। बुडु वँछुस, 'गोबराह! कथ बोज़। म्योन यि रथ माज़ छुख ना वुछान, फाकु दी दी छम हँट गॉमुच़। च़ु हय व्वन्य मे पनुन ओज़क बनावख तु अख अँदरम ति यियी नु बरनु। खामखाह खसी म्यॉन्य बाँठ। मे छुय पनुनि कोरि निश सालस गछुन। तति आसि तमि म्यानि बापथ हॉड मोरमुत। सु ख्यथ गछु बु वानुगन हिश। शाम ताम कर तु तहमुल, द्यव च़े ति अंदी मे ख्यथ केंह।' हापुत गव यि बूज़िथ रॉज़ी तु दोपुनस अदु ती करव। अमि पतु लँज स्व ब्रोंह कुन कदम दिनि। अमा वुनि आँस नु स्व ओड कूह ति पँचमुच़ ज़ि बुथि प्योस पादर सुह तु लोगुस अम करनि। अमा बुजि माजि वोनस, 'बादशाह साँबा! च़े क्या बनी मे ख्यथ? छुख ना वुछान फाकव सुत्य क्याह छे मे हँट गॉमुच़? न छुम रथ तु न माज़। अख मुदथाह वोतुम केंह ख्यनस। व्वन्य छुम पनुनि कोरि हुथ गामस मंज़ साल कोरमुत। म्यानि बापथ छिन क्वकर तु कठ मॉर्यमुत्य। तिम ख्यथ गछु बु अल हिश। पतु वुछतु ज़ि म्योन रथ माज़ क्याह लुत्फ दियी च़े। अदु ख्यवान ख्यवान करुहँम आँही। बस शाम तामथ कर तु सब्र। तोरु फेरु बु खॉरु सान तु तीतिस कालस कर तु दंद पनुन्य तेज़।' बुजि माजि हुंजु यिमु कथु बेछि सुहस बाँर थफ ज़न। दोपुनस अदु क्याह मॉजी ती गव जान। यि बूज़िथ लँज बुडु मॉज ब्रोंह कुन कदम दिनि तु वॉच़ कोरि हुंद गरु।

कोरि निश बतु ख्यनु पतु वोनुन तस यि सोरुय कसु तु दोपुनस, 'व्वन्य हबी छुम वापस गछुन मुश्किल। तिक्याजि सुह, हापुत तु शाल त्रेश्वय आसुनम वतन वुछान।' अँम्य संज यि जुर ऑस स्यठाह त्रुच तु गाटुज। दोपुनस 'मोजी, च्नु गरु वातुनावुन्य गँयि म्यॉन्य कॉम। च्नु मतु बर तु कांह फिकिर। सुह हापुत तु शाल त्रेश्वय ख्यावख फ्यख।' नाटु बतु जान पाँठ्य ख्याविथ बँरुन अँकिस बजि पँथुर्य अलि मंज तु द्युतुनस पनुनिस गामस कुन दकु। यि अल गँयि डुलवान डुलवान बुजि हुँदिस गामस कुन। युथुय यि अल पानस अंदर बुड ह्यथ सुहस निश वॉच, तँम्य रँट यि अल तु लोग ग्रजनि। अमा अलि अंदर वोनुस बुजि माजि जि 'बादशाह साँबा! यि छुख ना वुछान मे क्या आव बँनिथ? सु कति गव म्योन नाटु बतु ख्योन? तम्युक हय मे हमसोसुय रुद।' यि बूजिथ खँच सुहस च्नुख तु दोपुन यि हो छि अल। क्याह ख्यमन तु खश्मु सुत्य कँडनस कुनी ठिल तु लँज अल ब्रॉह कुन डुलान डुलान पकनि तु यिथु पाँठ्य वॉच यि अल हापतस निश। तस ति वँन्य बुजि यिथी श्रंग तु तँम्य ति कँड अथ अलि कुनी ठिल तु वॉच यि बुजि हुँदिस गामस निश, येत्यथ शालु काक बुजि ख्यनु बापथ गिरान ओस। तस मकारस तोर फिकरि जि बुजि छे क्याहताम चाल गिंजमुच तु लोग सु अथ अलि फासवुनि युथ अमि अँदर बुजि वँडिथ अम करिहे। तान्य गँयि बुजि माजि पनुन्यन होन्यन हुँदि चूँ चूँ करनुच आवाज कनन तु तमि ज़ोन जि बु छस पनुनिस गरस नँजदीख वॉचमुच। शाल ओस वुनि अलि फासवुनु बापथ जस्तु खॉज करान जि अलि अँदर लॉय बुजि पनुन्यन वफादार होन्यन क्रख। बुजि हुँद आलव युथुय तसुँद्यव होन्यव बूज, तिम आयि पादर सुहन हुँद्य पाँठ्य बुजि कुन दवान तु दोरान। शालन युथुय अल फासविथ त्रॉव तु वातुनाविहे बुजि हकुबल, होन्यव द्यव ओस तीतिस कालस शालस द्वयि अंदु मँतिथ त्वसमु वँरिथ त्राविमचु तु यिथु पाँठ्य म्यूल तस पनुनि लालुच करनुक मोकूल सजा।

★ ★ ★

वोवुर

दपान यिम ऑस्य बॉय बारुन्य जोराह। अख ओस शिकॉर्य तु ब्याख वोवुर। दृश्य बारुन्य ऑस्य नेथरु वॉल्य। शिकॉर्य बॉय सुंज आशेन्य ऑस स्योद सादु तु वोवर्य सुंज ज़नानु ऑस चालाक। शिकॉर्य ओसप्रथ दूह शिकार करनि गछान तु यि केंछा बनान ओसुस, सु ओस पनुनिस बापॉरिस दिवान युस तोरु गंडती पॉठ्य तिमन हुंद कुमत ओसुस दिवान। कुनि कुनि ओस पानस ति शिकार ख्यवान। वोवुर ओस बिचोर दोह्य दूहस पनुनिस वोवर्य वानस बिहिथ च़ादरु तु पॅट्य वोनान। यिथु पॉठ्य ऑस्य यिम बारुन्य ज़िंदगी हुंद्य च़ोक्य मोदुर्य दूह गुज़ारान। अकि दूह वोन वोवरिस पनुनि ज़नानि ज़ि 'हतो! यि बोय छुय शिकार पेश। पानु ति छु ख्यवान तु दोयिम्यन ति छु ख्यावान। अमा च़े मा छुय ज़ांह ति मज़ाक करान। पगाह नेर च़ु ति शिकारस अँमिसुय बॉयिस सुत्य, युथ ज़न अँस्य ति वारियाहि कॉल्य ऑस मेठरावुहव।' यि बूज़िथ गव वोवुर त्रन तु त्रुवहन ज़ि कोठ क्याह शिकार हेकि कॅरिथ। मगर आशनि हुंद ओसुस होकुम। मजबूर सपदिथ द्राव दोयिमि दूह बॉयिस पतु पतु शिकार करनुकि गरज़। अमा शाम वख्तस ताम बन्योस नु केंह ति, येलि ज़न शिकॉर्य बॉयिस अख ज़ु शिकार स्यठुह्य मुशकिलु सान बदस सपदिस। यि वुछिथ गव ग्वतन ज़ि छ्वन्यव अथव येलि गरु अच़ु, तति क्याह वनु ज़नानि। यी सोंचान सोंचान पेयस अँकिस मूमतिस कावस प्यठ नज़र तु ज़ोननुन ज़ि आशनि निश बचनुच सँबील द्रायि। ऑखुर तुलुन यि मूमत काव तु पोस वॉलिथ कोरुन साफ तु द्राव गरु कुन।

बडि हटि वोथ आशनि ज़ि 'रठ यि गव चानि खॉतरु शिकार तु युथ शिकार छुनु कमन कमन पेशवर शिकार्यन ति बनान।' माज़ छटांग जोराह वज़नी शिकार वुछिथ दोपुस तमि ज़ि बिचार्या, यि ख्यखा च़ु किनु बु? वोवुर वोथुस, 'मे छुनु शिकार ख्यनुक हाजथुय। गछ पानुसुय खे, तिक्याज़ि मे ख्यव अखाह तँतिथुय बुज़िथ।' अमा अँमिस क्याह यड यियिहे यि माज़ छटांग ड्वड छटांग ख्यथ, सु ति मूमतिस काव सुंद। लिहाज़ा दोपुस आशनि ज़ि 'पगाह नीर्यिज़ नेह गटि शिकार करनि। अगर गछख नु, बु करय येमिस चॉनिस शिकॉर्य बॉयिस सुत्य नेथरु तु च़ु थावथ वुछवुनुय।' यि ऑस अँदुर्य किन्य यछान ती ज़ि कोठि गॅछ अँमिस शिकसलद वोवरिस निश थफ व्वथुन्य। दोयिमि दूह क्वकर बांगे वॅछ तु लॅज खावंदस किच़ च़्वचि करनि तु सु हक़बल वातुनावनु म्वख़ रलोवुन यिमन च़्वचन शींक्याह। यिम च़्वचि गंजन दजि तु वुज़नोवुन खावंद। दोपुस तमि ज़ि 'व्वथ, अथु

बुथ छल तु नेर शिकारस। दुपहरस ताम वॉत्यजि शिकार ह्यथ।' वोवुर ओस अँदुर्य किन्य पनुनिस तकदीरस वदान जि कोठ क्या करि। ऑखुर द्राव फुटमुत्यव क्वठ्यव यि च्वचि दँज ह्यथ शिकारस। मगर अँदुर्य किन्य सूचुन जान गव अँमिस बलायि निश म्वकलुनुय। लिहाजा द्राव बेहिस हमसायि शहरस कुन। यिथु व्वं तिथु वोत तथ शहरस अंदर स्यठाह घीर्य तु राथ टपावनु बापथ च्राव अँकिस मसजिदि अंदर। अति वुछिन बेयि ति मुसॉफिर पोंशि। ब्वछि सुत्य ओसुस क्वठ्यन ति जुव द्रामुत, अमा फिकराह कँरुन जि अगर अथ च्वचि दजि गंड मुचरावु, यिम बाकय मुसॉफिर ति मा प्यनम अथ शँरीक। जान गव पान दुब दॉरिथ द्युन तु सुबहस वुछव ख्वदा क्याह करि? यि सूचिथ चोन त्रेशि कुनालाह अख तु हैचुन च्रादर कलु पेट्य।

दोयिमि दूह द्राव शहरस मंज तु अति वुछुन अँकिस मॉदानस अंदर अमि शहरुक वँजीर अँकिस ऑछरिस हँस्तिस सवार सपदिथ खति कडान। तमाम लुख यिम अँमिस ब्रूह्य किन्य ऑस्य पकान, ऑसिस नमान तु सलाम करान। अमा वोवर्य न कँरुनस सलाम तु न नम्योस। यि वुछिथ गव वँजीर नारोनार तु दोपुन यि कुस कलु फ्युर गछि आसुन येम्य नु म्यानि बजरुक कांह ति खयाल कोर। हँस्यति प्यठ वोथ ब्वन तु त्रोवुन यि होस वोवरिस कुन। सु ओस तमि विजि सख खूनख्वार बन्योमुत। तँम्य युथुय वोवुर वुछ, दोर्याव तस शिकार बनावनु बापथ। युथुय हँस्य तस निश वँहरिथ ऑस वाहरोव, वोवर्य दिचुनस योरु पान बचावनु म्वखु च्वचि दँज ऑसस अंदर बँरिथ। यिम ज़हरदार च्वचि येलि हँस्यतिस अंदर वाचु, तिमव कोर पनुन कार तु वुछान वुछान दितुन अँतिथुय अमानथ। यि वुछिथ गव वोवरिस हॉरत तु ज़ोनुन जि शोठस खारन व्वन्य कॉठिस, लिहाजा दितुन पनुन पान दॉरिथ तु लोगुन डांब। दोयिमि तरफु ओस यि सोरुय तमाशु वँजीर वुछान तु तँम्य येलि होस कोहुक्य पॉठ्य पथर प्यवान वुछ, दोपुन, 'बारे इल्लाहा! पहलवान ति छि कोठन वुछमुत्य, मगर युथ ह्यु रतु माज़ु वरॉय पहलवानाह छुम नु अज़ ताम ज़ांह नज़रि गोमुत येम्य अकेय खोंखलि सुत्य हँस्तिस जुव न्युव कँडिथ।' वँजीर दोर्याव बादशाहस निश तु दोपुनस, 'जहां पनाह! पहलवानाह अख छु सॉनिस यथ शहरस अंदर वोतमुत। स्यठह्य ख्वदसर तु बुकर्य दोर त्युथ जि ब वुछिथ होवुन नु मे कुन तॉज़ीम करनुक कांह इशारा। तितुय योत नु, बँल्यकि छुनुन सोन होस अके दूगि सुत्य मॉरिथ।' वँजीर सुंद बयान बूजिथ गव बादशाह ति हॉरान, जि पहलवान गछि सु पँज्य किन्य आसुन यस ब्रोंह कनि नु हँस्तिस ति कँह चलि। फोरन द्राव वँजीरस सुत्य यि पहलवान वुछनि। येलि बादशाह अथ मॉदानस अंदर वोत, अति वुछुन पनुन्यव अँछव होस कोहुक्य पॉठ्य पथर प्योमुत तु

दोयिमि पासु ड्युंतुन वोवुर दराज़ दिथ। वॅज़ीरस दोपुन यि पहलवान ति मा छु मूदमुत हॅस्तिस् सुत्य मुकाबलु करान करान। वॅज़ीर वोथुस, 'जहां पनाह! न स्व छनु कथ। अॅमिस आसि थकावट तु स्व दूर करनु म्वखु छुन दराज़ द्युतमुत।' यि वॅनिथ आव वॅज़ीर वोवरिस नखु तु लोग वुछनि अॅमिस छा शाह खसान वसान। बादशाहस आव दूरि बोज़नु ज़ि वॅज़ीर छु अॅमिस सुत्य क्याहताम कलामु करान। दोपुनस, 'क्याह छु यि पॅहलवान वनान?' वॅज़ीर वोथुस, 'जहां पनाह! जान बख्शी गछ्यम करुन्य। यि छु वनान ज़ि बु व्वथु तेलि थोद येलि बादशाह सलामत मे पनुनि दामाँदी अंदर नियि।' बादशाहन ज़ोन ज़ि युथ बहोदुर पॅहलवान पनुनि दामाँदी अंदर न्युन छे फख्रुच कथ। वॅज़ीरस दोपुन असि छु मंज़ूर।

अमे विज़ि आयि शहरस अंदर पारय दिनु ज़ि ईरानु प्यटु छु नॉमी पॅहलवान सॉनिस शहरस अंदर सॉलॉनी बॅनिथ आमुत, येम्य पनुनि बहोदुरी हुंद मुज़ाँहिरु वॅरिथ अके द्वगि न्युव हॅस्तिस् ज़ुव वॅडिथ। बादशाह सलामतु संजि शाहज़ादि यियि अॅज़्य अॅमिस सुत्य निकाह करनु। यि बूज़िथ लोग वोवुर सोंचनि ज़ि आशनि ओसुम ज़हर च्वचन अंदर मिलनोवमुत। अमा तमि टपु तलु रोछुनस ख्वदायन। अमा व्वन्य छनु कांह ति ब्रांथ। वोवुर बादशाह सुंदिस महलस मंज़ वातुनॉविथ आव सु महाराज़ु बनावनु तु बादशाह कोरि सुत्य आस नेथुर करनु। वोवुर येलि महारेनि हुंदिस कुठिस मंज़ चाव, सु ब्यूठ अॅकिस कूनस मंज़ छ्वपु दम वॅरिथ। बादशाह कोरि दोपुस, 'चु क्याज़ि छुख नु कथाह बाथाह करान।' सु वोथुस तोरु ज़ि 'कोठ न छु कांह पॅहलवान तु न कांह बहोदुर। बु सोज़ोनस दर अस्ल आशनि शिकारुकि बहानु मरनु बापथ तु च्वचन सुत्य ओसनम ज़हर रलोवमुत। तिम च्वचि आसम दजि अंदर गॅडिथुय। येलि वॅज़ीरु सुंद होस कोठस हमलु वॅरिथ आव, स्व च्वचि दॅज दिचुमस अॅसस अंदर बॅरिथ यि ज़ॉनिथ ज़ि कोठ बचि अमे तॅरीकु। ख्वदायि सुंद कार ज़ि तिमव च्वचव सुत्य गव होस मॅरिथ। वॅज़ीरन ज़ोन ज़ि यि छु कुसताम नॉमी पॅहलवान, नतु छुस बु अख अदना वोवुर।' स्व वॅछुस तोरु ज़ि 'शोठ आयि चॉनिस ड्यकस मरनु। ख्वसु नामावॉरी चॉन्य बादशाह आलम तु खास वॅरिथ आम लूकन अंदर सपुज़, स्व कॉयिम थवनु खॉतरु छुय च्चे व्वन्य कॅह नतु कॅह त्युथ करुन युथ ज़न कोठि पनुनिस वॅबीलस तु आम लूकन अंदर लाज रोज़ि।' वोवुर वोथुस दर जवाब ज़ि 'शोठ क्याह हेकि वॅरिथ।' तमि दोपुस, 'पगाह रॉन्न मंज़ अनि कोठ मॉल्य सुंदि खज़ानु अँदरु मोहरु ठेलु ज़ु च़ोर तु च्चे छुय म्यॉनिस मॉल्य सुंदि तबेलु अँदरु खर अख कडुन।

तँस्य प्यठ दिमव तिम ठेलु ज़ु चोर ओरु योर दौरिथ तु नेरव कुनि परदेस शहरस कुन,
युथ असि दूशवन्य बॉचन परतीथ रोज़ि।' तु यी गव यिमन बॉचन दरमियान मशखस।

यपौर्य ओस बादशाहन शहरस अंदर पारय द्यौवमुच्र ज़ि कोठ सुंद ज़ामतुर छु
स्यठहय वलवीर तु पहलवान। आम लूकन तसंज पहलवॉनी हावनु म्खु करि सु पगाह
म्यान्यन सुहन सुत्य मुकाबल तु पनुन्य पँहलवॉनी दियि सॉबित कँरिथ। यि पारय बूज़िथ
वोथ वोवरिस ज़्यादय तोस तु युथुय राथ सपुज़, सु द्राव तबेलु मंज़ु खर अननु बापथ युथ
सु ज़नानि ह्यथ रातो राथ महल खानु अँदर दूर देशन कुन चँलिथ हेकि। ख्वदायि सुंद
कार ज़ि तबेलु छांडान छांडान रॉव तस वथ तु वोत अकि बुजि हुंज़ि छेयि पहरि कुन।
अमि विज़ि ओस रूद ति प्यवान। रूद निश बचनु खॉतरु रूद सु बुजि हुंज़ि पँहरि हुँदिस
पशि ज़्यहस तल। अति वुछुन पहरि हुंद दरवाज़ु न्यस्फ यलय। अमा अनि गटि मंज़ आयस
ताबुवुनि ज़ुचु जोराह बोज़नु। यिमु आसु दर असल सुह संज़ु अँछ ज़ु ज़ोतान तु यि सुह
ओस बुजि ज़ागान ज़ि यि कर नेरि पँहरि अँदर तु चमस रथ। वोवरिस कति तरिहे फिकरि
ज़ि यिमु छे सुह संज़ु अँछ ज़ोतान। बुजि बिचारि ओस पहरि अंदर जायि जायि वुथ वसान
तु वनान ओस पॉन्य पानस सुत्य ज़ि दुनियिहुचि सारेय बलायि त्राव्यम च़ॉपिथ, अमा
येमिस ठिप्यकानि पूशिस नु ज़ांह। सुहन युथुय बुजि हुंद कलामु बूज़, सु लोग पानस सुत्य
सॉचनि ज़ि 'खलास! येलि अमि दुनियिहुचि सारेय बलायि च़ॉपिथ छे त्राविमचु, कोठस
कति थावि ज़िंद?' यि ज़ॉनिथ ह्योत तँम्य अति च़लुन। वोवुर ओस लबि तल करार
कँरिथ। तँम्य ज़ोन ज़ि यि छु खर तु कुनी व्वठ त्रॉवनस प्यठ तु लोगुस खूर करनि। सुहन
ज़ोन ज़ि यि गँयि कोठस बुड सवार य्वसु कोठस खत्म त्रावि कँरिथ। अमा सुह गव फ़ट
सुत्य पथर बिहिथ। युथुय व्वन्य सुबुह फोल, लूकव वुछ शख्साह सुहस सवार गोमुत।
वँज़ीरस निश वॉच यि खबर तु सु आव दवान तु दौरान यि तमाशु वुछनि। तँम्य येलि दीदव
वोवुर तु बादशाह सुंद ज़ामतुर सुहस प्यठ सवार वुछ, तस सपुज़ हॉरॉनी तु दोपुन अँम्य छु
कॉल्य कालय सुहन हुंद ब्योल गोलमुत। फोरन वोत बादशाहस निश। अर्ज़ कोरनस ज़ि
'जहां पनाह! तुहुंद दामाद कति करिहे दुहुक इन्तिज़ार। तँम्य छि रातो राथ सुह तहे तेग
कँर्यमुत्य तु ओखुरी सुहस छु मँहल खानुकि हेरिमि पासु सवार सपुदमुत।' यि बूज़िथ द्राव
बादशाह वँज़ीरस सुत्य पानु यि वुछनु बापथ तु वोवुर्य युथुय पानस कुन बादशाह तु वँज़ीर
यिवान वुछ, सु लोग अथु हावनि ह्यु। बादशाह वोथ वँज़ीरस यि क्याह छु वनान? सु
वोथुस, 'बादशाहम! यि छु वनान ज़ि बादशाह गछि पानु येमिस सुहस पँतिमि पासु गूल्य
लायुन।' बादशाहन अननुव अमी विज़ि बंदूक तु त्रोवुन सुहस लचि किन्य बंदूकु टास।

अमि पतु वातुनोवुख वोवुर महल खानस अंदर स्यठहुय शानु सान। कालुचनस येलि ज़नानि हुंदिस कुठिस अंदर च़ाव, तस निश वॅरुन अमि कथि हुंज़ बावथ ज़ि खर ज़ॉनिथ किथु पॉठ्य गव सु सुहस सवार।

वॅज़ीरस तु बादशाहस ब्यूठ पनुनि जायि ज़ि वोवुर छु च़कि बलवान। तिमन ओस हमसायि बादशाह अख बाज गुज़ार तु तॅम्य ओसुख केंच़व वॅरियव प्यठु बाज द्युन बंद कोरमुत। लिहाज़ा सूज़ुख अॅमिस बादशाहस पॉगाम ज़ि जंगु खॉतरु सपद तयार नतु कर पॅत्यम्यन वॅरियन हुंद बाज अदा। यपॉर्य वोनुख वोवरिस ज़ि तस छु हमसायि बादशाह सुंदिस शहरस प्यठ हमलु करनु बापथ गछुन। यि बूज़िथ गव तस पॅत्युम शाह पथ कुन तु ब्रुंहिम ब्रॉह कुन। कॉसिद आव सोज़नु तु तोरु वोतुख पॉगाम ज़ि जंग करनुय गव जान, बाज द्युन नु केंह ति। वोवुर गव ग्वतन ज़ि बनि हय तु बनि क्याह ? कालचनस वॅरुन अमि कथि हुंज़ बावथ ज़नानि निश। स्व वॅछुस ज़ि ग्वडनिचि लटि कोरनय ख्वदायन गॉबी मदद तु दोयिमि लटि ऑयी पनुनी बख्तावॉरी बुथि। अज़ ति गछि रोज़ुन्य सॉन्य शान। सु वोथुस प्रथ विज़ि किथु पॉठ्य गछि तॉज़्य बटुन कान स्योद। यि बूज़िथ गॅयि शाहज़ॉद्य क़ालु गरस अंदर रॉच़ हुंदिस अनि गॅटिस मंज़ तु हेच़नख बानु ह्यथ बानु यॅट तु बानु पॅज। खावंदस सुत्य कोरुन मश्खस ज़ि अज़ गव येमि शहरु मंज़ु च़लनुय जान युथ नु रुसवॉयी तुलनुय पेयि। हुपॉर्य वोत सरहदस प्यठ हमसायि बादशाह पनुन फोज ह्यथ तु तॅम्य द्युत तति ख्रुम खरगाह। दोयिमि दूह ओसुस पूर मुकाबलु खॉतरु नेरुन। बादशाह सुंदि तरफ़ आव वोवरिस फरमान ज़ि पगाह दुपहरस गछि सु हमसायि बादशाहस पसपा करनु खॉतरु साज़ो सामान तयार थावुन। यि बूज़िथ गव वोवुर बिचोर बे करार। अमा ज़नानि ओसनस च़लनुक इन्तिज़ाम मुकमल कोरमुत। राथ युथुय सपज़, बादशाह कोरि तुज क़ालु बाय लॉगिथ बानु पॅज तु वोवरिस दिच़न बानु यॅट। महल खानु मंज़ु नीरिथ युथुय यिम सरहदस निश वॉत्य, अति वुछिख हमसायि बादशाह सुंदन फोजन हुंद्य ख्रुम दूर दूर ताम। अनि गटु ऑस तीच़ाह ज़ि यिमन ओस नु बोज़नय यिवान ज़ि बुथि क्याह छु ? ख्वदायि सुंद कार ज़ि यिमन दूश्चुन्य गॅयि ख्रुमन हुंज़न रज़न मंज़ जंगु बंद तु आयि दूश्चय पथर वुरकावनु। येचि तु पजि अंदर यिम बानु ऑस्य, तिमन हुंदि सदाहु सुत्य वोथ हमसायि बादशाह सुंजि लशकरि मंज़ इनकलाब। तिमव ज़ोन ज़ि दुशमन बादशाहन मोर शब खून तु लॅग्य तिम बे तहाशा तलवार च़लावनि। तिमन युस अखाह ति बुथि ओस यिवान, तस गॅयि कतरान तु सुबह नेह फवलनस ताम थोव तिमव पनुनिसुय फोजस तहे तेग वॅरिथ। सुबह पूर पॉठ्य सपदुनस ताम ओस नु तमि फोजुक अख फोजी ति सॅही सलामत। वोवुर ओस यि सोरुय

तमाशु ति हस्बे हाल करारु सान वुछान तु ज़नानु ऑसुस ब्रोंह कनि पथर पेमुन्न । तस ओस रुमालि सुत्य वाव करान तु बुथ व्वथरावान । वॅज़ीर बा तदबीर द्राव सुबहॉय वुछनि ज़ि दुश्मन बादशाह सुंद कोताह फोज छु सरहदस प्यठ वोतमुत । येलि सु सरहदस प्यठ वॉतिथ हस्बे हाल पनुन्यव अँछव वुछान छु, सु गव दोरान दोरान बादशाहस निश तु अज़ कोरनस, 'जहां पनाह! तुहुंद पँहलवान दामाद कति प्रारिहे अज़ दुपहरस ताम । तँम्य छि कॉल्य कालय दुशमनु सुंदिस फोजस तने तनहा तुगियान थोवमुत वॅरिथ । अखतुय छस तुहुंज द्वखतर ति सुत्य ऑसमुन्न तु वुनि छु सरहदसुय प्यठ शायद तुहुंद इन्तिज़ार करान।' यि बूज़िथ द्राव बादशाह पनुन्य अँमीर वॅज़ीर ह्यथ तु वोत सरहदस प्यठ तथ जायि येति दुशमन फोज लरि लौर ओस प्योमुत । बादशाह आव तु प्यव वोवरिस परन । पनुन ताज तुलुन तु थोवनस कलस प्यठ । स्यठाह एहतिरामु सान आव दरबारस अंदर वातुनावनु तु बेहनोवुख तख्तस । यिथु पॉठ्य बन्योव वोवुर बादशाह ।

★ ★ ★

आसमानस तीर लायुन

वनन वोल छु वनान जि यि ओस बादशाहा अख। दूह अकि वोन तँम्य पनुनिस वँज़ीरस तु बादशाह बायि ब्रोंह कनि जि सु कुस आसि युस आसमानस तीर लायि? वँज़ीरन दोपुस, 'जहां पनाह! सु कुस हेकि ऑसिथ यस यूताह कमाल आसि?' यि बूज़िथ वोनस बादशाहन जि 'सु ह्यकु बुय ऑसिथ।' बादशाह बाय वँछ होर, 'आलम पनाह! त्वहि खोतु ति आसन काँत्याह यिम आसमानस तीर ह्यकन लाँयिथ।' बादशाहस गव पनुनि ज़नानि हुंद यि वनुन ना-गवार तु यि कथ सरु करनु बापथ द्राव अमि पतु अकि दूह पनुन योहय वँज़ीर ह्यथ पनुनि शहरु मंज़। मँज़िलन प्यठ मँज़िल तय करान वाँत्य अँकिस माँदानस अंदर। अति वुछिख पँहलवान जोराह अख अँक्य सुँदि खोतु यिम तीर नु, बँल्यकि बँड्य बँड्य पल ऑस्य आसमानस कुन लायान। बादशाहस तु वँज़ीरस गव यि वुछिथ अकि हालु ब्याख हाल। दोपुख जि तीर आसमान कुन लायुन छुनु त्यूताह मुश्किल, यूताह ज़न वज़नी पल लायिन्य छि। यिमन पहलवानन वोनुख पनुनि सफरस प्यठ नेरनुक मुदा तु तुलिख यिम ति पानस सुत्य। व्वन्य सम्यायि यिम च़ोर ज़ँन्य। वातान वातान वाँत्य अँकिस जायि। अति वुछुख ग़ूस्ता अख ज़ँमीन वायान। अमा दांदव बदलु ऑस्य तँम्य दांदु वानि सुह जोराह लाँग्यमुत्य तु मूरि बदलु ओसुन अथस क्यथ ज़्यूठ सर्फा अख ह्योतमुत। यि तमाशु वुछिथ सपुज़ यिमन च्वश्वन्य हॉरॉनी। पनुनि जायि वोनुख जि यि ग़ूस छु सानि खोतु सरस। अँमिस नज़दीख गँछिथ वोनुख तस पनुनि सफरस प्यठ नेरनुक वजह। दोपुहस जि च़ु ति पख असि सुत्य। तँम्य त्रॉव्य अलु बानि सुह यलु तु सर्फ द्युतुन होकुन दाँरिथ तु द्राव यिमन सुत्य। पकान पकान वाँत्य तिम अँकिस सेकि माँदानस अंदर। अति वुछिख ज़ँन्य जोराह सेकि रज़ु वुठान तु अमि कथि अँन्य यिमन सारिनुय ज़्यादय हॉरॉनी। दोपुहख जि तोह्य किथुपाँठ्य छिव सेकि रज़ु वुठान? तिम वँथिख, 'अँस्य कमि तँरीकृ छि सेकि रज़ु वुठान, यि छे साँन्य काँम, न जि तुहुंज़।' तुलिख यिम ति पानस सुत्य तु वाँत्य अँकिस जंगलस अंदर येति तिमन राथ लँज। ख्यनु चनुक सामानु ओस बादशाहन सुत्य तुलमुत तु पहलवानन दोपुन जि तोह्य वँरिव ख्यन चन तयार तु अँस्य यिमव तामथ यथ जंगलस ओरु योर नज़राह दिथ।

पहलवान ज़ु लँग्य च़ोट तयार करनि। युथुय तिमव च़ोट बेत्रि तयार वँर, तान्य गव अख ज़ज़ बुडाह अख पाँदु तु खोवरि अथु रँटिन दूश्वय पँहलवान तु छुनुन युहुंद

सौरुय ख्यनु चनुक सामानु ख्यथ। अमि पतु गव गॉब। पँहलवानन सपुज पनुनि जायि नदामत जि अँस्य अँस्य पँहलवान तु यि ओस अख बुडु शख्स। अँम्य हय थॉव्य अँस्य चरि बचन हुंघ पॉठ्य खोवरि अथु दबॉविथ, यीतिस कालस नियन सॉरुय चोट ख्यथ। अमि पतु लँग्य दुबारु चोट तयार करनि तु यि थोवुख राजुय। तामथ आव बादशाह, वँज़ीर, गूस तु सेकि रजु वुठन वॉल्य। दोयिमि दूह थॉविख रजु वुठन वॉल्य बतु तयार करनु बापथ तु बाकय द्रायि सॉलस। यिमव रजु वुठन वाल्यव येलि बतु तयार कोर, बुडु गव बेयि पॉदु तु लति सुत्य दबॉविन दूधय। यिथु पॉठ्य न्यून सौरुय बतु ख्यथ। अमि पतु गव बुडु गॉब। पनुनि जायि सपुजुख सख नदामत जि अँस्य हेक्य नु बुडस केँह ति पूशित्थ। अमा पहलवानन हुंघ पॉठ्य थोवुख यि राजुय। अमि पतु कोरुख दुबारु अनु कनु तयार तु वॉल्य यिम नफर। त्रेयिमि दूह रूद अति बादशाह, वँज़ीर तु गूस बतु तयार करनु बापथ। पहलवान ज़ तु सेकि रजु वुठन वॉल्य द्रायि जंगलस कुन। अमा अमि दूह आव नु बुडु केँह। बताह शताह ख्यथ त्रोव यिमव सारिवुय आराम तु फकत रूद बादशाह सुंद वँज़ीर बेदार। अथ जायि ओस अख कुल तु अँथ्य प्यठ ओस तोतु तु हॉर। हारि दोप तोतस, 'वनख ना तान्य दँलीलाह युथ वक्त टपॉविथ ह्यकुहव।' तोतु वोथुस 'न अज़ बोज़ु बु चाने ज़ेवि कथ।' हॉर वँछुस, 'अदु बोज़ अज़ म्याने ज़ेवि। तोतन वोनुस, 'अमा पोज़, कथ बोज़ुनॉव्यजि हस्बे हाल।'

हारि वोन तोतस कुन कथ शुरू करान जि 'वुन्यक्यस छि यथ कुलिस तल सथ जँन्य शॉगिथ। यिमव मंजु छु अख बादशाह, ब्याख छु बादशाह सुंद वँज़ीर, ज़ छि पहलवान, अख छु गूस तु ज़ जँन्य छि सेकि रजु वुठन वॉल्य। यिमन छु सारिनुय पनुनि जायि ज्ञाननुक छ्वख। बादशाह वनान तस बराबर छुनु काँह। ती सरु करनु खॉतरु ओस गरि द्रामुत तिव्याजि पनुनि आशनि ओसनस पोज़ वोनमुत। अमा ति ओसुस नागवार गोमुत। यिमन सारिनुय ओस यथ सफरस मंजु मारु गछुन अमा चोट आयख बुथि, येमि किन्य अज़ ताम बचेयि। यिमन छु पगाह व्वन्य वापस फेरुन तु अँकिस जायि वुछन यिम अख सर सब्ज बून्य। बादशाहस गछि तथ तल आराम करनुक शोक। मगर युथुय यिम तथ तल डाफ त्रावन, स्व नेरि छटि हुंदि ज़ोरु मूलव तु ब्रेक्यख पानस तल। कुस आसि युस यिमन वनि बोनि तल मतु त्रॉव्यतव डाफ।' तोतु वोथुस, 'अथ क्याह करव अँस्य, तु पख ब्रॉह कुन।' हारि वोनुस, 'य्वदवय यिम बोनि निश वॉतिथ स्योदुय पकन, बुथि वुछन यिम दँरियावु बँठिस प्यठ अख रंगु वँदुल। बादशाहस गछि तमि पेठ्य तरनुक शोक। अमा युथुय यिम से-मंजुस वातन, वँदुल पेयि फुटिथ तु यिम गछुन अकि अकि आबस। व्वं

कुस आसि सु युस यिमन वनि जि यिम गँछ्य नु तमि कँदलु तरुन्य।' तोतु वोथ हारि कुन, 'अगर तिथय पॉठ्य आस्यख वोतमुत, अँस्य क्याह करव तथ। च्चु पख ब्रोंह कुन।' हारि दोपुस, 'बादशाह संज शोछ येलि अहले शहरस वाति, तिम करन बादशाहस इस्तेकबाल तु महलस अंदर अचन विजि बनावनस अख डीड्य। बादशाह युथुय तमि तँल्य नेरि, स्व यियि यकबार वँसिथ तु मरि बादशाह तु वँजीर। अगर तति ति बचि, अँमिस गछि कांह सॉरिसुय रातस शांद दिथ रोजुन युथ नु यि मारु गछि। अमा कुस कँर्यज्यन युस यिमव टपव तलु बादशाहस बचावि?' तोतु वोथुस, 'आसि कांह तिथय पॉठ्य यिथु पॉठ्य बादशाह बायि बादशाहस वन्योव जि खबर कॉत्याह आसन चानि खोतु यिम आसमानस तीर लायन।' यि दँलील बोजनु पतु वोथ वँजी। तु तोतन तु हारि ति द्युत वुडव तु द्रायि कथ तान्य तर्फस कुन।

सुबहस वँथिथ द्राव यि ल्वकुट म्वकुट कॉफिलु वापस शहरस कुन। केंह कूह पँकिथ वुछुख अँकिस जायि सर सब्ज बून्याह तु बादशाहस गव अथ तल आराम करनुक शोक तु अमिच कँरुन बावथ। अमा वँजीरन कोरुस अर्ज, 'जहां पनाह! येलि अँस्य केंह दूह ब्रोंठ योर येमे वति द्रायि, तमि दूह क्याजि वुछ नु असि यि बून्य? जान गव स्योदुय नेरुन। ब्रोंह कुन वॉतिथ करव कुनि जायि आराम।' बेयि ति केंह मँजिलाह पँकिथ वुछ बादशाहन अँकिस दँरियावस प्यठ रंगु वँदलाह अख तु अमि पेठ्य तरनुक गन्योस खयाल तु वोनून वँजीरस। वँजीर वोथुस, 'आलम पनाह! असि यि ति केंछा पोंसा टूका ओस, ति सपुद सोरुय खर्च। चंदन अंदर छुनु किहिन्य। अगर असि यि वँदलु बनावन वोल वँदलु पेठ्य तरनुक टेक्स हेयि, असि मा सपदि नदामत? जान रोजि हुमि कानलि पेठ्य तरुन, येमि पेठ्य अँस्य ओरु तँर्य।' यिथु पॉठ्य द्युत नु वँजीरन बादशाहस अमि कँदलु पेठ्य तरनु। पनुनि शहरुकिस सरहदस अंदर युथुय बादशाहन कदम थोव, पहलवानन, सैकि रजु वुठन वाल्यन तु ग्रीस्तिस कोरुन वँखसथ। अहँदि यिनुक युथुय आम लूकन कनन गव, तिम द्रायि अँम्य सुंदि इस्तेकबालु खॉतरु तु सुती आयि राजु महलस अंदर अचन खॉतरु अख शानदार डीड्य ति बनावनु। अमा वँजीरन द्युत नु बादशाहस कांह नतु कांह बहानु कँरिथ अमि डेडि तँल्य नेरनु। बादशाह ओस यपॉर्य स्यठाह थोकमुत। सु युथुय राजु महलस अंदर च्राव, तस पेयि पलंगस प्यठ मस्त नँदर। अमा पोज, वँजीरन द्युत अँत्य शांद। अड राथाह युथुय सपुज, पेठ्य किन्य लँज क्वसु ताम बलायि तालव प्राटनि। वँजीरन कँर ह्यमत तु तँम्य तुज बादशाह संज तलवार तु रूद तालवस कुन वुछनि। रछ खंड गँछिथ द्राव अख शाहमार तु वँजीरन त्रोव तस दब तु कँर्यनस ज़ु अड। यि शाहमार

प्यव पथर तु वँज़ीरन त्रोवुस प्यठु परदु तु द्राव मँहलु मंज़ु। यपॉर्य ओस गाश यिनस ति तयार। वँज़ीर युथुय न्यबर द्राव, अति कोर रौंदु वॉल्य गिरफतार। वँज़ीरन दोपुस बु छुस येमि शहरुक वँज़ीर। रौंदु वॉल्य वोनुस, 'ठीख गव। अमा च़ु छुख सुबु प्यठु शाम ताम वँज़ीर तु दूहल्य गाशस मंज़ ह्यकख च़ु बादशाहस निश पँज्य पॉठ्य यिथ। मगर रॉच़ अंदर क्याह छे चॉन्य कॉम राज़ु महलस अंदर?' यिथु पॉठ्य आव दरबार लँगिथ वँज़ीर बादशाहस ब्रॉह कुन पेश करनु। तस प्यठ आव बादशाह मॉरिथ छुननुक इलज़ाम लगावनु। अमा पनुनि सफॉयी अंदर वोन वँज़ीरन ज़ि बादशाह सुंदिस पलंगस दँछिन्य किन्य यीतन वुछनु ज़ि तति क्या छु? हरकार आयि सोज़नु। तिमव ओन तोरु शाहमारु सुंद न्यस्फ अड तु वोनुनख वँज़ीरन सौरुय कुसु। तोतु तु हारि हुंद गुफ्तगू ति कोरुन बयान। तान्य च़ाव दरवाज़ु अख ज़ज़ बुडाह अख। सलामाह अर्ज़ कॅरिथ वोनुन बादशाहस ज़ि 'बादशाहम! पहलवान ज़ु तु सैकि रज़ु वुठन वॉल्य अनुनॉव्यतोख यूर्य तु तिमन हेयतव बयान पनुनि पनुनि बहोदरी तु छोह आसनुक।' फोरन आयि पहलवान तु सैकि रज़ु वुठन वॉल्य हॉज़िर दरबार करनु। बुडन कोर दुबारु बादशाहस अर्ज़ ज़ि 'यिमन पहलवानन, यिम कोह हिव्य पल ऑस्य असमानस कुन लायान, वँन्यतव ज़ि जंगलस अंदर युथुय त्वहि बतु तयार कॅरिथ ओसव, खोवरि अथु वॅक्य रचानव तु न्यूनव बतु ख्यथ, येमिच नु पतु यिमव त्वहि निश कांह बावथुय कॅर। यिमन रज़ु वुठन वाल्यव वँन्यतव ज़ि वुन्यक्यनस वुठ्यतन सैकि रज़ु यथ दरबारस मंज़।' यि बूज़िथ वोन पहलवानव बादशाहस। 'यि छु पज़र। असि ओस तुहँदि खॉतरु बतु तयार कोरमुत तु येम्य बुडन थॉव्य अँस्य दूश्वय अथु ख्वर पथर पॉविथ तु असि द्युतुन हॉविथ ज़ि सानि खोतु ति छि साह्यबे कमाल यथ दुनियाहस मंज़।' सैकि रज़ु वुठन वाल्यव वोनहस ज़ि 'च़कि छि अँस्य जॉद्यगर। असि कॅर तमि वख्तु तुहंज़ नज़र बंद, नतु छा सैकि रज़ु वुठनु यिवान।' अमि पतु वोथ बुडु तु वोनुन बादशाहस, 'जहांपनाह! युस ज़ंमीनदार त्वहि सुह अलबानि लॉगिथ वुछवन, सु छु यिमव पहलवानव खोतु बहोदुर। तु रूद व्वन्य वँज़ीर, यि अगर नय हारि तु तोतु संज़ कथ बोज़िहे, तोह्य कति ऑसिहिव ज़िंदु। त्वहि यि कॅछा पनुनि आशनि वन्योव ज़ि तुहँदि खोतु ति आसन लूख यिम आसमानस तीर लायन, पेयि त्वहि मानुन ज़ि तुहँदि खोतु तु पहलवानन हुंदि खोतु छु तुहंद वफादार वँज़ीर तु बडि पायि तुहंज़ मॅलिकॉन्य बा कमाल। यि वँनिथ गव बुडु दरबारु मंज़ु गॉब।



यस नु कांह तस खवदा

दपान अँकिस बादशाहस अँस्य सथ औलाद। शे अँस्य बद खसलत तु आवारु मगर काँसु कोट बोय ओसुख स्यठहुय गाटुल। पादशाहस ओस यि सख टोठ तु यि ओस मॉलिस दरबारस अंदर सुत्य सुत्य रोज़ान तु अँमीरन तु वँज़ीरन सुत्य ति ओस मशवरु करनस मंज़ शँरीक यिवान करनु। बाकय बाँय अँस्य अँमिस वुछिथ दज़ान तु अँछन मंज़ ओसुख योहय किटुर ह्यू बासान। अकि दूह वँर यिमव बायव च्वय जि राथ क्युत आस तु अँसस द्युतहस थोप। अँछन गँडहस पँट, बोहरि मंज़ लोदुख तु वातुनोवुख अँकिस वॉनाख जंगलस मंज़। अँकिस जायि बासेयख सुह ग्वफ तु अँथ्य मंज़ थोवुख अँकिस पलस सुत्य गंड वँरिथ तु पानु चँल्य। यि बिचोर छु राँत्य रातस वदान तु आह व ज़ॉरी करान। सुबहन येलि गाश फोल, अपॉर्य पोक अख बुज़र्गाह अख। अँमिस पेयि तस शाहज़ादस प्यठ नज़र तु वोत अँमिस निश। दोपुनस, 'गोबराह! व्वन्य यिनु वापस गछ्ख। यिम मारु वातल दिनय स्यठाह यिज़ाह।' यी वनान वनान मुचरुन अँमिस गंड तु द्राव सु कथ ताम तरफस कुन। अँम्य ति कोर सोंचाह समजाह पानस सुत्य तु दोपुन अगर बु वापस गरु गछु, बाँय तावन ज़द त्रावन नु शोठस जिंदु। लिहाज़ा लोग सु अँथ्य ग्वफि अंदर रोज़नि। अकि दूह राथ क्युत छु सु अँथ्य ग्वफि मंज़ शौंगिथ। अँम्य बूज़ ग्वफि नेबरु कनि सुह सुंद ग्रज़ुन। यि वोथ थोद तु रूद जल जल अँकिस पलस छायि तु सॉरिसुय रातस लोगुस बिचारस मरु मरु। पगाह सुबहन वँर अँम्य काँम तु डोलुन अख पल तु थोवुन ग्वफि छायि। येलि सु वापस अथ ग्वफि मंज़ च़ाव, अति वुछ अँम्य अथ पलस तल कनि ख्वड ह्यू, येमि मँज्य गाश ह्यू यिवान ओस। अँम्य दिन्न नज़र अथ तु अति वुछिन अख हेर ब्वन वसनु बापथ। यि गव हॉरान। सोंचान छु जि अमा यथ वॉरानस मंज़ वँम्य छे यि हेर बनाँवमुच्र तु कवु म्वखु छन बनाँवमुच्र। यिमु कथु सोंचान सोंचान लूसुस दूह। येलि अनि गटु सपुज़, अमि ख्वडु मंज़ु खोत यूताह गाश जि अथ ग्वफि अंदर सपुद दुहुक ह्यू अनमान। अँम्य दोप या बाँरी ताला, यि क्या सना सिर छु? दिलन वँडुस व्वठ तु याशाह वँरिथ वोथ अमे हेरि ब्वन। येलि ब्वन वोत, अति वुछुन नपु नपु करवुन कुठ। अथ वुछिन च्ववापॉर्य लाल जँरिथ। बेयि वुछुन कुठिस मंज़ बाग अँकिस पलंगस प्यठ अख हूरु पँरी शौंगिथ। अँम्य डुलुनॉव स्व पँरी, अमा पोज़, स्व सपुज़ नु बेदार। यि गव परेशान। आँखुर छु ओरु योर नज़र दिवान। अँकिस कूनस मंज़ वुछुन ठ्युपा अख। यि गव अथ नखु तु

अथ मंज वुछुन अख जानावार बंद। अथ ठिपिस तलु कनि ओस लबि प्यठ लीखिथ 'यि जानावार छु जॉदी जानावार। अगर कांह येमिस नाज मसवलि बेदार येछि करुन, तस छु यि जानावार मारुन। तीर कमान छु पंजरस तलु कनि। चोर तीर छि जानावारस लायिन्य। अगर यि मूद, तेलि गॅयि यि नाजल तु लाल जवॉहिर ति तॅस्य। अगर यि जानावार मूद नु, तेलि नेरि नु सु शख्स कयामतस ताम येमि कुठि मंजु। यि सेहरु छु तातॉरी जोदूगरन पनुनिस बे वफा माशोकस सजा दिनु बापथ बनोवमुत।'

यि अबारथ पॅरिथ कोर अॅम्य शाहजादन सॉचाह जि यथ वॉनाख जंगलस मंज कूत काल रोजि शोठ दर बदर। जान गव या तु यि नाजल जेनुन्य नतु जुव द्युन। यि सूचिथ ह्योतुन ख्वदायि सुंद नाव तु तुलुन तीर कमान अथस क्यथ। ग्वडन्युक तीर लोयुन, अमा सु ब्यूदुस नु जानावारस कॅह ति तु सु सपुद क्वठ्यन ताम कॅन्य। दोयुम तु त्रेयिम ति लोयुन तु तिम ति बीठ्य नु तस किहिन्य तु सपुद हॅटिस ताम कन्युव। व्वन्य रोजु अॅमिस सिर्फ नरि जु यलु। अॅम्य त्रॉव जिंदगी हुंज ब्रांथ। अॅछ कर्यन बंद तु ख्वदा ताला सुंद नाव ह्यथ तुलुन चूर्युम तु ऑखुरी तीर तु लोयुन, युस जानावारस सेदि स्योद ब्यूठ। अति ज़न गव बुन्युल ह्यु तु यि गव बे-ख्वद। येलि अॅमिस होश आव, अॅम्य वुछ यि नाज मसवल अॅमिस आबु कतराह कतराह ऑसस अंदर त्रावान। अॅम्य दिन्न पानस नज़र तु कॅन्य ऑस म्वकलेमुन्न। यि वोथ थोद तु छु अॅमिस हाल पृछान। अमि वोनुस, 'बु ऑसुस पॅरिस्तानु किस बादशाह सुंज कूर। तातॉर्य जोदूगाराह अख आव अकि दूह महल खानस मंज तु तस पेयि मे कुन नज़र। दिल तमबल्योस। मगर मे करनोव सु मुल्क बदर। तस गव सख हतख तु कॅरनस बु यथ चाहस मंज कौद। खबर कूत वक गॅछिथ गॅयस बु अज़ नॅदरि बेदार।' शाहजादु सपुद ख्वश यिछ रुन्न कॉम करनस प्यठ। अॅम्य तुज यि पानस सूत्य तु वॉत्य ग्वफि मंज। यि ऑस ब्वछि हॅन्न। शाहजादु गव परेशान। अॅम्य दोप व्वन्य क्याह बनि? नाज मसवलि शूक तु वॅछुस ख्यनु चनुच छनु कांह परेशॉनी। वुछ यथ वाजि कुन। अॅम्य द्युत अथ खुह। तान्य गव जिन अख पौदु। अॅम्य कॅर अॅमिस ख्यन चन अननुच फरमॉयिश। बुंजा गव तु सामानु गव ब्रॉह कुन वॉतिथ। यिमव कॅर राथाह ग्वफि मंज बसर। पगाह छुस शाहजादु वनान जि व्वन्य बनावव अॅस्य अख पॉर तु तॅथ्य मंज रोजव। तमि वोनुस च्चु रठ यि वॉज। च्यु छुख अॅज्यकि प्यठु येम्युक हकदार। यि च्चे ख्वश करी ति कर। मे ओस अथ वाजि अके फिरि कॅह मंगुन तु ति मॉगुमस। व्वन्य रूद नु सु मोकल म्यानि दॅस्य अथ तॉबीन। शाहजादन रॅट वॉज तु मंजु गॅयि कॅह दूह तु अथ जंगलस मंज गव ऑली शान मॅहल खानाह तयार, यथ अंदर हतु वादु नोकर तु चाकर,

दायि तु च्वंजु आसु तु वुछान वुछान बन्यव अति शहराह अख। मुखबिरव वातुनॉव पादशाहस ताम यि शैछ जि कुसताम दुशमन छु जंगलस मंज वोतमुत। पादशाह सपुद सख्त परेशान तु अँम्य अनुनॉव्य वँज़ीर नाद दिथ तु तिमन वोनून सौरुय हाल। वँज़ीरव कोर सौंचाह तु दोपहस, 'पादशाह सलामत! येमिस पादशाहस सासु वादु नोकर चाकर तु दायि च्वंजु सुत्य आसन, तस कोताह लशकर गछि आसुन। असि पजि जंग करनु खोतु तस सुत्य यारानु लागुन।' शाहज़ादस निश आव लालन तु जवॉहिरन हुंघ थाल ह्यथ कौंसिद सोज़नु। युथुय कौंसिद शाहज़ादस निश वोत, शाहज़ादन ओस रख बदलोवमुत। कौंसिदन वँर गुल्य गँडिथ सलामाह तु कोरुन अर्ज, 'हज़ूर, तुहुंद इकबाल रुज़िन बुलंद। कमय काल गव महल खानस मंज वॉच यि शैछ जि कुसताम इकबाल मंद छु यथ जंगलस मंज बसनि आमुत। सोन बादशाह छु त्वहि सुत्य दोस्ती कांछान। व्वन्य छु सु त्वहि साल यछान करुन।' शाहज़ादु वोथुस, 'यि छे स्यठाह रुच कथ। बु ति छुस बादशाह सुंद रुत कांछान। मे छि बादशाह सुंज दावत कबूल।'

केंह दूह गँयि, शाहज़ादु वोत शहरस नखु। बादशाह ओस शहरु न्यबर अँमिस इस्तेक्बालस आमुत। शाहज़ादस सुत्य अँस्य सासु वादु नोकर लाल तु जवॉहिरन हुंघ थाल ह्यथ। सौरी अँमीर, वँज़ीर तु बादशाह गँयि शशदर यि हाल वुछिथ। अँखुरस येलि सारिवुय सालाह वालाह ख्यव, बादशाह छु शाहज़ादस पृछान जि च्चु कमि शहरुक शाहज़ादु छुख तु यथ जंगलस मंज क्याजि वँरुथ बँस्ती। शाहज़ादु वोथुस, 'पादशाहम! बु गोस सुय बदनेँसीब शाहज़ादु युस पनुन्यव बायव वॉनाख जंगलस मंज मोतुकिस अँसस मंज त्राव्योव। मगर परवरदिगारन कोर मे पनुन सायि पानय तु बु रूदुस जिंदु।' अँम्य तुल बुथि प्यठ नकाब थोद तु पादशाहन जिंनोव पनुन सु टोठ नेचुव। यि वोथ थोद तु रोदुन नालुमति। मॉलिस लँज अँश दार तु नेचुव लोगुस ख्वरन फश दिनि। हुमव बदकार बायव तुज लँट तु च्वँल्य।

★ ★ ★

इस्मे आजम

दपान यि ओस अख ख्वदा दोस्ता अख। दूह राथ ओस फकत यादे ख्वदा करान तु वेंज़ीफ़ु ति ओस कमावान। येलि व्वं सॉरी वेंज़ीफ़ु कमाविथ फॉरिंग सपुद, तु गव दूह अकि पनुनिस मुरशिदस निश तु कोरुनस अर्ज़ जि 'या पीरु म्यानि! व्वन्य क्या हज़ रूद मे पर?' पीरन वोनुनस, 'ब-फज़्ले ख्वदा वोतुख स्यठाह कमालस। व्वन्य छुय फकत अकुय वेंज़ीफ़ु पर, तु सु गव इस्मे आजम।' तॉलिबन कोरुस अर्ज़, 'मुरशिदु म्यानि! तमिच ति व्वंर्यतोम हज़ ज्ञान।' मुरशिदन वोनुनस, 'मे नबा छनु पानस ति वुनि तमिच पॉर्यज्ञान तु च्चे क्या करय? व्वन्य गव यि जि बु वनय तम्युक पय। सु गव यि जि पगाह सुबहन गाश फवलवुनुय वॉतिजि फलॉन्य व्वंदलस प्यठ तु युस अखाह व्वंदलस ग्वडु तरि, तँस्य छु इस्मे आजमुक पय।' तॉलिब सपुद स्यठाह ख्वश तु रातस गँयस व्वटु सॉस्य नैदुर। मालु फवलवुन वोथ नैदरि तु वोत व्वंदलस प्यठ। स्यठाह आरज़ोय छुस दिलस तस नेकोकारस सूत्य मुलाकाथ करनस, युस व्वंदलस ग्वडन्यथ तरिहे। रछ खंड गँयि तु तान्य तोर व्वंदलस जिन्य मोज़ूरह अख नखस प्यठ जिन्य गेडाह ह्यथ। अँमिस गव अँदर्युम शाह अंदर तु नेबर्युम नेबर। पानस सूत्य लोग वनुनि, 'वुछ सॉ कुस शिकस लद तोर ग्वडन्यथ व्वंदलस। कुजा इस्मे आजम तु कति जिन्य मोज़ूर। न न यि सपदि नु ज़ांह ति मुमकिन। अगर अँमिस इस्मे आजम हॉसिल आसिहे, तेलि कति आसिहे यि अथ तावनस लँगिथ।' पानस सूत्य दोपुन पख सॉ पानु फेर वापस। अमा सूती प्योस पीरु सुंद वनुन च्यतस। सूंचुन जि पीरु सुंद दोप हैकि नु ज़ांह ति अपुज़ ऑसिथ। मगर येलि जिन्य मोज़ूरस कुन छु वुछान, ज़न छुस बासान तुलु कतरिस आब सपदान। वाराह सोंचाह दिथ कोरुन फॉसलु जि व्वलु अथ ति करव आजमॉयिशाह, हर्ज क्याह छु?

थोद वोथ तु द्राव जिन्य मोज़ूरस पतु पतु। जिन्य वोल वोत अँकिस कांदर वानस प्यठ तु त्रोवुन जिन्य बोर। तॉलिब छु दूरे यि तमाशु वुछान। च्यूह खंड गव तु कांदरस तु मोज़ूरस सपुद पानुवॉन्य बकवास। हु छुस आनु खंड ज़्यादु मंगान अमा कांदुर छुस नु योरु मानानुय। येलि मोज़ूरन योरु ज़्यादय पहान नाँगँर लॉजिस, कांदरस खँन्न च़ख तु व्वंडनस दज़वुनि जिन्य हरि हुंद टास। मोज़ूरन तुज दवान दवान रज़ तु द्राव गरु कुन। तॉलिब छु सोंचान, 'ख्वदाया पनाह! पीर छु डोलमुत। अँम्य वोन मे सूट्टुय अपुज़। अगर अँमिस ज़लच़ लदस इस्मे आजम विर्द आसिहे, यि हय करिहे कांदरस च़िहिस अंदर सुरु फ्यख।

व्वन्य क्याह करु बु ?' यि सूचिथ दोपुन व्वलु आजमॉयिश करनस क्याह हर्जु छु ? मे ति क्या रावि ? येलि जिन्य मोज़ूर सरयि न्यबर द्राव, तॉलिब वोत अँमिस नखु तु वोनुनस, 'पनुनि मुरशिदु सुंदि होक्मु मूजुब छुस बु च्चे निश आमुत। मे ति कर तु ज्ञान।' मोज़ूर वोथुस, 'कथ छय ज्ञान करुन्य ? दँलील क्याह छे ? ज्युन छा कुनि त्रावुन ?' 'न, न, ज्युन छुनु त्रावुन तु न दरकार। महज ख्वदायि सुंदि रजायि मूजुब छय च्चे इस्मे आजमुच मे ज्ञान करनावन्य।' जिन्य मोज़ूरन त्रोव ठाह ठाह करान असुन तु दोपुनस, 'इस्मे आजम ! न साँ तु च्चे मा छुख वति डोलमुत ? कति बु शिकस लद जिन्य मोज़ूर तु कुजा इस्मे आजम। अगर मे यूताह ताले आसिहे, बु आसुहा तेलि येथ्य तावनस लोगमुत। मे आसिहे तेलि सोरुय कँह गरि बिहिथ ब्रॉह कुन वातान। गछ पानस, खबर वँम्य छय वथ डॉजमुच।' यि वनान वनान द्राव जिन्य मोज़ूर ब्रॉह कुन।

दपान ऑकलस छु इशारय योत कॉफी आसान। अँमिस तोर सोरुय कँह फिकरि। अँमिस आयि वदन बाकु तु मोज़ूरस लोग ज़ारु पारु करनि। मगर सु न छु अवु करान तु न इनकार। यीतिस कालस वोत सू पनुन गरु। येलि आंगन बरु अंदर च़ाव, पथ कुन दिचुन नज़र, सु तॉलिब ति वुछुन पानस पतु कनि व्वदनी। बडि हटि वोथुस, 'हंगु तु मंगु रावरुथ पनुन दूह। शिकस लदन निश छा बाया लाल आसान।' यी वनान वनान कोरुन बर बंद तु च़ाव अंदर। तॉलिब छु अँथ्य आंगनस बरनि तल बिहिथ बराबर त्रन दूहन तिव्याजि अमे सातु लोगुन त्युथ रूद जि न्यबर द्युतुन नु नेरनु। त्रेयिमि दूह सुबहन कोरुन दोर तु जिन्य मोज़ूर द्राव रजाह ह्यथ पनुनि कामि प्यठ। येलि तँम्य आंगन बर मुच़रोव, अति वुछुन तॉलिब ब्वछि दादि अडु मोर गोमुत। अँमिस आव आर तु वोनुनस, 'हतो बाया, च्चे कथ वँरुथ पानस ब्वछि सुत्य ह्वगाड। च्चे क्याजि बीठुय नु म्यॉन्य कथ। येमिस शख्सस हबा इस्मे आजम विर्द आसि, ख्वदवय सु हुक्या हुथ कुलिस दपि जि व्वलु यूर्य, ज़रूर वाति कुल तस निश।' अँम्य सुंद ओस युतुय वनुन जि कुल्य ह्योत जिन्य मोज़ूरस कुन पकुन। अँमिस च़ँज क्रख नीरिथ, 'हता कुलि ! च्चे ना ओसुसय नु वनान। ख़ॉर सीर हबा गव फ़ाश।' अमि पतु वोनुन तॉलिबस, 'अदु बा व्वलु मे सुत्य।' यी वनान वनान च़ाव जिन्य मोज़ूर वापस अंदर तु पतु पतु ओसुस तॉलिब तु तस ओस दिल ग्वलाबुक्य पॉठ्य तमि विजि फ्वलान।



पाकदामन

दपान यि ओस अख बहलि पायि ख्वजाह। अँमिस अँस्य ख्वदा सॉबन ज़ु औलाद दित्यमुत्य। अख कूर तु ब्याख नेचुव। अकि दूह कोर ख्वजन ज़नानि सुत्य सफरस गछनुक फॉसलु। कूर तु नेचुव कोरुन मँहलुकिस ओखुन सॉबस हवालु। यिम बाँय बारुन्य अँस्य दूहस ओखन सॉबस निश परान तु कालचनस गरु यिवान। ख्वजस लँग्य अथ सफरस प्यठ वँरी वाद, तिक्क्याज़ि सफर ओस पैदल, गुर्यन या व्वखुल्य प्यवान करुन। ख्वजु छु तूर्य तु यपॉर्य सपज़ुस कूर बालिग। ओखन सॉबस प्यव अँमिस प्यठ टोर। अमा कूर ऑस गाटुज। अँमिस तोर फिकरि ओखनस छनु नेत साफ। तमि त्रोव ओखन सॉबस निश युन गछुन तु ओखन सॉब लोग तसुंदि बापथ फिज़ारु दुननि। अमा तमि कोरुस साफ इनकार। ओखन सॉबस लँज यि फिकिर जि यि गँछ नु मॉलिस यि हाल बावुन्य। तँम्य लीछ ख्वजस चिठ्य यथ मंज़ यि बावथ वँरनस जि चॉन्य कूर छे बे पर्दु गॉमुन्न। मे वँर वारियाह कूशिश यि गँछ नु चॉनिस दसतारस रब लदुन्य। अमा पोज़ स्व आयि नु बाज़। ख्वजन येलि चिठ्य पँर, तस चँज ख्वरव तलु मेन्न नीरिथ। नेचिविस ल्यूखुन जि कोठ छु सख ब्यमार। यलाज करनोवुम स्यटाह, अमा ठीख गोस नु केंह। व्वन्य छिम हँकीम वनान जि अथ दॉदिस गछि अनहँरिशि कोरि हुंज़ वॉलिंज आसुन्य। यि वॉलिंज कति बन्यम, सु छु बोड मसलु। व्वन्य कर च़ु कॉम, च़ु सोज़ मे पनुनि बेनि हुंज़ वॉलिंज वँडिथ।

दपान यि चिठ्य रँटिथ वातुनॉव बाँय स्व पनुन्य बेनि वॉनाख जंगलस मंज़ तु अति वोनुनस सोरुय हाल। वापस यिथ ल्यूखुन मॉलिस खत जि चॉन्य कूर द्रायि नु शर्मदार। स्व छे अज़ ब्रॉठ शे र्यथ गॉब गॉमुन्न। लिहाज़ा कति हेकि मे निश अनहँरिशि कोरि हुंज़ वॉलिंज बँनिथ। ख्वजस बीठ ओखन सॉबुन्य कथ। हुपॉर्य लँज स्व कूर अथ वॉनाख जंगलस मंज़ दूहा दूहा कडनि। दूहस छे जंगलस अंदर जंगली म्यवु तु गासु बेत्रि सॉबरावान तु रातस अँकिस ग्वफि अंदर रोज़ान।

दपान अकि दूह छि यि पलस प्यठ बिहिथ ताफ दिवान। अपॉर्य पोक बादशाहा अख, युस शिकारस ओस द्रामुत। तँम्य येलि आफताबुक अड हिश कूर अँकिस पलस प्यठ बिहिथ वुछ, सु गव शशद रुज़िथ। सु वोत अँमिस ब्रॉह कुन तु पृछुनस हाल चाल। दपान येलि पादशाहन तसुंद हाले बद बूज़, तस आव कोरि प्यठ रहम तु पकुनॉवुन पानस सुत्य महल खानस मंज़। केंह काल गव अदा तु पादशाहन कोर अँमिस सुत्य नेथुर।

अँमिस फीर्य दूह तु लँज राज ताज करनि। अकि दूह वुछ तमि पनुन्य मोज खाबस मंज। मन्नि नँदरि गँयि बेदार तु च़ोलुस ददरायि ओश नीरिथ। बादशाहन येलि अँमिस बुथिस प्यठ ओश वुछ, तँम्य पृछुनस वदनुक वजह। तमि वोनुनस, 'अज़ वारियाहि कौल्य वुछ मे मोज खाबस मंज। ब्यमार हिश बासेयम। दिलस छुम शर जि अकि लटि वुछहस बुथ।' बादशाहस च़ोल असुन नीरिथ तु वोनुनस जि 'यि क्याह बँड कथ छि? पगाह सुबहन दिमनय बु वँज़ीर तु लशकर सुत्य, माजि यितु बुथाह वुछिथ।' ऑखुर फोल गाश तु गव कारवान रवानु। शाम वख्त वोत। तिम वौत्य अँकिस जंगलस मंज। वथ ऑस नु व्वन्य बोज़नय यिवान। अवु म्वख्रु प्योख अथ शायि रातस करार करुन। दपान सु वँज़ीर ओस बद खसलत। अँमिस ऑस नु मँल्यकानि प्यठ नेत साफ। दपान येमि सातु नोकरन चाकरन नँदुर पेयि, वँज़ीर वोथ तु च़ाव तसुंदिस खुमस मंज। अमा अति वुछिन मँल्यकौन्य न्यमाज़ परान। अँम्य बद खसलत इनसानन वँर अँमिस थफ मगर मँल्यकौन्य ऑस स्यठाह गाटुज। अँमिस तँर वँज़ीरु सुंज यि शेताँनिल फिकरि। वोनुनस जि बु छस वुन्यक्यस न्यमाज़ परान। च़ु यि ब्रुंज खंड गँछिथ। वँज़ीर द्राव व्वट तुलान तुलान। शुक्रु कोरुन जि ग्यव खोत सेजि ऑंगजय। वँज़ीर युथुय न्यबर द्राव, मँल्यकौन्य वँछ थोद। मर्दु लिबास लोगुन तु खुमु मंजु नीरिथ सपुज अँकिस तेज गुरिस सवार तु च़ँज। वँज़ीर येलि वापस आव, अति वुछुन खुमु खौली। रँछ दर यिम नँदरि ऑस्य, वँरिन तलब तु कोरनख सख रीमाठ। मँल्यकानि हुंद लोग च़ववापोर तलाश, अमा स्व आयि नु कुनि ति अथि। व्वन्य छु वँज़ीर सौंचान जि बादशाहस क्या जवाब वनव? बेयि दूह येलि वँज़ीरन मँल्यकानि हुंदि रावनुच खबर बादशाहस वँन्य, सु गव खश्मनाख। बादशाहन द्युत होकुम जि वँज़ीर तु लशकरि हुंद सरदार गछि फहि युन दिनु, तु प्यादु गछुन कौद सपदुन्य। दरबारस मंज ओस अख गाटुल वँज़ीराह बिहिथ। यि वोथ बादशाहस कुन, 'जहां पनाह! ग्वडु गोछ यिमन पृछुन जि मँल्यकौन्य किथु वँन्य सपुज गौब। खबर यिम मा आसन बे ग्वनाह तु बे तकसीर मा गछुन मारु।' बादशाहन प्रुछ वँज़ीरस अम्युक वजह। वँज़ीरन गँड्य गुल्य तु वोनुन, 'हज़ूर! बु छुस तुंत्य वँरिस खसनस तयार, अमा बु हेकु नु स्व कथ वँनिथ।' बादशाह गव हौरतस। वँज़ीरस वोनुन, 'अगर च़ु यि दँलील वनख, बु करु चोन यि सज़ा माफ।' यि बूज़िथ कोरुस तँम्य अर्ज जि 'हज़ूर! येलि असि जंगलस मंज पडाव त्रोव, मँल्यकौन्य द्रायि न्यमाज़ परनुकि हीतु क्वलि कुन तु तति ओसुस पलस पँत्य किन्य कुस ताम यार ज़ीन साज वँरिथ गुर ह्यथ प्रारान। युथुय तस निश स्व वौच, तु च़ँज तँस्य सुत्य खबर कथ ताम तरफस कुन। युस पँहरुदार तस सुत्य ओस, सु कोरुन तँती डेर।

येलि वारियाहस कालस स्व वापस फीर नु, असि कोर तसुंद स्यठाह तलाश। छारान छारान वुछ रॉछ दर ति सॅर्य गोमुत। युस मरनस तयार ओस, जुव दिवान दिवान वोन तॅम्य यि कुसु।' बादशाहस गॅयि जिगरस चाख तिक्याज़ि तस ऑस स्व सख टॉठ। हुक्म द्युतुन जि वॅज़ीर तु बाकय नफर कॅर्यूक फोरन रिहा। मंज़ु गव वारियाह वक तु अकि दूह पेयि बादशाहस पनुन्य स्व आशेन्य याद तु लॅजिस अॅशिस दार। सौंचान सौंचान आस खयाल जि 'बु गछुहा रख बदलॉविथ तसुंद माल्युन। खबर तिमन मा आसि तसुंद कांह नेब। ख्वदा ज्ञानि यीन्न बे वफॉयी कॅरिथ ति क्याज़ि छनु मे तसुंज़ माय मशान?' पगाह सुबहन फोल गाश तु वोनून वॅज़ीरस च़ु कर बापॉर्य रख तु नेर मे स्यूत्य। अमि पतु वॉत्य पय कडान कडान ख्वजु सुंदिस शहरस मंज़ तु तस निश वॉतिथ कौरुख सासु वादन सोदा तु ऑखुर सपुद शाम। ख्वजु वोथ तिमन कुन जि 'माल छु स्यठाह। अज़ तुहुंद गछुन छु मुश्किल। लिहाज़ा कॅरिव म्यॉन्य दावथ कबूल। पगाह सुबहन फवलि गाश तु गॅछ्यतव वार कार पनुन शहर।' बापॉर्य सपुद्य ख्वश तु वॉत्य ख्वजु सुंद गरु। ख्वजन कोर अमि विज़ि ओखुन सॉबस ति साल। व्वन्य लॉज यिमव कथाह बाथाह करुन्य। यिमव प्रुछ ख्वजस जि जहां पनाहस कॅच औलाद छि? ख्वजन त्रोव व्वश तु वोनूनख, 'मे हज़ ऑस्य ज़ु औलाद, कूर तु गोबुर। नेचुव छुम हमसायि शहरस अंदर सोदा करनि गोमुत तु कूर ऑस, अमा रूज़ नु।' 'तॅमिस क्याह सपुद?' पादशाहन पृछुस। ख्वजन त्रोव ज़्यूठ व्वश तु वोनूनख, 'केंह नु हज़रत। तमि मंदछोव म्योन नाव। बैयि क्याह वनु बु? स्व छा अज़ येति? न हज़रत! स्व कमि बुथि यियि योर? बु हय छुनन स्व कत्ल कॅरिथ। व्वन्य दॅपिव जि ज्ञानु आलमाह छु अजीब। यि मोज छस फिज़ारु दुनान बुथ वुछनु बापथ।' यि बूज़िथ गव बादशाह सख गमगीन। राथ वॉन्न योर तु यिमव कोर शौंगनुक संज़। ख्वजन कोर अॅकिस नोकरस आलव तु वोनूनस, तला व्वलु यिमन पछ्यन दितु म्वठि फशाह। पादशाहन येलि ख्वश शॅकील नोकराह वुछ, सु सपुद स्यठहय ख्वश। दोपुन यि गछि कमि तान जान गरुक आसुन। खबर वॅम्य दूलाबन छु यथ हालस वातुनोवमुत? बादशाहस म्वठि फशाह फशाह दिवान प्रुछ बादशाहन तस नोकरस जि 'तलु सॉ लालु कांह कथाह वनख ना तान्य, युथ मे नैदर खसिहे।' सु वोथुस, 'क्याह कथ वनु? येलि व्वं तोह्य बोज़नुय छिव यछान, बूज़्यतव।' तु यिथु पॉठ्य लॉज नोकरन कथ वनुन्य तु ह्योतुन वनुन पनुनुय हाल। याने ख्वजि, ओखुन सॉब तु ज़ु बापॉर्य। किथु वॅन्य द्राव ख्वजि शुर्य ज़ु ओखन सॉबस हवालु कॅरिथ सफरस। ओखन सॉबन किथुवॅन्य यछाव तस ख्वजि कोरि हुंद दामन दाग दार करुन। ख्वजस चिठ्य सूज़िथ स्व पाक दामन कूर बदनाम करुन्य। पतु ख्वजि सुंद

कोरि हुंज वॉलिंज कडुनावनुच खॉहिश जॉहिर करुन। बॉय सुंज बेनि हुंदि खॉतरु
क्वरबॉनी तु अपुंज वनुन। बादशाह तॅमिस सुत्य जंगलु मंजु पानस सुत्य निथ नेथुर
करुन। अकि दूह स्व माल्युन यिनु बापथ जंगलस मंज पडाव त्रावन्य। वॅजीरु सुंज बद
चलनी तु तॅम्य सुंद चलुन। यि बूजिथ गव बादशाह बिसतरु मंजु थोद वॅथिथ तु वोनुनस,
‘ऐ जवानु! च्ने छुय पनुनिस टॉठ्य सुंद कसम, च्नु वन च्नु कुस छुख तु स्व कूर कति छि ?
अमि दॅलीलि हुंद पय कति छुय च्ने?’ नोकरन तुल बुथि प्यठु म्वखुट थोद तु युथुय
वॅजीरस तु ओखुन सॉबस तस कुन नजर पेयि, तिमन वॅछ थरु थरु। यि ऑस ख्वजि सुंज
कूर, नारु मंजुक पासु स्वन ह्यू। बादशाह वोथ तु रॅटुन पनुन्य छ्यनु गॉमुन्न मॅल्यकॉन्य
नालु मति। फोरन वॅडुन तलवार तु न्यून ओखन सॉबस तु वॅजीरस कलु थोद तुलिथ।
अदु क्याह। तिम गॅयि तोर तु अॅस्य आयि योर।

★ ★ ★

पीर बहोदरुन्य चोट

कथु गोर छु वनान जि अँकिस शहरस अंदर ओस कौड बापौर्या अख, अमा खांदार्यनि ओसुस अथु मुसठ तु व्वंदु साफ। स्व ऑसप्रथ वँरियु पांचन मनन ऑटिस ग्यव दार च्वचि बनाविथ गँरीबन गुरबातन तु मोहताजन अंदर बाँगरावान। अँथ्य ऑस्य पीर बहोदरुन्य चोट वनान। मगर बापौरिस ओस यि अख फजूल खरचाह बोज़नु यिवान, अवु किन्य ओस सु आशनि सुत्य विज़ि विज़ि त्रोंखु त्रोंख करान। अमा ज़नानु ऑसुस नु हरगिज़ ति यि नियाज़ बंद करुन माना। ऑखुरस येलि बार बार एतिराज़ करान गव, स्व बिचौर ति सपुज़ पीर बहोदरुन्य चोट न करनस प्यठ मजबूर। स्यठहुय कयोन खानुदारस ज़ारु पारु, मगर तस गँयि नु डुमटस ति रींज्य। अथ प्यठ ऑस स्व दुयान रोज़ान तु खानुदारस न्यसबत ति ओसुस नु दिल साफ।

अख दूहा बन्यव जि बापौर्य द्राव पनुन माल कुनु बापथ बेयिस शहरस कुन। नोकर चाकर तुलिन पानस सुत्य तु गरस अंदर थॉवन आशेन्य तु कूर। तिमन क्युत थोवुन अँकिस वँरियस सुम्ब ख्यनु चनुक सामानु तु बाकय इन्तिज़ाम वँरिथ। सफरस नेरनु पतु वोत यि कॉफिलु अँकिस जंगलस अंदर, येत्यथ यिमन राथ लँज। येलि रॉन्न हुंद पँत्युम पहर वोत, डाकूवन हुंज अख जमाथाह आयि तु न्यूख यि खॉफिलु लूटिथ। बापौर्य सुंद्य सॉरी नोकर चाकर छुनिख मॉरिथ तु बापौर्य थोवुख अँकिस कौद खानस मंज़ बंद वँरिथ। ज़ु पांछ वँरी गँछिथ चोल सु बापौर्य तमि कौद खानु मंज़ु तु च़लान च़लान वोत अँकिस समंदर बँठिस प्यठ। अति ओस तमि विज़ि अख समंदरी जहाज़ कथ ताम शहरस कुन नेरन वोल। बापौर्य ति लॉय जहाज़स अंदर व्वठ तु वारियाह सफराह वँडिथ वोत जहाज़ अँकिस बंदरगाहस प्यठ तु खोत बापौर्य बोठ तु च़ाव शहरस अंदर। तति लॉजिन यँड हुंदि खॉतरु मोज़ूर्य मशकत करुन्य। केंह वक गुज़रिथ रूद अँकिस लाल फरोशस निश नोकर। अख दूहा छु बनान जि लाल फरोशस निश आव शख्साह अख लाल कुननि। वानु वॉल्य वुछ लाल तु सु लोग सु परखावनि तु लॉगिन ग्राकस द्वार गँज़रुन्य। नोकर आव जल जल तु वँरुन लाल फरोशस अथस थफ तु दोपुनस, 'म्यानि आगु, यि लाल लवि नु किहिन्य तिक्याज़ि अथ छु आब।' लाल फरोश गव यि बूज़िथ हॉरान तु दोपुनस, 'चु ति ज़ानखु लाल वुछुन?' 'अगर ज़ानुहा नु, मे कति यियिहे बोज़नु?' लाल फरोशन कोर यि बूज़िथ अथ ज़ोद तु अमि मंज़ु द्राव आब। शामस छु नोकरस हाल पृछान जि चु कुस छुख

तु क्याह ओसुख करान। तँम्य वोनस वदान वदान पनुन सोरुय गुदरुन। बापॉरिस आव तस प्यठ आर तु दोपुनस, 'गम मु बर केँह। बु दिमय च़े माल तु दौलथ, च़ु गछ पनुन गरु तु लाग दुबारु बापार करुन। नफह मंज़ु आसतु मे ति पनुन हिसु वातुनावान।' केँह दूह गँछिथ द्युतनस माल तु युस जहाज़स लँदिथ सु गरु कुन द्राव।

हुपॉर्य ऑस तसंज़ ज़नानु तु कूर हालि हॉरान तु परेशान गॉमुत्य ज़ि अगर ह्य खानुदार गव तु कोत गव। तिमन यि केँछा ति ठेंठ मेंठ गरस अंदर ऑस, ति मँछुख यँड। ऑखुर येलि तिमन नमन हुंद मल ताम म्वकल्यव, स्व गँयि हमसायन अथु दारनस प्यठ मजबूर। अमा परेशान हॉली सुत्य ऑस रातस दूहस व्वश त्रावान तु रिवान। अख दूहा छु बनान यि गँयि हमसायि गरस त्योंगुल मंगनि, यिम तमि विज़ि च्वचि ऑस्य करान। ति वुछिथ प्यव तस पनुन नियाज़ याद। अँश दार लँजिस। गरु वॉच पानस सुत्य क्याहताम दॉयरान। कोरि सुत्य कोरुन मशवरु तु वोननस ज़ि 'म्यानि टॉठी, तलय अँस्य ति करुहाव पनुनिस पीर बहोदरुन्य च़ोट। द्यव ख्वदा सॉब सपदिहा असि प्यठ बेयि मेहरबान।' 'मोज! सु सामानु कति अनव?' वँछुस कूर। तमि दोपुस, 'गछ पादशाह सुंदिस तबेलस मंज़। तति कर खचरन तु कातरन हुंज़ ल्यद जमाह तु अन यूर्य।' यि बूज़िथ तुल तमि फोत तु वॉच बादशाह सुंदिस तबेलस मंज़ तु तति ओनुन लेदि फोताह। माजि कोर्यव लॉग्य तमि मंज़ु ज़ॉल्य दी दी मकायि पँल्य च़ारुन्य। व्वन्य ऑस तसंज़ कूर प्रथ दूह पादशाह गरि ल्यद अनान। अमि त्रायि सॉबरान वँर्य यिमव अख ज़ु सेर मकॉय जमह तु अकि दूह छँजुख तु नियख पिशिथ तु बनाविहेस केँह च्वचि। मोज वँछ वदान वदान तु त्राँवन यिमव मंज़ु अख च़ोटाह जानावारन तु अखाह खेयख माजि कोर्यव तु तारु थाव्यख मॉलिस किचु। मंज़ु गँयि केँह दूह तु बापॉर्य प्यव वॉतिथ। मोजूर लँग्य तसुंद माल सारनि। गाम आव मुबारकबाद दिनि तु बापॉर्य छु ब्रांदु प्यठय पनुन्यन लबन तु दरवाज़न मीठ्य करान। ऑखुर आयि अँमिस हक हमसायि तु छिस यिमन माजि कोर्यन हुंद गुदरुन बावान। बापॉर्य छु यिहुंद हाल बूज़िथ अँछव किन्य खून हारान। ऑखुर लॉज बापॉर्य पनुन्य दँलील वनुन्य तु वनान वनान वोत यि समंदरस मंज़ तु वोननख ज़ि 'त्रन दूहन रुद समंदरस वावु तूफान। काँह बचन बाथ रुज़ नु। त्रेयिमि दूह गव वाव ज़्यायदु तेज़। बु गोस परेशॉनी सुत्य बे ख्वद। अँथ्य मंज़ छुस बु खाब वुछान ज़ि म्यॉन्य गर वाजेन्य छि पीर बहोदरुन्य च़ोट बॉगरावान तु वदान वदान जानावारन त्रावान। स्व च़ोट ख्यथ गँय जानावार यिवान तु ऑस्य तथ जहाज़स लमान। बु येलि बेदार गोस, तूफान ओस म्वकल्योमुत तु जहाज़ु ति ओस बंदरगाहस लोगमुत।' यि बूज़िथ पेयि तसंज़ि आशनि तिमु च्वचि याद। स्व वँछ जल

जल थोद तु खानुदारस हावनु म्वखु तमि युथुय पलव पॅतिस थोद तुल, अति आसु च्वचि
त्रे गाह त्रावान तु अथस क्यथ ह्यनु विज़ि आसु तिमु स्वनु संजु बनेमचु।

★ ★ ★

नूराँनी कबर

वनन वोल छु वनान जि सोदागरन हुंद अख काँफिलाह ओस अकि सेकि सहरावु मँज्य पकान। ग्वनहुनि कारु डँज अथ काँफिलस वथ तु पकान पकान लँगिख दूह ति वारियाह, येमि किन्य कांह बँस्ती नज़र आयख नु। प्यठु आँसुख अथ सेकि सहरावस अंदर पेठ्य किन्य तापु क्राय तु त्रेशि हुंद युस ज़खीरु सृत्य ओसुख, सु ति वोतुख अंद, येमि किन्य काँफिलु अडु मोर सपुद। अमा ह्यमथ हॉरुख नु केंह। ब्रोंह कुन रुद यि काँफिलु तशनय पडुर पडुर दिवान तु अकि दूह रात क्युत आव अथ काँफिलस अँकिस बालु दामनस नखु अख कब्रिस्तान नज़रि। यि वुछिथ सपज़ुख सथ हिश। लँग्य तोशानि जि यि गछि अति बँस्ती आसुन्य। अथ कब्रिस्तानस नज़दीख त्रोवुख पडाव तु केंह नफर लँग्य त्रेश तलाश करनि। पय कडान कडान द्रायि यिम दूर ताम। अमा रॉच हुंदिस अनि गँटिस मंज आख नु केंह ति बोज़नु। तिमव कोर खयाल जि गाश फोलिथुय गव अमि कामि बापथ दुबारु नेरुन। तिक्याजि अगर राथ क्युत असि ति वथ डलि, तेलि छुनु साँनिस मारु गछनस कांह शखुय। अतु किन्य फीर्य पोत तु वॉत्य काँफिलस निश। अति वुछिख केंचन नफरन हुंज हालत तशनगी सबबु अबतर। ख्वदायस कुन सपुद्य दस्त-ब-दुआ जि 'बारे इल्लाहा! बँस्ती नखु वॉतिथ ति छा कोठन त्रेशि दादि मरुन।'

यि हालत वुछिथ लोग काँफिलुक सरदार वदनि तु ओश हारनि। यपॉर्य ज़न गँयि राथ ति ज़ेठान। मीर कारवान सपुद मुज़तरब ति क्याजि केंचन नफरन हुंद हाल ओस त्रेशि दादि सख खराब गोमुत। सु सपुद फोरन ख्वदायस कुन सर-ब-सजूद। येलि सु अमि कामि निश फॉरिग सपुद, सु गव कब्रिस्तानस प्यठ तु तमाम म्वरदन हुंदि नाव लोग फातेह परनि। अति वुछ तँम्य अख कब्र जान पॉठ्य लिविथ तु डुविथ। सुती वुछनस प्यूराह ति रुत खॉलिथ। कब्रि वुछुन सँखी हातम नाव लीखिथ तु यि वुछिथ सपुद अथ कब्रि कुन मुखॉतिब जि 'ऐ नेक बख्त इनसानु! अगर अज़ जिंदु आसुहँख, म्योन यि काँफिलु मा मरिहे येति त्रेशि त्रेशि करान। च़ु हय जिंदु आसुहँख, ज़रूर आसिही यथ सेकि सहरावस अंदर मुसाँफिरन हुंदि खॉतरु त्रेशि हुंद कांह नतु कांह बंदोबस्त कोरमुत।' यी वनान वनान आव अँमिस गॉयलु तु सपुब बे ख्वद। दपान छि जि मंजु गव केंह कालाह, तु नफर तारु वुछिन त्रेन वूटन प्यठ त्रेश ह्यथ पकान। यि वुछिथ आव अथ काँफिलस अन्यन अँछन गाश। येलि काँफिलु वॉत्य कथु करनस लायक सपुद्य, कारवानुक सरदार

लोग तिमन नफरन वनुनि जि तोह्य वॅन्यतव जि 'तोह्य कम छिवु तु तोह्य वॅम्य फिरशु
सिफत हातफीयन वातुनोववु सानि त्रेशि दाद्युक हाल।' यिमु मंजु वोथुस अख नफर जि 'बु
छुस हातमु सुंद नेचुव। बु येलि कालु शौगुस, मे वुछ मोल खाबस अंदर मे वनान जि व्वथ
जल जल तु कब्रिस्तानस निश पडाव करन वाल्यन वातुनाव त्रेश। मे द्युत यि वुछिथ गोश।
अमा सु रूदुम द्वयि त्रैयि लटि यी वनान जि जल जल वातुनाव त्रेश मुसॉफिरन। येलि सु मे
त्रैयमि लटि वुछ, तस ओस सख जलाल। बु गोस मच्चि नैदरि वॅथिथ तु यिम नोकर तुलिम
सुत्य तु वोतुस यि त्रेश तुहँदि बापथ ह्यथ। येति वुछिम सॉरी मुसॉफिर त्रेशि दादि बे हाल
गॉमुत्य।' मीर कारवान वोथ थोद तु रँटन हातम ताई संजु नूरॉनी कब्र नालुमति तु दोपुन,
'पॅज्य किन्य छु सु हातम ओसमुत तु मॅरिथ ति छुस सखावत करनुक पूर खयाल। हरगाह
सु त्रे खाबस अंदर वनि ही नु कॉफिलुकि त्रेशि दाद्युक हाल, सुबह सपदनस तामथ आसि
हे कॉफिलुक कॉफिलय हकबल वोतमुत।'

★ ★ ★

नेति बढ

दपान छि जि अँकिस गामस मंज अँस्य बारुन्य जोराह। अँकिस ओस नाव सुलु तु बेयिस बुलु। सुलु ओस मेहनत मशकत कँरिथ पनुन हाख बतु ख्यवान तु बुलु ओस यि वुछिथ हसदुकि नारु दजान। कथि कथि प्यठ ओस सु बाँयिस सुलस सुत्य जँप्य मिलवान। अमा सुलुन वरताव ओस नु नरमी तु छवपि वरॉय किहिन्य ति। बँल्यकि ओसुस नँसीहत करान तु शरारथ होमरावान। दूहा अख बन्योव तु सुलन तुल्य पनुन्य नेचिव्य जु सुत्य तु वॉत्य अँकिस जंगलस अंदर ज्युन चटनि। नेचिव्य आँसिस ज्ञानन मानन वॉल्य तु तसंजंन कथन अँस्य रँछ करान। ज्युन चटनस मंज लोगुख वख्त चौरुय पहान, येमि किन्य यिम कालय गरु हेक्य नु वॉतिथ तु प्योख अँकिस माँदानस मंज रातस रोजुन। त्रेश्वय माँल्य पँथुर बीठ्य अँकिस कुलिस तल तु हेचुख लर त्रावन्य। कुलिस प्यठ ओस स्वदु ब्रोर तु ब्वदु ब्रोर। स्वदु वोथ ब्वदस जि 'बोजुनाव साँ कथाह।' सु वोथुस, 'चै छुनय कथनुय कुन होवमुत। वुछान छुखु यथ कुलिस तल कम छि बिहिथ? यिम अगर यथ कुलिस तल खनन, यिमन नेरि अति खजानु, अदु शिकस विकस चल्यख।' यिमन हुंद ओस युतुय वनुन जि यिम वँथ्य याशाह कँरिथ तु लोगुख खनुन। पहर डवड पहर गँछिथ येलि नु अति केह द्राख, माँल्य दोपुनख, 'तलुसाँ योर कुन त्राँव्य तव यि बेल।' तँम्य युथुय अकुय पोतुर तुल, खजानुक ठानु आव होर लायनु तु यिम लँग्य अशरँफियि वुछिथ त्रपनि।

यपॉर्य दिच क्वकरन बांग। यिमव ह्योक अमि मंजु न्यस्फ हिसय तुलिथ तु दोपुख पगाह यिमव बेयि तु बाकय हिसु ति पकनावव। गरु वॉतिथ लँज यिहँदिस गरस दिवय तु ग्वडन्यथुय कोरुख काहनाँव्य सुंद नियाज। हक हमसायि ख्यावनाँविख यड बँरिथ नाटु बताह। बुलु छु यि वुछिथ अँदरी दजान। अमा पय छु कडान जि बाँयिस सुलस कति आयि यिम द्यार तालव प्रॉटिथ? तामथ वँछुस आशेन्य जि 'काक ओस राथ काक देदि वनान जि फलॉन्य जंगलस अंदर छु बेयि गछुन तु तति छु सु अमानथ बेयि अनुन।' यि बूजिथ वोथुस बुलु, 'यिम प्रॉर्य तन पगाह ताम, योछ हय ख्वदायन, अँज्य सँर्य शामय छुनोन अँस्य अँनिथ।' यि वननु पतु द्राव बुलु पनुन्य गुंडु नेचिव्य तारु ह्यथ जंगलस कुन। तति लँग्य जॉल्य दिनि जि यि कुस कुल छु ओसमुत येति सुलुन्यन गॉबी सबब बन्याव। आँखुर ह्यवान दिवान लोबुख सु कुल। अथ वुछुख पँज्य किन्य साँद्रवार म्यँच खँनिथ तु लँग्य खनुनि। युथुय खजानस ठानु तुलुख, कारे क्वदरत जि अमि मंजु द्रायि गनु तुलरि। यिम

छिनु ब्रलनस ति वातान। सुलस प्यठ तु तसुंघन शुर्यन प्यठ खोतुख सख शरारथ जि तिमव तावन ज़दव छु दर अस्ल साने बुछनु खॉतरु यथ खॉली द्यगलिस मंज गनु तुलरि थाविमचु। मशवरु कोरुख अंस्य ति कति छडोन। इन्तिकाम ह्यनु वरॉय कति रोज़व पथ, स्व गॉयि बुज़दिली।

यि सूचिथ आयि दुबारु अथ कुलिस तल तु वारु वारु कोडुख यि द्यगुल ज़मीनि मंजु तु बरिहस यिमु तुलरि वारु वारु ऊर्य। यपॉर्य लोग सुलस तु तसुंघन नेचिव्यन पय जि बुलु छु तिहँदिस अमानतस खयानत करनि द्रामुत। सुलस मतेयि शुर्य जि 'चे खँजोवुत वक्त, नतु कति वातिहे सु तोर, तु तँम्य आसि सु न्यस्फ हिंसु ओनमुत।' मोल वोथुख जि 'तोह्य हबा छिवु पेच तॉबी करान। त्वहि क्याजि नु फिकरि तरान जि तौत ख्यनु सूत्य छु ग्यग दज़ान। आसि दयन सानि कुसमतु थोवमुत, कांछा अगर ख्वनुवटु ख्वड ति खनि, तोति अंघस नु केंह। व इला सानि कुसमतु तितुय ओस यूताह असि ओन, तथ प्यठ ति गछि दयि सुंद शुकर करुन।' यि वँनिथ दोपुनख वँथिव तु त्रॉविव लर तिक्क्याजि राथ वॉच योर।

यिमन आसिहे नँदर खँचमुच जि बुलुन्य मॉल्य पँथुर पेयि जंगलु मंजु वापस यिथ। युथुय तिम गरु वॉत्य, याशाह वँरिथ द्युतुख यि गनु तुलरि द्यगुल सुलुन्यन दारि किन्य अंदर बँरिथ, युथ गनु तुलरि बुछिथ निनख। पानु चायि वँल्य वँल्य अंदर तु दितुख दुबु दरिथ। सुबुह वक्तु युथुय सुलु तु तसुंघ शुर्य बेदार सपुद्य, अति छि कुठिस अंदर अशरँफियय अशरँफियि वुछान तु अँथ्य सूत्य सु खजानु द्यगुल ति, युस तिमव बेयि दूह अनुन मशखस ओस कोरमुत। यि वुछिथ वोथुख मोल जि 'वुछान छिवा जि हकदारस निश किथु पॉठ्य छु हक वातान।' आफताबु खँसिथ चाव बुलु ओर वुछनि जि तुलर्यव क्याह आसि कोरमुत। अति येलि नु केंह वुछुन, बँल्यकि वुछन यिमन ब्वकु फवलान, दोपुनख जि 'मे हबा छि दर अस्ल नेति बद। तथ द्यगलिस अंदर अन्यम तोरु त्वहि बुछनु खॉतरु गनु तुलरि। अमा त्वहि छुनु तिमव किहिन् ति कोरमुत। यि बूजिथ वोथुस बोय सुलु जि 'हयो अन्याह! तिमु हा आसय अशरँफियि।' यि बूजिथ गव बुलस तमुन्य बुथ तु लोग पनुनिस कुसमतस वदनि।

★ ★ ★

खर टांग

वनन वोल वनान जि पथ कालि ओस बादशाहा अख। स्यठहय ख्वश शँकील, नेक अतवार तु ख्वश तँबियत। पनुनि कुस्मतु ऑसुस ज़नानु ति रुन्न, शूबिदार, गाटुज तु ख्वश सूरत बागि आमुन्न। शुराह मुराह ओसुख नु वुनि कांह ति ज़ामुत। दूह अकि ऑस्य दूश्वय बॉन्न अड राथ गँछिथ ति अख अँकिस सुत्य टसन च़टान तु ख्वश गफ़ करान। अँथ्य मंज़ बूज़ यिमव नेबुर्य किन्य क्याहतान्य टांग हिश। बादशाहन पुछ बादशाह बायि, 'टांग कसंज़ गछि आसुन्य?' स्व वँछुस खर संज़ टांग। बादशाह वोथुस, 'न यि ऑस सीमनि हुंज़ टांग।' बादशाह बायि कोर नु तसंज़ि कथि सुत्य यितिफाक। बादशाह ति रूदुस वनान यि ऑस सीमनि टांगुय। अख अँकिस सुत्य इख़्तिलाफ़ करनु सबब लोग ऑखुरकार यिमन बॉन्न दून यथ कथि प्यठ शर्त जि अगर यि खर टांग सॉबित सपदि, बादशाहस पेयि तख़्तु निशि दस्त बर्दार सपदुन। वँ इला सीमनि टांग ऑस, तेलि यियि बादशाह बायि खत दिनु। दूश्वय सपद्य अथ कथि प्यठ रज़ामंद। राथ अँस वुनि पूर पॉठ्य अदा सपदनय। बादशाह बाय वँछ पलंगु प्यठ थोद तु द्रायि महलु खानु मंज़ न्यबर। अति वुछुन आंगनस अंदर रोंद दिनु वोल। पृछुनस, 'अड राथ गँछिथ य्वसु टांग गँयि, स्व कस पोश्य संज़ ऑस?' रोंदु वोल वोथुस दर जवाब, 'बादशाह बॉय! स्व ऑस खर संज़ टांग।' बादशाह बाय य्वदवय यि बूज़िथ शाद सपुज़, अमा रोंदु वॉलिस वोनुन, 'हरगाह च़े पगाह पादशाह पृछी टांग वँहँज़ ऑस, च़ु वँन्यज़्यस स्व ऑस सीमनि हुंज़।' यि अपुज़ वननु खॉतरु दित्य बादशाह बायि अँमिस रोंदु वॉलिस ज़ु हथ दीनार। अमि पतु च़ायि बेयि महलु खानस अंदर तु त्रॉवन दुबार नैदर।

दोयिमि दूह येलि दरबार लोग, बादशाहन अनुनोव रोंदु वोल। पृछुनस अड राथ सपदनय य्वसु टांग मँहलु खानु नेबुर्य किन्य सपुज़, स्व वँहँज़ ऑस? रोंदु वोल वोथुस, 'जहां पनाह! जान बख़्शी गछ्यम करुन्य, स्व ऑस सीमनि हुंज़ टांग।' रोंदु वॉल्य सुंद बयान बूज़िथ सपुद बादशाह स्यठहय शाद। तँम्य करुनोव रोंदु दिनु वॉल्य सुंद बयान कलमबंद तु अमे आनु आव शर्तु मुतॉबिक बादशाह बायि खत दिथ मँहलु खानु मंज़ु नेरनुक होकुम दिनु। बादशाह बाय द्रायि केंह वननु वरॉय बुथिस खाम मँलिथ पादशॉही मँहलु मंज़ु। अति क्या रोज़िहे? बेयिस शहरस मंज़ वॉतिथ लँज अँकिस बेछवुन्य सुंद पॉठ्य लूठ दॉरिथ बेछनि। यि केंछा दूहस बीछिथ ओसुस बनान, तमि सुत्य ऑस पनुन

नपस पालान। अमा पनुन पान थोवुन नापाक नज़रव निशि पोशि टूरिक्य पॉठ्य बचॉविथ
तु नवजवान ऑसिथ ति ऑस खाम मलनु सुत्य बुडु ज़नानु बासान।

दूहा दूहा गॅछिथ वॉत्र अँथ्य व्वपर शहरस मंज़ स्व सियाह सर अँकिस बुजि माजि
निश। तस ति ओस नु पथ कांह न ब्रॉह। स्व असमानु पेमुन्न ति ऑस दूहस बीछिथ तँछिथ
पनुन ओज़कु कमावान तु शामस ऑस पनुनि छेयि पहरि मंज़ बे गम लर त्रावान। नवजवान
सियाह सर वुछिथ वँछुस स्व बुडु मॉज, 'कूरी, यि क्याह छुय बँनिथ आमुत? यथ फट
फट करवुनि जवॉनी मंज़ क्याज़ि छख अथु दारनस प्यठ वॉत्रमुन्न?' तमि द्युतुस तोरु
जवाब, 'खानुदारा ओसुम फलॉन्य शहरुक बादशाह। शर्त हारनस प्यठ द्युतनम खत तु
छुनिनस महलु खानु मंज़ु कँडिथ।' अमि पतु वोनुनस पनुन सौरुय हाल अहवाल।
'मालिन्य मरुक छुम नु कांह अखाह युस नाव हेयिहेम। च़ अगर मुनॉसिब ज़ानख, मे ति
दिख पानस निश छपन जाय। हुपॉर्य छस ग्वबि ख्वर।' बुजि माजि आव अँम्यसुंदिस
हालस प्यठ रहम। दोपुनस, 'च़े ति छुय नु मा सिवाय ख्वदा कांह। व्वलु माजि कोर्यन यि
कँछा दूहस बनि, ति ख्यमव यिकुवट।' यि वँछुस योरु, 'न च़ आस अँज्यकि प्यठु येथ्य
पहरि अंदर ब्यहान तु बु आसु लूठ ह्यथ गछान।' दूहस ऑस यि सियाह सर गर पतु गरु
गँछिथ सेर पांजुव सतुसोस सौबरॉविथ अनान तु शामस आसु दानस दुह त्रॉविथ वनु ज्वनु
करान।

दूह दूह गव गुज़रान। बादशाह बाय लँज ग्वबनि। यि वुछिथ वोनुनस बुजि माजि,
'कूरी! च़े छुय यि सिनुक वक। अँज्यकि मु नेर ओरु योर। यिमन कँचन दूहन नेरु बु
पानय।' ऑखुर वोत सु ति दूह येलि अँमिस आफताबु अड हू नेचुव बुजि माजि हुंज़ि
अँथ्य पहरि मंज़ ज़ाव, युस ऑन तु गॉन मॉल्य सुंज़ि शक्लि तु अक्लि ओस। त्राय ग्राय ति
ऑसुस बिलकुल शाहज़ादन हुंज़ हिश। यिमव माजि कोर्यव रोछ यि नव ज़ाद मायि तु लोलु
सान। पांच़ु वुहुर युथुय वोत, यछि तु पछि आव च़ाटुहाल त्रावनु। कमसुय कालस मंज़ द्राव
पनुन्यन च़ाटुबाजन लेखनस परनस मंज़ ब्रॉह। व्वथुनस बेहनस, कथ बाथ करनस तु गाटु
जार वरतावनस मंज़ ति गीवुन वुछान वुछान थज़र। अमा दूह अकि सपज़ुस च़ाटुहालस
मंज़ अँकिस च़ाटु बॉजिस सुत्य कथ ताम कथि प्यठ हर, यथ प्यठ सु च़ाटु बोज वोथुस,
'च़ हबा छुख च़कि हरामुक। न छुय मॉल्य सुंद पय तु न पनुनि प्यँड पुरनि हुंद।' यि
बूज़िथ गव सु सख दिल ओज़ुरद। गरु वॉतिथ ब्यूठ कुठ त्रोपरिथ। न छु कांह चीज़ ख्योन
मानान तु न चोन। मोज वँछुस, 'च़े क्योहो छुय अज़ बुथ गोब्योमुत हू? काँसि सुत्य मा
छय च़ुवमुन्न?' नेचुव वोथुस, 'मोजी! बु ख्यमु तेलि बतु येलि च़ वनख बु कुहुंद छुस, तस

क्याह छु नाव तु कति छु रोजान ?' माजि दोपुस, 'गोबराह! च्चे क्या यिमन कथन सुत्य ?
व्वथ खे बत्तु तु त्राव यि मन्नर करुन।' अमा सु रूदुस तोरु वनान, 'न अज गछु बु यि कथ
बोजुन जि म्योन मोल कुस छु, क्याह छु करान तु कति छुस बूद बाश ?' माजि येलि
फिकरि तोरुस अँमिस छु दर अस्ल कँम्यताम मॉलिस मुतलिक क्याहताम तेशु सान
वोनमुत, स्व वँछुस, 'गोबरा! चोन मोल ओस मोजूर्य मशकथ करान। जँमीन ज़िराथाह ति
ओस नु कँह। यि कँछा दूहस कमाँविथ ओस अनान, ति आँस्य यँड मथान। अकि दूह गव
हमसायि शहरस मंज ओजकृ छांडनि। अदु तनु प्यठु द्राव नु तसुंद कांह नेबाह जि तस
क्याह आव पेश तु कथ दीशस मंज छु सानि हालु निशि बे खबर प्यथ।'

दाह पंदाह वँरी गुजरिथ सपुद अँमिस सियाह सरि हुंद लँडकृ बालिग। बुजि माजि
सुत्य सलाह मशवरु कँरिथ द्रायि यिम माजि पोथुर तु बुडु मोज यि शहर त्राँविथ बादशाह
बायि हुँदिस शहरस कुन। तोत वॉतिथ बनाँवुख चकृ पँहरा अख तु लँग्य तँथ्य अंदर
लसनि बसनि। दूह अकि वोन माजि पनुनिस तस अँछ गाशस, 'गोबराह! च्चे पज़ी कँह नतु
कँह तछि बछि करुन। यिथु पॉठ्य नरि जंगु वँटिथ कति वसन तालवु टंग।' नेचिव्य
वोनुनस, 'मोज! च्य वन कोत गछु मोजूर्य मशकत करनि?' स्व वँछुस, 'हु क्या बादशाह
साँबनिस महल खानस अंदर हय छि वारियाह लुख मोजूर्य मशकत करान। च्चे ति कर तु
तँती मोजूरि दूहा दूहा। द्यव काँसि पेयि नु अथु दारुन।' यि बूजिथ द्राव सु ग्वंदुर बादशाह
सुंदिस महल खानस कुन। तति वँरुन बादशाह सुंदन अहलकारन निश स्यठाह ज़ॉरी।
तिमन आव आर तु थोवुख मोजूरन सुत्य सु ति। कँह दूह गँछिथ गव बादशाहस शिकार
करनुक शोक तु द्राव पनुन्य कँह अहलकार, अँमीर, वँजीर तु नोकर चाकर ह्यथ रूस
शिकार करनि। नोकरन चाकरन मंज ओस यि ग्वंदुर ति। जंगलस अंदर अँचिथुय पेयि
बादशाहस अँकिस रूस्य कचि प्यठ नज़र। यकदम आव रूस्य कचि च्रववापॉर्य गेरु
त्रावनु। अमा बादशाहस वरॉय ओस नु काँसि ति रूस्य कँट निशानु बनावनि नेरुन।
बादशाहन द्युत होकुम जि यसुंदि तरफु निशानु खता सपदनु किन्य रूस्य कँट च्रलि, तस
यियि सज़ा दिनु। क्वदरतुक कार, तीरुक निशानु खता सपदनु पतु च्रँज रूस्य कँट
बादशाह सुंदे अंदु। बादशाह सुंदि फरमानु मुताँबिक ओस सज़ा तँस्य प्रावुन। अमा पानसुय
वशफु सपदनु किन्य त्रोव बादशाहन पनुन गुर रूस्य कचि पतय। यि मोजूर वँन्यतोस या
बादशाह ज़ाद, ति द्राव बादशाह साँबस सुती गुरिस प्यठ। यिम दूश्वय छि गुर्यन प्यठ सवार
रूस्य कचि शिकार करनु म्वखु अकि जंगलु नेरान तु दोयिमिस अचान। अँथ्य अंदर सपुज

राथ । येमि किन्य बादशाह तु तसुंद नेचुव जंगलु मंजु वापस नीरिथ कालु कालय राजदानि वॉतिथ हेक्य नु ।

लाचार गॅछिथ प्यव यिमन जंगलसुय अंदर राथ गुज़ारनु खॉतरु रोजुन । जंगली जानवरव निशि बचावु खॉतरु ज़ोल यिमव नारु अलावाह । अमि विज़ि ऑस बादशाहस ब्वछि सुत्य वुनु वॅछमुच । अमा कांह ख्यनु चनु सामानु ति ओसुस नु सुत्य । मगर येमिस ग्वंदरस आसु सुबह वक्तु पनुनि माजि च्वचि अख ज़ु दजि अंदर गॅडिथ सुत्य दिचुमचु । बादशाह सुंज ब्वछि वुछिथ मुचरॉव अॅम्य दॅज तु थाव्यन यिमु च्वचि बादशाहस ब्रॉठु कनि । तस खॅच यि वुछिथ वॉलिंज बोठ । आंफरि थांपरि लोग ह्वछय च्वचि खेनि । मोजूरन ति खेयि च्वचि हना अख तु बादशाह वोथुस, 'यिमु चानि च्वचि ख्यथ आव मे लुतुफ, युथ मे पनुनि बादशाह बायि हुंदि अथु बनावनु आमुचन च्वचन ओस यिवान । खबर कथ जायि आसि बिचॉर ? दय ज़ानान हाल क्याह आस्यस ?' राथ जंगलस अंदर गुज़ारनु पतु वॉत्य यिम दोयिमि दूह राज़ महल तु अति छु बादशाह अॅमिस मोजूरस वनान, 'योदवय च्चु मे सुत्य नेरहख नु, कोठ सुंद ज़िंदु रोजुन ओस ना मुमकिन । बु कति ह्यकय च्चे हूरिथ ? च्चु यि केंछा ति वुन्यक्यनस मंगख, ख्वदा गवाह, ति यियि पूर करनु ।' तॅम्य द्युतुस तोरु जवाब, 'जहां पनाह ! मे यि केंछा कोर, तुहुंद हक नमक आसनु किन्य ओस ति म्योन फर्ज । यि फर्ज पूर करनस अंदर अगर कोठ सुंद जुव ति गछिहे, कोठ बरिहे नु वाय । लिहाज़ा क्याह मंगु बु ?' बादशाह वोथुस, 'न न, च्चे छुय लाबूदी तोर केंह नतु केंह मंगुन । अमि सुत्य सपदि मे दिलस करार ।' मोजूरन कोरुस अर्ज, 'जहां पनाह ! अज़ रातस दीवुम मोहलथ । पगाह करु बु पनुन्य खॉहिश ज़ॉहिर ।'

गरु वॉतिथ कोर मोजूरन यि सोरुय कुसु पनुनि माजि निश बयान । स्व वॅछुस, 'येलि पगाह बादशाह सलामतु सुंदिस दरबारस मंजु वातख, अर्ज वॅर्यज्यस ज़ि सतन दूहन करुम पनुन राज ताज हवालु तु मंगुनॉव्यजि प्रॉन्य कागज़ात । तिमन अंदर आसि खर टांगि हुंद कुसु वोल कागज़ ति । तथ कुसस सॅनिथ अनुनॉव्यज्यन रोंदु वोल तु स्व सियाह सर बुलॉविथ ख्वसु बादशाहन पनुनि महलु खानु मंजु वॅडिथ ऑस छुनिमुच । तु तथ न्यायस दिज़ि फॉसलु ।' दोयिमि दूह आव यि नव जवान दरबारस अंदर तलब करनु तु वननु आस, जल जल कर पनुन्य खॉहिश ज़ॉहिर । मोजूर वोथुस, 'बादशाह सलामत ! जान बख्शी गछ्यम करुन्य । हज़ूरन अगर ना गवार गछि नु, तेलि वॅर्यतव मे सतन दूहन हुंदि खॉतरु पनुन राज ताज हवालु ।' बादशाहन ओस वादु द्युतमुत । लिहाज़ा लोगुस नु पनुन राज ताज तु तख्त तस हवालु करनस मंजु कांह चारु । बादशाह वोथ तख्तु प्यठु ब्वन

तु मौज़ूरस आव कलस प्यठ ताज थावनु तु खोत सु तख्तस प्यठ। माजि हुंदिस वनुनस प्यठ मंगुनॉव्य तॅम्य प्रॉन्य कागज़ात तु लोग तिमनुय फ्युर फ्युर दिनि। यिमवुय कागज़व अँदर कोडुन रोंदु वॉल्य सुंद बयान। लुख ऑस्य यि तमाशु वुछनि जमह गॉमुत्य। तिमनुय मंज़ ऑस अँम्यसुंज़ मोज तु बुड ति मूजुद। तख्तस प्यठ बिहिथ मौज़ूर बादशाहन द्युत होकुम जि महलु खानुक रोंदु वोल अँन्यून हमी दमु बुलॉविथ। बेयि अँन्यतोन बादशाह सुंज़ स्व ज़नानु ख्वसु शर्त हारनमस प्यठ खत दिथ बादशाँही महल मंज़ कडनु ऑस आमुत्र। रोंदु वोल आव अमे वक्तु दरबारस मंज़ पेश करनु, अमा बादशाह सुंज़ि आशनि मुतलिक आव वनुनु जि तमि त्राव्योव तमे दूह यि शहर तु दय ज़ानान आसि कति? मगर बुड मोज वॅछ यकदम थोद तु वोनुन, 'बादशाह सलामत! स्व छे येथ्य मजमुअस मंज़ मूजुद।' तस आव वनुनु जि अँन्यून बादशाहस ब्रॉह कुन। तामथ वॅछ अँम्यसुंज़ मोज थोद तु सपुज़ पेशे बादशाह। सु गव पनुनी मोज वुछिथ हॉरान। दोपुन, 'बारे इल्लाहा! यि क्याह छुस वुछान?' पनुन्य हवास बजा थावनु पतु वोथ बादशाह पनुनि माजि कुन तु वोनुनस जि 'त्रे सुत्य क्याह जुल्म छु सपुदमुत, तु कथ प्यठ आयख खत दिथ कडनु?'

पनुन हाल बयान करान वॅछ बादशाह बाय जि 'बु ऑसुस बादशाह सलामत सुंज़ आशेन्य। अज़ ब्रॉह सदाह अर्दाह वॅरी आयस अख शर्त हारनस प्यठ कॅडिथ छुननु। तोह्य अनुनॉव्यतोन महल खनुक रोंदु दिनु वोल तु तस पृछ्यतव फलॉन्य दूह अड राथ गॅछिथ ख्वसु टांग महल खानु नेबुर्य किन्य गॅयि, स्व कॅहँज़ ऑस?' तसुंदि अमि बयानु पतु आव रोंदु वोल व्वदनी करनु। बादशाहन दोपुस, 'ऐ रोंदु वालि! कुसु क्याह ओस येमिच त्रे खबर छय?' सु वोथ दर जवाब, 'बादशाहम! स्व ऑस दर अस्ल खर टांग।' बादशाह वोथुस, 'अगर खर टांग ऑस, त्रे क्याज़ि द्युतुथ तमि विज़ि बयान जि स्व ऑस सीमनि टांग।' रोंदु वोल वोथ खूच्य खूच्य, 'जान बख्शी गछ्यम करुन्य। बु द्यावनोवुस दर अस्ल बादशाह बायी अपुज़ तु गलत बयान।' तस आव दुबारु सवाल करनु, 'तथ क्या वजह छु?' 'ति पृछ्य तव बादशाह बायि', रोंदु वॉल्य वोन तोर। यि बूज़िथ आयि बादशाह बाय पेश करनु। तमि वोन, 'ठीक छु, मे द्यावनोव रोंदु वोल गलत बयान। तथ छु वजह यि जि तमि वख्तु ओस नु बादशाह सलामत साहिबे औलाद बन्योमुत। अगर रोंदु वोल पोज़ वनिहे, तथ सूरतस मंज़ ओस बादशाहस शर्तु मुतॉबिक राज ताज तु तख्तु निशि दस्तु बर्दार सपदुन। अमि तॅरीकु नेरिहे हकूमत बादशाह सुंद्यव अथव मंज़ तु गछिहे व्वपर अथन मंज़। लिहाज़ा ज़ोन कोठि यि मुनॉसिब जि अगर म्यानि अपुज़ मपुज़ शर्त हारनु तु रोंदु वॉल्य सुंदि गलत बयॉनी सुत्य बादशाह सलामतु सुंद ताज तख्त बचि, हकूमत रोज़ि व्वपर अथन मंज़ गछनु

निशि महफूज़।' अँम्य सुंद खानुदार बादशाह वोथ थोद तु कोरुन बयान जि 'बु छुस नु वुन्यक्यन ति साहिबे औलाद। अज़ अगर हकूमथ अथु मंज़ु गछि, तोति वाति व्वपर अथन मंज़।' बादशाह बाय वँछ, 'हरगिज़ नु। वुन्यक्यन छु बादशाह सलामत ख्वदायस हवालु साहिबे औलाद।' बादशाह वोथुस, 'अथ कथि क्याह सबूत छु?' वापस फीरिथ द्युतनस तमि जवाब, 'अथ छुख च़ु सबूत युस येमिस बुजि माजि हुंज़ि पहरि मंज़ खत दिनु पतु बराबर नँव्यमि र्यतु थनु प्यव। अथ वक्तस दोरान यिम सितम तु द्वख दौँद्य मे तुल्य, तिम ज़ानु बु तु म्योन ख्वदा।' यि दासतान बूज़िथ वोथ असली बादशाह थोद तु सरे आम हेच़ुन पनुनि आशनि मॉफी तु तख्तस प्यठ नेचुव बादशाह रोदुन नालु मति तु ताज तख्त कोरुन तँस्य हवालु तु पानु लोग यादे ख्वदा करनि।

★ ★ ★

काँशिरि लूकु कथु

Source: 'käshíri lùkû kathû' (Vol: 4) in Persio-Kashmiri Script,
compiled by Nishat Ansari.

Published by: Jammu & Kashmir Academy of Art, Culture & Languages in 1988.

Rewritten in Devanagari-Kashmiri Script by M.K.Raina

Work Started: **10 November 2005.**

Work Completed: **02 February 2006 ~ Updated 29.03.2020**
